


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

Contents

SAN MATEO	1
SAN MARCOS	51
SAN LUCAS	82
SAN JUAN	135
LOS HECHOS	174
ROMANOS	221
1 CORINTIOS	241
2 CORINTIOS	262
GALATAS	275
EFESIOS	282
FILIPENSES	289
COLOSENSES	294
1 TESALONICENSES	299
2 TESALONICENSES	303
1 TIMOTEO	306
2 TIMOTEO	312
TITO	316
FILEMÓN	319
HEBREOS	321
SANTIAGO	336
1 SAN PEDRO	341
2 SAN PEDRO	347
1 SAN JUAN	351
2 SAN JUAN	356
3 SAN JUAN	357
SAN JUDAS	358
APOCALIPSIS	360

MATEO REMBICUACHIA JESUS RECOUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴ Aram rahir Aminadab, Aminadab rahir Naasón, Naasón rahir evocoyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acáz, Acáz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús si secoi. Ahe imembrí Tūpa Rembiporavo Poropisrosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropisrosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiēhi viteseve rumo, Espiritu Santo pīratasa pipe imembí. ¹⁹ Evocoyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰ Aipo opihañemoñeta reseve oque. Iquerve rumo, Tūpa rembiguai oyemboyecua chupe aipo ehi: “José, David suindar, eresiquiyei rene María rese nde menda āgua. Esepia, Espiritu Santo sui ou imembrí. ²¹ María virecose omembrí, pemondora sererguā Jesús. Esepia, ahe oipisrora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³ “Cuña ndaseco marai vahe imembrí. Ahe imembrí rer-ra Emanuel” ehi

(“Tūpa yande rese ité secoi’ oya aipo ehi).

²⁴ Omahese José, Tūpa rembiguai oyeupe ñehe agüer omboyeroya ité. Ichui omenda María rese cute. ²⁵ Ndo yapo vitei eté rumo mbahe oyese yuvireco. Yipindar imembrí rane ité, ahese José omondo Jesús sererguā.

2

Ava yasitata rese oyembohe vahe arí sēsa cotindar yuviraso pītani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei ãgua —ehi yuvireco chupe.

³ Aipo ihese, mborerecuar Herodes oyembosiquiye tēi, ava Jerusalén pendar avei ěgüe ehi pãve yuvireco. ⁴ Iyavei cūríteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropĩsĩrosar? —ehi.

⁵ Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tũpa ñehe mombehusar Miqueas rembicuachiagüer pĩpe aipo ehi:

⁶ ‘Pe, tecua mini Belén pĩpendar, ndahei ivi coti tēi vahe ambuae tecua Judá pĩpendar sui peico.

Esepia, pe sui osēra mborerecuar che recua iguar Israel yocuai ãgua’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pĩpe ité vo pesepia ramo aipo yasitata?” ehi.

⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pĩtani. Acoi peyosuse, co rupi avei peyevi cheu icua uca ãgua. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pĩpeve yasitata oyemboyecua iri senonera. Ichui pĩtani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oi pĩpe, osepia pĩtani ichi María reseve yuvireco. Ichui oñenopiha sovai imboeteisa pĩpe. Ipare opõhe ombahe rĩru pĩpe yuvireco oicuvãhe vaherã oporerecosa sepĩrusu vahe oro, itaisi, ambuae mbahe sãcua vahe mirra serer vahe avei. ¹² Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tũpa aipo omombehu iquerve chupe ambuae perĩ rupi iyeve ãgua.

Jesús pĩtani seroñemisa Egipto ve

¹³ Aipo ava yepepi pare, José upe oyemboyecua Tũpa rembiguai iquerve, aipo ehi chupe: “Eñarapuha, eroñemi pĩtani ichi reseve eraso Egipto ve. Aheve erepĩtara acoi che amombehuse voi nde yevi ãgua. Esepia, mborerecuar Herodes osecara pĩtani yuca ãgua oico” ehi chupe.

¹⁴ Ahe pĩtu pĩpeve voi José vĩraso pĩtani ichi reseve Egipto ve. ¹⁵ Aheve yuvirecoi co mborerecuar Herodes mano rãro. Co rupi imboaviyesa Tũpa ñehe mombehusar remimombehugüer: “Egipto sui anose che Rahĩr” ehi vahe.

Herodes oyuca uca chĩhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chĩhivahe cuimbahemi yuvireco opacatu ñuvirío aravĩter ovĩreco vahe, chĩhivahemi catu vahe avei, ahe tecua ivĩrindar pĩpe avei no” ehi. Esepia, omoñetase yasitata rese oyembohe vahe yuvireco, oicua ahe aravĩter opa cūrítei. ¹⁷ ěgüe ehi yaviye Tũpa ñehe mombehusar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembĩreta manose; ndoyemboviha catui eté ipĩpe” ehi.

¹⁹ Mborerecuar Herodes manore, Egipto ve José upe oñehe iri Tũpa rembiguai iquerve aipo ehi: ²⁰ “Eñarapuha, eroyevĩ pĩtani ichĩ reseve Israel recuave. Esepia, opa omano pĩtani yuca potasar yuvireco” ehi.

²¹ Aipo oyeupe hese, oñarapuha, viroyevĩ pĩtani ichĩ reseve Israel recuave. ²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso ãgua. Coiyemi tẽi iquerve Tũpa, “Peso Galilea ivi rese” ehi chupe. Ichui yuviraso tecua Nazaret ve. Aheve opĩta yuvireco cute. Ëgũe ehi yaviye Tũpa ñehe mombehugar remimombehugũer: “ ‘Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirẽhisa rupi secoi

¹ Ipare Juan Oporoãpiramo vahe Tũpa recocuer rese oñehe oico Judea ivi rupi ava yemboerecuãhisave ² aipo ehi: “ĩPemboasi pe angaipa; peyevĩ Tũpa upe! Esepia, co Tũpa mborerecuasa cõimi secoi yandeu” ehi.

³ Co Juan rese niha oñehe yipive Tũpa ñehe mombehugar Isaías aipo ehi gũembicuachiagũer pipe:

“Oyeendu ñehesa ava yemboerecuãhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragũer apopri, sumbicuasa mbahe pিরer, sembihu evocoyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso ñehe rendu ⁶ oangaipagũer mombehu ãgua. Ahese Juan oñapiramo iai Jordán pipe.

⁷ Yugũeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “ĩPe mboi mboetasa tẽi peico! ¿Ava vo, ‘Pesẽra Tũpa ñemoirosa ou vaheĩ sui’ ehi tupri tẽi pẽu? ⁸ Yipindar toyecua tupri rane Tũpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tẽi pe ñepisiro ãgua. Esepia, Tũpa oĩcatuño ité co ita sui Abraham suindar nungar tupri apo ãgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia ãgua. Ichui yasia pare imondosa tatave. ¹¹ Che ipipe tẽi opoãpiramo Tũpa upe pe yevi ãgua. Oura rumo ambuae che raquicuei, ahe pe ãpiramora Espĩritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora ãgua ichui. ¹² Ahe oipehara mbahe rãhi ihigũer sui. Sãhi evocoyase oyapocatura, ihigũer rumo omondora tata apirẽhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? — ehi.

¹⁵ —Ëgũe tehiño aipo. Iyacatu yayapora Tũpa porocuita —ehi Juan upe.

Evocoyase Juan, “Aviye” ehi chupe. ¹⁶ Oãpiramo pare, osẽ ive sui. Ahe pipeve voi iva oyemboi tupri, aheseve avei osepia Tũpa Espĩritu ogũeyise ou iharive apicasu nungar. ¹⁷ Iyavei oyeendu ñehesa iva suindar aipo ehi vahe: “Co che Rahĩr, che rembiaisu. Sese aviharete vichico” ehi.

4

Jesús recoãhasa

¹ Ipare Tũpa Espĩritu viraso Jesús ava yemboerecuãhisave ‘tosecoãha Caruguar’ ohesa pipe.

² Aheve cuarenta ari, cuarenta p̄itu ndocarui. Sese ndasiepoi eté oico. ³ Evocoiyase oyemboya Carugar sese secoãha ãgua, aipo ehi chupe:

—Tūpa Rahir ité nde recose, co ita sui eyapo pan cūrītei —ehi.

⁴ Jesús rumo omboyev̄i chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tūpa Ñehengagüer reroya pipe ava yuvirecovera yepi’ ehi —ehiño chupe.

⁵ Ichui Carugar v̄iraso Jesús Jerusalén maranehi pipendar tūparo torre apiterve.

⁶ Aheve aipo ehi chupe:

—Tūpa Rahir ité nde recose, eviapi cohove sui. Esepia niha, icuachiapri pipe:

‘Tūpa oyocuirā güembigui eta nde rãro ãgua.

Ahe nde mopuhara yuvireco que ñepe ita nde momara rãgüer sui’ ehi —ehi Carugar chupe.

⁷ Evocoiyase omboyev̄i Carugar upe:

—Icuachiapri pipe rumo aipo ehi avei no: ‘Ndereseoãhai chira nde Yar Tūpa’ ehi —ehi chupe.

⁸ Ipare Carugar v̄iraso iri iv̄itri ivate vahe apiterve secoãha ãgua. Aheve aipo opacatu iv̄i pipendar, tecua guasu pipendar mbahe porañete vahe yemboivate aisa omboyecua chupe, ⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

¹⁰ Aipo oyeupe hese:

—Eyepepi che sui cūrītei, Carugar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

¹¹ Ahese Carugar oyepepi ichui. Ipare Tūpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea iv̄i rese Nazaret ve. ¹³ Ndopitai rumo aheve. Osoño Capernaum ve, aheve opita. Ahe tecua ipa Galilea iv̄i, iv̄i Zabulón iyavei Neftalí rupi avei. ¹⁴ Na ehi yaviye Tūpa ñehe mombehusar Isaias rembicuachiagüer aipo ehi vahe aracahe:

¹⁵ “Co ava iv̄i Zabulón pendar, Neftalí pendar,

para guasu iv̄irindar, ïai Jordán rovaïndar iyavei Galilea pipendar ndahei vahe judío,

¹⁶ ahe av̄iye p̄itumimisave yuvirecoi vahe,

osepia ramo vahe tesapesa yuvireco; iyavei mano rãgüer pipe yuvirecoi vahe upe avei av̄iye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyev̄i Tūpa upe. Esepia, cõimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea iv̄i oguatase, Jesús osepia mb̄ia Simón Pedro serer vahe tiv̄ri Andrés reseve. Ahe pira omboha yuvireco. ¹⁹ Evocoiyase:

—Pe pira recasar peico. Perio che rupi. Na peye aveira ava reca ãgua cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mb̄ia Santiago tiv̄ri Juan reseve, ahe oguapi yuvinoi carite pipe oyesupa Zebedeo p̄iri; omoingatu opira mbohasa yuvinoi. ²² “Perio che rupi” he ramoseve, opaño oporav̄iquisa sui opoi yuvireco, oseyañe oyesupa, yuviraso supi.

Jesús ombohe ava rehii

²³ Jesús evocoyase oguata opacatu Galilea ivi rupi, judío tũparo yacatu rupi oporombohe oico. Aheve ñehesa aviye vahe omombehu Tũpa mborerecuasa resendar. Oporombogũera avei opacatu-catu tẽi mbaherasisa ava vireco vahe sui. ²⁴ Oyepotase rumo serãcua opacatu Siria ivi rupindar upe, ahese gũeru opacatu iparaisu vahe yuvireco chupe: imbaheasi vahe, carugar vireco vahe, que nañaca põrai vahe iyavei ndoguatai vahe. Ahe opa tupri ombogũera.

²⁵ Ëgũe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, ñai Jordán rovaindar avei no.

5*Jesús oporombohe ivitri*

¹ Ñepeí ari pipe, ava rehii repiase, Jesús oyeupi ivitri rese. Aheve oguapi oĩ. Ahese semimbohe oyemboya yuvireco sese. ² Ichui omboipi imbohe aipo ehi:

³ “Sorivete catura acoi ava oicuase mbahe ipane vahe Tũpa rese ité güeco tupri ãgua. Esepia niha, chupe nara ité Tũpa mborerecuasa.

⁴ “Sorivete catura acoi ava oyaseho vahe oviharẽhisa pipe. Esepia niha, Tũpa omboura viharetesa chupe coiye.

⁵ “Sorivete catura ndaseco asimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catupriisa Tũpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tũpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepiara Tũpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tũpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tũpa mborerecuasa.

¹¹ “Perorivete catura pe acoi ava iñehe-ñehe tẽise pẽu, iyavei pe mombaraisuse, acoi oyapo-yapo tẽise güemira-mira tẽi pipe mbahe pe rese che recocuer sui tẽi yuvireco. ¹² Pe rumo peyembovihanora. Esepia, ivave tuvichá vahe porerecosa peipisira curi. Ëgũe ehi avei niha yipindar evocoi ava ramoi Tũpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri ãgua, ndiporusai chietera; imombopasara ava pirunga ãgua yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi ãgua. ¹⁵ Iyavei ndayamoendi chira tataendi mbahevri tẽi. Iyacatu rumo yasupi ivate sendave opacatu oi pipendar ava resape ãgua. ¹⁶ Pe Ëgũe peye aveira pemboyecua ava eta upe pe recocuer aviye vahe. Ipipe sui tomboetei yande Ru Tũpa ña pendar yuvireco” ehi ava rehii upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tũpa ñehe mombehusar rembicuachía mboyeroyaẽhi ãgua iyavei Moisés porocuita cuachiapri mboyeroyaẽhi ãgua avei no’ peye tẽi cheu. Ëgũe ehi rumo che ayu imboaviye ãgua. ¹⁸ Supi eté co ñva, ivi avei yandeu oime vitemiseve, ndipoi chietera que ñepeí yepe Moisés porocuita, que ambuae Tũpa

ñehe mombehusar rembicuachiagüer ocañi tēi vaherã; ñepei-pe porocuita imombe-hupri imboaviyesaño itera. ¹⁹ Sese acoi ava ndoviroyai vahe que ñepei mborocuitamira viña, ombohe avei ava seroyaēhi āgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborecuasave curi. ²⁰ Iyavei amombehu pēu: acoi pe reco ivi tupriśa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroēhi āgua rese

²¹ “Pe peicua acoi pe ramoī aracahendar upe aipo ehi vahe: ‘Peporoyucaī rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi. ²² Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ēgüe ere tēi vahe eico’ ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroīrosave ambuae ava upe, ahe iyacatu imondosa ité tata guasuve.

²³ “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, ²⁴ peseya rane pe porerecosa aheve; peyevi rane pe amotarēhimbar upe pēu iñero āgua rese. Acoi peñerose oyeupe, ahese voi peyevi, tapeicuvēhe pe porerecosa Tūpa upe.

²⁵ “Iyavei peyeamotarēhise, peñero voi oyeupe peyoepiase. Anise, avieteramo coiye catu tēise pe mombehu tēira pe amotarēhimbar mborerecuar upe pe reraso āgua. Ichui avieteramo ahe pe roquenda ucara. ²⁶ Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi āgua rese

²⁷ “Peicua niha Moisés porocuita yipindar: ‘Peaguasai rene ambuae ava rembireco rese’ ehi vahe. ²⁸ Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

²⁹ “Iyavei inungar que pe resa pe acato cotindar oipota rai ucase mbahe pēu pe mboangaipa āgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. ³⁰ Iyavei inungar que pe po pe acato cotindar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi āgua rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pēu: ava opoise güembireco sui, cuña ndoyaviise mbahe, ahese ombopihañemoñeta tiētera güembireco mboaguasa uca āgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi āgua rese

³³ “Iyavei peicua acoi aipo ehi vahe pe ramoī upe aracahe: ‘Pemboaviye itera pemoiñgatu tuprise Tūpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda; ³⁵ ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶ Pe āca rer pipe avei ndapeñehei chira. Esepia, ndapeicatui chira que ñepei pe ha

momorochi ãgua, imou ãgua avei. ³⁷ Sese niha peñehese, ñepeí reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyevīēhi ãgua

³⁸ “Peicua acoi Moisés porocuita aracahendar aipo ehi vahe: ‘Que ava vīnose vahe ambuae ava resa ichui, ahe sesa avei senosesara. Iyavei vīnose vahe sãi ichui, sãi avei senosesara’ ehi vahe. ³⁹ Che rumo aipo ahe pēu: Aní chira pemboyevī pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. ⁴⁰ Porandusave pe rerasose pe camisa rerocua ãgua yuvireco pe sui, pe saco avei pemondoñora chupe. ⁴¹ ‘Ñepeí legua rupi evosi co mbahe rese cheu’ ehise que ava pēu, pe rumo perasoñora ñuvirío legua rupi chupe. ⁴² Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese” ehi.

Pesaisu pe amotarēhimbar

⁴³ “Iyavei pesendu ñehesa yipīndar: ‘Pesepia potai rene pe amotarēhimbar, pe mboripar güeraño pesaisu’ ehi vahe. ⁴⁴ Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese. ⁴⁵ Evocoi nungar apo pipe pe Ru Tūpa íva pendar rahir ité peicora. Ahe niha osesape uca arí ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶ Pe raisupar güeraño pesaisu catu tēise, ndapeipisi chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. ⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. ⁴⁸ Sese pe recocuer perecora pe Ru Tūpa íva pendar seco catupri vahe nungar” ehi.

6

Jesús oporombohe mbahe aviye vahe apo ãgua rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ēgüe peyese, ndapeipisi chietera pe Ru Tūpa íva pendar porerecosa. ² Evocoiyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbī omoñehe yuvireco ‘Co ava aviye ité yuvirecoi, tehí angahu yuvireco yandeu’ oya tēi. Supi eté aipo ahe pēu: Ēgüe ehi vahe rumo opa voi oipisi porerecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure ãgua rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyeroqui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ēgüe ehi vahe opa voi eté co ivi pipeve tēi oipisi porerecosa yuvireco. ⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui ãgua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevī-yevī chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevī-yevī oyeruresa ‘Tūpa revo co rupi yande mboyeroya voira’ ohesave yuvireco viña. ⁸ Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu. ⁹ Sese aipo peyera peyeroqui:

‘Ore Ru Tūpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihi ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarëhimbar upe.

¹³ Ore mboangaipa ucai rene eve; eipeha mbahe naporai vahe ore sui' peyera.

¹⁴ “Esepia, pe amotarëhimbar upe peñerose, pe Ru iva pendar avei iñerora pëu;

¹⁵ ndapeñeroise rumo, ahe avei niñeroi chietera pëu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyecuai chira pe vïharëhisa, inungar acoi Tüpa reroyasar angahu tõi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tõi. Supi eté aipo ahe pëu: Ëgüe ehi vahe opa voi oipisi porerecosa ava güepia pipe tõi yuvireco. ¹⁷ Pe rumo peyecuacuse, peñeaca mondoro tupri, peyovai tupri aveira. ¹⁸ Evocoyase, ‘Co oyecuacu vahe’ ndehi chira ava yuvireco pëu. Pe Ru Tüpa, ndayasepia vahe, güeraño oicuaru pe yecuacusa. Ahe evocoyase iporerecora pe rese curi” ehi.

Mbahe porañeté vahe oime ivave

¹⁹ “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoï omboaso ati-ati imocañipa, iyavei sãve-sãve tõi opochi ati-ati oapocatusave, imonda vahe avei evocoyase imondaño sese pëu. ²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi ägua. ²¹ Esepia, pe mbahe pe rembiereco setá catu vahesa rupi-rupi pe pïhañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

²² “Iyavei yande resa inungar tataendi yande retecuer upe. Evocoyase yande resa aviyesa, opacatu yande retecuer upe osesape; ²³ acoi imarase rumo, opacatu yande retecuer pïtumimbisave tõi secoi. Tesapesa oime vahe yande rese, ahe ogüese rumo yande sui, mbahe tõi eté, pïtumimbi nungar opacatu yande recocuer upe” ehi.

Guarepochi pota raisa; Tüpa mboyeroyaëhisa

²⁴ “Iyavei ndipoi chietera que ava ñuvirío güerecuar omboyeroya vahe. Esepia, ñepeï oyamotarëhira imboyeroya potaëhisa pipe, ambuae evocoyase osaisu catura imboyeroysa pipe. Ëgüe peye avei, ndapeicatui Tüpa mboyeroya guarepochi pota raisa pipe” ehi.

Tüpa osãro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove ägua, pe ihu ägua rese, pe turucuarã rese tõi avei no. Esepia, yande recovesa aviye catu vahe tembihi sui, yande retecuer avei aviye catu turucuar sui no. ²⁶ Pesepia vïrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tüpa iva pendar ité niha omoime mbahe itohu. ¡Pe rumo ivate catu vahe ité peico vïrai sui! ²⁷ Ndipoi que ñepeï pe pãhu pendar oicatu vahe opïhañemoñetasa pipe tõi güecocuer mopucu iri ägua.

²⁸ “Ndahei chira pe turucuarã rese tõi peyemomahenduha guasu ai. Pemahecua ru mbahe potri caha pipendar rese: ndoporaviqui eté iyavei ndoipiai oturucuarã. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catupri güer rumo ndahoyoyai mbahe potri catupri güer rese. ³⁰ Tüpa niha omboporañete raimi tõi mbahe potri caha pipendar, moviro ari tõi yasepia, ichui sapisapaño horno pipe. ¡Ahe rumo omondo catura turucuar pëu, pe ava nimbahe reroya tupri vahe! ³¹ Sese, ‘¿Mbahe pïha yahura, yaïhura?’ Iyavei, ¿mbahe pïha yamondera?’

ndapeyei chira pe yemomahenduha guasu aisa pipe. ³² Ava Tūpa reroyasarēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe. ³³ Pemahenduha rane Tūpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. ³⁴ Peyemomahenduha guasa ai eme mbahe peyapo vaherā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaherā yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira pēu. ² Esepia, inungar pe ambuae ava upe peico, ēgüe ehi aveira niha Tūpa pēu. ³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! ⁴ Ndiyai pēu, ‘Che toropitiví mbahe nde rembiaví rese’ peye vaherā chupe. Esepia, ¡pe peyavi guasu catu mbahe ichui! ⁵ ¡Pe Tūpa reroyasar angahu tēi peico vahe! Penose uca rane mbahe pe rembiaví tuvichá catu vahe peyesui, ahese ramo ambuae ava rembiaví tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondo chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu. ⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepeí pe pāhu pendar omondo vaherā ita tēi guahir upe pan rese oyeupe poranduse. ¹⁰ Que pira rese oyeupe poranduse revo, ndomondo chiaveira mboi tēi chupe. ¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaherā pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; ¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coiye yugüerura ava Tūpa Ñehengagüer mombehusar angahu tēi pe pāhuve. Ahe ndoyavi chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. ¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. ¹⁷ Evocoyase ivira aviye vahe, iha aviye avei; ivira naporai vahe, iha naporai avei no. ¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. ¹⁹ Sese opacatu ivira iha naporai vahe yasiasa yepi. Ichui imondosapa tatave. ²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisa pipe omopuha vahe ivi cuhi harive tēi güetarã. ²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Ñehe renduse ava rehii, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūritei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavēhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ēgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūritei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique āgua; iyacatu niha cohapeve ereñeheño tēi icuera āgua. Evocoyase nde ñehe pipe tēi che remimboacua ocuerara.

⁹ Esepia, che niha serecuva vahe avei no, areco avei sundao che voya. Ahe chupe, “Eso peve” ahese, cūritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:
—Eso, nde mbahe reroya pipe yaposa nde remimbotar ndeu —ehi.
Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco āgua.

Jesús ombogüera setá ava imbaheasi vahe

¹⁶ Ipare pītu ramose setá caruguar vireco vahe ogüeru yuvireco chupe. Jesús rumo ñepeí reseve oñehe pipe tēi omombopa caruguar ava rehii sui, iyavei opacatu imbaheasi vahe ombogüera avei no. ¹⁷ Ēgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae vīrocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so āgua” ehi. ¹⁹ Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyevi chupe:

—Yavaira rumo ndeu. Esepia, vīrai vireco guaiti, iyavei aguara vireco oquesa; che rumo, Ava Riquehīr, ndarecoi que che rēta ité che pītuhu āgua yepi —ehi.

²¹ Ipare ñepeí ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cūrītei voi eyu che rupi —ehi—. Ēgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuviraso carite pipe. ²⁴ Ipa pipe yuviraso pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayī eté, seni-seni carite oyopi. ²⁵ Evocoyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande pīsiro eve! —ehi yuvireco chupe.

²⁶ Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepītuhupa” ehi. Aheseve voi opa tupri opituhu yuvireco.

²⁷ —¿Mara ehi rutei pīha co? —ehi tēi semimbohe yuvireco chupe—. ¿Mara ehi vahe pīha co ava secoi?

Esepia niha, ivitu, para guasu avei omboyeroya yuvireco no —ehi.

Jesús omboyepepīpa caruguar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava caruguar vireco vahe yugüeru sovaīchi. Ahe ava tehögüer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi. ²⁹ Jesús repia ramoseve rumo, oñehe pīrata yuvireco chupe aipo ehi:

—¡Jesús, Tūpa Rahīr, eyepēpi ore sui! Esepia niha, ndoyepota vitei ari nde ore mombaraīsu āgua oreu —ehi tēi yuvireco.

³⁰ Namombriimi cuchi rehii yuvirecoi ichui. ³¹ Caruguar evocoyase aipo ehi yuvireco chupe:

—Ore mombopaño tēi eve evocoi cuchí rese —ehi.

³²—Aviye, peso —ehi carugareta upe.

Aipo hese, carugar opa yuvínose ava sui, yuvíroique cuchí rehí avítérve. Ipare rumo cuchí ndayaracua iri yuvíreco; iví socuer rupí yuvínoña yuvíraso, opa ipa pípe ocañi tēi yuvíreco.

³³ Yuvínoña evocoyase cuchí rārosar tecuave yuvíraso opacatu mbahe güembiepia mombehu ava upe yuvíreco. ³⁴ Ichui opacatu ava tecua pendar yuvínose atí Jesús upe, “¡Eso cohavé sui!” ehi yuvíreco chupe.

9

Jesús ombogüera ava ndoguatai vahe

¹ Ipare Jesús oha carite pípe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe ríru pípe yuvíreco chupe. Ahe oicuase co ava yuvírecoi vahe oyese yeroya, aipo ehi imbaheasi vahe upe:

—Che rahír, eyemopóase, che ñero nde angaipa rese ndeu —ehi.

³ “¡Co mbia oyemboivate ai tēi vahe, Tūpa ñehe nungar pípe tēi oñehel!” ehi Moisés porocuita rese oporombohe vahe yuvíreco chupe. ⁴ Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapísacasa rereco! ⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie? ⁶ Tapeicua ru che, Ava Ríquehír, areco mborerecuasa co iví pípe ava angaipa upe che ñero água —ehi.

Evocoyase aipo ehi imbaheasi vahe upe:

—Epñha, esupí nde rupa seraso nde rētave —ehi.

⁷ Ahese opñha voi, oso güētave. ⁸ “¡Too! ¿Mara ehi rutei vo?” ehi ava rehí yuvíreco imboetisave. “Esepia, ahe niha ombou opíratasa ava upe” ehi yuvíreco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuar guasu upe guarepochi rerocuasa mesave che rēise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰ Ahe arí pípeve Jesús güemimbohe reseve yuvíroique che rētave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvírecoi vahe reseve avei. ¹¹ Co nungar repiase, fariseo oporandu semimbohe upe yuvíreco:

—¿Mahera ru pe mbohesar ocaru evocoi nungar ava angaipa viyar pñhúve tēi? —ehi seroñrosa pípe yuvíreco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvíreco. ¹³ Peyapísaca icuachiapri arachendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ēgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoñpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvíreco yepi? —ehi yuvíreco chupe.

¹⁵ Ahe rumo omboyeví ahe ava upe:

—¡Ndiyai eté ichohopri mendasave ndoyembovihai yuvireco imer oicovese ipãhuve! Oimera rumo ari imer reraso ãgua ichui curi. Ahese ramo oyecuacura yuvireco cute — ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe pirer cuacua vahe pipe. Ëgüe ehise, mbahe pirer opura viña, ocañi tẽira, uva ricuer avei evocoyase ocañi tẽi aveira viña no. Acoi uva ricuer ipiasu vahe mbahe pirer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cũritei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoyase opũha yuviraso güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepia, ahe aipo ehi opiha pipe: “Yepe que iturucuar popi resemi tẽi apocora, acuerara rumo” ehi. ²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cũritei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rõtave, osepia omimbi vahe iyemoingatupase omano vahe tĩ ãgua, ava yaseho atise avei no. ²⁴ Ahese aipo ehi ava oyaseho vahe upe:

—Pesẽpa cohava sui. Co cuñatai nomanoi; oque tẽi ou —ehi.

Ahe ava rumo opucaete atiño seroyaẽhisave yuvireco. ²⁵ Ichui opa ava omose, ahese oique oi pipe oipopisi cuñatai. Evocoyase ahe oñarapuha voi. ²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osẽse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraisuerecomi tẽi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pẽu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ambuae ava viroyepota ava niñhengatui vahe caruguar rerecosar Jesús upe yuvireco. ³³ Ichui omosese caruguar, iñhengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tẽi yuvireco.

³⁴ Fariseo eta rumo aipo ehiño yuvireco:

—Caruguar rerecuar pĩratasa pipe co mbia omose caruguar ava sui —ehi tupri tẽi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. ³⁶ Osepiase ava rehi, oiparaisuereco yuvireco. Esepia, ahe oñemosañō tēi mbahe rasicuer pāhuve inungar ovesa ndovirecoi vahe guārosar yuvireco ³⁷ Evocoyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pīratasa caruguar ava sui imboyepepi āgua iyavei iporombogüera āgua opacatu-catu tēi mba-herasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu āgua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoī rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei caruguar pemboyepepi serecosar sui. Esepia niha, peipisi pīratasa ndasepi vahe. Sese peyapoñō evocoi mbahe guarepochi pisiēhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoī chira guarepochi peyese. Ndaperasoī chiaveira pe mbahe riru, iyavei ambuae pe turucuar, pe pitaqui; peyendar güerañō tupri perasora. Pe pococa avei ndaperasoī chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoyase peique ramoseve oi pipe, peyapora, ‘Avirave, Tūpa tape rovasa’ peyera chupe. ¹³ Acoi aviyeise oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisi chira Tūpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, ahese pesēñō ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. ¹⁵ Evocoyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

¹⁶ “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, ¹⁸ ichui pe reraso aveira mborerecuareta ivate catu vahe rovai yuvireco che recocuer sui tēi, ēgüe peyera peñehe che recocuer rese chupe iyavei ava ndahei vahe judío upe avei. ¹⁹ Acoi pe rerasose mborerecuar upe yuvireco, ‘¿Mbahe pīha amombehura chupe?’ ndapeyei

chira; acoi peñehe potase rumo, Tũpa omondora pe ñehe ãgua pẽu. ²⁰ Esepia, ndahei chira peyesui tẽi peñehe, pe Ru Tũpa Espiritu pemoñehe ucara.

²¹ “Ipare rumo ava vıvri omondora oamotarẽhisar upe ‘toyuca yuvireco’ oya. Ëgũe ehi aveira ava guahır upe; tahır avei oyamotarẽhira oyesupa yuca uca ãgua yuvireco che recocuer rese. ²² Iyavei opacatu ava ndape ambotai chira che recocuer sui tẽi yuvireco. Acoi oyemovıracua vaheño rumo arı ipa vahe rupi, ahe ipısiropri yuvirecoira curi. ²³ Iyavei acoi pe mañeco tẽise ñepeı tecuave yuvireco, ahese peyepıñora ichui ambuae tecua pıpendar upe che recocuer mombehu ãgua. Supi eté Ava Rıquehır oura ndapemboaviye vıteiseve pe guatasa judıo recua rupi.

²⁴ “Ñepeı yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Avıye ité’ ehiñora ombohesar osecoupıtise. Ëgũe ehi aveira mbiguai güerecuar upe. Acoi oı yar upe: ‘Carugar rerecuar Beelzebú’ ehise, aipo ehi aveira niha oı pıpendar upe yuvireco no” ehi.

¿Uma sui pıha sıquıyesara?

²⁶ “Sese ndapesıquıyeı chira ava pe amotarẽhimbar sui. Esepia, yaposa vahe imombe-hupırẽhi cũriteı, icuasaño itera curi; iyavei mbahe ñomıprı, icuasaño aveira no. ²⁷ Acoi che amombehu vahe pıtumimbisave pẽu, pemombehu arı pıpe coiye, iyavei acoi amombehu vahe pẽuñomi, perosapucaı pe rẽta harıve imombehu opacatu ava upe. ²⁸ Iyavei ndapesıquıyeı chira acoi ava peyuca potasar sui. Esepia, ndoıcatui niha ava hã mocañi ãgua yuvireco. Tũpa sui rumo pesıquıye catura. Esepia, ahe oıcatu yande retocuer, yande hã reseve imocañi ãgua tata guasu pıpe” ehi.

²⁹ “Yamondo niha ñuvırıo vıraımi repırã ñepeımi guarepochı yepı. Yande Ru Tũpa ndoıpotaise rumo, ndovıapı chıetera que ñepeı vıraımi” ehi. ³⁰⁻³¹ “Sese pesıquıyeı eme. Esepia, pe niha ivate catu vahe ité peıco opacatu vırai sui. Supi eté Tũpa niha oıcua opacatu ñepeı-peı pe ha retacuer” ehi.

“Che aıcua Jesucrısto” ehi vahe opacatu ava rovaque

³² “Acoi ava ‘che aıcua Jesucrısto’ ehi vahe opacatu ava rovaque, che aveı evocıyase: ‘Co ava che rupındar secoı’ ahera che Ru ıva pendar upe. ³³ Acoi ava ‘che ndahei Crısto rese aıco’ ehi vahe rumo cheu ava rovaque, che aveı evocıyase, ‘Ndahei co che rupındar secoı’ ahera che Ru ıva pendar upe.

Jesús reroyasa pıpe sui oımera yeamotarẽhısa

³⁴ “ ‘Mbahe tuprı ai revo güeru co ıvı pıpe’ ndapeyeı chira cheu. Ëgũe ehi rumo che yusa omoıme ucara yeamotarẽhısa. ³⁵⁻³⁶ Sese ava oñemu ae oyeamotarẽhi-rẽhıra yuvireco; ava oyesupa oyamotarẽhıra, iyaveı cuña membrı osı oyamotarẽhıra, cuña vovayar oyamotarẽhi aveira.

³⁷ “Iyaveı acoı oyesupa tẽı osaisu catu vahe che sui, ahe ndıyai eté secoı che voyarã; inungar aveı osaisu catu vahe guahır, anıse guayrı che sui. ³⁸ Iyaveı acoı noñemosai vahe mbahe rasıcuer upe, inungar-ra curusu rese ovosıı vahe ité vıña che rupı oguata pıpe, ahe chupe ndıyai eté che voya seco ãgua. ³⁹ Acoı ava oıpısiro pota vahe güecocuer tẽı, ahe ocañi tẽıra; acoı omocañi vahe rumo güecocuer che recocuer rese, ahe oñepısiroıra” ehi Jesús güemimbohe eta upe.

Porerecosa resendar ñehesa

⁴⁰ “Acoı ava pe pısi tuprı vahe, ahe che pısi tuprı aveı yuvireco, iyaveı acoı che pısi vahe, ahe oıpısi aveı che mbousar. ⁴¹ Acoı ava oıpısi tuprı vahe ambuae ava Tũpa ñehe mombehusar secosa rese, ahe oıpısi aveıra porerecosa inungar tuprı. Iyaveı acoı ava oıpısi tuprı vahe ava seco catuprısa rese, ahe oıpısi aveıra porerecosa inungar tuprı.

⁴² Iyavei acoi omondo vahe que chñhi i sōhisa vahe que ñepei seco mbegüemi catu vahe toiñu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoãpiramo vahe ovoya omondo Jesús recocuer cua uca ãgua

¹ Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu ãgua: “¿Nde ité vo Tūpa Rembiporavo aipo sãrombri ereico? anise, ¿oime tie ambuae orosãro vahe?” ehi yuvireco chupe.

⁴ Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵ ‘Ndasesapisoi vahe osareco tupri cūritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pñirosa resendar ñehesa’ peyera chupe. ⁶ ¡Oviharetera acoi ava oyeroyaño vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihata ivitu ombova-mbova vahe nungar pñha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rētave yepi. ⁹ Evocoiyase pesepiase, ¿‘Ava’ peye vo pe chupe? ¿Tūpa ñehe mombehusar ité pñha? Taa, ahe ité. Evocoi niha ivate catu vahe Tūpa ñehe mombehusar sui. ¹⁰ Ahe chupe ité Tūpa icuachiapri aracahendar pipe aipo ehi: ‘Che amondora nde renondeve che ñehe mombehusar nde raperã moingatu ãgua’ ehi.

¹¹ Supi eté ndipoi que ñepei ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tūpa povri pendar oiporara mbahe tēi yuvireco. Osãhasãha ava opĩratasa pipe imocañi ãgua. ¹³ Opacatu Tūpa ñehe mombehusar rembicuachía pipe, Moisés porocuita icuachiapri pipe avei imombehusa Juan yusa rupive co Tūpa mborerecuasa resendar. ¹⁴ Yepe yavaira seroya ãgua pēu viña, Juan rumo, Tūpa ñehe mombehusar Elías. Ahe imombepri ou vahe. ¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pñha amboyoyara ava recocuer cūriteindar? Esepia, co ava inungar acoi chñhivahe iguayi tēi vahe ocar rupi. Ipare oñehe pucu-pucu omboripar upe yuvireco aipo ehi: ¹⁷ ‘Oromoñehe tēi mimbĩ pēu, ndapepivoi eté rumo iyavei orosapucái tēi sapucaisa viharēhisa resendar pēu, pe rumo ndapeyasehoi eté’ ehi. ¹⁸ Esepia, ouse Juan Oporoãpiramo vahe, ahe ndohui tembiñu sepĩrusu ai vahe iyavei ndoiñu uva ricuer ipĩrata vahe, sese, ‘Co mbia caruguar vireco vahe oyese’ peye tupri tēi chupe. ¹⁹ Coiye che ayu, Ava Riquehĩr, acarũ, aihu tupri avei. Ipare, ‘Co icaru guasu ai vahe secoi, iñu guasu ai vahe avei’ peye cheu; ‘Ava angaipa viyar mboripar tēi iyavei guarepochi reroquasar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

Tecua ndiporeroyai vahe

²⁰ Ahese Jesús oñehe pĩrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuerai Tūpa upe nara yuvireco. Evocoiyase aipo ehi chupe: ²¹ “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga

omondera turucuar viharēhisa resendar; tanimbu avei omondora oāca rese oangaipa mboasisa pipe yuvireco viña no. ²² Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ²³ Pe avei no, tecua Capernaum pendar pemoha co ivave pe reco āgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondisa yapopri vahe pe pāhuve yaposara viña, cūritei oime vitera ahe tecua viña. ²⁴ Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

²⁵ Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. ²⁶ Ĕgüe ere niha mbahe nde remimbotar apo, che Ru” ehi.

²⁷ “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri. ²⁸ Peyu cheu opacatu icueraí vahe. Che amondora pe pituhu āgua. ²⁹⁻³⁰ Peico che povrive, peyembohe avei che sui. Esepia, che ndache reco asií, iyavei che povrive pe recosa ndayavaimi eté. Ahese ramo oimera mbituhusa pēu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pāhu rupi. Ahese semimbohe ndasiepoi. Evocoyase trigo rāhii oipoho-pohomi güemihura yuvireco.

² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu āgua ondugüer reseve. Ahe chupe acoi ndipotasai ihu āgua yuvireco viña. Judío pahi yuvirecoi vahe upeño ité niha ipotasa ihu āgua yepi. ⁵ ¿Ndapeyeroquií vo Moisés porocuita resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. ⁶ Cūritei cohava oime ava ivate catu vahe tūparo sui. ⁷ Evocoyase pe ndapesenducuai eté Tūpa Ñhengagüer aipo ehi vahe: ‘Che aipota peporoparisuereco, aní chira peropovēhepa porerecosa mbahe mimba tēi cheu’ ehi vahe. Pesenducuse viña, ahese, “Oyavi mbahe” ndapeye voi chira che remimbohe mbahe ndoyavi vahe upe viña. ⁸ Esepia, Ava Riquehir mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui oose Jesús, oique judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pñha mbituhusa ari pipe ava imbogüerasa yepi’ —ehi yuvireco chupe.

¹¹ Evocoyase Jesús aipo ehi imboyevi:

—¿Ava vo pe pāhu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva. ¹⁴ Evocoiyase fariseo opa yuvínose yuviraso oyemoingatu Jesús yuca ãgua yuvireco.

Yaviye aracadendar imombehupri Jesús recocuer resendar

¹⁵ Evocoiyase Jesús oicuase fariseo pihañemoñetasa, osẽ oso, ava rehii avei yuviraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ëgüe ehi yaviyepa Tũpa ñehe mombehugar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayembovaha.

Amondora che Espiritu chupe.

Ahe omombehu aveira mbahe ihĩvi vahe opacatu ava ivi pĩpendar upe.

¹⁹ Noiñehopepi-epii chira ava, nasase-sasei tẽi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepe patavĩmi oyeapa vahe; nombogüei chiaveira tataendi sãtachiñomi tẽi vahe.

Ëgüe ehira mbahe ihĩvi vahe pipe opacatu secopipa.

²¹ Evocoiyase opacatu tecua pendar ava ndahei vahe judío oyeroyara yuvireco sese’ ehi Isaías aracahe.

“Jesús vireco carugar pĩratasa oyese” ehi tẽi ava yuvireco

²² Ichui ava ndasesapiso vahe, noñehei vahe carugar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei. ²³ Evocoiyase opacatu ava oyepihamondisave aipo ehi yuvireco: “¿Tũpa Rembiporavo David suindar pĩha co?” ehi yuvireco chupe.

²⁴ Osenduse rumo fariseo, “Co mbia carugar rerecuar Beelzebú pĩratasa pipe tẽi omboyepipi carugar ava sui” ehi yuvireco.

²⁵ Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarẽhisave yuvireco, ahese evocoi mborerecuar pĩratasa ocañi tẽira. Iyavei que tecua pendar, anise, que ava omu rese ovavase oyeupe, oyoya oyemocañi tẽira yuvireco. ²⁶ Ëgüe ehi avei carugar. Esepia, serecuar omboyepipse opovri pendar, ovavara oyeupe yuvireco viña. Evocoiyase ahe oyemocañi tẽira yuvireco. ²⁷ Iyavei pe, ‘Beelzebú pĩratasa pipe sui tẽi omboyepipi carugar ava sui’ peye tẽi cheu. Evocoiyase, ¿ava pĩratasa pipe vo pe voya eta omboyepipi carugar ava sui yuvireco? Tũpa pĩratasa pipese, che avei evocoiyase ayapo evocoi nungar ipĩratasa pipe. Pe voya ae omboyecuar pe ñehe pe rembiavi yuvireco pẽu. ²⁸ Che rumo Tũpa Espiritu pĩratasa pipe amboyepipi carugar ava sui. Sese cũritei pesepia ité Tũpa mborerecuasa.

²⁹ “Iyavei no, que ava oique potase ambuae ava ipĩrata etepri vahe rõtave imbahe rerocua ãgua ichui viña, yipĩndar opa rane itera oñapichi-pichi. Ipare voi opara vırocua imbahe ichui.

³⁰ “Iyavei acoi ava ndache mboyoyai vahe, ahe che amotarẽhimbar yuvirecoi; acoi ava ndosecai vahe ava cheu nara, ahe omosai tẽi yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara tẽi vahe upe avei. Co catu acoi iñehe-ñehe tẽi vahe Tũpa Espiritu upe, ahe chupe ndipoi chietera ñeroisa. ³² Iyavei acoi ava oñehe-ñehe tẽi vahe che, Ava Riquehir rese, ahe chupe oimeño ñeroisa; acoi oñehe-ñehe tẽi vahe rumo Espiritu amotarẽhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviyera; nderemoatiro tupriise ivira, ahe evocoiyase vırecora oha naporai vahe. Esepia, ivira icuasa iha rese. ³⁴ Evocoiyase pe, mboi nungar tẽi peico vahe, pe recocuer naporaise, ndapeicatui chira mbahe avıye vahe rese pe

ñehe ãgua! Esepia, pe piha pipe sui tēi osē pe ñehe ãgua. ³⁵ Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe. ³⁶ Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. ³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua ãgua —ehi yuvireco.

³⁹ Jesús rumo omboyevi ñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua ãgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara. ⁴⁰ Esepia, inungar Jonás secoi mbosapi ari pira guasu aviterve aracahe, ãgüe ehi aveira Ava Riquehir mbosapi ari ivivri taira omano vahe pãhuve. ⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa ãgua. Esepia, Nínive pendar niha omboasise oangai, oyevi Tūpa upe yuvireco Jonás omombehuse Tūpa Ñehengagüer chupe. Cūrtei rumo oime Jonás sui aviye catu vahe pe pãhuve. ⁴² Iyavei ari cañi pipe cuña mborerecuar guasu irohí coti secua vahe porandusave, omombehura cūrteindar ava cañipa ãgua. Esepia, ahe ou amombri sui Salomón mbahecuasa rendu ãgua. Cūrtei rumo oime ivate catu vahe Salomón sui —ehi fariseo eta upe.

Caruguar oyevi iri ava güeco agüerve

⁴³ “Iyavei caruguar osēse ava sui, oguata tēi ivi ipiru vahe rupi opituhu ãgua reca. Ipare rumo ndoyosuse, ipihañemoñeta, ⁴⁴ ‘Ayevi irira che reco agüerve vicho’ ehi. Aheve oyevisse, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete caruguar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. ãgüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinochai. Ahe oñehe pota yuvireco chupe. ⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvinochai. Ahe oñehe pota yuvireco ndeu —ehi.

⁴⁸ Ahe rumo,

—¿Ava piha che si; ava piha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta. ⁵⁰ Esepia, acoi che Ru iba pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, uguapi ipa popive oĩ. ² Aheve ava oñemonuha atise yuvireco, oha carite pipe uguapi oĩ, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepe mbia osē omaheti oico. ⁴ Ahe otiapi-apiise mbahe rãhi oso, moviro oiti peri rupi. Vĩrai ogüeyise rumo sese, opaño yuvirohu. ⁵ Iyavei moviro oiti ivi nayanai vahesave ita pãhuve. Sese cūrteimi sori; ⁶ ari tasise rumo, opaño ipiru. Esepia, ndasapoi niha. ⁷ Iyavei

ambuae mbahe rãhii oiti yu pãhuve. Ahe yu rumo sorì poyava catu yuvireco ichui. Sese opaño oyopi. ⁸ Ambuae rumo oiti ivi aviye vahesave, ahe setá iha imonuhasa; ñepeí ihì sui osẽ cién iha, ambuae sui osẽ sesenta, ambuae sui treinta. ⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pãha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu ãgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. ¹¹ Jesús aipo ehi: “Pẽu rumo Tũpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui. ¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tẽi, ndosepiacuai rumo yuvireco iyavei osendu tẽi, ndosenducuai avei yuvireco no. ¹⁴ Na ehi yaviye Tũpa Ñehengagüer Isaías remimombehu:

‘Pe niha pesendu tẽira, ndapeicuai chira rumo; iyavei pesepia tẽira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya ãgua, ndayapisai eté sendu potaẽhisave; ndoyemboesapisoi avei sepia potaẽhisave.

Esepia, ndosenducua potai opiha pipe yuvireco cheu oyevi potaẽhisave ombogüera ãgua’ ehi

Isaías aracahe.

¹⁶ “Pe rumo perorivete ité sepiacuase, pesenducua avei no. ¹⁷ Supi eté setá Tũpa ñehe mombehusar iyavei ava seco catupri vahe aracahendar osepia pota tẽi mbahe pe rembiepia, ahe rumo ndosepiai eté yuvireco; iyavei osendu pota tẽi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese. ¹⁹ Acoi osendu tẽi vahe Tũpa Ñehengagüer imborerecuasa resendar, ipare rumo ndosenducuai, ahe inungar acoi mbahe rãhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tũpa Ñehengagüer opa tupriño omocañi ichui. ²⁰ Iyavei acoi mbahe rãhii seitipri ita pãhuve, ahe inungar ava recocuer yipriño osendu vahe, oipisi vahe avei vorivetesia pipe Tũpa Ñehengagüer. ²¹ Ipare rumo inungar co mbahe miti ndovirecoi vahe guapo oviracua ãgua, ãgüe ehi avei evocoi nungar ava oimese mbahe-mbahe tẽi Tũpa Ñehengagüer sui chupe, cüriteimi seroyaẽhisave oyepepi ichui. ²² Acoi mbahe rãhii seitipri yu pãhuve, ahe inungar ava osendu vahe Tũpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tũpa Ñehengagüer rupi. Sese secocuer ndaviye iri eté, inungar mbahe miti ndihai vahe. ²³ Acoi itisa vahe mbahe rãhii ivi aviye vahe rese, ahe inungar ava osenducua vahe Tũpa Ñehengagüer. Iyavei inungar acoi co mbahe miti ihá iteanga vahe, ãgüe ehi avei ava secocuer aviye vahe inungar ñepeí-peí sãhii sui osẽ que cien iha, sesenta iha, anise que treinta” ehi Jesús güemimbohe eta upe.

Trigo pãhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tũpa mborerecuasa oyoya tupri ava oivi pipe mbahe rãhii oñoti vahe rese. ²⁵ Opacatu ava queseve rumo oyepota yamotarẽhisar, caha tẽi rãhii oñoti trigo pãhuve oso. ²⁶ Acoi trigo iha potase, supive avei sorì caha. ²⁷ Evocoyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rãhii aviye vahe ereñoti nde ivi pipe? ¿Que sui ru caha sorì ipãhuve?’ ehi yuvireco chupe. ²⁸ Iyar rumo aipo ehi chupe: ‘Oime revo que che amotarẽhisar’ ehi. Evocoyase oporaviqui vahe oporandu yuvireco

chupe: ‘¿Ndiyai pñha caha tēi orosapohopara ichui viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi. ³⁰ ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

Jesús oiporu oporombohe āgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehusar rembicuachiagüer aviye āgua: “Che añehese, amboyoyara che porombohesa ambuae mbahe rese. Iyavei amombehura Tūpa ivi apo suive mbahe niporēhii vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe resendar yandeu’ oya. ³⁷ Evocoyase omboyevi chupe: “Acoi ava mbahe rāhii aviye vahe oñoti vahe, ahe che, Ava Riquehir. ³⁸ Ivi mbahe miti rupa, ahe ava co ivi pipendar. Iyavei mbahe rāhii aviye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe. ³⁹ Acoi yamotarēhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai iva pendar yuvireco. ⁴⁰ Iyavei inungar acoi caha tēi imonuhapri sapi āgua, ēgüe ehi aveira ari cañi pipe coiye. ⁴¹ Evocoyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua āgua che povri yuvirecoi vahe pāhu sui. ⁴² Ichui omondopara tata guasuve. Aheve oyaseho tēira iyavei ombotere-tere tēira guāi yuvireco. ⁴³ Aheseve voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua āgua mbahe sepirusu vahe pota raisa pipe” ehi.

Mbohír sepirusu catu vahe sui yembohesa

⁴⁵ “Iyavei Tūpa mborerecuasa inungar ava mbahe rerocuasar oseca vahe mbohír icatupri vahe yepi. ⁴⁶ Ahe oyosuse mbohír sepi catu vahe, oso opacatu ombahe mondo co sepi catu vahe rerocua āgua.

Pira mbohasa sui yembohesa

⁴⁷ “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira. ⁴⁸ Acoi savapipose pira mbohasa, vinose ivi ātasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco. ⁴⁹ Ēgüe ehi aveira ari cañi pipe: ahese Tūpa rembiguai iva pendar yuvinosera opacatu ava ndaseco pōrai vahe mboyepepi āgua ava seco catupri vahe sui. ⁵⁰ Evocoyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osē ichui ⁵⁴ oyepota güecuave oso. Aheve ombohe ava judío tūparo pipe oico. Evocoyase ahe pendar ava oyepihamondi tēi:

—¿Que pīha co ava oyembohe catu ombahecua āgua? iyavei, ¿mara ehi pīha co mbahe poromondiisa apo? —ehi yuvireco—. ⁵⁵ ¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pāhuve. Evocoyase, ¿que pīha oyembohera viña? —ehi tēi yuvireco chupe.

⁵⁷ Ipīpe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nombotei yuvireco —ehi.

⁵⁸ Evocoyase, ahe ava viroyaēhisa rese, moviro tēi oyapo mbahe poromondiisa ipāhuve.

14

Juan Oporoāpiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerācua.

² Evocoyase aipo ehi opitivisar upe: “Juan Oporoāpiramo vahe revo ocuerayevi. Sese oyapo poromondiisa ipirata vahe” ehi.

³ Esepia niha, yipindar Herodes Juan oipisi, oñapichi carena pipe soquenda āgua vivri Felipe rembireco Herodías sui tēi, ⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tūpa ñehe mombehusar secoi” ehi yuvireco chupe. ⁶ Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoyase aviye ai eté. ⁷ Sese ahe oyemoingatu ñepe reseve que mbahe oyeupe oporanduse imondo āgua chupe. ⁸ Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoāpiramo vahe āca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe āgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰ Ahese oporocuai Juan āca hasia āgua soquendasave. ¹¹ Ipare viraso poratu pipe cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, vıraso sete ñoti yuvıreco. İpare yuvıraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porêhisave carite pipe. Ava rehi rumo oyanduse, yuvınose voi güecua sui, ivı rupi yuvıraso osupiti secosave yuvıreco.

¹⁴ Evocoyase osêse carite pipe sui, osepia ava rehi. Ahese oiparisuereco ava eta. Sese opa ombogüera imbaheasi vahe serasopri. ¹⁵ Evocoyase caharuse semimbohe oyemboya yuvıreco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovırocua mbahe güemihura yuvıreco? —ehi yuvıreco chupe.

¹⁶ —Anı, ndiyai yuvıraso. Pe pemondora mbahe semihura yuvıreco —ehiño chupe.

¹⁷ —Poyandepomi tēi rumo pan orovıreco iyavei ñuvıriomi tēi avei pira —ehiño semimbohe yuvıreco chupe.

¹⁸ —Peruño ave cheu —ehi güemimbohe upe.

¹⁹ İpare aipo ehi ava rehi upe: “Peguapı capihi harıve” ehi. Evocoyase oipisi poyandepomi vahe pan, ñuvıriomi vahe pira. Ichui omahese ıva rese, “Avıye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvıreco. ²⁰ Evocoyase opacatu ava ocaru vahe ihıtaropa tēi yuvıreco. İpare semimbohe omboapıpopa doce tuprı iruova sembihu rumbırer yuvıreco. ²¹ Ahe cuimbahe ocaru vahe retacuer cinco mil. Cuña rumo iyavei chıhıvahe ndıpasai yuvıreco.

Jesús oguata i harı rupi

²² İpare Jesús, “Peha pe rane carite pipe, pesasa ıpa peso che renondeve. ‘Avıye’ tahe rane ava eta upe” ehi güemimbohe upe. ²³ “Avıye” ohe pare ava upe, oyeupi oso ahe ae ivıtri rese oyerogui āgua. Pıtuse chupe, opitaño aheve. ²⁴ Aheseve carite oso pucuse ıpa popı sui, ivıtu ipırata vahe osovaıchi yuvıreco. Sese ohıtu vahe nambegüe-mbegüei ocua sese. ²⁵ Cōhe potase, oguata i harı rupi oso güemimbohe coti. ²⁶ Semimbohe i harı rupi iguatase, oyembosıquiye yuvıreco ichui. Sese,

—ıNdahei vo evocoi hāgüer secoi! —ehi yuvıreco chupe.

²⁷ Güemimbohe upe rumo aipo ehi:

—ıPeyemovıracuaño, che tēi! ıPesıquiye eme che sui! —ehi.

²⁸ —Che Yar —ehi Pedro—. Nde ité ereicose, taguata i harı rupi vıcho nde pıri —ehi.

²⁹ —Erio ru —ehi chupe.

Evocoyase Pedro ogüeyı carite pipe sui, oguata i harı rupi. Osora ipıri viña. ³⁰ İvıtu pırata repıase rumo, osıquiye ichui. Oso senise rumo ipıve,

—ıChe Yar! ıChe pısiromi eve! —ehi.

³¹ Ahese cūrteimi voi oipisi Pedro po rese, aipo ehi chupe:

—ıChıhi tēi ereyeroya che rese! ıMahera ndereyeroya tuprı che rese! —ehi.

³² Oyuvırohase rumo carite pipe, opıtuhu voi ivıtu. ³³ Evocoyase carite pipe yuvırecoi vahe oñenopiha sovai,

—ıSupi eté catu nde Tūpa Rahır ereico! —ehi yuvıreco chupe.

Jesús ombogüera imbaheasi vahe Genesaret pendar

³⁴ Osasase ıpa, oyepota Genesaret ivı rese yuvıraso. ³⁵ Opacatu ahe pendar ava oıcuase Jesús yepota, ahese opacatu tecuami rupi omombehu-mbehu ava upe yuvıreco. Evocoyase vıraso imbaheasi vahe chupe, ³⁶ aipo ehi yuvıreco: “Topocomi tēi nde turucuar popı rese yuvıreco” ehi; evocoyase opacatu sese opoco vahe, ocuerapa voi eté yuvıreco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramo aracahendar aracuasa rupi yuvireco? ¿Mahera vo yande porocuita mboaviyeẽhisa pipe ndoyepoi ocaru ãgua yuvireco yepi? —ehi.

³ Jesús omboyevi aipo ehi chupe:

—Pe no, ¡mahera ndapemboyeroyai Tũpa porocuita pe ramo aracahendar aracuasa rupi tẽi pe guata ãgua! ⁴ Esepia, Tũpa aipo ehi: “Pemboyeroyara iyavei peipĩtivira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe. ⁵ Pe rumo aipo peye tẽi: “Acoi ava aipo ehi vahe vu upe, osi upe avei no: ‘Ndiyai chira mbahe mondo ãgua pẽu. Esepia, che opacatu mbahe areco vahe imondopri Tũpa upe’ ehise, ⁶ ahese ndiyai eté ipĩtivii ãgua chupe” peye. Ëgüe peye pe aracua raisa pipe pemocañi Tũpa porocuita peyesui. ⁷ ¡Pe Tũpa reroyasar angahu tẽi peico vahe! Supi tupri ité Tũpa ñehe mombehusar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pipe tẽi che mboetei yuvireco; ipihañemoñetasa rumo amombri tẽi che sui.

⁹ Oyerure tupri tẽi yuvireco cheu.

Esepia, iporombohesa ava porocuita tẽi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe: ¹¹ mbahe oique vahe ava yuru rupi nomboangaipa ucai. Mbahe osẽ vahe ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. ¹⁴ Ëgüe tehiño yuvireco. Esepia, evocoi inungar ndasesapiso vahe viroguata ambuae ava ndasesapiso vahe yuvireco. Ahe evocoyase oyoya voira oviami ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa? ¹⁷ ¿Ndapeicuai vo opacatu mbahe acoi ava yuru rupi oique vahe oso yaviterve, ipare osẽ setecuer sui? ¹⁸ Ava pihañemoñetasa sui osẽ vahe rumo iyuru rupi, ahe ava omboangaipa. ¹⁹ Esepia, ava pihañemoñetasa sui osẽ pihañemoñeta raisa, porapichisa, mendasa sui yemboaguasasa, nomendai vahe yemboaguasa tẽisa, mondasa, temira iyavei ava rese ñemoñeta tẽisa. ²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiẽhisa nungar —ehi.

Cuña ndahei vahe judía viroya Jesús

²¹ Ichui osẽ Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco caruguar oyese! —ehi pucu-pucu ou chupe.

²³ Ahe rumo nomboyevii eté chupe. Evocoyase semimbohe oyemboya yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande raquicuei —ehi yuvireco chupe.

²⁴ Evocoyase aipo ehi güemimbohe upe:

—Che Ru Tũpa rumo che mbou Israel recua pendar upeño. Esepia, ahe ovesa ocañi tẽi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¿Che Yar, che pĩtiviimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaheerã —ehi.

²⁷ —Supi eté, che Yar, cave avei rumo ohuño ité pan rahicuer ovĩapi vahe yepi —ehiño chupe.

²⁸ —¿Cuña, tuvichá nde yeroyasa! Aviye, ãgũe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osẽ oso ipa Galilea ivi. Ipare oyeupi ivitri rese oguapi oĩ. ³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapiso vahe, ipãri-pãri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñehengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapiso vahe osareco yuvireco. Sepiase ava rehii oyepihamondii aipo ehi: “Imboeteipri Israel Tũpa tasecoi” ehi yuvireco.

Jesús oyopoi cuatro mil cuimbahe

³² Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sètave sie porẽhi reseve amondo. Aviyeteramo oviroviapi-api tiẽtera tieporẽhi peri rupi yuvireco viña —ehi.

³³ Evocoyase semimbohe aipo ehi yuvireco chupe:

—¿Que sui pĩha orosecara tembihu ava rehii upe nara cohava ava porẽhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tẽi pirami —ehi semimbohe yuvireco chupe.

³⁵ Evocoyase, “Peguapi ivi harive” ehi ava rehii upe. ³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehii upe yuvireco. ³⁷ Opacatu ava ocaru vahe ihĩtaro yuvireco. Ipare semimbohe omboapipo iri rane sumbirer siete iruova yuvireco.

³⁸ Cuimbahe ocaru vahe retacuer cuatro mil. Cuña, chĩhivahe retacuer rumo ndicuasai.

³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha ãgua yuvireco viña. “Emoporẽhi Tũpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pĩra iteanga’; ³ iyavei añihivei: ‘Co pipe ari naporai chira. Esepia, iva rese pĩra vai anga, pĩtu guasu-guasú avei’ peye. Pe niha peicua mbahe iva resendar tẽi oyecua vahe mombehu; ndapeicuai rumo mara oyapave co poromondiisa cũriteindar ava upe imombehu. ⁴ Co ava ndaseco põrai vahe oyepipi vahe Tũpa sui oporandu poromondiisa rese ‘¿Tũpa suindar ité pĩha?’ oyapave. Che rumo

namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri asevara chupe” ehi.

Ichui oseypaña ava rehii oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Ñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tupri che rese! ⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? ¹¹ ¡Too, mara peye rutei pe aipo senducuañhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité ñehe, Jesús rumo ñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipo ivi rese, aheve oporandu güemimbohe upe aipo ehi:

—¿Mara ehi vo ava ñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tūparoguã. Ñepe yepe manosa ndosecoreroyii chietera opĩratasa pipe. ¹⁹ Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ñgüe ehi aveira ivave; iyavei, “Aní” erese que mbahe uve co ivi pipe, ñgüe ehi aveira ivave —ehi.

²⁰ Ipare Jesús aipo ehi güemimbohe upe: “ ‘Co Tūpa Rembiporavo Poropĩsirosar’ peye eme ava upe cheu” ehi.

Jesús omombehu omano ñgua

²¹ Ichuive tupri Jesús omboipi imombehu güemimbohe upe oico: “Iya niha cheu che so ñgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

²² Pedro rumo viraso co cotimi chupe ñhengata ñgua:

—¡Tūpa ndoipotai eté evocoi nungar nde reco ñgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosira viña, toyemoingatu voi che recocuer rese oparaisu āgua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora.

²⁶ Esepia, ¿aviye ai angahu pīha ava upe opacatu mbahe co ivi pipendar pisi āgua, ahe ae tēi omocañise güecocuer yuvireco viña? ¿Mbovi pīha omondora ava güecocuer repirā viña? ²⁷ Esepia che, Ava Riquehir, ayevira che Ru reco pīratasa pipe che rembiguai iba pendar reseve curi. Che evocoyase aicuara ñepeipei ava rembiapo agüer rupi chupe. ²⁸ Supi eté oimera amove cohava ava nomano vitei chivaherā, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei. ³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, ¡aviye ai eté cohava yaico! Ereipotase, ayapora mbosapi teyupami: ñepeindeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iba quiha rese osesapé ogüeyi ou oyopipa tupri ité. Ipāhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu ñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeipei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu āgua curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

¹³ Evocoyase semimbohe osenducua ramo ñehe yuvireco. Ëgüe ehi Jesús oñehe Juan Oporoāpiramo vahe rese.

Jesús ombogüera chīhivahe carugar rerecosar

¹⁴ Viroyepota Jesús güemimbohe ava rehīsave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri vitei eté che rese! ¡Co coti tēi vite pe pīhañemoñetasa! ¡Mbovi rupi rutei vo aico vitera pe pāhuve che ñemosasa pipe! Peru evocoi chīhivahe cheu —ehi.

¹⁸ Ahese oñehe pīrata carugar upe chīhivahe sui imose. Aheseve ocuera tupri voi eté.

19 Ipare semimbohe oporandu co cotimi yuvireco chupe:

—¿Mahera p̄ha ndoromose catui eté carugar ichui? —ehi yuvireco.

20 —Esepia, ndapeyeroya tuprii Tūpa rese. Supi eté sese pe yeroyasa, yepe ndoyavii chira mostaza rāhii tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe. 21 Evocoi nungar carugar imosesa yayerurese yande yecuacusa pipe —ehi.

Jesús omombehu iri omano āgua

22 Jesús oguata viteseve Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarēhimbar povrive. 23 Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

24 Oyepotase Jesús güemimbohe reseve tecua Capernaum ve, aheve guarepochi rerocuar tūparo upe nara yuviraso Pedro upe, oporandu yuvireco chupe:

—¿Supi eté pe rereciar ndomondo guarepochi tūparo upe nara? —ehi.

25 —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborereciar guasu co ivi pipe yepi? ¿Omu sui p̄ha, ambuae ava sui tie? —ehi.

26 Pedro evocoyase omboevii chupe:

—Ambuae ava sui —ehi.

—¡Taa! —ehi—. Evocoyase mborereciar povri pendar nomboepi chira yuvireco —ehi—. 27 Guarepochi rerocuar moñemoñeñe āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

18

¿Ava vo seco ivate catu vahe?

1 Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

2 Evocoyase Jesús: “Erio” ehi ñepe chihivahemi upe, omondo güemimbohe pāhuve imoha, 3 aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tūpa mborerecuasa pipe. 4 Acoi oñemomini vahe rumo inungar co chihivahemi, evocoi nungar seco ivate catura Tūpa mborerecuasave. 5 Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaisu itera ava oporomongaipa uca vahe

6 “Acoi que ava rumo omongaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua. 7 ¡Iparaisu co ivi pipendar che reroyasar omongaipa uca vahe yuvireco! Che reroyasar upe rumo oimeño itera poroatoisa yepi, ¡ahe imongaipa ucasar rumo iparaisu itera!

8 “Sese inungar pe po, anise que pe pi avei pemongaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepe pe pi, pe po rese, peso rāgüer sui tata guasu apirēhisave ñuvirio pe po, que ñuvirio pe pi reseve.

9 Iyavei pe resa pe mongaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirio pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroiroi rene que ñepeí chīhivahemi che reroyasar. Esepia, ivave sembiguai che Ru p̄irindar ité yuvirecoi yepi” ehi. ¹¹ “Che niha, Ava Riquehir, ayu ava ocañi tēi vahe p̄isiro āgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso. ¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴ Ēgüe ehi avei che Ru ivave secoi vahe, ndoipotai eté que ñepeí ava che reroyasar chīhivahemi nungar cañi āgua” ehi.

Porombohesa yande ñero āgua rese

¹⁵ “Acoi nde mboetasa Tūpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. ¹⁶ Nande reroyaise rumo, ahese ereñehera ñepeí, anise ñuvirío ava upe nde p̄itivii āgua rese. Ahe avei tosendu pe ñehe. Ahese oimera que ñuvirío, anise mbosapi sendusar. ¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tūpa ndoicuai vahe nungar pereco iyavei inungar mbahe-mbahe tēi aposar, ēgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; ēgüe ehi aveira ivave. Iyavei co ivi pipe, ‘Aní’ peyese que mbahe upe, ēgüe ehi aveira ivave.

¹⁹ “Iyavei co amombehu potami avei p̄eu: Acoi ñuvirío co ivi pipe pe pihañemoñetasa oyoya tuprise que mbahe rese peporandu āgua pe yeruresa pipe, evocoyase che Ru iva pendar omondora pe porandusa p̄eu. ²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipāhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi p̄iha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tūpa mborerecuasa inungar mborerecuar guasu omoingatu pota vahe güembiguai revesa chupe. ²⁴ Evocoyase omboipi imoingatu āgua, ahese ip̄itiviiisar güeru ireve ati catu vahe guarepochi rese chupe. ²⁵ Ahe rumo ndovirecoi imboepi āgua. Sese co mborerecuar oyocuai op̄itiviiisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa āgua cheu’ ehi. ²⁶ Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tupri vahe ireve. Ahe chupe aipo ehi iyesho p̄isi: ‘¡Emboepipa acoi nde revesa cheu!’ ehi. ²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca. ³¹ Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. ³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu āgua ‘tomboepipa rane ité orevesa cheu’ oyapave.

³⁵ “Indó, evocoyase ēgüe ehi aveira che Ru iva pendar p̄eu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiēhi āgua

¹ Ipare Jesús osē Galilea sui, oso Judea ivi rupi ari sēsa coti iai Jordán rovai. ² Ava rehi yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepipira oyesupa sui güembireco rese ité yuvirecoi āgua. Evocoyase ñuvirío yuvirecoira ñepeí ava nungar’ ehi. ⁶ Sese ndahe iri ñuvirío, ñepeí vahe ité yuvirecoira. Evocoyase ava Tūpa omomenda vahe oyese, ndiyai ava tēi omboyepi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheerã güembireco upe cuachiar poisa resendar opoi āgua ichui? —ehi.

⁸ —Pe poreroyaēhisa pipe niha Moisés ēgüe ehi pēu. Yipisuive ité rumo Tūpa ndoipotai oyesui opoi āgua yuvireco. ⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ēgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporã, ahe güeraño osenducua yuvireco —ehi güemimbohe upe—. ¹² Esepia, oime pihañemoñetasa ava mendaēhi āgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tūpa mborerecuasa reseño ité. Acoi oicatu vahe co ñehesa reroya āgua, toviroyaño —ehi.

Jesús osovasa chīhivahe

¹³ Ipare ahe pendar güeru moviro chīhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chīhivahe?” ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru povrive —ehi.

¹⁵ Ipare omondo opo chīhivahe harive osovasa. Ichui osē oso.

Mbia chīhivahe imbahe eta vahe omoñeta Jesús

¹⁶ Mbia chīhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeíño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

¹⁸ —¿Uma vo aipo mborocuaita? —ehi.

Ahese omboyevi chupe:

—‘Ndereporoyucái chira, nandeaguasai chira, nandemondai chira, nanderemirai chiaveira ambuae ava rese, ¹⁹ eremboyeroyara nde ru, nde si avei, eresaísura ambuae ava nde yeaisu nungar eico’ ehi icuachiapri pipe —ehi mbahe yar upe.

²⁰ —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaheerã? —ehi.

²¹ —Ereipotase mbahe tupri pipe nde reco ãgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, mbahe yar ité secoi.

²³ Evocoyase aipo ehi güemimbohe upe:

—Supi eté yavai eteanga imbahe eta vahe upe oi que va herã che Ru mborerecuasave.

²⁴ Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁵ Aipo iñehesa renduse, semimbohe oyepihamondi aipo ehi:

—¡Ava angahu piha evocoyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

²⁸ —Oime itera niha mbahe pēu. Esepia, acoi ari oyepotase opacatu mbahe recuñaro ãgua, ahese che, Ava Riquehir, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi. ²⁹ Acoi opacatu ava oseya vahe güēta, anise que viquehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirēhi vahe. ³⁰ Seta vai rumo cūrítei yipindar vahe, ipa tēira yuvirecoi; setá aveira cūrítei ipa tēi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ² Oyosuse ava, ahese omoingatu oyeupe oporaviqui va herã upe ñepi ari mboraviqui repri imboepi ãgua. Ahese opa omondo ocove imboporaviqui. ³ Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴ aipo ehi chupe: ‘Peso, tapeporaviqui che uva tive. Amboepi tuprira niha pēu’ ehi. Ahe evocoyase yuviraso oporaviqui ãgua icove. ⁵ Ipare oso iri mbiter ari rupi oyeupe oporaviqui vahe reca, ãgüe ehi tupri avei caharuse, las tres rupi. ⁶ Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tēi ari momba cohava pehã?’ ⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. ⁸ “Pitu ramosa, cove yar aipo ehi oporaviqui vahe rese yangarecuar upe: ‘Eñehesa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. ⁹ Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepi-peñepi ari rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepi ari rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa tēi vahe, ñepi horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañño tēi oroporaviqui ari momba sacucuer upe oroico’ ehi. ¹³ Cove yar rumo aipo ehi ñepi ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepi ari

resendar ndeu acoi, Aviye, peye vahecuer rese cheu' ehi. ¹⁴ 'Evocoyase ndo co, eipisi nde guarepochi, eraso. Che rumo amondo pota co ava ipa tēi oi que vahe upe inungar tupri ndeu amboepi. ¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe' ehi.

¹⁶ “Indó, ēgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherã yuvireco curi” ehi güemimbohe upe.

Jesús omombehu iri omano āgua

¹⁷ Jesús oguata oso tecua Jerusalén piar rupi. Ahese co cotimi oi peha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu. ¹⁹ Ipare che mondora ava ndahei vahe yande mu upe mara-mara tēi che rereco āgua che roiroso pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembrí upe nara

²⁰ Ipare Zebedeo rembireco ñuvirío omembrí reseve, oyemboya Jesús rese yuvireco. Ahese oñenopiha sovai oporandu āgua mbahe rese. ²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membrí eremboguapira ndeyepiri ñepeí nde mbahe rese pocosa coti, ambuae nde mbahe rese pocoēhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vaherã, inungar-ra que igua iro vahe aihu vaherã viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che piri opomboguapi āgua che mbahe rese pocosa coti, ambuae che mbahe rese pocoēhisa coti avei. Che Ru rumo omoingatu güembiporavo upe nara oguapi vaherã che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi. ²⁶ Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. ²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaherã ava eta repirã Carugar povri sui senose āgua —ehi.

Jesús ombogüera ñuvirío ndasesapisoí vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehi yuviraso saquicuei. ³⁰ Aheve peri popive ñuvirío ava ndasesapisoí vahe oguapi yuvinoi. Evocoyase osenduse Jesús ocuase supi, osapucái pīrata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucái pīrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherã pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saiskusave opoco sesa rese. Ahe ramoseve ndasesapiso vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ñipimi. Aheve omondo ñuvirío güemimbohe ² aipo ehi chupe:

—Peso co tecuami yande rovaingarve. Aheve pesepiara guaricu imembri reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyeví voiñora” peyera chupe —ehi güemimbohe upe.

⁴ Co ēgüe ehi chupe aracahendar Tūpa ñehe mombehusar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembri reseve’ peyera” ehi.

⁶ Evocoyase evocoi semimbohe yuviraso, oyapo ité ocuaise yuvireco. ⁷ Güeru guaricu imembri reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive. ⁸ Iyavei ava rehii oipipira oturucuar peri rupi imboetei guasusa pipe. Ambuae evocoyase oyasia pindo omondo peri rupi yuvireco saperã. ⁹ Ava rehii senonde, saquicuei avei oguata vahe osapucaí yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pīha co mbia? —ehi tēi yuvireco.

¹¹ Ava rehii oguata vahe Jesús rupi aipo ehi yuvireco chupe:

—Co niha Jesús, Tūpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tūparo pipe sui

¹² Ipare Jesús oique judío tūparo guasu pipe. Ipipendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapiso vahe, ipāri-pāri vahe avei. Ahe opa ombogüera. ¹⁵ Osepiase rumo pahi rerecuar guasu iyavei judío porocuaíta rese oporombohe vahe yuvireco mbahe ndayasepiai vahe sembiapo, iyavei tūparo pipe osenduse chīhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chīhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe: ‘Chīhivahemi, pītanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepeí pītu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevise tecua Jerusalén ve, Jesús ndasiepoi oico. ¹⁹ Aheve peri popive osepia ivira higuera. Ahe sese oyemboya oso ‘¿iha pīha?’ oya viña. So güeraño tēi rumo osepia. Evocoyase ahe aipo ehi chupe:

—¿Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¿Too, mara ehi rutei pīha co cūríteimi opa voi ipiru! —orohe tēi chupe.

²¹ Ahese omboyevī oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera.

²² Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oique iri judío tūparo guasu pipe oporombohe. Ahese pahī eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pēu. Pemboyevise che porandusa, ahese che avei amombehura ava porocuita rupi eté pīha ayapo co mbahe vichico. ²⁵ ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira.

²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷ Sese,

—Ndroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pīhañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi.

²⁹ ‘¡Nachequerēhii!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui. ³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoāpiramo vahe ou co tecocuer ihivi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva rīavii āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembiguai oporaviqui vahe upe imboporandu āgua ‘taipisi uva pohopri cheundar cute’ oyapave viña. ³⁵ Ipare rumo oporaviqui vahe oipisi sembiguai yuvireco: amove oinupa-nupa

yuvireco, amove oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembigui. Oporaviqui vahe rumo mara-mara tēiño avei vireco yuvireco.

³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸ Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. ³⁹ Evocoyase oipisi, vinose miti pãhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹ Ahe evocoyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe? ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapisi ai eté’

ehi icuachiapri pipe. ⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombaesa chupe. ⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osiquiyeño rumo ava rehi sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta.

³ Ipare oyocuai güembigui eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve. ⁴ Ipare oyocuai iri ambuae güembigui eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquiri vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembigui upe. ⁵ Ichohopri rumo ndoviroyai eté yuvireco. Evocoyase ñepeí osoño ocove, ambuae oso ombahe movendesave, ⁶ ambuae rumo oipisi sembiguai mara-mara tēi sereco āgua. Ahe ipipe oyuca yuvireco. ⁷ Evocoyase mborerecuar guasu oñemoiro etepri save omondo osundao eta co ava oporapichi vahe yuca ucapa āgua, iyavei secua rapipa āgua. ⁸ Ipare aipo ehi ambuae güembigui eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheerā cohava. ⁹ Sese peso opacatu ava guata catusa rupi, peñehe mendasave yugüeru vaheerā opacatu pe rovaichisar upe’ ehi. ¹⁰ Evocoyase sembiguai eta yuvinosepa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ēgüe ehi ava savapipo tupri oi guasu mendasave yuvireco.

¹¹ “Evocoyase acoi mborerecuar oique ava ichohopri repia. Ipare omahecua tupri ñepeí ava ipãhu pendar rese. Ahe rumo ndomondei turucuar mendasa resendar. ¹² Evocoyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñeheño ité chupe. ¹³ Evocoyase, ‘Peipisi co mbia,

peñapichi ipi, ipo avei, pemose ocarve p̄tumimbisave. Aheve oyaseho t̄ira, s̄aitere-tere t̄ira mbaherasicuer rereco' ehi ichohopri rese hañecosar upe. ¹⁴ Esepia, setá t̄i ichohopri, moviromi t̄i rumo iporavopri ip̄ahu sui" ehi mborerecuareta uve.

Fariseo osecõha iri t̄i Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara t̄i ãgua. ¹⁶ Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe T̄upa recocuer rese. Nde niha ndereroyai vahe ava ñehesa t̄i. Esepia, ava p̄ihañemoñeta rupi ndereicoi vahe; nde p̄ihañemoñeta rumo ñepi reseve erereco. ¹⁷ ¿Mara ehi nde p̄ihañemoñeta? ¿Aviyera p̄iha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo p̄ihañemoñeta raisa. Sese aipo ehi chupe:

—Pe seco tupri angahu t̄i vahe peico. ¡Mahera che moingue pota mbahe t̄i pipe peye!

¹⁹ Pemboyecua ru ñepi guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, T̄upa upendar mbahe evocoyase pemondora T̄upa upe —ehi fariseo upe.

²² Osenduse, oyepihamondi t̄i yuvireco. Evocoyase yuvirase yuviraso ichui.

Saduceo oporandu Jesús upe cuerayevisa rese secoãhasave

²³ Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu t̄i angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiẽhiseve, ahese tivri omendara sembirecocuer rese ahe viquehir omano vahecuer upe nara tahirã oico' ehi —ehi yuvireco chupe—.

²⁵ Cohave, ore p̄ahuve, oime siete tupri oyesuindar p̄ave yuvirecoi vahe. Yipindar vahe omenda. Ipare omanoño guahiẽhiseve. Evocoyase tivri omenda sembirecocuer rese.

²⁶ Ahe omano guahiẽhiseve avei no. Ëgüe ehi avei opacatu ambuae tivri, omano avei guahiẽhiseve yuvireco. ²⁷ Opacatu imano pare, cuña avei omano cute. ²⁸ Evocoyase opase ocuerayevi yuvireco, ¿uma rese ité p̄iha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe p̄ihañemoñetasa co coti t̄i eté. Esepia, ndapeicuai eté T̄upa ñehe icuachiapri aracahendar, ndapeicuai avei T̄upa p̄iratasa —ehi—. ³⁰ Esepia, acoi omano vahe ocuerayevise, chupe ndipo iri chira mendasa. Ahe rumo T̄upa rembiguai iva pendar nungar yuvirecoira ivave —ehi—. ³¹ Co cuerayevisa resendar rumo amombehu p̄eu. Aviyevise ndapeyeroqui anga vahe acoi T̄upa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob T̄upa aico' ehi. ¡T̄upa ndahei omano vahecuer T̄upa, ahe rumo oicove vahe ité T̄upa secoi! —ehi.

³³ “¡Too!” ehi ava rehi. “¡Mara ehi rutei iporombohesa!” ehi t̄i yuvireco.

Porocuita aviyevise catu vahe

³⁴ Ipare fariseo oyanduse yuvireco Jesús omonguiriripaño saduceo oyesui, ahese oñemonuha yuvireco. ³⁵ Ñepi ip̄ahu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tũpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita aviye catu vahe ambuae porocuita sui. ³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirío porocuita rupi uguata opacatu Moisés porocuita icuachiapri, opacatu Tũpa ñehe mombehusar rembicuachía avei —ehi.

¿Ava suindar pĩha Poropĩsirosar?

⁴¹ Fariseo ñemonuha viteseve, ⁴² Jesús oporandu chupe:

—¿Mara ehi pepihañemoñeta acoi Tũpa Rembiporavo ou vaherã ava pĩsiro ãgua rese? ¿Ava suindar-ra pĩha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pĩha evocoyase David oñehese Espiritu pĩratasa pipe aracahe, “Che Yar” ehi chupe? Esepia, ahe aipo ehi:

⁴⁴ ‘Yar aipo ehi che Yar upe:

Eguapi che acato coti acoi che amondose voi eté nde amotarẽhimbar nde povrive yuvireco’

ehi David aracahe. ⁴⁵ Evocoyase, ¿mahera ru: “Poropĩsirosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶ Evocoyase ndoicatu iri imboyevi ãgua yuvireco cute. Ahe ari pipe sui ndipo iri que ñepe iquerẽhi vahe ñehe avi uca ãgua oñehe pipe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipare Jesús aipo ehi ava eta upe, oreu avei no: ² “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco. ³ Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tẽi mbahe viña, ipare rumo co coti tẽi mbahe oyapo yuvireco. ⁴ Iyavei omondo porocuita inungar mbahe ndayasupi catu vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuita yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tẽi. Osiva rese, oyiva rese avei ipe guasu vahe vireco-reco tẽi oturucuar rese Tũpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otũparo pipe yuvireco no. ⁷ Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. ⁹ Iyavei, ‘Che ru’ ndapeyei chira que ava co ivi pipendar tẽi upe. Esepia, ñepeño ité pe Ru pereco, ahe niha iva pendar. ¹⁰ Ndiyai avei, ‘Mborerecuar’ pembohe uca ava peyeupe. Esepia, Poropĩsirosar güeraño ité pe rerecuar secoi. ¹¹ Acoi ava seco ivate catu vahe, ahe toporopĩtivi güeco mbe güesa pipe. ¹² Esepia, acoi oyemboivate ai vahe opara seco reroyisa, iyavei acoi ava seco mbe güe vahe, ahe seco mboivate catusara curi.

¹³ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Pemombitaño ava Tũpa povrive seique

rãgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgüer sui.

¹⁴ “¡Peparaísu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipĩrata catu vahe curi.

¹⁵ “¡Peparaísu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

¹⁶ “¡Peparaísu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye āgua, ěgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. ¹⁷ ¡Pe ndapembahecua vahe nungar, ndasesapisoi vahe nungar avei peico! ¿Uma vo aviye catu vahe: oro pĩha, anise tūparo tie? Tūparo pipe niha oro rovasasa yepi. ¹⁸ Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye āgua, ěgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya ité yamboaviyera yande ñehe yepi’ aipo peye tēi. ¹⁹ ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pĩha, anise mbahe seropovēhepri renda tie? Ahe tenda harive niha porerecosa sovasasa yepi. ²⁰ Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, ²¹ iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secoi. ²² Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secoi.

²³ “¡Peparaísu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepe-pe diez pe remiti menta, anis, comino pereco vahe sui ñepe Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihivi vahe, peporoparaísuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. ²⁴ ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoyase. Ěgüe peye co mborocuita upe.

²⁵ “¡Peparaísu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ěgüe ehi tēi pe recocuer pe monda raisave, mbahe pota-pota tēisave avei. ²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaísu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomochimbrī tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese. ²⁸ Ěgüe peye: ava rembiepiave aviye pe reco ihivi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaísu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar

ruvīpagüer peico sese pe yemomahenduha ãgua iyavei pemoporañete ai tēi ava seco ihīvi vahe ruvīpagüer yepi viña. ³⁰ Ipare aipo: ‘Yande yaicose revo aracahe yande ramoi recose, ndayaipītivī chietera Tūpa ñehe mombehusar yuca ãgua yuvireco viña’ peye tupri tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyeapi iriño evocoyase pe ramoi rembiapocuerai!

³³ “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. ³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe ãgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. ³⁵ Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco īvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. ³⁶ Supi eté opacatu co mbahe tēi oura pe recove vitesese” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco ãgua. ³⁸ Sese seyapirā tēi peicora. ³⁹ Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi ãgua

¹ Ipare Jesús osē judío tūparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tūparo!” orohe. ² Ahe rumo:

—Supi eté amombehu pēu: co opacatu pesepia vahe, ndipoi chietera que ñepeit ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vahe rā ari cañi renonde

³ Ipare Jesús oso ivitri Olivo ve oguapi oī. Aheve ore güeraño tupri oroso chupe mbahe rese ore porandu ãgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu ãgua iyavei ari cañi ãgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, ‘Che aico Tūpa remimbou ava pīsiro ãgua’ ehi tēira ava eta mbopa yuvireco.

⁶ Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, ēgüe ehi rane itera niha; ndehi vitei chira rumo ari cañisa. ⁷ Esepia, ñepeit ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi riri opacatu-catu tēi tecua rupi. ⁸ Opacatu evocoi mbahe rumo omboipi ramomi vahe mbahe tēi porarasa.

⁹ “Ahese pe pisira yuvireco mara-mara tēi pe rereco ãgua, pe yuca ãgua avei. Iyavei opacatu ava-ava tēi ndape ambotai chira che recocuer sui tēi yuvireco. ¹⁰ Ahe ari rupi evocoyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco. ¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco. ¹² Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo ari ipa vahe rupi, ipisiropri yuvirecoira. ¹⁴ Iyavei co ñehesa icatupri vahe Tūpa mborerecuasa resendar

imombehusapa ranera opacatu ivi rupi icua uca ãgua. Ahese ramo oimera cañisa co ivi pipe” ehi oreu.

¹⁵ “Tũpa ñehe mombehusar Daniel oicuachía mbahe-mbahe tẽi aposa resendar oime vaherã tũparo guasu maranehi vahe pipe aracahe. Ahe pesepiase oi maranehi pipe — acoi oyeroqui vahe, ahe tosenducua tupri yuvireco—, ¹⁶ evocoyase Judea ve yuvirecoi vahe toñemipa poyava ivitri rese yuvireco ichui; ¹⁷ iyavei acoi güeta harive yuvirecoi vahe ogüeyise, toique iri eme güetave ombahe reca; ¹⁸ iyavei acoi que rupi tẽi yuvirecoi vahe, toyevi iri eme güetave que oyeaosa renose ãgua yuvireco. ¹⁹ ¡Iparaisu itera cuña ipuruha vahe, imembi pĩtani vahe avei yuvireco! ²⁰ Peporandu Tũpa upe pe recua pipe sui pe sẽhi ãgua irohi pipe, mbituhusa ari pipe avei. ²¹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. ²² Iyavei nomombituhuse Tũpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropĩsirosar secoi’; anise, ‘Peve secoi’ ehise yuvireco pẽu, aní chira peroya aipo ehi vahe. ²⁴ Esepia, yugüerura ava ‘che Poropĩsirosar aico’ ehi tẽi vahe iyavei ‘che amombehu vahe Tũpa Ñhengagüer’ ehi angahu tẽi vahe; iyavei oyapora mbahe ava ndoyapoi vahe poromondiisa güeco pĩratasa mboyecua ãgua yuvireco. Ipipe osecoãhara Tũpa rembiporavo imbopa ãgua yuvireco. ²⁵ Opa aipo co senondeve amombehu pẽu. ²⁶ Sese que ava pẽu: ‘Pesepia pe ivi iporupirẽhisave secoi’ ehise, pesoi rene aheve seroyasave, aní chiaveira peroya acoi ‘pesepia co secoi oi pipe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, ãgüe ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha atĩ yuvireco yepi” ehi güemimbohe eta upe.

Jesús yevi ãgua resendar

²⁹ “Ahe ari pipe mbahe-mbahe tẽi pare cũriteimi ndoyecua iri chira ari, yasi avei ndosesape iri chira, yasitata avei opara oviapi iva sui iyavei iva resendar mbahe oririira yuvireco. ³⁰ Ahese oimera iva rese iporẽhi vahe che, Ava Riquehir, yu ãgua resendar. Evocoyase opacatu ava-ava tẽi co ivi pipendar oyaseho tẽira osiquiyepave yuvireco. Che repia aveira yuvireco agüeyise iva quiha rese che pĩratasa rendigüer porañetesa pipe. ³¹ Iyavei amboura che rembiguai eta iva pendar. Ahe evocoyase güemimbi omoñehe pĩratara opacatu che rembiporavo co ivi rupindar que amombri rupi yuvirecoi vahe monuha ãgua” ehi.

³² “Peyembohera ivira higuera recocuer sui: Co ivira soqui ramosa, yaicua cõimi ari sacu vahe yepota ãgua yandeu yepi. ³³ Na ehi aveira pẽu che ñehe rupi tupri mbahe pesepiase, sese peicudara cõimi eté che yevi ãgua. ³⁴ Supi eté yuvirecove vitera ava osepia vahe co mbahe opase yaviye. ³⁵ Iva, ivi opara ocañi, che ñhengagüer rumo imboaviyesa rane itera.

³⁶ “Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde. ³⁸ Yipive amarusu renonde, ahese ava ocaru, oi hu; guahir, guayri avei omomendaño yuvireco. Noé arca pipe seiquese, ãgüe ehi vite yuvireco. ³⁹ Nomohai eté rumo amarusu viapi ãgua yuvireco oyeupe viña, ãgüe ehi rumo aviyeteramo tẽi amar oviapi imocañipa. ãgüe ahe aveira che, Ava Riquehir, ayevi aviyeteramo tẽi. ⁴⁰ Evocoi ari pipe oimera ñuvirio ava amombri güecua sui yuvirecoi vahe: ñepi serasosara, indugüer rumo opitara. ⁴¹ ãgüe ehi aveira ñuvirio cuña ohicho vahe upe: ñepi serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. ⁴³ Iyavei peyapisaca tupri co rese: inungar acoi oi yar oicuae revo que hora pïtu pipe imonda vahe yepota ãgua, ahese imahemohara sese güeta pipe seiqueehi ãgua viña. ⁴⁴ Ëgüe peye aveira peyemoingatu che yevi ãgua rese. Esepia niha, che, Ava Riquehir, aporoesaiha tãira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ãgua ‘tembihu tomondo che rëta pipendar upe che porocuita rupi’ ohesave. ⁴⁶ Acoi omboaviyese ocuaita, ahese oviharetera güerecuar yevise. ⁴⁷ Supi eté niha serecuar oyocuaira opacatu ombahe rese hañeco ãgua. ⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya, ⁴⁹ omboetasa omboipi mara-mara tãe sereco iyavei oyemboya caguar tãe rese ipiri ocaru iyavei oihu tãe ãgua. ⁵⁰ Ipare rumo serecuar oyepotara imahemohaehiseve. ⁵¹ Ahese omombaraisu catura, ‘Tinupasa, ava seco tupri ai angahu tãe vahe nupasa nungar pipe’ ehira chupe. Ahese oyaseho tãira, oyemoaitere-tere tãe aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tüpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi ãgua yuvireco. ² Ipãhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendirã yuvireco, ndovirasoi rumo yandi guataendi riru mboapipo iri ãgua yuvireco; ⁴ evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesi tãe yuvireco. Coiye opaño yuviroque yuvireco ichui. ⁶ Pïtu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesë ipisi ãgua cute!’ ehi. ⁷ Evocoyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tãe chïhi pe yandi oreu. Esepia, ogüe pota ité ore rataendi’ ehi tãe yuvireco. ⁹ ‘Aní, ndiyai chira revo oromondo vaherã pëu. Iyacatu revo peso imboepisave serocua peyeupe nara’ ehi. ¹⁰ Imboepi yuviraso viteseve, ou cuña mevi cute. Oyemoingatu vahe rumo yuviroique supi mendasave. Evocoyase saquicuerive voi omboya oquenda rãrosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tãe oreu!’ ehi tãe yuvinoha. ¹² ‘Aní, ndopocuai vahe ité’ ehiño chupe.

¹³ “Pe evocoyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

Ñehesa guarepochi mondosa resendar

¹⁴ “Iyavei Tüpa omborerecuasave inungar-ra ava mbahe yar oso ãgua renonde ivi amombrisave omonuha güembiguai oguarepochi rãro ãgua viña. ¹⁵ Yipindar ñepeu upe omondo cinco mil guarepochi, ambuae upe omondo dos mil, iyavei imombosapisa upe omondo mil tãe: ahe omondo ñepeu-peu upe seco etegüer rupi-rupi. Ipare voi oso cute. ¹⁶ Evocoyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepeu guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiye oyevise serecuar, ahese oñehe güembiguai upe oguarepochi retacuer cua ãgua. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi

irimi ndeu' ehi. ²¹ 'Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi chupe.

²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipipe sui co ambuae aipisi irimi dos mil avei ndeu' ehi. ²³ 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi avei chupe.

²⁴ "Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepërer tēi avei ereipisi ndeyeupe nara. ²⁵ Sese che siquiyesa pipe añomi ivivive nde guarepochi. Ndo co nde mbahe' ehi chupe.

²⁶ 'Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboveyi catumi ãgua viña' ehi. ²⁸ Ipare aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi. ²⁹ 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai ãgüe ehi tēi vahe ocarve pītumimbisave. Aheve toyaseho, tasãitere tēi oī' ehira serecuar chupe" ehi Jesús oreu.

Jesús oura opacatu ava recocuer rese porandu ãgua

³¹ "Che, Ava Riquehir, ayevisé, opacatu che Ru rembiguai ìva pendar reseve che reco ivategüer pipe, ahese aguapira che renda porañete vahesave ava recocuer rese porandu ãgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoẽhisa coti. ³⁴ Ahese che mborerecuar ivate catu vahe aipo ahera che acato cotindar upe: 'Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pẽu nara. ³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tẽise pe recua rupi vichico, pe avei oi pembou che que ãgua. ³⁶ Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no' ehi. ³⁷ Evocoiyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu? ³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?' ehira yuvireco cheu. ⁴⁰ Evocoiyase che, mborerecuar ivate vahe, amboveyira yuvireco chupe aipo ahera: 'Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo ãgüe peye' ahera.

⁴¹ "Ahese aipo ahera cute che mbahe rese pocoẽhisa cotindar upe: 'Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu caruguar upe nara serecuar reseve. ⁴² Esepia, ndacheriepoise, pe evocoiyase: Yamondomi icaru ãgua, ndapeyei eté cheu; che huseise, ahese, Yamondomi toihi, ndapeyei avei cheu; ⁴³ ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapemboui cheu, chembaheasise vichico, iyavei che roquendasave, Yasomi tēi sepia, ndapeyei eté cheu' ahera. ⁴⁴ 'Ore Yar, ¿marase vo aipo nde repiasa nanderiepoise, anise aipo

nde huseise, ipanese nde turucuarã ndeu no, nembraheasise, anise nde roquendasave, marase vo mbahe rese nande pĩtiviisai?’ ehi tẽira yuvireco cheu. ⁴⁵ ‘Supi eté acoi amove mbahe ndapeyapaise que seco mbegüemi vahe upe viña. Ipipe rumo cheu avei mbahe ndapeyapoi eté’ ahera. ⁴⁶ Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhisave yuvirasora” ehi Jesús oreu.

26

Jesús yamotarẽhimbar omboguai yuca ãgua yuvireco

¹ Ipare Jesús aipo ehi oreu:

² —Pe peicua ñuvirio ari tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judio rerecuareta oñemonuha yuvireco pahi rerecuar ivate catu vahe Caifás rõtave. ⁴ Aheve oñemoñeta: ‘Yambopa ipisi yuca ãgua’ ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehii yemondi guasuẽhi ãgua yandeu —ehi.

Cuña oipiyere Jesús ãca rese mbahe sãacuá vahe

⁶ Jesús tecua Betania ve secoi, Simón lepra vireco vahecuer rõtave. ⁷ Aheve mesave chiniseve, cuña vireco vahe mbahe sãacuá vahe siru reseve viroyepota chupe. Ahe oipiyere Jesús ãca rese. ⁸ Orosepiase rumo oroñemoiro aipo orohe oreyeupe:

—¡Mahera vo co omocañi tẽi! ⁹ Omondo vahe ité tie co setá guarepochi rupi ava iparaisu vahe pĩtiviã ãgua viña —orohe tẽi chupe.

¹⁰ Jesús rumo oicua ore pihanemoñetasa. Sese aipo ehi oreu:

—¡Mahera vo co cuña pemañeco tẽi! Esepia, co mbahe oyapo vahe aviye ité cheu. ¹¹ Ava iparaisu vahe niha yuvirecoiño itera pe pãhuve. Che rumo ãgüe ndahe viteñoi chira vichico pe pãhuve. ¹² Esepia, co cuña oipiyere mbahe sãacuá vahe che rese che tĩ ãgua renondeve. ¹³ Supi eté aipo ahe pẽu: co ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas Iscariote oyemoingatu Jesús mondo ãgua yamotarẽhimbar povrive

¹⁴ Ipare ñepeï ore pãhu pendar, Judas Iscariote, oso, oñehe pahi eta rerecuar yuvirecoi vahe upe ¹⁵ aipo ehi:

—¿Mbovi rupi vo pemboepira cheu amondose Jesús pẽu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rõtave aipo peyera chupe: ‘Ore Mbohesar aipo ehi: Cõimi che mano ãgua, sese ayapo potami sõtave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pĩtu ramomise, opacatu orogupari mesave Jesús piri ore caru ãgua. ²¹ Ore carusave aipo ehi oreu:

—Supi eté aipo ahe pẽu: ñepeï pe pãhu pendar che mondora che amotarẽhisar upe —ehi.

²²—Che Yar, ¿che p̄iha? —orohe-rohe t̄ei ñepei-pei ore yacatu ore v̄ihar̄ehisa p̄ipe chupe.

²³—Omondo vahe opo che caro p̄ipe, ahe che mondora che amotar̄ehisar upe —ehi—

²⁴ Imboav̄iyesa itera che, Ava Riqueh̄ir, rese ñehesa icuachiap̄ri. ¡Iparaisu catura rumo acoi mb̄ia che mondosar! Av̄iye catura ndoyesuisse viña —ehi.

²⁵ Ahese Judas imondosav̄i oporandu:

—Ore Mbohesar, ¿che tie? —ehi.

—Taa, ¡nde ité niha ěḡue erera! —ehi chupe.

²⁶ Ore caru v̄iteseve, Jesús oip̄isi pan, “Av̄iye ndeu” ehi Vu upe. Aipo ohe pare, omboh̄i-mboh̄i oreu imondo, aipo ehi:

—Ndo co, pehu co che rete —ehi.

²⁷ Ipare oip̄isi igua r̄iru, “Av̄iye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruv̄i, ahe omoimera che Ru remimbotar ip̄iasu vahe p̄eu, ahe oyep̄iyerera ava reh̄i angaipa rese ñero āgua. ²⁹ Ndaihu iri chira uva ricuer cheu ar̄i oyepotase voi che Ru mborerrecuasave aihura pe rese ambuae uva ricuer ip̄iasu vahe —ehi oreu.

Jesús, “ ‘Ndaicuai vahe ité aipo mb̄ia’ erera cheu” ehi Pedro upe

³⁰ Ore sapucaire, oroso iv̄it̄ri Olivo ve. ³¹ Evocoyase Jesús aipo ehi oreu:

—Opara pemocañi che rese yeroyasa peyesui co p̄itu p̄ipe. Esepia, acoi icuachiap̄ri p̄ipe aipo ehi: ‘Ayucara ovesa r̄ārosar, ahese oñemosai t̄eira ovesa opacatu rupi yuvireco’ ehi vahe. ³² Che cuerayev̄ire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayep̄ep̄i chietera nde sui —ehi chupe.

³⁴ —Che rumo supi eté aipo ahe ndeu: co p̄itu p̄ipeve voi eté tacura ñeh̄e renondeve, “Ndaicuai vahe ité aipo mb̄ia” erera mbosap̄i oyupaḡuer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mb̄ia” ndahei chietera —ehi-ehi catuño ité chupe.

Aipo orohe p̄ave tup̄ri t̄ei chupe.

Jesús oyerocūi Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguap̄i cohav̄e; che aso ranera peve catumi, ayeroqūi —ehi.

³⁷ Aheve v̄iraso Pedro oyeupi iyavei ñuv̄ir̄io Zebedeo rah̄ir. Ahese oyandu ov̄ihar̄ehisa oico. ³⁸ Evocoyase ahe aipo ehi chupe:

—Ndav̄ihai eté. Esepia, che h̄ã oyandu ité manosa. Pep̄ita rane cohav̄e iyavei pemahemohara pe yeroqūi p̄ipe che rese —ehi.

³⁹ Evocoyase oso tenonde catumi. Aheve oñenop̄iha ovap̄i iv̄i rese oyerocūi Vu upe aipo ehi: “Che Ru, iyase ndeu che renose mbahe-mbahe t̄ei sui eve; tayapo eme ru che remimbotar t̄ei, nde remimbotar rupi catu tayapo” ehi.

⁴⁰ Ipare oyev̄i güemimbohe upe. Ahe rumo opaño yuv̄iroque yuv̄irocua. Ahese aipo ehi Pedro upe:

—¡Ndapeñemosai eté vo pe ropesīi upe che r̄āro āgua que ñepei hora che monduḡue āgua peye! ⁴¹ Pemahemoha, peyerocūi mbahe t̄ei p̄ipe pe v̄iapiēhi āgua. Supi eté pequer̄ehi ité viña, pe retecuer t̄ei niha nipiratai p̄eu —ehi.

⁴² Ichui imoñuv̄ir̄iosa rupi oso iri oyerocūi aipo ehi: “Che Ru, ereipotase che reique āgua co mbahe t̄ei p̄ipe, eyapo nde remimbotar che rese” ehi.

⁴³ Ipare oyev̄ise, osesap̄iha iri iquesave ou. Esepia, sopes̄i nomboyeroyai eté yuvireco.

⁴⁴ Evocoyase oseyapa iri oso oyerocūi āgua imombosap̄isa rupi. Aipo ehi tup̄riño avei oyerocūi Vu upe. ⁴⁵ Ipare oyev̄i iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive. ⁴⁶ Pepũha, yaso. Esepia, cõimi eté che amotarẽhisar upe che mondo vaheã secoi —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepe semimbohe ore pãhu pendar, iyavei setá iteanga ava yugũeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuaita rupi oyapo yuvireco. ⁴⁸ Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi. ⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. ⁵³ ¿Ndereicuai vo aporanduse che Ru uve viña, ahe evocoyase cõritei voi omboura doce mil sui setá catu vahe güembigui che repi ãgua viña? ⁵⁴ Ëgüe ehise rumo Tũpa Ñehengagüer icuachiapri ndayaviyei chietera viña, ahe co cõritei osupiti —ehi.

⁵⁵ Ahese aipo ehi ava rehi upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tũparo pipe, ndapeyapoi eté co nungar cheu. ⁵⁶ Co rumo opacatu Ëgüe peye Tũpa ñehe mombehusar rembicuachiagüer mboaviye ãgua cute —ehi ava rehi upe.

Ahese voi opacatu oroñemosai, oroseya ahe aetemi Jesús ava rehi upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rõtave yuvireco, ahe pahi rerecuar ivate catu vahe secoi. Aheve oñemonuha Moisés porocuaita rese oporombohe vahe, judío rerecuar yuvirecoi vahe avei no. ⁵⁸ Pedro rumo amombri rupive tõi osaquicue moña oso. Ëgüe ehi oyepota pahi rerecuar ivate catu vahe rëta rocar ãchisave. Aheve oique ipipe, iyavei oguapi oĩ sundao pãhuve ‘¿mara ehi etera pĩha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca tõi ava Jesús amotarẽhisave yuca uca ãgua yuvireco, ⁶⁰ yepe oyemboyecua setá iteanga yamotarẽhisar semira-mira tõi vahe yuvireco viña, ndoyosui eté rumo mbahe sembiapo naporai vahe yuca uca ãgua yuvireco. Aheseve yugũeru ñuvirío yamotarẽhisar oporombopa-mbopa tõi vahe yuvireco cute.

⁶¹ —Co mbia aipo ehi: ‘Che aicatu co tũparo monduru; aicatu aveira imopuha iri mbosapi ari rupi’ ehi —ehi tõi yuvireco chupe.

⁶² Ahese pahi rerecuar ivate catu vahe opũha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarẽhisar nde rese oñehe? —ehi.

⁶³ Noñehei eté rumo. Ahese,

—Che orocuai Tũpa supi eté vahe rer pipe emombehu oreu: ¿Poropisirosar ité nde ereico, Tũpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pẽu, che repiara niha peye che, Ava Riquehir, aguapise Tũpa mbahe mboavaisarẽhi acato coti, ayevise avei iva quĩha rese curi —ehi.

⁶⁵ Evocoyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrítei. ⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanofño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbuo Poropĩsĩrosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoyase oguapi sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cõhe ramose, ahese opacatu pahi eta rerecuar, judío rerecuar avei oñemonuha atĩ oyemboyoya guasu ‘Jesús tayucasa ité’ oyapave yuvireco. ² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tūparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevĩ ãgua aipo ehi:

⁴ —Che ayemboangaipa tiēte vichico. Esepia, amondoño tēi mbia seco catupri vahe pēu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirã repri tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehögüer tĩ ãgua’ oyapave yuvireco.

⁸ Sese cūrítei co ivi upe, “Ava ruvi repri tēi” ehi yuvireco yepi. ⁹ Eñgüe ehi co imboaviye ité

Tūpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua. ¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tūpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tēi yuvireco. Nomboyevei eté rumo iñehe chupe oyeepi ãgua.

¹³ Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevei eté rumo que ñepe angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepe ava soquendapri renose ãgua Pascua pieta pipe ava rehi remimbotar rupi yepi. ¹⁶ Aheve oime soquendapri mbia icuapri vahe ité Barrabás serer vahe; ¹⁷ evocoyase ava rehi oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pñha, anise Jesús “Poropñisrosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatēhisa pipe sui imondopri secoise.

¹⁹ Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehi omonguerēhi, “Barrabás tosē; Jesús evocoyase tomano” he ãgua yuvireco. ²¹ Evocoyase Pilato oporandu iri ava rehi upe:

—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tosē! —ehi yuvireco.

²² —¿Mbahe vo evocoyase che ayapora Jesús rese chupe acoi ava, “Poropñisrosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tēi ava rehi upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoyase Pilato: “Ndaicatui mbahe moingatui sepi ãgua” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehi rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica ãgua.

²⁷ Evocoyase mborerecuar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco. ²⁸ Ahese osequipa iturucuar ichui. Ipare omonde turucuar pñra vahe yuvireco sese ²⁹ iyavei omonde ñaca rese yu piapri, omondo avei ñepe tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayî tēisa pîpe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pîpe ñaca rese yuvireco. ³¹ Ëgüe ehi yoyai catu-catu yuvireco. Ipare vîrocuase turucuar pîra vahe ichui, ahese omonde iturucuar ité yuvireco sese. Ichui vîraso curusu rese yatica ãgua yuvireco cute.

Jesús yaticasa curusu rese

³² Acoi yuvinosese yuvîraso, osepia mbîa Cirene pendar, Simón serer vahe. Ahe chupe, “Erio, terevosii co curusu Jesús vîreco vahe rese” ehi voîño tēi yuvireco.

³³ Oyepotase yuvîraso Gólgota serer vahesave, ahe ‘ava ãcagüer’ oya aipo ehi chupe, ³⁴ aheve uva ricuer imboyesehapri mbahe pîhapiar rese omondo tēi yuvireco Jesús toihu. Osâha tēi, ndoihu potai rumo.

³⁵ Ipare oyatica curusu rese yuvireco. Ahese sundao iguayîño oyeupe iturucuar mboyaho-yaho ãgua rese. ³⁶ Ipare aheve oguapî yuvînoi sâro. ³⁷ Iyavei omombehu ivate curusu rese ñaca harîve mbahe sui oyuca yuvireco: “Co Jesús judío rerecuar guasu” ehi icuachiapri oî.

³⁸ Ñuvîrío imonda rai vahe yaticasa avei curusu rese supive yuvireco, ñepeî mbahe rese ipocosa coti, ambuae evocoyase mbahe rese ipocoêhisa coti yuvireco. ³⁹ Acoi ava ñocuasar îñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tûparo amonduru. Ipare mbosapî arî rupi opa irira amopuha” ere acoi cuese. ¡Eñepîsîro ru nde ae cute! ¡Tûpa Rahîr nde recose, egüeyî curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuaîta rese oporombohe vahe iyavei judío rerecuareta avei; ahe îñehe mara-mara tēi yuvireco chupe aipo ehi:

⁴² —Oipîsîro ambuae, ahe ae rumo ndoicatui oñepîsîro. Israel rerecuar guasu secoise, ¡togüeyî curusu sui cûritei, ahese voi seroyasara! ⁴³ Ahe oyeroya Tûpa rese, Tûpa evocoyase oipotase, toipîsîro cûritei. Esepia, ahe, “Che Tûpa Rahîr aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbîter arî pîpe, opa tupri pîtu ivi rupi. Ëgüe ehi las tres rupi. ⁴⁶ Ahese tupri avei Jesús oñehe pîrata aipo ehi: “Elí, Elí, ¿lema sabactani?” ehi, (ahe ‘che Ru Tûpa, che Ru Tûpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse îñehe, aipo ehi yuvireco:

—Esendu co mbîa, Tûpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaquî vinagre pîpe imondo ivîra apri rese chupe ‘toihu’ oya. ⁴⁹ Ambuae rumo aipo ehiño yuvireco:

—Ëgüe tehiño rane, ¿oura pîha Elías ipîsîro ãgua? —ehi yuvireco.

⁵⁰ Ahese Jesús sâse pîrata iri, omano. ⁵¹ Ahe pîpeve voi tûparo guasu turucuar ivate coti sui ovo tupri. Aheseve avei ivi orîriî iyavei îta guasu-guasû oyeca. ⁵² Tehögüer ruvîpa îta apopri avei oyemboi yuvireco iyavei setá Tûpa reroyasar omano vahecuer, ahe avei opa ocuerayevî yuvireco. ⁵³ Ëgüe ehi Jesús cuerayevîre, ahe opa yuvînose tehögüer ruvîpa sui. Ipare yuvîroi que Jerusalén maranehi pîpe. Aheve setá ava upe oyemboyecua yuvireco.

⁵⁴ Evocoyase co sundao rerecuar iyavei Jesús rârosareta, ahe oyanduse ivi rîriî yuvireco iyavei ambuae mbahe êgüe ehi vahecuer repiase, ahese oyembosîquiye guasu aipo ehi yuvireco:

—¡Supi eté catu co mbîa Tûpa Rahîr ité secoi! —ehi tēi yuvireco.

⁵⁵ Iyavei setá cuña aheve amombrive osepiá catu yuvinoha, ahe acoi Galilea sui yugüeru vahecuer Jesús rupi iyavei setá rupi oipítivi yuvireco yepi. ⁵⁶ Ahe ipãhuve María Magdalena secói, iyavei ambuae María ahe Santiago, José sí, Zebedeo rahír sí avei supí secói.

Jesús apocatu agüer tuvipa pipe

⁵⁷ Pítu potase, ou mbía mbahe yar José serer vahe, ahe Jesús reroyasar tecua Arimatea pendar. ⁵⁸ Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi. ⁵⁹ José evocoyase viraso sehögüer. Ipare oimama tupri turucuar secose vahe ndiquihai vahe pipe. ⁶⁰ Ichui omoingue ombahe tuvipa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso. ⁶¹ Aheve María Magdalena ambuae María rese suvipa rovai oguapi yuvinoi.

Jesús ruvipa osãro sundao yuvireco

⁶² Ahere ayihive mbituhusa ari pipe, yuviraso pahi eta rerecuar iyavei fariseo Pilato upe mbahe rese oporandu ãgua ⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vitese —ehi yuvireco—. ⁶⁴ Sese emondo sundao sehögüer ruvipa rãro tupri ãgua mbosapi ari rupi semimbohe ñomiëhi ãgua pítu pipe yuvireco. Aviyeteramo, “Ocuera yevi omano vahe pãhu sui” aipo ehi tupri tẽi tiëtera ava upe yuvireco. Aipo ehise yuvireco, yipindar semira tẽi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pẽu. Peraso, pemoviracua tupri ité sãro ãgua —ehi.

⁶⁶ Evocoyase yuviraso tehögüer ruvipa rãro tupri ãgua yuvireco. Ahese omondo tehögüer rovapisa ita guasu rese mbahe imomiisa cua ãgua yuvireco. Ipare oseya aheve sundao sãro ãgua yuvireco cute.

28

Jesús ocuera yevi

¹ Cõhe ramomise, domingu pipe, María Magdalena iyavei ambuae María yuviraso tehögüer ruvipa repia yuvireco. ² Aviyeteramo tẽi orirí piratá ivi Tũpa rembiguai iva sui igüeyise. Ègüe ehi oyepota tehögüer ruvipave ou, ahe virocua itape guasu sovapisa ichui. Ipare iharive oguapi oĩ. ³ Ègüe ehi sendí iteanga aviye acoi overa vahe. Iturucuar evocoyase morochí eté. ⁴ Osepiase sundao, orirí eteanga osiquiyepave yuvireco ichui, opa oyuca pucu-pucu tẽi yuvireco. ⁵ Tũpa rembiguai rumo aipo ehi voi eté cuña upe:

—Pesiquiyeyi rene. Esepia, che aicua pe peseca Jesús yatıcapırer. ⁶ Ndipoi eté cohave. Esepia, ahe ocuera yevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuera yevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pẽu —ehi Tũpa rembiguai cuña upe.

⁸ Evocoyase cuña yuviraso poyava voi suvipa sui, osiquiye pãhuve rumo ovihãno yuvireco; ègüe ehi yuvinoñá iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco. ¹⁰ Evocoyase ahe aipo ehi chupe:

—Pesiquiyeyi rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco. ¹² Evocoyase pahi rerecuareta oñemoñeta judío rerecuar rese opihañemoñeta mboyoya água. Ichui omondo setá guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve pĩtu pipe, ahese revo Jesús remimbohe yugüeru sehögüer ñomi água ore sui” peyera —ehi mborerecuar yuvireco chupe—

. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cūrítei judío Jesús cuerayevisa reroyaëhi yuvireco yepi.

Jesús omondo güemimbohe ivi yacatu rupi oñehengagüer mombehu água

¹⁶ Evocoyase ëgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro tēi ore pãhu pendar ndoviroya tupri vitei yuvireco viña. ¹⁸ Evocoyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco água ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaheerã; peñapiramo avei che Ru rer pipe, che rer pipe, Espíritu Santo rer pipe avei no.

²⁰ Iyavei pembohe che opacatu pe mbohe agüer reroya água rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tūpa Rahir, recocuer resendar amombehu potami pëu. ² Yipindar Tūpa aipo ehi imombehu oñehe mombehusar Isaías rembicuachía pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipirata vahe ava porêhisa: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Ëgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tūpa upe, ahese opoãpiramora Tūpa pëu ñero ãgua pe angaipa rese” ehi ava upe. ⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei. ⁷ Ahe aipo ehi oñehe ava upe oico: “Che raquicuei oura seco pirata catu vahe che sui, sese cheu ndiyai chira ayeaivi ipitaquisã yora ãgua. ⁸ Che supi eté opoãpiramo i pipe tēi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osē tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osē ramoseve i sui, Jesús osepia i va oyemboi tupri, ahese Espiritu ogüeyi iharive apicasu nungar. ¹¹ Ahese oyeendu ñehesa i va sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mimba vai pãhuve. Aheve avei Carugar osecoãha; Tūpa rembiguai i va pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cōimi eté Tūpa mborerecuasa yandeu. Sese, pemboasi pe angaipa, peyevi Tūpa upe, iyavei peroya co ñehesa aviye vahe Tūpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepe ari Jesús uguata i pa Galilea ivi. Ahese osepia Simón, tivri Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chñhi uguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoyase vu oseya carite pipe ipitivisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbihusa ari pipe, Jesús oique oporombohe tūparove. ²² Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco piratasa pipe, ndahei Moisés porocuita

rese oporombohe vahe nungar. ²³ Aheve mbia ahe tecua pendar vireco vahe caruguar oyese, oñehe pĩrata chupe aipo ehi:

²⁴ —¿Mahera vo ereyuño tẽi cohave oreu, Jesús Nazaret pendar? ¿Ereyu vo ore mocañi ãgua tẽi? Che orocua ité, nde Tũpa suindar ndaseco marai vahe ereico —ehi chupe.

²⁵ Oñehe pĩrata rumo caruguar upe aipo ehi: —¿Quiriri, esẽ co mbia sui! —ehi chupe.

²⁶ Evocoyase caruguar mbia rese secoi vahe omoehoha seiti ivive, sãse, osẽ oso ichui.

²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pĩha co? ¡Iporombohesa ipiasu vahe ité! ¡Co mbia vireco ité omborerecuasa! ¡Caruguar avei eté omboyeroya oyeupe iñehese! —ehi tẽi ava yuvireco.

²⁸ Cũriteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tũparo sui, yuviraso Santiago, Juan rese Simón, Andrés rõtave.

³⁰ Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco. ³¹ Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pĩtu ramose opacatu imbaheasi vahe iyavei caruguar vireco vahe viraso yuvireco chupe imbogüera ãgua. ³³ Opacatu ava ahe tecua pendar oñemonuha oquendipive yuvireco. ³⁴ Evocoyase setá ombogüera mbaherasi-rasi tẽi vireco vahe, iyavei omboyepipi setá caruguar ava sui. Ndoipotai rumo caruguar ñehe. Esepia, ahe oicua ité evocoyase seco yuvireco.

Jesús Vu Tũpa Ñehengagüer omombehu judío tũparo rupi

³⁵ Ayihiteve Jesús oñarapuha oso ava porẽhisave oyerogui ãgua. ³⁶ Evocoyase Simón ondugüer reseve yuviraso seca. ³⁷ Osepiase,

—Opacatu ava nde reca tẽi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tũpa Ñehengagüer mombehu ãgua aheve; evocoi nungar apo ãgua niha che ayu —ehi.

³⁹ Êgüe ehi oguata opacatu Galilea ivi rupi, omombehu Vu Tũpa Ñehengagüer judío tũparo yacatu rupi oico, iyavei setá omose caruguar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cũritei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatu ava upe. Sese Jesús ndoicatu iri güeique ãgua güecocuer mombehuse tecua rupi; secoiño tẽi tecua popi rupi ava porẽhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyevi ou tecua Capernaum ve, ahese opacatu oyandu ñepe oive secoise yuvireco. ² Cũriteimi voi eté setá ava oñemonuha yuvireco secosave. Sese

ndipoi eté ava reique iri ãgua oi pïpe oquendipï rupi. Ahe rumo omombehuño ité Vu Ñehengagüer. ³ Aheve irungatu mbïa viroyepota ndoguatai vahe yuvireco chupe. ⁴ Ahe rumo ndiyai seroique ãgua Jesús uve ava rehïisave yuvireco. Sese viroyeupi oi harïve seraso yuvireco. Aheve teca virocua oi sui yuvireco; supï viroyï supa reseve imondo Jesús rovai tupri yuvireco. ⁵ Ahe oicuae co mbïa yuvirecoi vahe oyese yeroya, aipo ehi imbaheasi vahe upe:

—Che rahïr, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipïhañemoñeta aheve yuvinoi: ⁷ “¿Mahera co mbïa aipo ehiño tēi oñehe? Ahe oyemboivate ai tēi vahe Tūpa ñehe nungar pïpe tēi oñehe. Tūpañō ité niha oicatu ava angaipa upe oñeroi ãgua” ehi. ⁸ Ahe rumo oicuaño ipïhañemoñetasa, sese aipo ehi:

—¿Mahera vo pepïhañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pïha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehïr, areco mborerecuasa co ivï pïpe ava angaipa upe che ñero ãgua —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepïhamondï yuvireco, omboetei Tūpa yuvireco aipo ehi:

—Yïpïsuive ndayasepiai vahe ité co nungar mbahe —ehi tēi yuvireco.

Jesús oñehe mbïa Levï serer vahe upe

¹³ Ipare Jesús oso iri ipa ivïi. Aheve oporombohe oyese ava rehïi yemboyase. ¹⁴ Ichui uguata vïtese, osepia Levï, Alfeo rahïr, guarepochi rerocuasave chinise, aipo ehi chupe: —Erio che rupi —ehi.

Evocoyase Levï opūha, oso voi supï.

¹⁵ Ipare ocaru Levï rētave güemimbohe reseve yuvireco, ava sui guarepochi rerocuasar iyavei ava yangaipa vahe pãhuve. Esepia, setá ava osaquicue moñaño ité yuvireco.

¹⁶ Evocoyase Jesús ocaruse ipãhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pãhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeï ari pïpe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase movïro mbïa ipãhu pendar yuvïraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepï —ehi yuvireco chupe.

¹⁹ Evocoyase omboyevï ahe ava upe:

—¿Ndiyai eté ichohopri mendasave iyecuacu ãgua imer oicove vïtese ipãhuve! ²⁰ Oimera rumo ari imer reraso ãgua ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipïasu vahe pïpe. Esepia niha, ipïasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité. ²² Iyavei uva ricuer ipïasu vahe ndiyai iñasa mbahe pïrer cuacua pïpe. Esepia, uva ricuer ipïasu vahe osose mbahe pïrer cuacua vahe pïpe, ombopuñora, uva ricuer

evocoyase ocañipa tẽira, iyavei mbahe pিরer ocañi tẽi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepe mbituhusa ari pipe, Jesús uguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhi yuvireco. ²⁴ Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oique Tũpa rẽta pipe pan imboeteipri Tũpa upendar reca ondugüer reseve yuvirohu ãgua. Ahe chupe acoi ndipotasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oique iri judío tũparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pãha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tẽi. ³ Evocoyase Jesús aipo ehi co mbia ipo nomii vahe upe:

—Epũha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pãha, mbahe naporai vahe tie? ¿Yaipĩsiro pãha ava recocuer, yamocañi uca tẽi tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese voriehısave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahese fariseo opa yuvınose yuvıraso oyemoingatu Herodes rupindar rese Jesús yuca ãgua yuvireco.

Ava rehii ipa popi rupi yuvirecoi

⁷ Ipare Jesús yuvıraso güemimbohe reseve ipa popi rupi, ava rehii avei ivi Galilea rupindar yuvıraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia ãgua. ⁹ Sese oyocuai güemimbohe vireco voi vahe rã ñepe carite yuvireco ava omboti etepriehi ãgua yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuvıraso chupe sese opoco ãgua.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tũpa Rahir ereico! —ehi.

¹² Jesús rumo oñehe pĩrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo ãgua güemimbotar rupi. Ichui oyugüeru yuvireco chupe. ¹⁴ Ahe ipãhu pendar osenoi doce tupri güemimboherã ‘toguataño che rupi, tomombehu Tüpa Ñehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa carugar ava sui imboyepepi ãgua yuvireco’ oyapave. ¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatëhi vahe pãhu pendarer; ¹⁹ iyavei Judas Iscariote, ahe omondo vaheerã Jesús yamotarëhisar upe.

“Jesús carugar pĩratasa vireco oyese” ehi tẽi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru ãgua yuvireco. ²¹ Oyanduse imu secocuer yuvireco, oyugüeru seraso ãgua ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipĩratasa pipe tẽi omboyepepi carugar ava sui” ehi yuvireco.

²³ Evocoiyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pĩratasa ocañi tẽira. ²⁵ Acoi oñemu oyese ae oyeamotarëhise, oyemboyahose yuvireco viña, ahe ndipocopi chiaveira yuvireco. ²⁶ Acoi carugar oyemboyahose ovava ãgua oyeupe ae yuvireco, ndipocopi chiaveira yuvireco, ahe evocoiyase secocuer ocañi tẽi vaheerã ité yuvireco.

²⁷ “Ndipoi eté niha ava oi que vahe que ava ipĩrata etepri vahe rëta pipe imbahe rerocuapa ãgua ichui; oñapichi rane itera. Ipare voi opara imbahe virocuia ichui.

²⁸ “Supi eté aipo ahe pëu: Acoi ava yangaipa vahe upe Tüpa iñerora opacatu yangaipa rese, iñehe-ñehe tẽisa rese avei. ²⁹ Acoi iñehe-ñehe tẽi vahe rumo Espiritu Santo rese, ahe chupe ndipo iri chietera ñerosa apirëhi vaheerã ité” ehi.

³⁰ Aipo ehi Jesús imboyevi ava upe. Esepia, “Carugar tẽi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichë ãgua. ³² Yivi yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tẽi yuvireco —ehi.

³³ Ahe rumo,

—¿Ava pĩha che si; ava pĩha che rivireta yuvirecoi? —ehi.

³⁴ Evocoiyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tüpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oi oñehe. Ava rumo opacatu ivi ãtasa rupi opitaño yuvireco. ² Evocoiyase ava mbohe ãgua omboyoya tecocuer mbahe tĩsa rese aipo ehi:

³ “Pesendu co ñehesa: Ñepe mbia osë omaheti. ⁴ Ahe otĩapi-apĩise mbahe rãhii oso, moviro oviapi peri rupi. Vĩrai yugüeruse rumo, opaño yuvirohu. ⁵ Iyavei moviro oiti ivi

nayanai vahesave, ita pãhuve. Sese cūrteimi sorì. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rãhii oiti yu pãhuve; ahe yu rumo sorì poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rãhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehi upe.

¿Mahera pãha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pëu niha Tũpa oicua uca mbahe ndicuasai vahe omborerrecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tẽira, ndosepiacuai chietera rumo yuvireco. Iyavei yepe osendu tẽira, ahe rumo ndosenducuai chietera yuvireco, Tũpa upe oyevi potaẽhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

¹³ Iyavei aipo ehi: “¿Ndapesenducuai vo aipo porombohesa? ¿Mara peyera ru opacatu ambuae che porombohesa cua tupri ãgua? ¹⁴ Evocoi mbahe rãhii oñoti vahe, Tũpa Ñehengagüer mombehusar nungar. ¹⁵ Amove ava recocuer inungar co mbahe rãhii seitipri peri rupi: osendu angahu Tũpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rãhii seitipri ita pãhu rupi: osendu Tũpa Ñehengagüer, oipisi tupri angahu oyeupe nara vorivetesá pipe; ¹⁷ ndovirecoi rumo guapo oyese opirata ãgua. Evocoyase yuvirecoise mbahe-mbahe tẽi pipe Tũpa Ñehengagüer sui tẽi, cūrteimi seroyaẽhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rãhii ñotimbrì yu pãhu rupi: osenduse ñehesa Tũpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saissave. Oyembopa uca rumo ombahe eta upe. ‘Opacatu ité mbahe tareco’ ehi tiẽte viña. Ipipe sui omocañi tẽi Tũpa Ñehengagüer. Ndoypa ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tũpa Ñehengagüer seroyasa pipe, oyapoño ité mbahe aviye vahe. Ahe inungar mbahe rãhii ñotimbrì ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrìve nara tẽi iyavei yande rupavrive nara tẽi no? Aní, tataendi imondosa ivate poroesape ãgua. ²² Ndipoi chietera mbahe ñomipri ndayasepiai vahrã curi. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pëu. Iharive amondo iri catura pëu. ²⁵ Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

Yembohesa mbahe rãhii rorisá resendar

²⁶ Aipo ehi iri avei Jesús: “Tũpa mborerrecuasa co ivi pipe inungar que ava oñoti vahe mbahe rãhii. ²⁷ Omaheti pare, oso oque. Ipare coiye catu oñarapuha. Ahe oñocua pĩtu, arì avei, evocoyase mbahe rãhii sorì poyava yuvireco. Itisar rumo ndoicuai mara ehi vorì. ²⁸ Ivi rese niha oyesu miti: yipindar sorì, ipare iha, ipare sãhii yuvinose sese. ²⁹ Evocoyase co mbia mbahe ha yaviyese, oipoho. Esepia, oyepota arì ipoho ãgua chupe” ehi.

Yembohesa mostaza rãhi suindar

³⁰ Iyavei aipo ehi: “¿Mara ehi vo Tũpa povri pendar co ivi pipe pẽu; mbahe rese pĩha iyacatu imboyoyasa icua ãgua? ³¹ Ahe oyoya tupri mostaza rãhi rese. Ahe tahimi catu opacatu ambuae mbahe rãhi sui. ³² Ñoti pare rumo, sorĩ, ocuacuase tuvichá catu ambuae mbahe miti sui. Sãca tuvichá ité, sese vĩrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ëgüe ehi Jesús oporombohe Tũpa Ñehengagüer rese, omboyoya-yoya ñepe mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaẽhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pĩtu ramomise, aipo ehi güemimbohe upe:
—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi. ³⁷ Oyepotase rumo ivitu ai ipĩrata vahe, i ohitu vahe oha guasu-guasú carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porumbohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pĩrata ivitu ai upe, ipa upe avei:
—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:
—¿Mahera pesiquiyé iteanga? ¿Ndapeyeroa vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:
—¿Ava pĩha co mbia secoi? Esepia niha, ivitu ai, ipa avei omboyeroa —ehi tẽi yuvireco chupe.

5*Mbia Gerasa iguar vireco vahe carugar oyese*

¹ Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe. ³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tẽi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pĩtu rupi oguata, osapucaí oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pĩrata chupe:

—¡Eyepepi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuehi ãgua eve! —ehi.

⁸ Aipo ehi, esepia, yipindar Jesús aipo ehi chupe:
—¡Carugar mbahe tẽi vahe, esẽ co mbia sui! —ehi chupe.

⁹ Aheve oporandu chupe:
—¿Mara vo nde rer? —ehi.

Ahe omboyevi chupe:
—Che rer Legión. Esepia, ore rehi eté —ehi.

¹⁰ Oporanduño chupe omondopaẽhi ãgua co ivi sui. ¹¹ Ichui namombriimi setá cuchi ocaru vahe ivitri rese yuvireco. ¹² Sese carugar oporandu yuvireco chupe:
—Ore mondopaño cuchi aviterve eve —ehi yuvireco.

¹³ Evocoiyase Jesús omondo caruguar sê ãgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoiyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pñha?’ oya yuvireco. ¹⁵ Oyepotase Jesús recosave, aheve osepia mbia caruguar vireco vahecuer yuvireco oyemonde tuprise oñ, yaracua tuprise avei. Ahese oyembosiquiye tñi yuvireco. ¹⁶ Mbahe oime vahe caruguar vireco vahe rese, cuchi rese avei, ahe sepiasar omombehupa ambuae ava upe yuvireco. ¹⁷ Evocoiyase ava Jesús upe: “Esê cohava sui” ehi yuvireco.

¹⁸ Oha irise Jesús carite pipe, co mbia caruguar rerecosarer oporandu chupe supi oso ãgua. ¹⁹ Ahe rumo,

—Esoño nde rêtave, nde mu pñri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoiyase ava opacatu, “¡Mara ehi rutei!” ehi tñi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyeveise Jesús carite pipe ipa rovai oso, aheve oñemonuha ati ava yuvireco chupe. Ahe evocoiyase opitaño ipa popive. ²² Evocoiyase oyepota mbia mborerercuar tñparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tñi nde po iharive imbogüera ãgua —ehi.

²⁴ Evocoiyase oso supi. Ava rehi avei yuviraso supi. ²⁵ Ipãhuve avei oime cuña doce araviter rupi suvi yepiyere-yere vahe. ²⁶ Iparaisú iteanga, setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri tñi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, oguata saquicuei oso ava rehi pãhuve, iturucuar rese opoco. ²⁸ Aipo ehi oyeupe oico: “Iturucuar rese apocose rumo, acuerara” ehi. ²⁹ Ahe ramoseve voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui. ³⁰ Jesús rumo oyandu osêse opñratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oiviindar rese ‘¿uma ité pñha opoco che turucuar rese?’ oya. ³³ Evocoiyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoiyase Jesús aipo ehi chupe:

—Che rayri, erecuera cñritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñehe vñteseve, oyepota moviro Jairo rñta pendar tayri mano mombehu yuvireco:

—Omano ité nde rayri. Aní eremañeco tñi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho ãgua; Pedro, Santiago, Juan güeraño oipota.

³⁸ Oyepotase Jairo rñtave, osepia ava yemondi oyaseho vahe. ³⁹ Ichui oiqueste oi pipe, aipo ehi:

—¿Mahera vo perãse guasu tñi peyaseho peyu? Co cuñatai nomanoi, oque tñi ou —ehi ava upe.

⁴⁰ Ava rumo opucae-eteño seroyaëhisave yuvireco. Evocoyase omose opacatu ava. Ipare omoingue iyésupa, ichi, oyeupindar reseve cuñatai rehögüersave. ⁴¹ Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare uguata. Sepiase ava, oyembosiquiye guasu yuvireco. ⁴³ Jesús rumo oyocuai imombehuëhi ãgua ambuae ava upe. Ipare,

—Pembocaru co cuñatai —ehi.

6

Jesús Nazaret ve secoi

¹ Jesús osë co tecua sui oso güecuave; semimbohe avei yuviraso supi. ² Oyepotase mbítuhusa ari, ahese oporombohe tũparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pñha vñnose co mbahecuasa co poromondiisa apo ãgua? —ehi yuvireco oyeupe—. ³ Co niha carpintero, María membri; Santiago, José, Judas iyavei Simón riquer, seindri avei yuvirecove yande pãhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sëta pipendar ae rumo nomboetei yuvireco —ehi.

⁵ Ndoicatui mbahe oporomondi vahe apo ãgua ava viroyaëhisa pipe, sese moviro tēi imbaheasi vahe harive omondo opo imbogüera ãgua. ⁶ Ndoyembovihai ava viroyaëhisa rese.

Jesús oyocuai güemimbohe Tũpa mborerecuasa mombehu ãgua

Ipare Jesús oso, uguata tecua-tecuami namombrii vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pñratasa carugar mboyepepi ãgua chupe.

⁸ —Ndaperaso chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei. ⁹ Iyavei pemondera pitaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesëra pecua. ¹¹ Acoi ambuae tecua pendar ndape pisi potaise, ndosendu potaise avei pe ñehe yuvireco, peyepeniñora ichui. Peipiteño aveira pe pi ivi rãtachigüer sui. Ëgüe pe hesa omboyecuar cañisa apirëhi yuvireco chupe —ehi.

¹² Evocoyase semimbohe eta yuviraso, “Pemboasi pe angaipa, peyevi Tũpa upe” ohe ãgua yuvireco. ¹³ Iyavei setá omboyepipi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipñrata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar arachendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cñritei ocuerayevi —ehi.

¹⁷ Herodías recocer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña.

Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoyase oyuca pota Juan yamotarēhisave; ndoicatu rumo yuca. ²⁰ Esepia, Herodes osiquiyeño ichui oicuase co mbia reco tupri aisa iyavei seco maranehise. Sese osepí ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrí cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osē oso, osi upe oporandu:

—¿Mbahe rese pīha aporandura chupe? —ehi.

Ichí aipo ehi chupe:

—Eporandu Juan Oporoāpiramo vahe āca rese —ehi chupe.

²⁵ Ipare cuñatai oña, oi que oso mborerecuar guapisave, aipo ehi chupe:

—Che aipota co pipeve voi eremboura Juan Oporoāpiramo vahe āca poratu pipe cheu —ehi.

²⁶ Mborerecuar rumo ndoyembovīhai tēi. Esepia, ava ichohopri rovaque ité yipindar oñehe. Sese ndoicatu, “Aní” ohe āgua. ²⁷ Evocoyase ipare voi mborerecuar oyocuai sundao Juan āca reru āgua. ²⁸ Sundao oso soquendasave, oaysia Juan āca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. ³¹ Ahese aipo ehi oapóstol upe: —Perio cohave, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru āgua yuvireco. ³² Evocoyase ahe güeraño apóstol reseve yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehí, ahese iparaisu ava eta chupe, inungar ovesa ndovirecoi vahe guārosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cōi vahesa rupi? Aheve tovirocua ocaru āgua yuvireco —ehi yuvireco chupe.

³⁷ Ahe rumo omboyeví:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pīha oreu doscientos denario pan repirā ava mbocarū āgua? —ehi.

³⁸ Jesús aipo ehi:

—¿Mboví vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapí capihí harí rupí. ⁴⁰ Cincuenta, cien rupí-rupí oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo

güemimbohe upe ava rehii upe imondo ãgua yuvireco. Pira ñuvirío vahe avei omboyahoyaho opacatu ava upe. ⁴² Evocoyase opacatu ava ocaru vahe ihitaropa tēi yuvireco. ⁴³ Ipare semimbohe omboapipopa doce tupri iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Peña pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese oyeroci ãgua. ⁴⁷ Pituse carite ipa mbiterve ité secoi. Jesús rumo ahe ae opitaño ivive. ⁴⁸ Ahese omahe güemimbohe rese iyeapicui catuēhise. Esepia, ivitu ipirata vahe osovaichi yuvireco. Cōhe potase, oguata i hari rupi güemimbohe coti oso. Aviye ité acoi oñocuaño vaherã oso. ⁴⁹ Sepiase rumo ‘hãgüer tēi revo’ oya, sãse pucu-pucu i hari rupi iguatase semimbohe yuvireco. ⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tēi! ¡Pesiquire eme che sui! —ehi güemimbohe upe.

⁵¹ Ahe ohasse carite pipe, opituhu voi ivitu. Evocoyase, “¡Mara ehi rutei!” ehi tēi yuvireco. ⁵² Esepia, ndoicua vitei eté pan apo ati agüer yuvireco, yavai vite seroya ãgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco. ⁵⁴ Yuvinosepa ramomiseve, ava oicua voi Jesús yuvireco. ⁵⁵ Ichui opacatu ahe ivi pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oi mi rupi, ahe supi imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ãgua iyepoiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracadendar recocuer sui ndipoisai eté yuvireco, sese oyepoiēhise ndocarui eté yuvireco yepi. ⁴ Mbahe rerocuasa sui oyevise, ndocarui oyepoiēhi viteseve yuvireco. Iyavei tecocuer aracadendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tupri.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramo aracadendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía aracadendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ëgüe peye pepoipa Tūpa porocuita sui ava recocuer aracadendar rupi tēi pe guata ãgua —ehi.

⁹ Iyavei aipo ehi iri chupe:

—Pe ramoi recocuer aracahendar pîpe tēi peseyaño co coti Tūpa porocuita. ¹⁰ Esepia, Moisés aipo ehi: ‘Pemboyeroyara iyavei peipîtivîira pe ru, pe si avei no. Acoi iñehe mara vahe oyesupa upe ahe, Tomanofno, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye; ¹² pe evocoyase, aipo ehi vahe upe, ‘Ndiyai eté oyesupa pîtivîi āgua’ peye. ¹³ Co nungar apo pîpe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vîte —ehi.

¹⁴ Ipare, “Perio” ehi iri ava rehî upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha āgua. Ahe rumo osē ipîha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pîpe. Aheve semimbohe eta oporandu yuvîreco co porombohesa omombehu vahe rese chupe. ¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava avîterve nomboangaipai eté? ¹⁹ Esepia niha, ndahei ipîhave oso, ahe rumo oso yavîterve. Ipare osē ichui —ehi ‘opacatu tembîhu avîyeño ité’ oyapave aipo ehi.

²⁰ Ipare aipo ehi:

—Ava pîha sui osē vahe rumo mbahe, ahe omonguiha ava recocuer. ²¹ Esepia, ava pîhañemoñetasa sui osē pîhañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoïrosa, ava rese ñemoñeta tēisa, teco ivate aisa, pîhañemoñetasa nihîvi vahe. ²³ Co mbahe opacatu naporai vahe yuvînose ava sui îmboangaipa uca āgua —ehi.

Cuña ndahei vahe judía vîroya Jesús

²⁴ Ichui Jesús osē oso tecua Tiro coti. Aheve oique oi pîpe, ndoyecua uca potai ava upe viña; ndoicatui rumo ava sui oñemi. ²⁵ Oime cuña vîreco vahe omembri cuñatai, ahe vîreco carugar oyese; ahe cuña oicuase Jesús recosa, oso voi sovai oñenopiha. ²⁶ Ahe rumo ndahei judía, sirofenícia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipîsi mbahe yuvîreco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahîcuer ovîapi vahe tahir mesavri pendar —ehi.

²⁹ Aipo ihese, aipo ehi:

—Avîye ité nde ñehe. Eyevî eso. Carugar osē nde membri sui —ehi chupe.

³⁰ Co cuña oyepotase güêtave, osepia omembri supave; yîpîve rumo osē carugar ichui.

Jesús ombogüera mbîa ndayapisai, iñehe ipîti-pîti vahe

³¹ Jesús oyevî oso Tiro ivî sui. Ipare osasa Sidón rupi oso, ambuae tecua eta Decápolis ivî rupi avei. Ichui oyepota ipa Galilea ve. ³² Aheve mbîa ndayapisai, iñehe ipîti-pîti vahe rerasosar: “Emondomi tēi nde po iharîve” ehi yuvîreco chupe. ³³ Ichui Jesús vîraso coi cotîmi ava sui. Aheve ocuã omonde yapîsa pîpe. Ipare omondo güendi ñapecu rese. ³⁴ Ipare omahe îva rese, ipîtuhe pucu aipo ehi: “¡Efata!” ehi (“timboisa’ ohesave aipo ehi).

³⁵ Ahe pîpeve voi yapîsa tupri, oñehe tupri avei. ³⁶ “Ndapemombehui chira ambuae upe” ehi ahe mbîa upe. Ahe rumo oîcua ucaño ité ambuae ava upe yuvîreco. ³⁷ Evocoyase ava oyembovîha guasusave, aipo ehi yuvîreco: “Avîye ité rumo mbahe sembiapo. ¡Esepia, ndayapisai vahe omboapîsa, iñehe ipîti-pîti vahe avei omoñehengatu tupri!” ehi yuvîreco.

8

Jesús oyopoi cuatro mil cuimbahe

¹ Ñepeí ari pipe setá ava oyemboya iri Jesús rese yuvireco. Ndipoi rumo mbahe icaru ãgua. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapí ari yuvirecoi yande píri, iyavei ndipoi eté mbahe semihura. ³ Amondopase sêlave sieporêhi reseve, virovíapi-ápi tiêtera tieporêhi perí rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porêhisave? —ehi.

⁵ Ahe oporandu:

—¿Mboví vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapí iví haríve” ehi ava rehí upe. Ahese oipísi siete pan, “Avíye ndeu” ehi Tũpa upe. Ichui omboyaho-yaho pan imondo güemimbohe upe, semimbohe evocoyase omondo ava rehí upe yuvireco. ⁷ Iyavei víreco movíro pírami yuvireco, sese avei, “Avíye ndeu” ehi iri Tũpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihĩtaro yuvireco. Ipare rumo semimbohe omboapípo iri rane sumbírer siete iruova yuvireco. ⁹ Ava rehí ocaru vahe retacuer cuatro mil tuprí. Ipare Jesús, “Avíye, peso tuprí” ehi ava upe. ¹⁰ Ipare voi eté yuvíraso güemimbohe eta reseve carite pípe Dalmanuta iví rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepí-epí ãgua yuvireco. Jesús recoãha ãgua, oporandu íva pendar poromondiisa rese ‘¿Tũpa sui eté píha ou?’ oya yuvireco chupe.

¹² Sese Jesús ipítuhe pucu, aipo ehi:

—¿Mahera vo co ava oipota íva pendar poromondiisa che recocuer cua ãgua yuvireco! Namboyecuai chietera rumo que ñepeí evocoi nungar mbahe pẽu —ehi.

¹³ Ipare oseypañõ ava. Ichui yuvíroha iri carite pípe, osasapa ípa yuvíraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tẽi pan víraso güemihura yuvireco. ¹⁵ Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruisse revo aipo ehi yandeu” ehi-ehi tẽi oyeupe yuvireco.

¹⁷ Ahe rumo oicua güemimbohe píhañemoñetasa, aipo ehi:

—¿Mahera, “Pan ndayarui” peye? ¿Ndapeicua vítei vo che rembiapo? ¿Yavai víte tie seroya ãgua pẽu? ¹⁸ Oime tẽi pe resa, ndapesepiai rumo; oime tẽi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mboví iruova vo acoi sumbírer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mboví iruova vo acoi pemonuha sumbírer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vítei vo? —ehi güemimbohe upe.

Jesús ombogüera ava ndasesapísoi vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapísoi vahe yuvireco chupe ‘epocomi tẽi sese’ oya yuvireco. ²³ Evocoyase oipopísi ndasesapísoi vahe seraso co cotími tecua sui. Aheve omondo güendi sesa rese, omondo avei opo

iharive. Ipare oporandu chupe: “¿Eresepia vo mbahe?” ehi. ²⁴ Ndasesapisoi vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. ²⁶ Ichui Jesús omondo sêtave aipo ehi chupe:

—Ereyevi iri eme tecuave —ehi.

Pedro oicua uca Jesús Tũpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tũpa ñehe mombehúsar mboetasa” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tũpa Rembiporavo Poropĩsirosar ereico —ehi.

³⁰ Jesús rumo, “Pemombehúi rene que ñepei ava upe” ehi.

Jesús omombehu omano ãgua

³¹ Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahí rerecuar ivate catu vahe iyavei Moisés porocuaíta rese oporombohe vahe remiamotarêhi aicora. Ahe avei che yuca ucara yuvireco. Acuer-ayevira rumo mbosapi ari rupi” ehi. ³² Ahe omboyecua tupri ité chupe. Evocoyase Pedro viraso co cotimi chupe oñehengata ãgua. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tũpa upendar rese; ava nungar tẽi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tẽi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi. ³⁵ Esepia, acoi ava güetecuer tẽi raisupar, ocañi tẽi etera. Acoi ava omocañi tẽi vahe rumo güetecuer che recocuer rese, ñehesa ñepisirosa sui avei, ahe oñepisiora. ³⁶ ¿Aviye ai angahu pĩha ava upe opacatu mbahe ivi pipendar pisi ãgua tẽi, ahe ae tẽi omocañi güecocuer yuvireco viña? ³⁷ ¿Mbovi pĩha omondora ava güecocuer repirã viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tupri vahe rovai, che avei, Ava Riquehir, ãgüe ahera acoi ayevise che Ru reco pĩrata porañetesa pipe, sembiguai rehi iva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vitei chivaherã, osepia rane itera ouse Tũpa mborerecuasa ipĩratasa pipe yuvireco curi —ehi.

Jesús ñecuaño agüer

² Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tẽi oñecuaño güemimbohe rovai. ³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe. ⁴ Iyavei aviyeteramo tẽi oyemboyecua Elías, Moisés reseve Jesús rese oñemoñeta yuvinocha. ⁵ Ipare Pedro aipo ehi chupe:

—Ore mbohesar, javiye ai eté cohave yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoiyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehe ãgua, aipo ehiño tēi. ⁷ Ahe ramoseve avei ogüeyi ìva quiha iharive, oyopipa tupri yuvireco. Ahe ipãhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. ⁸ Ahe ramoseve avei omahese oivivi yuvireco, ndosepiaí eté que ambuae ava, Jesús güeraño tupri ité osepia opãhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pñha aipo, ‘Acuerayevira’ ehise?” ehi tēi yuvireco.

¹¹ Evocoiyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoiyase aipo ehi chupe:

—Elías rane ité niha oura opacatu mbahe moingatu ãgua. ¿Mahera aracahendar icuachiapri pipe aipo ehi: “Ava Riquehir oiporarara mbahe, yamotarēhimbri avei secoira” ehi? ¹³ Che niha aipo ahe pñu: Elías rumo ou ité, ava evocoiyase opacatu güemimbotar tēi oyapo yuvireco sese. Ëgüe ehi opacatu yaviye aracahendar icuachiapirer sese —ehi.

Jesús ombogüera chñivahe carugar rerecosar

¹⁴ Ipare oyevi yuvireco güemimbohe recosave. Aheve osepia ava rehii oyere guasuse yuvireco sese, iyavei oime aheve Moisés porocuita rese oporombohe vahe oiñehepoepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoiyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeí ipãhu pendar omboyevi chupe:

—Porombohesar, co aru che rahir ndeu, vireco vahe carugar oyese, nomoñhengatu ucai vahe yepi. ¹⁸ Iyavei que iguatasa rupi co carugar aviyeteramo tēi opocose sese, oiti voi ivive iyavei sendiriyuiyusu, sãitere-tere avei; sese cūritei nipirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyevi chupe:

—¿Too, ndapeyeroa tupri vitei eté che rese! ¿Mbovi rupi rutei vo aico vitera pe pãhuve che ñemosasa pipe? Peru evocoi chñivahe cheu —ehi.

²⁰ Evocoiyase ogüeru yuvireco chupe. Osepiase carugar Jesús, oiti uca iri chñivahe ivive. Omboapayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichñivahemi suive ité. ²² Amove co carugar oiti uca tatave, ìve avei yuca pota uca ãgua yepi. Sese ereicatuse, ore pñiviviñomi tēi catu eve ore paraisuerecosave —ehi.

²³ Jesús aipo ehi chupe:

—¿Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¿Oroviroya niha, che pñivivi ru eve nde reroa catu ãgua! —ehi pñirata chupe.

²⁵ Osepiase Jesús ava rehii, oyemboyase sese, oñehe pñirata carugar upe aipo ehi:

—Carugar noñehi vahe, ndayapisai vahe, che orocuai, epoi co chñivahe sui, ereique iri eme secocuer rese —ehi.

²⁶ Caruguar sãse pucu chĩhivahe yuca tupri oso. “Omano ité co chĩhivahe” ehi ambuae ava yuvireco. ²⁷ Jesús rumo oipopisi imopuha; evocoyase chĩhivahe opũha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pĩha ndoromose catui eté caruguar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarẽhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroique se oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehi tupri yuvireco chupe. Esepia, peri rupi, “¿Ava pĩha ivate catu vahe?” ehi asi-asi oyeupe yuvireco. ³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe pãhu pendar oyemboivate ai vahe, ahe rumo seco ivi coti catura opacatu sui ava eta pitivii ãgua —ehi.

³⁶ Ipare oipisi chĩhivahe güemimbohe pãhuve senoha aipo ehi:

³⁷ —Acoi ava oipisi vahe co chĩhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarẽhimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cũritei ore rupi; ore ité ndoroipotai chupe —ehi.

³⁹ Jesús rumo,

—Aní ãgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaherã oñehi rai che rese. ⁴⁰ Sese ndayande amotarẽhi vahe, ahe yande mboyoyasar secoi. ⁴¹ Acoi que omondo vahe i vaso pipe che rupi pe recosa pipe pẽu, evocoi nungar oipisi itera porerecosa oyeupe nara —ehi.

Yaicua catura mbahe tẽi apoẽhi ãgua

⁴² “Acoi que ava omboangaipa uca vahe co chĩhivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo ãgua. ⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirẽhisave ñepi pe po rese, peso rãgüer sui que ñuvirio pe po rese tata guasu apirẽhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pi pe mboangaipa ucase, peyasia avei peyesui. Esepia, aviye catu ndape pindugüei peique tecovesave, que ñuvirio pe pi rese peique rãgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepi pe resa rese Tũpa mborerecuasave que ñuvirio pe resa rese tata guasu apirẽhisave pe reique rãgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹“Esepia, opacatu ava imoehesara tata nungar pipe. ⁵⁰Sese yucrí aviye ai eté. Nasehe irise rumo, ndayaicatui chira imoehe iri água. Peico catu yucrí nungar mbahe tuprí pipe peyeupe nara” ehi.

10

Jesús oporombohe mendasa sui poiēhi água

¹Ipare Jesús osē tecua Capernaum sui, oso Judea ivi rupi íai Jordán rovai arí sēsa coti. Aheve ava rehíi oñemonuha iri yuvireco sese. Iyavei ombohe iri ava güecocuer rupi tuprí.

²Evocoyase fariseo oyemboya seco rāha água tēi yuvireco sese, “¿Aviye píha cuimbahe omenda vahe opoi güembireco sui?” ehi yuvireco chupe. ³Ahe rumo omboyeví chupe:

—¿Mara ehi vo acoi Moisés porocuita pipe? —ehi.

⁴Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi água pe rembireco sui” ehi —ehi fariseo yuvireco chupe.

⁵Evocoyase fariseo upe aipo ehi:

—Moisés omondo co porocuita pe poreroyaēhisa pipe sui pēu. ⁶Yipisuive ité niha, ‘Tūpa oyapo opacatu mbahe, oyapo avei cuimbahe, cuña reseve. ⁷Sese niha cuimbahe omendase, oyepepíra oyesupa sui güembireco rese ité yuvirecoi água. ⁸Evocoyase ñuvirío yuvirecoira ñepeí ava nungar.’ Sese ndahe iri ñuvirío, ñepeí nungar ité yuvirecoira. ⁹Evocoyase ava Tūpa omomenda vahe oyese, ndiyai ava tēi omboyepépi yuvireco oyesui —ehi.

¹⁰Oíve yuvirecoi vitesé, semimbohe oporandu iri co mbahe rese yuvireco chupe.

¹¹Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. ¹²Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chīhivahe

¹³Ipare ogüeru chīhivahe Jesús upe yuvireco sese ipoco água. Semimbohe rumo, “¿Mahera vo peruño tēi chīhivahe?” ehi opíha vīracuasa pipe serusar upe yuvireco.

¹⁴Evocoyase Jesús osepiase, ndasoríi güemimbohe upe aipo ehi:

—¡Mahera ndapeipotai iyu água! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave. ¹⁵Supi eté, acoi ndoipísí vahe che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipípe —ehi.

¹⁶Evocoyase oipísí, omondo opo iharíve osovasa.

Ñepeí mbía chīhivahe imbahe eta vahe oñehe Jesús upe

¹⁷Oguata vitesé Jesús yuvireco, aheseve mbía chīhivahe oña oso sovai, oñenopíha, oporandu chupe:

—Porombohesar aviye vahe, ¿mbahe vo ayapora tecovesa apírēhi vahe rereco água? —ehi.

¹⁸Jesús evocoyase aipo ehi ahe mbía upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa secói. ¹⁹Ereicua niha Tūpa porocuita: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde sí aveí’ ehi vahe —ehi.

²⁰Ahe mbía rumo,

—Porombohesar, che aipo nungar opacatu amboaviye ité che chīhivahe suive —ehi.

²¹Evocoyase omahe saísusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe sepri evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

²³ Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique água che Ru Tūpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tēi iñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique água ombahe eta rese tēi ipihañemoñeta vahe upe! ²⁵ Yavai rai camello upe yucuar rupi seique água, ava imbahe eta vahe upe rumo yavai catu che Ru mborerecuasave seique água —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pīha oñepisirora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo água; Tūpa upe rumo ndayavaimi eté. Esepia, Tūpa opacatu mbahe mboavaisarēhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata água —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseypa vahe güeta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupaguer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. ³¹ Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

Jesús omombehu imombosapisa rupi omano água

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime água chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe: —Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaherã pēu? —ehi chupe.

³⁷ —Ore oroipota nde mborerecuá porañetesave ore mboguapira ndeyepiri eve, ñepei nde mbahe rese pocosa coti, ambuae nde mbahe rese pocoēhisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaherã, inungar-ra que igua iro vahe aihu vaherã viña? Iyavei, ¿peicatura pīha che ãpiramosa aipisi vaherã pisi? —ehi.

³⁹—Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaheerã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoehisa coti. Che Ru Tũpa omoingatu güembiporavo upe nara uguapi vaheerã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe. Iyavei acoi ivate catu vahe oyeecoapirasá iteanga omborerecuasa pipe yepi. ⁴³ Pe rumo ãgüe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoehisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapiso vahe Bartimeo serer vahe, Timoteo rahir, uguapi oĩ. ⁴⁷ Osenduse, “Jesús Nazaret pendar” hesa, osapucái pĩrata:

—¡Jesús, David suindar, che paraisuerecomi tẽi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo, —¡David suindar, che paraisuerecomi tẽi eve! —ehi pĩrataño ité chupe.

⁴⁹ Evocoyase osenduse iñehe, opita,
—Peñehe chupe —ehi.

Ichui oñehe yuvireco chupe:

—Eyemonguerẽhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe.

⁵¹ Evocoyase oporandu ndasesapiso vahe upe:

—¿Mbahe vo ereipota ayapo vaheerã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapiso vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ipiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ãgüe peye?” ehise pẽu, “Ore Yar oiporu pota, ipare niha omboyeve voñora” peyera chupe —ehi.

⁴ Evocoyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohosa rupi tupri ité omboyevi yuvireco chupe. Evocoyase, “Tovirasño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoyase oyasia pindo omondo peri rupi saperã yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe—. ¹⁰ ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

¹¹ Ëgüe ehi Jesús oiquese Jerusalén ve. Ipare oique tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico. ¹³ Osepiase amombri ivira higuera so ati vahe, oso chupe ‘¿iha pĩha?’ oyapave. Ahe rumo osepia so pãve tẽi sese. Esepia, ahe ivira upe ndosupiti vitei iha ãgua. ¹⁴ Evocoyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaherã! —ehi.
Semimbohe osendu iñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei ombovapi imondo. ¹⁶ Ndoipotai eté que ambuae mbahe seroiquepirã tũparo pipe. ¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rẽta yeruresa rẽtarã opacatu ava ivi pipendar uve nara’ ehi. Pe rumo imonda rai vahe rẽta nungar tẽi pereco —ehi.

¹⁸ Pahi eta rerecuar iyavei oporombohe vahe Moisés porocuita rese osenduse, “¿Mara yahera pĩha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovhai iporombohosa rese yuvireco. ¹⁹ Pĩtu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco. ²¹ Evocoyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoyase,

—Peyeroya Tũpa rese —ehi—. ²³ Supi eté aipo ahe pẽu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ãgüe ehi etera chupe. ²⁴ Sese aipo ahe pẽu: opacatu que mbahe rese peporanduse pe yeroquisa pipe, peyeroya itera mbahe oime vaherã rese pẽu, ahese peipisi itera. ²⁵ Acoi peyeroyise, yipindar peñero rane que pe amotarẽhimbar upe, ahese ãgüe ehi aveira pe Ru iva pendar iñero pe angaipa rese pẽu. ²⁶ Ëgüe ndapeyise, pe Ru iva pendar avei niñeroi chira pe angaipa rese pẽu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo ãgua? —ehi yuvireco chupe.

²⁹⁻³⁰ Evocoyase omboyeví chupe:

—Che avei aporandura mbahe rese pëu: ¿Ava vo Juan ombou ava ãpiramo ãgua; Tũpa pĩha, ava tẽi tie? Pemboyevise cheu, ahese che avei amombehura pëu ava porocuita rupi eté pĩha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “‘Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. ³² ‘Ava tẽi remimbou’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. ³³ Evocoyase omboyeví chupe yuvireco:

—Ndoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

¹ Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oiví pipe, ahe oñachi tuprĩ sereco iyavei oyapo mbahe uva ricuer renose ãgua. Oyapo avei oi ivate vahe opacatu mbahe moha ãgua. Ipare oseya oiví ava oporaviqui vahe upe iporu ãgua. Ichui osẽ, oso amombri vahesa rupi. ² Oyepotase ari uva pohosa, ahese omondo güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. ³ Ahe rumo oipisĩño, inupa-nupa imboyeví tuprĩ tẽi yuvireco. ⁴ Evocoyase ahe ivi yar omondo iri ambuae güembigui. Ahe oyapicha-pichaño ñaca rupi, iñehe mara-mara tẽiño avei yuvireco chupe. ⁵ Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocua-rocuano yuvireco, oyucaño avei ambuae yuvireco.

⁶ “Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco. ⁸ Ichui oipisĩ, oyucaño yuvireco. Ipare ovĩnose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oiví ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviyeye catu vahe oi moviracua tuprĩ ãgua.

¹¹ Ëgüe ehi niha yande Yar yapo.

¡Mara ehi rutei revol!’ ehi icuachiapri pipe” ehi.

¹² Evocoyase ovĩraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecoãha iri tẽi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuvĩraso chupe aipo ehi:

—Porombohesar, ore orocua nde supi eté vahe mbahe eremombehu eico, nde niha ndereroyai vahe ava ñehesa tẽi. Esepia, “Ëgüe ehi co mbia” nderei eté ava upe iyavei ereporombohe mbahe supi tuprĩ vahe Tũpa remimbotar apo ãgua rese. ¿Aviyera pĩha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo p̄ihaēhisa, sese aipo ehi voi chupe:

—¿Mahera che moingue pota mbahe tēi p̄ipe peye? Peru evocoyase ñepeí guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoyase pemondora Tūpa upe —ehi.

Evocoyase oyep̄ihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiēhiseve, tivri evocoyase omendara sembirecocuer rese ahe viquehir omano vahecuer upe nara tahira oico.” ²⁰ Oime siete tupri oyesuindar p̄ave yuvirecoi vahe. Yip̄indar vahe omenda. Ichui omanoño, ndatahi eté rumo. ²¹ Ipare tivri omenda viquehir rembirecocuer rese. Ahe rumo omanoño, ndatahi avei rumo. Ēgüe ehi tupri avei tivri imombosapisa. ²² Ēgüe ehi co siete tupri omenda ahe cuña rese, ndatahi eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rembireco itera p̄iha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoyase Jesús omboyevi chupe:

—Pe p̄ihañemoñeta p̄ipe peyavi. Esepia, ndapeicuai eté Tūpa ñehe icuachiapri arachendar, ndapeicuai avei Tūpa p̄iratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai ìva pendar nungar yuvirecoira ìvave. ²⁶ Co cuerayevisa resendar rumo amombehura p̄eu: aviye ndapeyeroqui anga vahe Moisés rembicuachiagüer p̄ipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. ²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe p̄ihañemoñeta p̄ipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepeí Moisés porocuita rese oporombohe vahe osendu iñehe p̄iratase oyeupe yuvireco, oicua avei Jesús omboyevi tuprise iñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yip̄indar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepeí yande Yar secoi. ³⁰ Eresaisura nde Yar Tūpa opacatu nde p̄ihá p̄ipe, opacatu nde recocuer p̄ipe, opacatu nde yapisacasa p̄ipe iyavei opacatu nde p̄iratasa p̄ipe’ ehi. ³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepeí Tūpa iyavei ndipoi eté ambuae. ³³ Iyavei yasaisura Tūpa opacatu yande p̄ihá p̄ipe, opacatu yande yapisacasa p̄ipe, opacatu yande p̄iratasa p̄ipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sap̄ipri tēi sui —ehi.

³⁴ Evocoyase Jesús icuase co ava p̄ihañemoñeta tuprisa, aipo ehi chupe:

—Namombriimi ereico Tūpa mborerecuasa sui —ehi.
Ipare ndipo iri oyemonguerēhi vahe oporandu vaheṛã mbahe rese yuvireco chupe.

¿Ava suindar pīha Poropīsīrosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsīrosar David suindar ité” ehi yuvireco? ³⁶ Esepia, David ité aipo ehi Espiritu Santo pīratasa pipe: ‘Yar aipo ehi che Yar upe:

Eguapī che acato cotī, acoi che amondose voi eté nde amotarēhimbar nde povrive yuvireco’

ehi David aracahe. ³⁷ ¿Mahera ru, “Poropīsīrosar David suindar secoira” peye, David teieté, “Che Yar” ehise chupe? —ehi.

Ava rehīi oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave oguapī yuvireco yepi no. ⁴⁰ Iyavei cuña imer mano vahecuer rēta vīrocua-rocuā tēi ichui. Oarondaguã tēi avei oyerōqui pucu-pucu yuvireco. Ahe rumo oipīsira Tūpa ñemoirosa ipīrata catu vahe yuvireco curi” ehi.

Cuña imer mano vahecuer porerecosa

⁴¹ Ñepeī arī Jesús oguapī oī porerecosa rīru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. ⁴³ Evocoyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi rīru pipe. ⁴⁴ Ambuae ava eta rumo oguarepochi rumbirermi tēi omondo oporereco ãgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

13

“Imondurusara tūparo guasu” ehi Jesús

¹ Jesús osēse tūparo guasu pipe sui, ahese ñepeī semimbohe aipo ehi chupe:

—Ore mbohesar, jeseπia oī ita imopuhapri, icatupri ai! —ehi.

² Jesús rumo omboyevī chupe:

—¿Pesepia co oī tuvichá vahe ité? Ndipoi chietera rumo que ñepeī ita oyeha vite vahe; opacatu ité imondurusara curi —ehi.

Cañi renonde mbahe oime vaheṛã

³ Evocoyase Jesús yuvirasō ivitri Olivo ve, ahe ivitri tūparo guasu rovai tupri. Aheve Jesús oguapise oī, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyevī chupe: “Peicua catu, peyembopa ucai rene ambuae ava upe.

⁶ Esepia, setá ava yugüerura, ‘Che niha Poropīsīrosar aico’ ehi tēira ava eta mbopa yuvireco.

⁷ “Pesenduse rumo ñehesa vavasa resendar cohove, iyavei que rupi, ndapeyembosiquiyei chietera. Esepia niha, ēgüe ehi rane itera; ndehi vitei chira rumo arī cañi.

⁸ Esepia, ñepeī ivi pipendar ovavara ambuae ivi pipendar rese oyeupe yuvireco; iyavei

oimera ivi riri opacatu-catu tēi tecua rupi, tiavor avei. Co rumo omboipi ramomira mbahe tēi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. Ēgüe peyera peñehe che recocuer rese chupe. ¹⁰ Cañi renonde rumo co ñehesa pĩsirosa resendar opacatu rane ité ava upe icua ucasara ivi rupi. ¹¹ Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecua Tūpa pe ñehe āgua pēu. Esepia, ndahei chira peyesui tēi peñehe, Espiritu Santo ité oñehera. ¹² Ipare rumo ava omondoñora vivri yamotarēhisar upe ‘toyuca yuvireco’ oya. Ēgüe ehi aveira ava guahir upe; tahir avei oyamotarēhiñora oyesupa yuca uca āgua yuvireco che recocuer rese. ¹³ Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

¹⁴ “Tūparo guasu maranehi pipe pesepiase mbahe-mbahe tēi aposa —acoi oyerogui vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güeta harive secoi vahe, ahe ari toique iri eme güetave mbahe renose āgua. ¹⁶ Acoi que rupi tēi secoi vahe, toyevi eme avei güetave oyeaosa renose āgua. ¹⁷ ¡Iparaisu itera cuña ipuruha vahe ahe ari pipe, imembi pĩtani vahe avei! ¹⁸ Peporandu Tūpa upe, toime eme co nungar mbahe sōhisa vahe pipe pēu. ¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. ²⁰ Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropĩsirosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. ²² Esepia, yugüerura ava, ‘Che Poropĩsirosar aico’ ehi tēi vahe, iyavei, ‘Che amombehu vahe Tūpa Ñhengagüer’ ehi angahu tēi vahe, iyavei oyapora mbahe ava ndoyapoi vahe poromondisa güeco pĩratasa mboyecua āgua yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tūpa Rahir oyevise

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi iva sui, iyavei iva resendar mbahe oririira yuvireco. ²⁶ Ahese che, Ava Riquehir, iva quiha rese ayecua itera vitu che pĩratasa pipe che rendigüer porañetesa pipe avei. ²⁷ Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramosa, yaicua cōimi ari sacu vahe yepota āgua yandeu yepi. ²⁹ Na ehi aveira niha pēu che ñehe rupi tupri mbahe pesepiase. Sese peicua che, Ava Riquehir, cōimi eté che yevi āgua. ³⁰ Supi eté yuvirecove vitera ava osepia vahe, co mbahe opase yaviye. ³¹ Iva, ivi opara ocañi; che ñhengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi āgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rãrora peye. Esepia niha, ndicuasai che yevi āgua. ³⁴ Inungar que mbia amombri oso pota āgua renonde, güembiguai oseyapa güeta rãro āgua, omondo avei ñepeipei upe iporaviqui āgua, iyavei omondo güeta roquendipi rãro āgua. ³⁵ Pe evocoyase pemahemohara. Esepia, ndapeicuai marase che oi yar ayevira pēu, aviyeteramo pĩtu ramosa, pĩtu mbiter, tacura ñehese, anise añihivei.

³⁶ Ndaipotai pemahemohaẽhiseve tẽi ayevirã. ³⁷ Che aipo ahe pẽu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca ãgua rese yuvireco

¹ Ipare ñuvirío ari judío Pascua pieta ãgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuaita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiẽhi ãgua yandeu —ehi.

Cuña Jesús rese mbahe sãcua vahe oipiyere

³ Ahese Jesús secoi Betania ve Simón lepra vireco vahecuer rõtave. Aheve mesave chiniseve, cuña güeru mbahe sãcua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese. ⁴ Ambuae ava aheve yuvinoi vahe rumo oñemoiro tẽi aipo ehi yuvireco oyeupe:

—¿Mahera vo co omocañi tẽi mbahe sãcua vahe? ⁵ Omondo vahe ité tie co tresciento ari rupindar mboraviqui repri rupi ava iparaisu vahe pítiviã ãgua viña —ehi yuvireco.

Omañeco tẽi avei ahe cuña yuvireco.

⁶ Jesús rumo aipo ehi ahe ava upe:

—Teheni, ãgüe tehiño, ¿mahera vo pemañeco tẽi? Co mbahe oyapo vahe rumo cheu aviyete ité. ⁷ Ava iparaisu vahe niha yuvirecoiño itera pe pãhuve, iyavei peyapoño itera mbahe aviyete vahe peyapo potase chupe; che rumo ãgüe ndahe viteñoi chira vichico pe pãhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoẽhi vitesese. ⁹ Supi eté aipo ahe pẽu: ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarẽhimbar upe

¹⁰ Evocoyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua. ¹¹ Senduse, oyemboviharere: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovẽhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sãta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. ¹⁵ Evocoyase ahe omboyecuarã oi guasu ivatendar imoingatupri pẽu. Aheve pemoingatu mbahe yahu vaheerã —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ Pĩtu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pẽu: ñepepe pe pãhu pendar yande piri ocaru vahe che mondora che amotarẽhimbar upe —ehi.

¹⁹ Evocoyase semimbohe ndoyemboviharẽ tẽi yuvireco, iyavei oporandu-randu tẽi ñepepepe chupe yuvireco:

—¿Che pñha? —ehi yuvireco.

²⁰ Omboyeve rumo güemimbohe upe:

—Ñepeí eté pe pñhu pendar ahe co omoaquí pan che caro pípe. ²¹ Supi eté che, Ava Riquehí, amboavíyera icuachiapri; jíparaisu catura rumo acói mbía che mondosar! Aviye catura ahe mbía ndoyesuise viña —ehi.

²² Yuvírocaru viteseve, Jesús oipísi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipísi; co che rete —ehi.

²³ Ipare oipísi ígua ríru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuvíroihu. ²⁴ Ahese aipo ehi:

—Co che ruví, ahe che Ru remimbotar ípiasu vahe pñu nara. Oyepíyerera ava rehi recocuer rese nara. ²⁵ Supi eté aipo ahe pñu: ndáihu iri chietera uva ricuer cheu arí oyepotase voi che Ru Túpa mborerecuasave áhura uva ricuer ípiasu vahe —ehi.

“Pedro, ‘Ndaicuai vahe evocoi mbía’ erera cheu” ehi Jesús Pedro upe

²⁶ Osapucaire, opa yuvíraso ívitrí Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acói icuachiapri pípe aipo ehi: ‘Ayucara ovesa rãrosar, ahese oñemosai tñira ovesa opacatu rupi yuvireco’ ehi. ²⁸ Che cuerayevíre rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pñtu pípeve voi eté tacura ñehe yupagüe renondeve, “Ndaicuai vahe evocoi mbía” erera mbosapí oyupagüer rupi cheu —ehi.

³¹ Ahe rumo,

—Yepe che amano tñira nde rupi viña, che rumo, “Ndaicuai vahe evocoi mbía” ndahei chietera —ehi-ehi catuño ité chupe.

Ambuae opacatu aipo ehi tuprí tñi avei yuvireco chupe.

Jesús oyeruquí Getsemaní ve

³² Ipare yuvíraso Getsemaní ve yuvireco. Aheve Jesús aipo ehi güemimbohe upe:

—Peguapí cohove, che aso ranera ayeroquí peve —ehi.

³³ Aheve víraso Pedro, Santiago, Juan oyeupi. Ahese ndoyepíhambovíhai eté oico ³⁴ aipo ehi:

—Che cñritei ndavíhai eté. Esepia, che hã oyandu ité manosa. Pepita rane cohove, iyavei pemahemohara pe yeroquí pípe —ehi güemimbohe víraso vahe upe.

³⁵ Evocoyase oso tenonde catumí. Aheve oyaví íviri rese oso, oporandu Túpa upe mbahe tasí vahe reimeñhi água oyeupe. ³⁶ Oyeruquí pípe aipo ehi: “Che Ru, che rembiaísu, ndeu niha mbahe ndayavái vahe ité: che renose co mbahe-mbahe tñi sui eve; tayapo eme che remimbotar tñi, nde remimbotar rupi catu tayapo” ehi.

³⁷ Ipare oyeve güemimbohe upe. Ahe rumo opaño yuvíroque yuvíroca. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeí hora nde ropesí upe?

³⁸ Pemahemoha, peyeruquí mbahe tñi pípe pe víapiñhi água. Pe niha pequerñhi ité viña, pe retocuer tñi rumo nipiratai pñu —ehi.

³⁹ Ichui oso iri oyeruquí, aipo ehi tuprí avei oñehe. ⁴⁰ Ipare oyeve, osesapíha iri íqueseve tñi avei. Esepia, sopesí nomboyeroyai eté yuvireco, ahese ndoicatui eté ñehe mboyeve yuvireco. ⁴¹ Imombosapísa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo ãgua ava yangaipa vahe povrive. ⁴² Pepũha, yaso. Esepia, cõimi eté che amotarẽhisar upe che mondo vaherã secoi —ehi.

Jesús ipisisa

⁴³ Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setá ava yugũeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovinose oquise pucu. Ipipe oyasia pahi rerecuar ivate catu vahe rembiguai nambi. ⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgũe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco. ⁵¹ Mbia chĩhivahe rumo turucuar pipe gũerañomi oñemama vahe supive secoi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús vraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. ⁵⁴ Pedro avei amombri rupive tẽi oi que ité oso pahi rerecuar ivate catu vahe rẽta ãchisa pipe. Aheve oguapiño mbia sundao pãhuve tata ipive oyephe oĩ.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vaherã Jesús rese yamotarẽhisave yuca uca ãgua yuvireco; ndoicatui eté rumo yuvireco. ⁵⁶ Iyavei setá iteanga tẽi semira yuvireco sese; oyecopipipi tẽi rumo gũemira pipe. ⁵⁷ Amove aipo ehi tẽi yuvireco seco momara ãgua:

⁵⁸ —Ore orosendu iñehe aipo ehise: ‘Che opara amonduru co tũparo ava tẽi rembiapo. Ipare rumo mbosapi ari rupi opara amopuha. Ndahe iri chira evocoyase ava tẽi rembiapo’ ehi —ehi tẽi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opũha oporandu Jesús upe:

—¿Nderemboyevii chira vo iñehe yuvireco chupe? ¿Mbahe vo aipo nde amotarẽhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropisirosar ité vo nde ereico, Tũpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarẽhi acato coti; ayevise avei iva quiha rese curi —ehi chupe.

⁶³ Evocoyase pahi rerecuar ivate catu vahe omondo oturucuar aipo ehi:

—¿Mbahe iri vo yande yaipota vite yaico? ⁶⁴ Yasendupa niha aipo Tũpa upe iñehe-ñehe tẽisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe. ⁶⁷ Osepiase Pedro iyepese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osese oquendipive ohã, ahese oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe güer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe.

⁴ Evocoyase Pilato oporandu iri chupe aipo ehi:

—¿Mahera vo ndereñehi eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pīha?” ehi tēi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepeí ava soquendapri renose ãgua Pascua pieta pipe ava rehí porandusa rupi yepi. ⁷ Mbía Barrabás serer vahe, ahe pipeve avei soquendasa yuvireco ambuae oporapichí vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vaheñã judío rerecuar? —ehi.

¹⁰ Esepia, Pilato oicuaño ité ava rese yemoecatēhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosē’ ombohe ati-ati uca ava yuvireco. ¹² Evocoyase Pilato oporandu ahe ava upe:

—¿Mbahe vo peipota ayapora co mbía chupe acoi, ‘Judío rerecuar’ peye vahe rese? —ehi.

¹³ Ahe rumo omboyeví Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica ãgua.

¹⁶ Ahese sundao viraso mborerecuar rêta sui ambuae oi pipe, aheve opacatu omboetasa omonuha yuvireco. ¹⁷ Aheve omboyemonde turucuar pĩraumbi vahe pipe yuvireco, ipare yu piapri omonde ñaca rese. ¹⁸ Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboetisave angahu. ²⁰ Mara-mara tẽi sereco pare, ovirocua iturucuar pĩraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica ãgua yuvireco.

Jesús yaticasa curusu rese

²¹ Ñepi mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tẽi yuvireco chupe.

²² Jesús oviraso Gólgota serer vahesave yuvireco (‘Ava Ñaca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tẽi yuvireco chupe. Ahe rumo ndoihui eté. ²⁴ Evocoyase oyatica yuvireco. Ipare sundao iguayĩño Jesús turucuar rese ‘¿uma pĩha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ. ²⁷ Supive avei yaticasa ñuvirío imonda rai vahe ñepi mbahe rese ipocosa coti, ambuae mbahe rese ipocoẽhisa coti. ²⁸ Ëgüe ehi imboaviye icuachiapri aipo ehi vahe: “Ava mbahe-mbahe tẽi aposar nungar ipãhuve serecosa” ehi.

²⁹ Acoi ava ñocuasar iñehe-ñehe tẽi, oñeaca mbovava aipo ehi yuvireco chupe:

—Nde acoi, “Opara tũparo amonduru. Ipare mbosapi ari rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ëgüe ehi avei pahi eta rerecuar, oporombohe vahe avei Moisés porocuita rese iñehe mara-mara tẽi yuvireco chupe, aipo ehi yuvireco oyeupe:

—Oipĩsiro ambuae. Ahe ae rumo ndoicatui oñepisiro. ³² ¡Poropĩsirosar Israel rerecuar guasu, toyeeroyi ahe ae curusu sui cũritei, ahese voi seroyasara —ehi.

Iyavei supive yaticapri mara ehi-ehi tẽi avei chupe.

Jesús mano agüer

³³ Osupitise rumo mbiter ari, opa tupri pĩtu ivi rupi. Ëgüe ehi las tres rupi. ³⁴ Ahese tupri avei Jesús oñehe pĩrata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tũpa ñehe mombehusar Elías upe oñehe —ehi yuvireco chupe.

³⁶ Evocoyase ñepi imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toihu’ oya:

—Ëgüe tehiño rane, ¿oura pĩha Elías seroyi ãgua curusu sui? —ehi.

³⁷ Ahese Jesús sãse pĩrata. Ipare omano. ³⁸ Aheseve tũparo asiasa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehõgüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tũpa Rahir ité —ehi.

⁴⁰ Iyavei cuña aheve amombrive osepiya catu yuvinoha; ahe yuvirecoi María Magdalena, José si María, ahe avei Santiago chĩhivahe catu vahe si iyavei ambuae cuña

Salomé. ⁴¹ Co cuña eta yuvirecoiño vahe ité Jesús rupi, oipítivi vahe avei Galilea ve yuvirecoise. Setá avei ambuae ava supí yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pĩtu ramose, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Túpa mborerecuasa osãro vahe oico, oquerêhisa pipe ité oi que oso Pilato upe oporandu ãgua Jesús rehögüer rese. ⁴⁴ Pilato rumo oyepihamondi tēi, “Omano” hese. Oñehe sundao rerecuar upe oporandu ãgua ‘¿marase vo êgüe ehi?’ ⁴⁵ Sundao rerecuar omombeuse chupe, ahese omondo sehögüer José upe. ⁴⁶ Evocoyase José virocuva turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiãño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocuva mbahe sñacua vahe Jesús rehögüer rese nara yuvireco. ² Iyavei añihiveive, yipindar ari semana pipe, oyepota Jesús ruvipave icatu ramose yuviraso. ³ Aheve aipo ehi oyeupe yuvireco:

—¿Ava pĩha co tehögüer rovapisa virocuara yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihã, ⁵ yuviroiquese tehögüer ruvipave yuvireco, aheve osepiã ombahe rese pocosa coti mbia chñhivahe, iturucuar pucu morochi vahe oguapise oĩ. Ahese cuña oyembosiquiye yuvireco. ⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohava. Pesepia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiãra mbahe che remimombehu rupi tupri’ peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, orirĩ avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi. ¹⁰ Ahe oso imombehu supindar upe. Ahe rumo oyaseho vite oviharêhisave yuvireco. ¹¹ Osenduse cuña ñehe: “Jesús ocuerayevi, che ité asepiã” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaêhisa rese chupe, iyavei ocuerayevisa mombehusar reroyaêhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pĩsirosa resendar peico. ¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirã tēi yuvirecoira. ¹⁷ Co mbahe poromondisa omboyecuara che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe,

ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oĩ.
²⁰ Semimbohe evocoyase opa yuviraso opacatu ivi rupi ñehesa pĩsirosa resendar mombehu. Yande Yar avei oipĩtívii, iyavei mbahe poromondiisa pipe omboyecua uca ité ñehesa pĩsirosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrtei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoiyase nde ereicua tupri ra co porombohesa supi eté vahe acoi nde mbohe agüer.

Tüpa rembiguai omombehu Juan Oporoãpiramo vahe ha ãgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirío secocuer aviye tupri Tüpa upe; viroya tupri opacatu Yar porocuita yuvireco. Evocoiyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepe ari aipo osupiti icuaita tüparo pipe imboetasa reseve iporaviqui ãgua Tüpa rovaque yuvireco. ⁹ Pahi recosa ité ãgüe ehi aracahe suive, ahese iporavosa Zacarías yipindar yasiapri tüparo maranehi pipe oi que vahe ña itaisi rapí ãgua. ¹⁰ Itaisi rapí vitesese aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tüpa rembiguai repiase aipo, oyembosiquiyé iteanga. ¹³ Tüpa rembiguai rumo aipo ehiño chupe:

—Zacarías —ehi—, eresiquiye eme. Tüpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tüpa rovaque. Ndoi hui chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohaehi vitesese. ¹⁶ Ëgüe ehira omonguerëhi setá ava judío Yar Tüpa reroya iri ãgua oico. ¹⁷ Ahe virecora espíritu pĩratasa oyese oyoyara Tüpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. Ëgüe ehira ava mbohe imoingatu yande Yar pisi ãgua sereco —ehi chupe.

¹⁸ Evocoiyase,

—¿Mara ahera pĩha aipo reroya? Che rumo acuacuami eté vichico, iyavei che rembireco ocuacuami avei no —ehi Tüpa rembiguai upe.

¹⁹ —Aní —ehi chupe—. Che aico Tüpa rembiguai Gabriel, Tüpa rovaindar. Ahe niha che mbou ndeu che ñehe ãgua iyavei co ñehesa aviye vahe mombehu ãgua. ²⁰ Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tüpa rembiguai chupe.

²¹ Osãro pucu tēi aipo ocarve ambuae imboetasa eta yuvireco. “¿Mahera pĩha nose vītei tüparo pipe sui?” ehi tēi yuvireco chupe. ²² Osēse aipo tüparo pipe sui, niñehengatui voi eté. “Ñaro osepia mbahe tüparo pipe” ehiño ité aipo imboetasa eta yuvireco chupe. Ipo ãta-ãta tēi aipo oñehengatuēhise mbahe mombehu oico.

²³ Ipare omboaviyese ocuaita tũparo pipe, oyevi oso güetave. ²⁴ Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta: ²⁵ “Yar Tũpa ité ěgüe ehi cheu ava che rese ñeheĕhi iri ěgua yuvireco” ehi vorivetesave pipe aracahe.

Tũpa rembiguai Jesús yesu ěgua omombehu

²⁶ Coiye seis yasi pipe Tũpa omondo güembigui Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe ěgua; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tũpa rembiguai oique co cuña rĕtave aipo ehi chupe:

—¡María, Tũpa nde rovasa, erereco mbahe icatupri vahe pĕtivisa Yar Tũpa suindar! Tũpa nde rese ité secoi; nde rovasa catu opacatu cuña sui —ehi chupe.

²⁹ Tũpa rembiguai repiase, “¿Mara oya pĕha co aipo ehi cheu?” ehi tĕi osiquiyepave opĕhañemoñeta rereco. ³⁰ Evocoyase Tũpa rembiguai aipo ehi chupe:

—María, eresiquiye eme. Esepia niha, Tũpa ité nde poravo nde rovasa ěgua. ³¹ Cũritei voirira rumo ndemembira: ererecora nde membri; ahe serer-ra Jesús. ³² Ahe niha secouvicha catu vahe rã secoira; “Tũpa seco ivate vahe Rahir secoi” ehira yuvireco chupe. Iyavei niha Yar Tũpa ité omoinguera mborerecuar guasu seco ěgua inungar tamoi David aracahe. ³³ Mborerecuar guasu secoira judío recua rupi apĕrĕhi vahe rã; imborerecuasa niha apĕrĕhi vahe rã ité secoira —ehi.

³⁴ Evocoyase ahe aipo ehi:

—¿Mara ahera vo aipo che membri viña? Esepia niha, ndaico vĕtei vahe cuimbahe rese —ehi Tũpa rembiguai upe.

³⁵ —Espĕritu Santo ogüeyira nde harive iva quiha nungar; Tũpa güeco pĕratasa pipe nde momembira. Sese acoi ohasa nde membri seco maranehi vahe, “Tũpa Rahir” hesara chupe. ³⁶ Cũritei nde mu Isabel avei ocuacuami pipe imembi oico; ahe niha ndimembi vahe yipĕndar viña, cũritei rumo vĕreco seis yasi omembi vie pipe. ³⁷ Esepia niha, Tũpa upe ndipoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aico, tayaviye ayase Tũpa remimbotar cheu nde ñehe rupi —ehi. Aipo ihe pare, Tũpa rembiguai oyepepi oso ichui.

María oso omu Isabel pĕri

³⁹ Ahese María oso voi eté ivĕtri rupi tecua ivi Judea ve. ⁴⁰ Aheve aipo Zacarías rĕta pipe oiquese oso, oyapo “avĕrave” omu Isabel upe. ⁴¹ Evocoyase Isabel rie pipe omĕi imembi iñehe renduse. Ahese Espĕritu Santo oique Isabel avĕterve. ⁴² Ipare osapucaí pĕrata aipo ehi chupe vorivetesave:

—¡Tũpa nde rovasa cuña opacatu sui, iyavei osovasa nde membri! ⁴³ Noromohai eté che pĕri ereyu vahe rã viña, che Yar si. ⁴⁴ Esepia, cheu “avĕrave” ereyapose, che membri omĕi voi vorivetesave che rie pipe. ⁴⁵ ¡Sovasapri ereico! Esepia, ereroya ité ñehesa ndeundar. Iyavei Tũpa omboaviyera güemimombehu nde rese —ehi Isabel chupe.

⁴⁶ Evocoyase aipo ihese,

“Che niha amboetei che Yar vichico;

⁴⁷ cherorĕveté Tũpa che Pĕsirosar rese.

⁴⁸ Esepia, ahe omahe che rese che reco yemominisa pipe seroyasar che recosave. Co pipe suive, ‘Sovasapri secoi’ ehira opacatu ava yuvireco cheu.

⁴⁹ Esepia niha, Tũpa mbahe mboavaisarĕhi, oyapo mbahe tuvichá vahe cheu.

¡Tũpa imboeteipri catu tasecoi yepi!

⁵⁰ Ahe oiparaisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tĕi vahe.

⁵² Viroyi mborerecuar seco pĩrata vahe pĩratasa sui; ava seco mbegüemi vahe rumo osecomboivate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

⁵⁴ Oipĩtivii niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ãgua ⁵⁵ güemimombehugüer rupi yande ramoi aracadendar Abraham upe, ichuindar upe avei yepi no” ehi vorivetesa pipe omu

Isabel upe.

⁵⁶ Ipare María opita Isabel piri mbosapi yasi rupi. Ichui oyeve oso güetave.

Juan Oporoãpiramo vahe haragüer

⁵⁷ Osupitise ari Isabel upe, imembira. Ahe imembri cuimbahemi. ⁵⁸ Imu iyavei icotindar oyanduse Tũpa rembiapo mbahe aviye vahe, aipo ehi yuvireco chupe: “Aviye ai catu Yar Tũpa secoi co cuña rese” ehi vorivetesave yuvireco. ⁵⁹ Ocho ari pipe aipo, ahe pĩtani ombocircuncida yuvireco judío porocuita mboyeroyasa pipe. Ipare aipo omondo pota iyesupa Zacarías rer yuvireco sese viña, ⁶⁰ ichi rumo,

—Aní —ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvireco chupe.

⁶² Evocoyase aipo omahe pĩtani yesupa rese yuvireco ‘¿mbahe pĩha ahe omondo pota sererguã viña?’ oyapave yuvireco. ⁶³ Evocoyase aipo iyesupa oporandu ivirapemi rese sese serer oicuachía vahe. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tẽi oyeupe yuvireco. ⁶⁴ Ahese ramo Zacarías iñehengatu, omboipi Tũpa upe osapucái oico. ⁶⁵ Opacatu aipo sẽta cotindar oyembosiquiye tẽi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. ⁶⁶ Mbahe osendu vahecuer rese avei aipo oporandurandu oyeupe yuvireco: “¿Mbahe pĩha aipo pĩtani oyapora curi?” ehi. Esepia niha, supi eté Tũpa osovasa.

Zacarías sapucái agüer

⁶⁷ Zacarías, Espiritu Santo pĩratasa pipe, oñehe Tũpa oyeupe ñehesa pipe aipo ehi:

⁶⁸ “¡Yande Yar Tũpa imboeteipri tasecoi!

¡Esepia niha, ahe ou yande judío yaico vahe pĩsiro ãgua!

⁶⁹ Ombou niha Poropĩsirosar güembiguai David suindar yandeu.

⁷⁰ Ëgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pĩsirora yande amotarẽhimbar sui.

⁷² Ëgüe ehi Tũpa imbou oporoparaisuerecosa yande ramoi aracadendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose ãgua yande amotarẽhimbar povri sui ‘tache mboetei osiquiyeẽhisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tũpa ivate vahe ñehe mombehusar secoi’ ehira ava yuvireco ndeu. Esepia, nde eremoingatura ava recocuer Yar pisi ãgua senondeve eico.

⁷⁷ Supi eté nde niha eremoyecuara opacatu ava Tũpa upendar yuvirecoi vahe upe angaipa sui ñeroisa pisi ãgua iñepisiro ãgua.

⁷⁸ Esepia, yande Ru Tũpa, oporoparaisuerecosa pipe ombou oporoesapesa iva pendar yandeu yande reco mbopiasu ãgua

⁷⁹ iyavei ava Tūpa cuaparēhi resape āgua ‘toyuvirecoi mbahe tupri pipe’ oyapave. Esepia, ahe inungar ava pītumimbisave yuvirecoi vahe, ocañi tēi vaherā yuvireco” ehi Zacarías.

⁸⁰ Ichui pītani ocuacua iyavei vireco pīratasa Espiritu suindar oyese. Ipare rumo oso oyemboerecua ivi iporupirēhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rēise. ³ Opacatu ava yuviraso güecua yacatu rupi oyecuachía āgua yuvireco.

⁴ Sese José avei osē Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. ⁵ Ēgüe ehi oyoya yuviraso güembirecovi María rese oyecuachía āgua. María rumo imembira pota ité oico. ⁶ Aheve oyepota ramose, osupiti ari imembira āgua. ⁷ Aheve oha imembri yipindar vahe cuimbahemi. Ahese María oyao omembri turucuar pipe, ēgüe ehi imoñeno imondo mbahe mimba rembihi riru pipe. Esepia niha, ndoyosui eté oque āgua aheve yuvireco.

Tūpa rembiguai eta omombehu Jesús haragüer ovesa rārosar upe yuvireco

⁸ Namombriimi Belén sui ovesa rārosar yuvirecoi. Aheve osāro ovesa pītu pipe yuvireco. ⁹ Aviyeteramo tēi oyemboyecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui. ¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu āgua pēu pe mboviharete āgua iyavei opacatu ava mboviharete āgua avei no. ¹¹ Co pipe oha David recua Belén ve Poropisirosar pēu nara. Ahe niha Tūpa Rembiporavo, pe Yarguā secoi. ¹² Icuā āgua peyosura pītani yaopri tuprimi vahe tui mbahe mimba rembihi riru pipe” ehi.

¹³ Aviyeteramo tēi oyemboyecua ambuae setá Tūpa rembiguai iva pendar yivii yuvireco. Tūpa upe osapucái yuvireco aipo ehi:

¹⁴ “¡Imboeteipri tasecoi Tūpa ivave!

¡vive ava Tūpa rembiaisu toyuvirecoi tupri oyeaisusa pipe!” ehi osapucái yuvireco.

¹⁵ Opase oyevi Tūpa rembiguai ivave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ipare osepia María, José, Jesús pītani avei yuvireco cute. Ahe pītani omoñenomi mbahe mimba rembihi riru pipe ino. ¹⁷ Ipare yuvinose omombehu-mbehu ambuae ava upe Tūpa rembiguai remimombehugüer pītani re-sendar ñehesa yuvireco. ¹⁸ Evocoyase opacatu ava oyepihamondi co ñehesa rende yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevise ovesa rārosar yuviraso, omboetei iyavei osapucái Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pītani seropovēhesa Tūpa upe tūparo pipe

²¹ Ocho ari pipe ahe pītani ombocircuncida yuvireco; omondo sererguā Jesús yuvireco, ahe terer tupri avei acoi Tūpa rembiguai omombehu María upe imembiehi viteseve.

²² Ipare omboaviyese ohari güetave oñemoatiro āgua, ahe aipo ēgüe ehi Moisés porocuita rupi yuvireco yepi, ahese vinose pītani seraso tecua guasu Jerusalén tūparo pipe seropovēhe āgua Yar upe yuvireco. ²³ Ēgüe ehi yuvireco. Esepia, Yar porocuita

aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi. ²⁴ Yuviraso oporerecosa reropovēhe āgua yuvireco yande Yar porocuita rupi: “Ñepei oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia aviye etepri vahe. Oyerure vahe Tūpa upe, osāro vahe avei Israel recua pendar Pīsīrosar imombehupri. Ahe secoi vahe ité Espiritu Santo rese. ²⁶ Ahe chupe Espiritu Santo opa uca oicua “eresepia rane itera Poropīsīrosar Tūpa remimbou nde mano renondeve” ehi vahe.

²⁷ Ahe ari pipe Espiritu Santo viroguata tūparove. Oyepotase José, María reseve yuvireco tūparove Jesús pītani reropovēhe āgua Tūpa porocuita rupi tupri, ²⁸ ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

²⁹ “Che Yar, cūrītei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

³⁰ Asepia ité niha Poropīsīrosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecuarā mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyerogui.

³³ José iyavei María ndoyembovihai tēi yuvireco pītani rese Simeón yeroqui renduse.

³⁴ Evocoyase Simeón osovasa ahe pītani iyesupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuarā mbahe ava upe. Amove rumo viroñoñora yuvireco. ³⁵ Ipipe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete araviter rupive. ³⁷ Cūrītei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no. ³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osāro vahe güecua pīsīro āgua upe oico.

Jesús pītani reroyevi agüer Nazaret ve

³⁹ Evocoyase opacatu Moisés porocuita mboaviyere, opa oyevi Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

Jesús chīhivahe tūparo pipe secoi

⁴¹ Iyesupa yuviraso araviter yacatu Jerusalén ve Pascua pieta repia yepi. ⁴² Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, Ēgüe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pāhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, ⁴⁵ ndoyosui eté yuvireco. Ahese oyevi iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuita rese oporombohe vahe pāhuve oī; oyapisaca iñehe rese iyavei oporandurandu ahe ava upe Tūpa Ñehengagüer rese oī. ⁴⁷ Evocoyase opacatu ava ndoyembovihai

tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyésupa, oyepihamondii yuvireco. Ahese ichi aipo ehi chupe:

—Che membri, ¿mahera vo ãgüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vahe? —ehi osi upe.

⁵⁰ Iyésupa rumo ndosenducuai eté aipo oyeupe hesa yuvireco.

⁵¹ Evocoyase oyevi Nazaret ve oso supi. Aheve omboyeroña ité oyésupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

3

Juan Oporoãpiramo vahe secoi ivi iporupirēhisu rupi

¹ Quince araviter pipe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoyase mborerecuar secoi Iturea ve iyavei Traconite ve, Lisancias avei mborerecuar secoi Abilinia ve. ² Anás iyavei Caifás ahe pahi rerecuar ivate catu vahe yuvirecoi. Ahese Tūpa, “Emombehu che ñehesava upe cute” ehi Zacarías rahir Juan upe oico ivi iporupirēhisave. ³ Juan evocoyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tūpa upe, ahese opoãpiramora Tūpa pēu ñero ãgua pe angaipa rese” ehi. ⁴ Co yaviye ité Tūpa ñehesava mombehusar Isaías rembicuachiaguer pipendar aipo ehi vahe:

“Sendusa ivi iporupirēhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

⁵ ‘Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi peri ipãri vahe, ahe imohivisapara; peri ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pñisirosa resendar Tūpa remimbou yuvireco cute’ ehi vahe” ehi.

⁷ Ava rehi yuvinosepa chupe ‘tayande ãpiramo’ oyapave yuvireco viña. Ahe rumo aipo ehi: “¿Pe mboi mboetasa tēi peico! ¿Ava vo, ‘Pesera Tūpa ñemoirosa ou vahe sui’ ehi tupri tēi pēu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro ãgua. Esepia, Tūpa oicatuño ité co ita sui Abraham suindar nungar tupri apo ãgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia ãgua yepi. Yasiapri evocoyase imondosapara tatave” ehi.

¹⁰ —¿Mbahe pñha evocoyase oroyapora ore recocuer recuñaro ãgua oroico? —ehi ava rehi oporandu yuvireco chupe.

¹¹ —Pe pereco vahe ñuvirío pe camisa, ñepe pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi rerocuar ‘tayande ãpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata ãgua oroico? —ehi yuvireco chupe.

¹³ Evocoyase aipo ehi ahe ava yuvirecoi vahe upe:

—Aní perocua catu iri guarepochi pëu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihañora pe poraviqui reprü rese —ehi sundao upe.

¹⁵ Ava rumo, “¿Ndahei pīha co Poropĩsirosar sãrombri secoi?” ehi tēi Juan upe yuvireco.

¹⁶ Juan rumo aipo ehi opacatu ava upe: “Che opoãpiramo i pipe tēi; oura rumo ambuae che raquicuei, ahe pe ãpiramora Espíritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora ãgua ichui” ehi. ¹⁷ “Ahe güeru trigo mbovevesa ihigüer sui ipeha ãgua. Sãhiñ evocoyase yapocatusa, ihigüer rumo imondosa tata apirēhi vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhi güecocuer recuñaro ãgua yuvireco’ oya. ¹⁹ Ipare rumo Juan oñehe pĩrata mborerecuar Herodes upe secocuerai rese. Esepia, vıvri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús ãpiramosa

²¹ Yıpındar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure vıteseve, avıyeteramo tēi oyemboi tupri iva. ²² Ipare Espíritu Santo ogüeyi ou iharıve apıcasu nungar, iyavei oyeendu ñehesa iva sui aipo ehi vahe:

—Nde che Rahır ereico, che rembiaısu; sese avıha ité nde rese —ehi.

Ava eta oyesu vahe Jesucristo yesu renondeve

²³ Jesús vırecese treinta aravıter, ahese ramo omboıpi oporombohe. Ahe icuapri vahe ité José rahır secose viña. José Elı rahır secoi, ²⁴ Elı evocoyase Matat rahır, ahe Matat evocoyase Levı rahır, Levı evocoyase Melqui rahır, ahe Melqui evocoyase Jana rahır, Jana evocoyase José rahır, ²⁵ ahe José Matatıas rahır, Matatıas evocoyase Amós rahır, ahe Amós evocoyase Nahúm rahır, Nahúm evocoyase Esli rahır, ahe Esli Nagai rahır, ²⁶ Nagai evocoyase Maat rahır, ahe Maat Matatıas rahır, Matatıas evocoyase Semei rahır, ahe Semei evocoyase Josec rahır, Josec evocoyase Judá rahır, ²⁷ ahe Judá Joanán rahır, Joanán evocoyase Resa rahır, ahe Resa evocoyase Zorobabel rahır, Zorobabel evocoyase Salatiel rahır, ahe Salatiel Neri rahır, ²⁸ Neri evocoyase Melqui rahır, ahe Melqui Adi rahır, Adi evocoyase Cosam rahır, Cosam evocoyase Elmadam rahır, Elmadam evocoyase Er rahır, ²⁹ ahe Er Jesús rahır, Jesús evocoyase Eliezer rahır, ahe Eliezer Jorim rahır, Jorim evocoyase Matat rahır, ³⁰ ahe Matat Levı rahır, Levı evocoyase Simeón rahır, ahe Simeón evocoyase Judá rahır, Judá evocoyase José rahır, ahe José Jonam rahır, Jonam evocoyase Eliaquim rahır, ³¹ Eliaquim Melea rahır, ahe Melea Mena rahır, Mena evocoyase Matata rahır, ahe Matata evocoyase Natán rahır, ³² Natán David rahır, ahe David evocoyase Isaı rahır, Isaı Obed rahır, ahe Obed evocoyase Booz rahır, Booz Sala rahır, ahe Sala evocoyase Naasón rahır, ³³ Naasón Aminadab rahır, ahe Aminadab evocoyase Admin rahır, Admin evocoyase Arni rahır, Arni evocoyase Esrom rahır, ahe Esrom evocoyase Fares rahır, Fares evocoyase Judá rahır, ³⁴ ahe Judá Jacob rahır, Jacob evocoyase Isaac rahır, ahe Isaac Abraham rahır, Abraham evocoyase Taré rahır, Taré evocoyase Nacor rahır, ³⁵ ahe Nacor Serug rahır, Serug evocoyase Ragau rahır, ahe Ragau evocoyase Peleg rahır, Peleg Heber rahır, ahe Heber evocoyase Sala rahır, ³⁶ Sala Cainán rahır, ahe Cainán evocoyase Arfaxad rahır, Arfaxad evocoyase Sem rahır, ahe Sem evocoyase Noé rahır, Noé evocoyase Lamec rahır, ³⁷ ahe Lamec Matusalén rahır, Matusalén evocoyase Enoc rahır, Enoc evocoyase Jared rahır, ahe Jared Mahalaleel rahır, Mahalaleel evocoyase Cainán rahır,

³⁸ ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tūpa rahir.

4

Jesús recoãhasa

¹ Jesús Espíritu Santo rese ité secoi. Ahe osē iai Jordán sui oso. Ipare Espíritu viroguata ivi iporupirēhisa rupi. ² Aheve cuarenta ari secoise Caruguar osecoãha. Ndocarui avei oico. Sese ndasiepoi eté. ³ Caruguar evocoyase aipo ehi chupe:

—Tūpa Rahir ité nde recose, co ita sui eyapo pan cūritei —ehi.

⁴ Evocoyase Jesús omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Caruguar upe.

⁵ Ipare Caruguar viraso ivate vahesave. Aheve ñepei reseve opacatu ava-ava tēi mborerecuasa ivi pipendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheñã ava upe che remimbotar rupi. ⁷ Acoi ereñenopihase cheu che mboetei ãgua, ahese opacatu co mbahe ereipisira nde mahera —ehi tēi Caruguar chupe.

⁸ —Icuachiapri pipe rumo: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar viraso oyeupi tecua guasu Jerusalén ve. Aheve oviroyeupi tūparo apiterve. Aheve Caruguar aipo ehi chupe:

—Tūpa Rahir ité nde recose, eviapi cohava sui. ¹⁰ Esepia niha, icuachiapri pipe: ‘Tūpa oyocuaira güembigui eta nde rãro ãgua.

¹¹ Ahe nde mopuhara yuvireco que ñepei ita nde momara rãgüer sui’ ehi —ehi Caruguar chupe.

¹² Evocoyase omboyevi Caruguar upe:

—¡Aní! Icuachiapri pipe niha aipo ehi avei: ‘Nderesecoãhai chira nde Yar Tūpa’ ehi —ehi chupe.

¹³ Ahese Caruguar ndoicatu iri eté Jesús recoãha ãgua oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco pīratasa pipe, oyevi oso Galilea ve. Ipare serãcua oguata opacatu tecua-tecuami rupi. ¹⁵ Esepia, ahe oporombohe judío tūparo pipe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbituhusa ari pipe oique tūparove inungar oyapo yepi. Ahese opūha ‘tayeroqui icuachiapri maranehi pipe’ oya.

¹⁷ Evocoyase tūparo rese ñangarecuar pītivisar omondo Tūpa ñehe mombehusar Isaías rembicuachía chupe. Oyorase ahe cuachiar, oyerorqui icuachiapri aipo ehi vahe pipe ohã:

¹⁸ —“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivrive yuvirecoi vahe senose ãgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rasícuer oiporara vahe sui senose ãgua,

¹⁹ iyavei ‘cūritei Yar oyemoingatu oporovasasa mondo ãgua pēu’ he ãgua” ehi icuachiapri pipe

—ehi oyeroqui.

²⁰ Sese oyeroqui pare, oyapoapipa cuachiar imondo tūparo rese ñangarecuar p̄t̄iviisar upe. Ipare oguap̄i oī ava rembiepiave. Ahese opacatu tūparo p̄ipendar omahe at̄i yuv̄ireco sese. ²¹ Evocoyase ahe oñehe aipo ehi:

—Cūr̄itei yav̄iye co icuachiap̄i p̄ipendar opacatu pe rovaque —ehi.

²² Opacatu ava oñehe tupriño it̄e yuv̄ireco sese. Ndoyembov̄ihai t̄ēi iñehe tupri renduse yuv̄ireco. Oporandu-randu rumo yuv̄ireco oyeupe:

—¿Ndahei vo acoi co José rah̄ir t̄ēi? —ehi yuv̄ireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum p̄ipe, ěgüe ere avei eyapo cohava nde recua p̄ipe it̄e’ peyera cheu —ehi.

²⁴ —Supi et̄e, ndipoi et̄e niha que ñepe yepe Tūpa ñehe mombehusar oip̄isi tupri vahe güecua p̄ipe yuv̄ireco yepi. ²⁵ Supi tupri it̄e Tūpa ñehe mombehusar Elías recose, iñehe rupi tupri ndoqūi et̄e mbosap̄i arav̄iter yemombitesa rupi oico. Sese oime tiavor opacatu Israel iv̄i rupi aracahe. Ahese set̄a etepri cuña imer mano vahecuer oime Israel recua rupi viña, ²⁶ Tūpa rumo nomondoi Elías cuña imer mano vahecuer Israel pendar upe ip̄it̄ivi ĩgua. ěgüe ehi rumo omondo cuña ndahei vahe Israel pendar ip̄it̄ivi ĩgua. Ahe cuña tecua Sarepta pendar, ahe Sarepta Sidón ip̄imindar. ²⁷ Iyavei set̄a ava oime Israel recua p̄ipendar imbaheasi vahe lepra rerecosar yuv̄ireco evocoi Tūpa ñehe mombehusar Eliseo recose. Evocoi ava yuv̄irecoi vahe rumo ndipoi et̄e que ñepe ocuera vahe yuv̄ireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahese opacatu ava judío tūparo p̄ipendar oñemoiró iteanga yuv̄ireco sese aipo mbahe renduse. ²⁹ Sese opa voi et̄e opūha Jesús reraso ĩgua tecua p̄ipe sui iv̄it̄ri iv̄i socuerve yuv̄ireco, ahe ihar̄ive tecua yaposa. Ahe ichui oit̄i pota yuv̄ireco viña. ³⁰ Jesús rumo ip̄ahu sui os̄e tupriño oso.

Jesús ombogüera mbia carugar v̄ireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mb̄ituhusa ari p̄ipe. ³² Ipare opacatu ava, “¡Mara ehi rutei!” ehi t̄ēi iporombohesa renduse yuv̄ireco. Esepia niha, ahe oñehe güeco p̄iratasa p̄ipe.

³³ Aheve judío tūparo p̄ipe oime mbia v̄ireco vahe carugar oyese, ahe oñehe p̄irata Jesús upe:

³⁴ —¡Ore mañeco t̄ēi eme eve! ¡Mahera ereyuño t̄ēi cohava oreu, nde, Jesús Nazaret pendar! ¿Ereyu vo ore mocañi ĩgua t̄ēi? Che orocua it̄e. Nde niha seco maranehi vahe ereico Tūpa suindar —ehi chupe.

³⁵ Evocoyase,

—¡Quiriri, es̄e co mbia sui! —ehi oñehe p̄irata carugar upe.

Ahese carugar omboviapi ahe mbia ava rovai, os̄e ocua ichui; nomomarai et̄e rumo.

³⁶ Opacatu ava oyembosiquiye, iyavei oporandu-randu t̄ēi mbahe rese oyeupe yuv̄ireco: —¿Mara ehi vo aipo oñehe oico? ¡Esepia, co mbia op̄iratasa p̄ipe oyocuai carugar ava sui imose ĩgua! —ehi yuv̄ireco.

³⁷ Sese Jesús rer̄acua oyandu opacatu tecua-tecuami iv̄irindar yuv̄ireco.

Jesús ombogüera Simón Pedro rebireco si

³⁸ Evocoyase Jesús os̄e judío tūparo p̄ipe sui oso, oique Simón Pedro r̄etave. Simón rebireco si soh̄i iteanga ou. Evocoyase oñehe ahe pendar sese Jesús upe ‘ombogüeram̄i t̄ēi’ oyapave yuv̄ireco. ³⁹ Evocoyase Jesús oyeav̄i oso chupe soh̄i sui imbogüera ĩgua. Ocuera pare voi ahe cuña oñarapuha; ohañeco ahe ava yuv̄irecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepei-pei imbogüera. ⁴¹ Iyavei setá ava sui opa omose caruguar. Evocoyase caruguar osapucaí tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pĩrata caruguar upe, nomoñehe iri. Esepia niha, caruguar oicua ité ahe Tūpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cōhe ramomise, Jesús osē tecua pĩpe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoēhi āgua ité yuvireco vinā. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa avīye vahe Tūpa mborerecuasa resendar ava upe. Esepia, aherā niha che mbousa —ehi.

⁴⁴ Ēgüe ehi Jesús oguata oporombohe Judea tūparo rupi oico.

5*Pira mboha atĩ agüer*

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere atĩ yuvireco sese. Esepia niha, ahe osendu pota ité Tūpa Ñehengagüer yuvireco. ² Aheve oime ñuvirío carite imbehĩ popive. Ahe ava pira mbohasar opa yuvĩnose evocoi carite pĩpe sui yuvireco. Ipare opira mbohasa oyosei yuvĩnoi.

³ Evocoyase Jesús osepiase, oha Simón carite pĩpe iyavei aipo ehi chupe: “Tosĩri catumi tēi chĩhi coi coti ĩai popi sui” ehi. Ipare oguapi oĩ carite pĩpe. Aheve ombohe ava cute.

⁴ Oñehe pare aipo ehi Simón upe:

—Yaso ipa tipĩ catu vahesave. Aheve erembohara pira —ehi.

⁵ Simón rumo omboyevi chupe:

—Porombohesar, orosāha tēi niha pĩtu momba pira mboha oroico. Nde porocuita pĩpe rumo amondo irira pira mbohasa ĩve —ehi.

⁶ Ēgüe ehise, pira rehii omondoromi ombohasa yuvireco. ⁷ Ahese oyaitĩ yuvireco omboetasa evocoi ambuae carite pĩpe yuvirecoi vahe upe ‘toyugüerumi yande pĩtivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepemĩ tēi che sui, che Yar! ¡Esepia, che yangaipa vahe tēi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. ¹⁰ Iyavei Simón mboetasa ambuae carite pĩpendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pĩpe suive inungar pira eremboha, Ēgüe ere aveira ava reca cheu nara —ehi.

¹¹ Evocoyase opa vĩnose carite ivi ātasave yuvireco, oseypañõ opacatu mbahe. Ipare yuvirasõ supi.

Jesús ombogüera ava lepra rerecosar

¹² Ñepei ari Jesús secoise tecua pĩpe, aheve oime mbĩa lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, ĩya nde che mbogüerami eve —ehi chupe.

¹³ Evocoyase, opocose sese,

—Aipota. ¡Erecuerara cūritei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipape eicuavêhe nde porrecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoyase setá ava oyemboya yuvireco sese iñehe rendu ãgua ‘tayande mbogüerami tēi yande mbaherasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemi oyerure ãgua yepi.

Jesús ombogüera ava ndoguatai vahe

¹⁷ Ñepeí ari Jesús oporombohe oico. Yar Tūpa pīratasa vireco oyese ava mbogüera ãgua. Aheve avei oguapí yuvinoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ãgua yuvireco viña; ¹⁹ ndoicatui eté rumo seroique yuvireco ava rehii pāhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuae co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpañi ité niha oicatu ava angaipa upe oñero ãgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero ãgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipape osapucaí oso güētave Tūpa upe. ²⁶ Ahese opacatu tupri ité ava, “¡Too! ¿Mara ehi rutei pīha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepia vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rerocuar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoyase Leví opūha. Oseyapa oporaviquisa, oso supi.

²⁹ Ipape Leví oyapo pieta guasu chupe nara güētave. Aheve iyemborisave setá imboetasa ava guarepochi rerocuar iyavei ambuae ava ocaru yuvinoi ipiri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyevi ãgua yuvireco —ehi.

Yecuacusa rese ñehesa

³³ Ipape ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyeví chupe aipo ehi:

—Ndiyai eté ichohopri mboyecuacu mendasave imer oicove viteseve ipãhuve.

³⁵ Oimera rumo ari imer reraso ãgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyeví ãgua:

—Ndiyai eté ava upe vicrocua vaheerã turucuar ipiasu vahe sui ambuae turucuar cuacuami vahe apete ãgua. Esepia niha, ãgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ãgüe ehise, uva ricuer piasu evocoyase opara ombopu mbahe pিরer cuacua viña, ãgüe ehira oyepiyerepa, mbahe pিরer avei evocoyase ocañi tẽira viña. ³⁸ Uva ricuer piasu rumo yamondora mbahe pিরer piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe avıye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepe mbituhusa ari pipe Jesús vıroguata güemimbohe mbahe miti pãhu rupi. Semimbohe evocoyase oipoho-poho yuviraso trigo rãhi. Ipare oyequi opo pipe sãhi yuvireco igua. ² Evocoyase fariseo osepiase, aipo ehi yuvireco semimbohe eta upe:

—¿Mahera peporavıquiño tẽi co mbituhusa ari pipe peico! —ehi.

³ Jesús rumo omboyeví chupe:

—Peicua tẽi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasıepoise yuvireco. ⁴ Ahe niha oique ité Tũpa rẽta pipe, opoco pan imboeteipri Tũpa upendar rese evocoi pahi upe güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Rıquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomıi vahe

⁶ Ambuae mbituhusa ari pipe, Jesús oique juicio tũparo pipe oporombohe oico. Aheve mbia yasu coti ipo nomıi vahe secoi. ⁷ Moisés porocuaıta rese oporombohe vahe, fariseo avei omahengatu Jesús rese yuvireco ‘¿ombogüerara pıha co mbia mbituhusa ari pipe?’ oya; ‘yaiñhengapo angahu’ oyapave tẽi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomıi vahe upe:

—Epũha cohava terehã ava pãhuve —ehi.

Ahe mbia evocoyase opũha, opıta aheve ohã ⁹ Ahese Jesús oporandu ahe ava upe:

—Aporandura mbahe rese pẽu —ehi—. ¿Mbahe vo yaposara mbituhusa ari pipe yepi, mbahe tupri pıha, anise mbahe naporai vahe tie? ¿Yaipısiro pıha ava recocuer; yamocañi uca tẽi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomıi vahe upe:

—Eichoho nde yıva —ehi.

Ahe mbia evocoyase oichoho oyıva; evocoyase ipo ocuera tupri ité. ¹¹ Evocoyase oñemoıro catuño ité yuvireco sese, iyavei oporandu-randu oyeupe yuvireco ‘¿mara yahera pıha imomara ãgua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitri, oyerure p̄itu momba tupri Vu upe oico. ¹³ Cõhese, “Periõ” ehi güemimbohe eta upe. Ipãhu sui oiporavo doce tupri, ahe chupe, “Apõstol” ehi. ¹⁴ Co ahe yuvirecoi: Simõn, ahe acoi Pedro avei serer; Andrés Simõn rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simõn, ava güecua rese secatēhi vahe pãhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi ñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco p̄iratasa pipe oico.

Ava sorivete vahe iyavei ava ndoyembovihai vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tũpa mborerecuasa p̄eu nara ité secõi.

²¹ “Perorivete catu cūriteindar ndasiepoi vahe. Esepia niha, peh̄itarora peico curi.

“Perorivete catu pe acoi ava cūritei oyaseho vahe. Esepia niha, peviharetera coiye peico.

²² “Perorivete catu pe acoi ava pe amotarēhise, pe mboyepepiñose avei oyesui yuvireco, ñehe-ñehe tēise yuvireco p̄eu pe amotarēhisave, iyavei acoi viroĩrose pe rer mbahe tēi pipe che, Ava Riquehir, recocuer sui tēi yuvireco. ²³ Peyembovihaiño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Ēgüe ehi tupri avei evocoi ava ramoĩ aracahendar mara-mara tēi Tũpa ñehe mombehusar sereco yuvireco” ehi.

²⁴ “¡Peparaisu catu rumo cūritei mbahe yar peico vahe! ¡Esepia niha, pemboaviye perorivetesa peico!

²⁵ “¡Peparaisu catu acoi pe ih̄itaro vahe cūritei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietase cūritei! ¡Esepia, peyasehora pe viharēhisa pipe peico coiye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, ēgüe ehi tupri tamoi Tũpa ñehe mombehusar angahu tēi vahe upe yuvireco aracahe!” ehi.

Iyacatu yasaisu yande amotarēhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe. ²⁸ Peoporandu Tũpa porovasasa rese ava p̄eu ñehe-ñehe tēi vahe upe nara; peyerure Tũpa upe p̄eu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotindar avei pemoporēhiñora chupe. Iyavei acoi que ava virocuaño tēise pe yeasa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco p̄eu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira p̄eu imboyevi āgua rese. ³¹ Acoi mbahe peipota vahe ambuae ava oyapo vahe p̄eu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe ēgüe ehi yuvireco yepi. ³³ Anise, acoi ava mbahe

tupri ai oyapo vahe pëu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei ãgüe ehi yuvireco yepi. ³⁴ Acoi pemondoño tãise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipipe? Esepia niha, ava angaipa viyar ãgüe ehi avei yuvireco. ³⁵ Pe rumo pesaisu catura ava pe amotarẽhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi ãgua vichico’ ndapeyei chietera. Ahese oimera porerecosa aviye catu vahe pëu. Pe evocoyase Tũpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparisuereco inungar pe Ru Tũpa oporoparisuereco yepi” ehi.

Ndiyai ambuae ava seroĩrosa

³⁷ “Ndiyai, ‘Oyavi itẽ mbahe’ peye voiño tẽi ambuae ava upe. Evocoyase Tũpa, ‘Oyavi mbahe’ ndehi chira pëu. Pemocañi uca tẽi eme ambuae ava. Evocoyase Tũpa ndape mocañi tẽi chira. Peñeroño catu ambuae ava upe, ahese Tũpa iñero itera pëu. ³⁸ Pemondose mbahe ava upe, evocoyase Tũpa omondoño itera mbahe aviye vahe pëu inungar-ra omondo pe mbahe riru pipe pëu sãhambri tupri aviye vahe viña. ãgüe ehira mbahe imondo pëu. Tũpa oicua tupri itera pëu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pĩha ñepe ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi oviapira que ivicuar pipe yuvireco viña. ⁴⁰ Ñepe yepi niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiavimi rese tẽi pemahe? Iya rumo peyese rane mbahe tuvicha catu vahe pesepiara. ⁴² Ndiyai pëu, ‘Che toropĩtivi mbahe nde rembiavi rese’ peye vahe rã chupe. Esepia, pe peyavi guasu catu mbahe. ¡Pe Tũpa reroyasar angahu tẽi peico vahe! Penose uca rane pe rembiavi tuvicha catu vahe peyesi, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sãchi ati vahe sui higuera ha, iyavei ndahipohosai uva, yu pãhu sui. ⁴⁵ ãgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opĩha pipe yepi. Iyavei acoi ava ndaseco põrai vahe oyapo mbahe tẽi. Esepia niha, ahe vireco mbahe tẽi eté opĩha pipe yepi. Esepia niha, pe piha pipe sui tẽi osẽ pe ñehe ãgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tẽi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pëu uma nungar tupri itẽ acoi ava ou vahe cheu che ñehe rese oyapisaca vahe, iyavei oyapo itẽ vahe mbahe che remimombehu: ⁴⁸ ahe inungar tupri itẽ acoi ava oyapo vahe güõtara ita harive yepi. Yipindar rumo oyoho picucu rane itẽ ita harive imopuha ãgua. Yepi ahe oi upe oyepota tẽi ivitu ai, amarusu reseve oinupa pĩrata tẽi, nomboyerocuai eté rumo. Esepia niha, vireco itẽ ovĩracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavi acoi ava oyapo vahe güõtara ivi cuhi harive tẽi, ndovirecoi eté ovĩracuasa. Ipare amar, ivitu ai reseve oinupa pĩratá, opaño omonduru; ocañi tẽi eté evocoyase” ehi Jesús ava mbohe.

7

Jesús ombogüera chĩhivahe sundao rereciar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerãcua anduse rumo, oyocuai moviro tēi omboripar judío imboeteipri chupe iñehe água ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique água. ⁷ Sese niha che teieté ndasoi nde reca. Nde ñehe pipe tēi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou vodiño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepia vahe ité co mbia che reroya tupri vahe nungar judío eta pãhuve —ehi.

¹⁰ Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipare voi Jesús oso tecua Naín ve, iyavei semimbohe yuvirasoño ité supi ava rehi reseve avei no. ¹² Virovise tecua oso, osepia tehögüer ava virocuase yuvireco ñoti água. Ahe cuña imer mano vahecuer membri ñepeu vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbia chñivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oñ iyavei oñehe no. Ichui Jesús omondo ichi upe. ¹⁶ Opacatu tupri ité ava oyembosiquiye sepiase yuvireco:

—Cūritei oyemboyecua Tūpa ñehe mombehusar seco ivate vahe yande pãhuve cute —ehi yuvireco.

Iyavei,

—Tūpa niha ou güecua pñivíi água oico —ehi avei yuvireco.

¹⁷ Ipare co Jesús rerãcua yandusa opacatu Judea rupi, yivirindar rupi avei no.

Juan Oporoãpiramo vahe omondo vupindar Jesús recocuer cua uca água

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu água ‘¿nde ité vo Tūpa Rembiporavo aipo sãrombri ereico, anise oime tie ambuae orosãro vaheerã?’ oyapave. ²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu água: ¿Nde ité vo Tūpa Rembiporavo ereico imombehupri ereyu vaheerã, anise ambuae pñha orosãro oroico? —ehi yuvireco chupe.

²¹ Ahe arí pìpeve voi Jesús ombogüera setá ava imbaherasisa sui oico, ava caruguar rerecosar sui avei no. Iyavei ava ndasesapísoi vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndas-esapísoi vahe osareco tuprí cūritei yuvireco, ipāri-pāri vahe oguata tuprí, iyavei lepra rerecosar ocuerapa tuprí, ndayapísai vahe avei yapísapa, omano vahe opa ocuerayeví yuvireco iyavei ava iparaisu vahe upe imombehusa písirosa resendar ñehesa” peyera chupe. ²³ ¡Oviharetera acói ava oyeroyaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihiata ivitu ombova-mbova vahe nungar pīha? ²⁵ Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapísave yepi. ²⁶ ¿‘Mara ehi secocuer’ peye vo chupe? ¿Tūpa ñehe mombehúsar ité pīha? Ahe ité, iyavei evocói niha ivate catu vahe Tūpa ñehe mombehúsar sui. ²⁷ Ahe chupe ité Tūpa icuachiapri aracahendar pìpe aipo ehi: ‘Amondora che ñehe mombehúsar nde renondeve nde raperã moingatu ãgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

²⁹ “Co ñehe renduse opacatu ava, opacatu guarepochi rerocuasar yuvirecói vahe avei oñeapiramo uca vahecuer Juan upe yuvireco: ‘Supi eté Tūpa avíye vahe ité’ ehi eté yuvireco cute. ³⁰ Fariseo eta rumo iyavei Moisés porocuaíta rese oporombohe vahe ahe noñeapiramo uca potai vahe Juan upe yuvireco, ahe viroño Tūpa remimbotar oyeupendar yuvireco.

³¹ “¿Mbahe rese pīha amboyoyara ava recocuer cūriteindar? ¿Mara ehi pīha secocuer? ³² Ahe inungar chīhivahe iguayí tēi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tēi mimbí pēu, ndapepivoi eté rumo; iyavei oros-apucaí tēi sapucaisa viharēhisa resendar pēu, ndapeyasehoi avei’ ehi. ³³ Esepia, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mbía caruguar vireco vahe’ peye tuprí tēi chupe no. ³⁴ Coiye che ayu, Ava Riquehír, acarú iyavei aihu tuprí avei. Ipare, ‘Co mbía icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi iyavei ava guarepochi rerocuasar mboripar tēi’ peye avei cheu. ³⁵ Ava Tūpa mbahecuaasa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

³⁶ Fariseo Simón serer vahe oñehe Jesús upe: “Terecarumi che piri” ehi. Jesús evocoiyase oso sētave oguapí oī mesave. ³⁷ Ahese cuña angaipa viyar evocói tecua pendar secoi vahe oyandu ichose Simón rētave icaru ãgua. Sese viroyepota aheve mbahe síacua vahe siru pìpe seraso sepírusu vahe chupe. ³⁸ Aheve oyasehó ite oñenopiha Jesús pive iyavei güesai pìpe opa tuprí omoaquí ipi. Ipare opaño omombiru oha aprí pìpe ichui, iyavei oipirupite, oipiyere avei mbahe síacua vahe ipi rese. ³⁹ Sepiase fariseo, ipihañemoñeta tēi: “Co mbía Tūpa ñehe mombehúsar itese, oícuaño itera co cuña opoco vahe oyese ndipihai vahe viña” ehi tēi fariseo chupe. ⁴⁰ Evocoiyase aipo ehi fariseo upe:

—Simón, amombehu potami mbahe ndeu —ehi.

—Avíye Porombohesar, emombehu ru cheu —ehi.

⁴¹ Evocoiyase Jesús aipo ehi chupe:

—Ñuvirío mbía oime virocua guarepochi mbía guarepochi mondosar sui yuvireco. Ñepeí virocua guarepochi quiniento tuprí mboraviquí repirã ichui. Ambuae evocoiyase cincuenta rupive virocua. ⁴² Ipare ndoicatu irise ité imboyeví ãgua yuvireco chupe, evocói mbía guarepochi mondosar iñeroño chupe yuvireco —ehi—. Esãha, emombehu cheu, ¿uma evocoiyase osaisu catura mbía guarepochi mondosar? —ehi fariseo upe.

⁴³—Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aiquese acoi nde rēta pipe, nde nderembouimi eté i che pisei āgua cheu; co cuña rumo güesai pipe oyosei che pi. Ipare omombiru oha apri pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ “Nde nderemondoi mbahe sñacua vahe che āca rese; co cuña rumo opa tupri voi oipichi mbahe sñacua vahe che pi rese. ⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi pñsirosa. Sese eso tupriño eico —ehi.

8

Cuña oipitivii vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi. ² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipāhuve avei María secoi, Magdalena serer yoapisa vahe, ahe ichui osē vahecuer siete tupri carugar; ³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitivii mbahe güembireco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia āgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ “Ñepe mbia osē omaheti oico. Ahe otiapi-apñise mbahe rāhii oso, moviro oiti peri rupi. Ahe opa tēi oicambe yuvireco, iyavei vñrai opa tēi yuvirohu. ⁶ Iyavei moviro tēi oiti ivi nayanai vahesave ita pāhuve. Sese cūritei sori; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pāhuve. Ipare oyoya tupri sori yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepepei mbahe miti sui osē” ehi.

Aipo ohe pare, Jesús oñehe pñratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pñha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoyase omboyevi chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tñsa resendar

¹¹ “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; ¹² iyavei mbahe rāhii peri rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vñrai chupe, ahe inungar

caruguar ou vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. ¹³ Acoi mbahe rāhi seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo inungar co mbahe miti ndovirecoi vahe guapo oviracua āgua; viroya raimi tēi yuvireco. Oyepotase rumo mbahe tēi chupe, oyepepi voiño yuvireco ichui. ¹⁴ Acoi mbahe rāhi seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opihañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe ité. ¹⁵ Acoi mbahe rāhi seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tūpa Ñehengagüer rese oyapisaca āgua yepi; viroya tupri ité no; yuvirecoiño ité sese. Ēgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape āgua. ¹⁷ Esepia, ndipoi eté mbahe ñomipri, ndayasepiai vahe rā curi. Iyavei yaposa vahe imombehupirēhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocusaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vahe rā yuvireco ava rehi sui. ²⁰ Oime rumo ambuae ava imombehusar chupe, —Nde si, nde rivireta reseve nde repia pota tēi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepi ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasú carite pipe i, omondo pota ité ipive viña.

²⁴ Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pīrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. ²⁵ Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyēño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pīha co mbia! Esepia niha, ivitu ai, para guasu avei omboyeroa —ehi tēi oyeupe yuvireco.

Mbia Gerasa iguar vireco vahe caruguar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai. ²⁷⁻²⁹ Aheve mbia tecua iguar caruguar vireco vahe secói. Aracahe suive nani tupri ité secói iyavei ndopitai vahe ité oi pipe yepi; ēgüe ehi rumo ahe tehögüer ruvipa rupindar tēi secói. Setá rupi caruguar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme caruguar’ oyapave yuvireco chupe viña, ahe rumo ombosando-sandoño ité iyavei caruguar omoñemi ucaño ava porēhisa rupi

sereco. Evocoyase Jesús osēse carite pipe sui, osovañchi ahe mbia. Sepiase rumo, ahe mbia oñenopiha voi oso sovai oñehe pĩrata chupe:

—¡Eyepepi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai caruguar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yaviterve. ³¹⁻³² Oimese rumo cuchí setá ocaru vahe ivitri ruambesave, caruguar evocoyase oporandu chupe aipo ehi: “Toroiqueñomi tēi co cuchí aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi caruguar upe. ³³ Ahese opa yuvinose mbia sui yuviroique cuchí aviterve cute. Aheseve voi cuchí opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

³⁴ Cuchí rārosar osepia ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia caruguar rerecosarer oguapi oĩ ñipimi, oyemonde tupri, yaracua tupri avei oico. Ahese oyembosiquiye tēi yuvireco. ³⁶ Acoi ava osepia vahecuer, ahe opa mbahe omombehu yuvireco co mbia caruguar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. ³⁸ Yipindar rumo evocoi mbia caruguar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētave, emombehupa opacatu mbahe Tũpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetosa pipe oipisi tupri yuvireco. Esepia niha, ava opacatu ité osāro yuvireco. ⁴¹ Ahese Jairo serer vahe oyepota oso Jesús upe, evocoi judío tũparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētave, aheve peri rupi ava rehii yuvirasoño supi; oyemboti tupri ité yuvireco. ⁴³ Ahe ipāhu rupi oime cuña doce araviter rupi suvi yepiyere-yere vahe. Opa opa tēi omondo ombahe ocuera āgua repirā yepi; ndocueraí eté rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. ⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehii mo oyemboya nde rese iyavei nde moañi-añi yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pĩratasa osēse che sui —ehi Pedro upe.

⁴⁷ Ahe cuña ndoicatui oñemi. Sese oriri oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tupri apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe vitesave, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua. ⁵² Aheseve opacatu ava oyaseho ati, ndoyembovichai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipare Jesús, “Pembocaru” ehi iyeesupa upe. ⁵⁶ Iyeesupa evocoyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombehui chiera que ñepeí ava upe” ehi.

9

Jesús doce güemimbohe omondo Vu Tūpa mborerecuasa resendar mombehu āgua

¹ Jesús opa omonuha güemimbohe doce vahe oyeupe. Ipare omondo opīratasa opacatu upe caruguar ambuae-ae tēi vahe imboyepepi āgua ava sui iyavei ava mbogüera āgua imbaherasisa sui. ² Opa omondo Vu Tūpa mborerecuasa resendar mombehu āgua, ava imbaheasi vahe mbogüera āgua avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío peraso. ⁴ Pepitami ranera ñepeí oi pipe güeraño tecua yacatu peico. ⁵ Acoi ava ndape moingue uca potaise güeta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvinose yuviraso, iyavei oñemosai opacatu tecua rupi omombehu Tūpa Ñehengagüer písirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pīha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pīha?” ehi tēi. Esepia niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeí Tūpa ñehe mombehusar aracahendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan āca —ehi—. ¿Uma rerācua pīha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepepi ava rehii sui, viraso ivi iporupirēhisave tecua Betsaida cotive. ¹¹ Ahe ava rehii rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tūpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco.

¹⁶ Evocoyase oipisi poyandepo pan iyavei ñuvirio pira. Ipare omahe iva rese, “Aviyeteche Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco. ¹⁷ Evocoyase opacatu ava ocaru vahe ihitaropa tēi yuvireco. Ipare semimbohe omboapi-popa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropisirosar secoi” ehi

¹⁸ Ñepe arí pipe Jesús oyeruque ahe ae güemimbohe pãhve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehugar arachendar ocuerayevi” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropisirosar ereico —ehi Pedro imboyevi chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehí, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaite rese oporombohe vahe remiamotarēhi aicora. Ahe avei che yuca ucara yuvireco; mbosapi arí rupi rumo acuerayevira —ehi.

²³ Ipare aipo ehi opacatu upe:

—Acoi uguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosira viña, toyemoingatu voi che recocuer rese oparaisu ãgua arí yacatu rupi iyavei toguata tupri che rupi. ²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisiora. ²⁵ Esepia, ¿aviye ai angahu pñha ava upe opacatu mbahe co ivi pipendar pisi ãgua tēi, ahe ae tēi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehí, ãgüe ahera ichui acoi ayevise che reco pñratasa pipe, che Ru reco pñrata porañetesa pipe avei sembiguai rehii iva pendar maranehi reseve curi. ²⁷ Supi eté, oimera amove cohava ava nomano vitei chivaherã, osepiã rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho arí pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi. ²⁹ Oyerure viteseve, oñecuñaro sepiaca. Iturucuar evocoyase sendi, morochí eteanga. ³⁰ Ahese ñuvirio ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirio mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesii eteanga yuvireco viña. Aviyeteramo tēi opa sopesii yuvireco ichui. Ahese osepiã Jesús porañetesa yuvireco iyavei co ñuvirio mbia yuvinocha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohave yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa. ³⁴ Iyavei ñehe viteseve, aviyeteramo tēi iporēhi ìva quiha, oyopipa tupri ité. Evocoyase osiquiye tēi yuvireco. ³⁵ Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu ñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihāise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chñhivahe caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco.

³⁸ Ahese mbia ava pāhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; ³⁹ caruguar rumo opoco sese, omoase pucu-pucu uca yepi iyavei omoeōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepemí tēi caruguar ichui’ che yapave viña; nomboyepemí eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetas! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohave cheu —ehi ahe mbia upe.

⁴² Chñhivahe oyemboyase rumo sese, caruguar omboviapi voi imondo ivive, imoeōha iri. Jesús rumo ñehe pīrata caruguar upe imose āgua chñhivahe sui. Ahese chñhivahe ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

Jesús omombehu iri omano āgua

Opacatu ava ndoyembovīhai viteseve yuvireco, ahese aipo ehi güemimbohe upe:

⁴⁴—Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pīha ivate catu vahe rā curi?’ oyapave. ⁴⁷ Jesús rumo oicuaño ipihañemoñetas yuvireco. Evocoyase oipisi chñhivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chñhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar; ahe ndahei yande amotarēhisar

⁴⁹ Evocoyase Juan aipo ehi chupe:

—Ore mbohesar, orosepia niha mbia ombogüera vahe caruguar pīratasa sui ava nde rer pipe oico; ore rumo ndoroipotai chupe evocoyase seco āgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūrítei” ehi. ⁵² Evocoyase omondo ava güenonera. Ahe yuviraso tecua Samaria ivi

rupi ipituhu ãgua moingatu viña; ⁵³ Samaria iguar rumo nomoingue potai eté güëtave yuvireco. Esepia, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuvirasas ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güëtara, vírai avei vireco guaiti; che rumo, Ava Riquehir, ndarecoi que che rêta che pituhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tüpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rêtave mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresa imohivi tupri ãgua, omahese rumo guaquicuei coti, evocoi nungar naporai Tüpa mborerecuasave yuviroique vaherã —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua” ehi. ³ “Peso, opomondo ovesami nungar ava mbahe mimba oñaro vahe nungar pãhuve. ⁴ Peraso rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquese que oi pipe, yipindar rumo peyapo ranera: ‘Avirave. Tüpa tape rovasa’ peyera. ⁶ Acoi aheve oimese ava aviyave vahe, ahe oipisira Tüpa porovasasa; anise evocoyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rêta rupi-rupi tēi. Ñepeipei oi pipe güeraño pepitañora. ⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoyase pembogüerara, iyavei aipo peyera chupe: ‘Tüpa mborerecuasa namombrimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tüpa mborerecuasa namombrimi pe sui’ peyera chupe. ¹² Supi eté acoi ari cañi oyepotase, oimera Tüpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharēhisa resendar, tanimbu

avei omondora oãca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tũpa ñemoirosa ava Tiro, Sidón pendar sui ari cañi pipe coiye. ¹⁵ Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoyase che avei che mboyepepi oyesui yuvireco. Acoi ava rumo che mboyepepiño vahe oyesui, ahe evocoyase che mbousar avei omboyepepiño oyesui” ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetse aipo ehi yuvireco chupe:

—¡Ore Yar, caruguar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha caruguar rerecuar oviapise iva sui overa vahe nungar. ¹⁹ Che niha amondo pĩratasa pẽu peguata vaheerã mboi iyavei mbahe rumbiquĩape hari rupi opacatu pe amotarẽhisar pĩratasa reroyi ãgua, que mbahe pe momaraẽhi ãgua avei. ²⁰ Peyemboviharetei rene caruguaeta pe mboyeroya. Iya rumo peyembovha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espiritu Santo rese, vorivetesá pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. ²⁴ Esepia niha, setá etepri ava Tũpa ñehe mombehusar yuvirecoi vahe iyavei mborerecuar guasu eta aracahendar osepia pota tẽi mbahe pe rembiepia; ndosepiai eté rumo yuvireco. Osendu pota tẽi co pe remiendu yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tũpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirẽhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tũpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirẽhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvínose ava ndipihai vahe yuvireco chupe. Ahe vírocuapa imbahe yuvireco ichui, iturucuar opacatu reseve; iyavei yuvirocua-rocua yuvireco sese. Ipare oyuca seni seya peri rupi yuviraso. ³¹ Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. ³² Ëgüe ehi tupri avei ambuae mbia pahi p̄tívīisar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoiyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esãro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. ³⁶ Indó, ¿uma vo co evocoiyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoiyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güēta pipe. ³⁹ Icupihir evocoiyase María serer. Ahe oguapi Jesús pive ñehe rendu oĩ. ⁴⁰ Marta rumo oyembopihaviracua opacatu mbahe rese oico. Ipare oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache p̄tívīi rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo ãgua eico? ⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava vírocua vaheñã ichui —ehi Jesús Marta upe.

11

Jesús ombohe güemimbohe eta yerure ãgua rese

¹ Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihi ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave p̄tū mbit̄er rupi aipo peyera chupe: ‘Che mboripar, emboumi tēi mbosapi pan cheu tamboyeve ndeu.

⁶ Esepia, ambuae che mboripar oyepota ou che rētave; ndarecoi eté rumo mbahe amondomi vaheñã chupe’ peyera chupe. ⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. ⁸ Supi eté, yepe nopuhai chietera mbahe mondo pēu

pe mboripar secose viña, opũhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pẽu. ⁹ Sese aipo ahe pẽu: Pe porandura mbahe rese Tũpa upe, ahese omboura pẽu; peseca ahe mbahe, ahese peyosura; inungar pemota oquenda, ěgũe peyera peyeroquisa pipe Tũpa upe, ahese imboisara mbahe mbou āgua pẽu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeriquisa pipe omota vahe oquenda Tũpa upe, chupe imboisara.

¹¹ “Oimese tahi vahe pe pãhuve, tahir oporanduse pira rese vu upe, ¿omondora pĩha mboi tẽi guahir upe viña? ¹² anise, ¿omondora pĩha oporanduse mbahe rupiha rese, mbahe rumbiquiãpe tẽi chupe viña? ¹³ ¡Aní! Esepia, pe yepe ava ndaseco põrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru ìva pendar omondo catura Espiritu Santo acoi ava oyeupe porandusar upe!” ehi güemimbohe eta upe.

“Jesús viresco carugar pĩratasa oyese” ehi tupri tẽi ava yuviresco

¹⁴ Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipare ava rehii sepiase, ndoyembovihai tẽi yuviresco. ¹⁵ Amove rumo ava aipo ehi tẽi yuviresco: “Beelzebú, carugar rereciar pĩratasa pipe revo omboyepipi carugar oico” ehi tẽi yuviresco chupe.

¹⁶ Ambuae ava secoãhasa pipe oporandu yuviresco chupe: “Eyapo ru mbahe nde rembiapo ìva pendar nde recocuer cua āgua” ehi tẽi. ¹⁷ Ahe rumo oicuaño ipihañemoñetasa. Evocoyase aipo ehi chupe:

“Que mborereciar guasu povri pendar ovava-vavase oyeupe oyeamotarẽhisave yuviresco, ahese evocoi mborereciar pĩratasa ocañi tẽira. Iyavei ava omu rese ae oyeamotarẽhi vahe, oyemocañi aveira yuviresco no. ¹⁸ ěgũe ehi avei niha carugar. Esepia, sereciar omboyepipise opovri pendar, ovavara oyeupe yuviresco viña. Ahese oyemocañi tẽira yuviresco. Co ñehesa aipo ahe pẽu. Esepia pe, ‘Beelzebú pĩratasa pipe tẽi opa omose carugar ava sui oico’ peye tẽi cheu. ¹⁹ ěgũe ahese rumo viña, ¿ava pĩratasa pipe ru evocoyase pe voya omboyepipi carugar ava sui? Pe voya ae omboyecua pe ñehe pe rembiavi yuviresco pẽu. ²⁰ Che rumo Tũpa pĩratasa pipe carugar amboyepipi ava sui. Sese cũritei Tũpa mborerecuasa oyepota ité pẽu.

²¹ “Inungar oime ava ipĩrata etepri vahe, iyavei viresco oyeroyasa. Ipipe osãro güeta opacatu mbahe ipipendar avei icañiẽhi āgua. ²² Acoi ouse rumo ambuae ipĩrata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarẽhimbar yuviresco; iyavei acoi ava ndosecai vahe ava cheu, ahe omosai tẽi yuviresco che sui” ehi.

Carugar oyevi iri güeco agüerve

²⁴ “Acoi osẽse carugar ava sui, oguata tẽi ìvi ipiru vahe rupi opituhu āgua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi.

²⁵ Aheve oyevise, osepia iri secocuer inungar oi sahuvapri tupri. ²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tẽi catu ité secocuer yipindar güeco agüer sui” ehi Jesús ava rehii upe.

Tũpa Ñehengagüer viroya vahe sovasapri secoira

²⁷ Oñehe viteseve aipo mbahe rese, cuña ava rehii pãhu pendar oñehe pĩrata aipo ehi: —¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tũpa Ñehengagüer iyavei viroya vahe ité, ahe sovasapri secoira che Ru Tũpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehii oyere ati vitesse Jesús rese yuvireco, ahe aipo ehi: “Pe cūrteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe. ³¹ Acoi ari cañi pipe cuña mborerecuar guasu irohi coti secua vahe porandusave omombehura co ava cūrteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrteitei rumo oime ivate catu vahe cohava Salomón sui. ³² Iyavei ari cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe; cūrteitei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondo chiaveira que mbahevrive. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi. ³⁵ Sese peicua catu co poroesapesa pereco vahe, tape rereco eme pītumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pītu vahe pēu” ehi.

Jesús omombehu fariseo iyavei Moisés porocuita rese oporombohe vahe recocuerai

³⁷ Opase oñehe Jesús, fariseo vīraso güētave imbocarū. Oiquese sētave oso, oguapī mesave oī. ³⁸ Ocaru renondeve ndoyepoise rumo, ahese fariseo ndoyembovihai tēi nomboaviyeise judío porocuita. ³⁹ Ahe rumo aipo ehi fariseo upe:

—Inungar igua rīru iyavei tembihu rīru icupe rupi tēi yoseipri, ipipe rumo iquiha opitaño ité, ēgüe ehi tupri avei pe recocuer pe monda raisave mbahe-mbahe tēi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei? ⁴¹ Sese pemondo porerecosa ava iparaisu vahe upe pe recatēhiēhisa pipe. Evocoyase ipipe sui opacatu imoatīrombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepeipei diez vahe sui Tūpa upe viña, pe rumo ndaperoyai teco ivisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosa sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapī āgua tūparo pipe, iyavei peipota pēu opacatu ‘avirave’ oyapora ava pe mboeteisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgüer ruvipa icuaēhise ava oguata ihari rupi yuvireco” ehi chupe.

⁴⁵ Evocoyase Moisés porocuita rese oporombohe vahe,

—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipītiviimi eté ahe ava imboaviye āgua rese yuvireco.

⁴⁷ “¡Peparaisu! Esepia, pemoiingatū Tūpa ñehe mombehusar ruvipagüer peico Tūpa mboeteisa angahu pipe tēi. Pe ramoi teieté rumo oyuca yuvireco. ⁴⁸ Evocoyase pemboyecua co pe ramoi eta pihañemoñeta agüer secocuer moña pipe peico. Esepia,

ahe oyuca Tũpa ñehe mombehusar yuvireco. Pe evocoyase cũritei pemoingatu vite suvipagũer peico.

⁴⁹ “Sese Tũpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipãhu pendar oyucara yuvireco. Iyavei ambuae mara-mara tẽi virecora yuvireco’ ehi. ⁵⁰ Esepia, ava ndiporeroyai vahe cũriteindar upe ité omondora oñemoirosa opacatu oñehe mombehusar yucagũer rese aracahe suive, cũriteindar avei oyucase yuvireco. ⁵¹ Abel yuca agũer suive oyepotara Zacarías yuca agũerve oso. Ahe oyuca tũparo maranehi rocar mbahe reropovẽhesa rovai. Supi eté aipo ahe pẽu: Tũpa opara omondo oñemoirosa ahe yuca agũer rese ava ndiporeroyai vahe cũriteindar upe curi.

⁵² “¡Peparaĩsu pe Moisés porocuita rese oporombohe tẽi vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

⁵³ Ipare Jesús osẽ oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tẽi, oporandu-randu mbahe rese yuvireco chupe, ⁵⁴ osecõha-ãha tẽi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavi supi tupri vahe viña; ndahei eté rumo. ² Esepia, yaposa vahe imombehupirẽhi cũritei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pĩtumimbisave, ahe sendusa tupri ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatu ava rovaque” ehi.

¿Uma sui pĩha siquiyera?

⁴ “Iyavei aipo ahe pẽu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo ãgua pẽu. ⁵ Che rumo amombehura pẽu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vĩrai ñuvirío guarepochi rupivemi tẽi yepi. Tũpa rumo ndasesarai eté que ñepei sui. ⁷ Tũpa niha oicua ñepei-pei yande ha retacuer. Sese, pesiquiye eme; pe niha ivate catu vahe ité peico opacatu vĩrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tũpa upe sembiguai rovaque” ehi.

¹⁰ “Iyavei opacatu oñehe-ñehe tẽi vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe tẽi vahe rumo Espiritu Santo amotarẽhisave, ahe chupe ndipoi chietera ñeroisa” ehi.

¹¹ “Acoi pe amotarẽhisar che recocuer sui tẽi pe rerasose porandusave pe recoãha ãgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pĩha amombehura?’ ndapeyei chira. ¹² Esepia niha, ahe pipeve voi Espiritu Santo pe mbohera aviyeteramo tẽi mbahe mombehu ãgua rese” ehi güemimbohe eta upe.

Ñearosa mbahe pota raisa sui

¹³ Ñepeí mbaí ava rehíi pãhu pendar aipo ehi Jesús upe:

—Porombohesar, emombehumi che ríquehír upe, tomboyahomi tēi mbahe che mom-bahesa cheu —ehi.

¹⁴ Ahe rumo omboyeví chupe:

—Che mborípar, che ndachecuaitai mbahe moingatu ãgua, mbahe mboyaho-yaho ãgua avei —ehi ahe mbaí upe.

¹⁵ Ipare aipo ehi:

—Peñearo tuprí opacatu mbahe pota raisa sui. Esepia niha, ndahei mbahe rereco atí ãgua pe recocuer —ehi.

¹⁶ Ipare omboyoya ambuae mbahe rese imbohe: “Oime mbaí mbahe yar, iha tuprí ai eté semiti. ¹⁷ Ahese ipíhañemoñeta oico oyeupe: ‘¿Mara ahera píha che rembipoho rereco?’ ehi tēi. ‘Ndareco iri eté yapocatu ãgua’ ehi. ¹⁸ Ipare ipíhañemoñeta cute: ‘Aicua mbahe che rembiaporã. Opara aroyí tembihu rēta. Ichui ayapo irira ambuae tuvichá catu vahe. Aheve ayapocatura che remiti ráhíi opacatu mbahe areco vahe avei no. ¹⁹ Evocoyase aipo ahera cheyeupe: Che mborípar, oime setá mbahe cheu aravíter momba-momba ãgua; sese cūritei apítuhura vichico, acarura, acahura iyavei ayembovíharetera no, ahera’ ehi. ²⁰ Tūpa rumo aipo ehira chupe: ‘Mbaí, nandearacuai eté eico, co pítu pípeve voi eté eremanora. Co mbahe nde rembiapocatu, ¿ava mahera píha evocoyase?’ ehira chupe. ²¹ Ëgüe ehi eté niha que ava oyeupeñomi tēi mbahe omonuha atí vahe, iparaisu rumo Tūpa rovaque” ehi ahe mbaí upe.

Tūpa osãro opacatu guahír

²² Ipare aipo ehi Jesús güemimbohe upe: “Co amombehura pēu: Ndapeyemomahenduha guasu ai chira pe remihura rese pe recove ãgua, pe turucuarã rese tēi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vírai: nomahetíi vahe, nomonuhai vahe avei, ndovirecoi vahe avei mbahe ráhíi rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vírai sui! ²⁵ Ndipoi eté que ñepeí pe pãhu pendar oicatu vahe opíhañemoñetá iteangasa pípe tēi güecocuer mbosasaviño ãgua. ²⁶ Supi eté ndapeicatuise yapo, ndiyai peyemomahenduha guasu ai mbahe rese.

²⁷ “Pemahecua ru mbahe potrí caha pípendar rese: ndoporavíquií eté iyavei ndoipíai oturucuarã. Iyavei no yepe mborerecuar guasu Salomón víreco setá mbahe iporañete vahe aracahe víña, iturucuar catuprígüer rumo ndahoyoyai mbahe potrí catuprígüer rese. ²⁸ Tūpa niha omboporañete raimi tēi mbahe potrí caha pípendar. Ichui sapísapaño horno pípe. ¡Ahe rumo omondo catura turucuar pēu, pe ava nimbahe reroya tupríi vahe! ²⁹ Sese, ‘¿Mbahe píha yahura, mbahe píha yamondera?’ ndapeyei chira pe yemomahenduha guasu aisa pípe. ³⁰ Esepia, ava Tūpa reroyasarēhí co íví pípendar aipo nungar mbahe reseño tēi ipíhañemoñeta yuvireco yepí. Pe Ru Tūpa rumo oicua ité pēu mbahe ipane vahe. ³¹ Aviye catu rumo pesecara pe Yar Tūpa povríve pe reco ãgua, ahese omboura que mbahe ipane vahe pēu” ehi.

Ivave mbahe eta oime vahe yandeu

³² “Aní pesíquiye, che ovesa nungar, yepe pe movíromi tēi peico víña, pe Ru rumo oporoaisusa pípe oipota opovríve pe rereco ãgua. ³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe ríru ndituyui vahe nungar pípe. Aheve ava imonda rai vahe ndoiquei chira ñomi ãgua pe sui iyavei mbahe rasoí nomomarai chiaveira. ³⁴ Esepia, pe mbahe pe rembiereco setá catu vahesa rupi-rupi pe píhañemoñeta yepí” ehi.

Peyemoingatu Tūpa Rahír yeví ãgua

³⁵ “Peyemoingatu tupri che yevi ãgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuapri güerecuar osãro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú. ³⁸ Yepe serecuar oyepotara pĩtu mbiter ou viña, anise añihiveive, ahe rumo osãroño itera chupe imboi ãgua yuvireco. Evocoyase serecuar aviye ai etera chupe. ³⁹ Peyapisaca tupri co rese: acoi oi yar oicuaese mbahe hora imonda vahe yepota ãgua, ahese opitara imonda vahe rãro güeta pipe sui mbahe renoseñhi ãgua. ⁴⁰ Ëgüe peye aveira peyemoingatu che yevi ãgua. Esepia niha, che, Ava Riquehir, aporoesapiha tẽira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi:

—Che Yar, ¿oreuñomi pĩha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoyase omboavei Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ãgua ‘tembihu tomondo che rẽta pipendar upe che porocuita rupi’ ohesave. ⁴³ Acoi omboaviyese ocuaita, ahese oviharetera güerecuar yevise. ⁴⁴ Supi eté niha, serecuar oyocuaire opacatu ombahe rese hañeco ãgua. ⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tẽi sereco iyavei ocaru, oihu tẽi osavaipo-ipoño avei oico. ⁴⁶ Ipare rumo serecuar oyepotara imahemohaẽhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tẽise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara. ⁴⁸ Acoi mbiguai nomboaviyei vahe ocuaita icua tupriẽhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarẽhisa

⁴⁹ “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. ⁵⁰ Aique ranera rumo mbahe tẽi che recoãhasa pipe, jẽgüe ahera che paraisú itera imboaviye ãgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che ayu che sui ava yeamotarẽhi ãgua. ⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarẽhira yuvireco che recocuer sui: mbosapi oyamotarẽhira ñuvirio vahe, ñuvirio vahe evocoyase oyamotarẽhira mbosapi vahe yuvireco. ⁵³ Que ava oyamotarẽhira guahir, anise tahir evocoyase oyamotarẽhira vu; cuña oyamotarẽhira omembri, imembri evocoyase oyamotarẽhira osi; sovayar oyamotarẽhira vovayar” ehi güemimbohe upe.

Iva pendar poromondiisa mboyecuasa

⁵⁴ Ipare Jesús aipo ehi ava rehii upe: “Pe pesepiase mbahe pĩtu ari sosa coti sui opũhase, ahese, ‘Oquirá’ peye. Ëgüe ehi eté oqui. ⁵⁵ Iyavei acoi ivitu oipecuse irohi coti sui, ahese, ‘Sacú iteangara’ peye. Ipare ãgüe ehi eté. ⁵⁶ ¡Pe Tũpa reroyasar angahu tẽi peico vahe! Pe niha peicua mbahe iva rese oyecua vahe tẽi iyavei ivi rese mbahe oyecua vahe tẽi mombehu, ¡mahera ru ndapeicuai peyeupe mbahe cũritei oime vaherã mombehu peico!” ehi.

Peñero pe amotarẽhimbar upe

⁵⁷ “¿Mahera napesãha ranei pe ae ité co mbahe supi eté vahe? ⁵⁸ Acoi que ava nde amotarẽhisar nde soho ucasa nde mondo ãgua mborerecuar rovai, emoingatu tupri

voi mbahe eico chupe tenondeve nde rerasoẽhi ãgua sovai; anise, mborerecuar nde mondora ava naporai vahe rarõsar upe. Ahe evocoiyase nde roquendara. ⁵⁹ Supi eté nderesẽi chietera acoi eremboepipase voi eté eresẽra ichui” ehi ava rehii upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovẽhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tẽi oime vahe evocoi mbia Galilea pendar upe, yangaipa guasu catu rese ambuae güecua pendar sui ãgüe ehi mbahe chupe viña. ³ ¡Aní rumo! Acoi ndapemboasiise pe angaipa Tũpa upe pe yevi ãgua, pe avei opara pecañi tẽi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tũpa upe peyevi ãgua, pe avei opara pecañi tẽi” ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia viresco vahe ivira higuera oco pipe. Setá ari ahe oso sepia ‘¿iha pĩha?’ oyapave. Ndosecai eté rumo iha sese. ⁷ Ahese aipo ehi mbia oco rãrosar upe: ‘Esendu, che ayu pihii tẽi higuera ha reca mbosapi araviter rupi. Ndasepiiai eté rumo que ñepeii iha sese yepi’ ehi. ‘Eyasiapa; ndiyai ihai tupri tẽi cohavẽ’ ehi. ⁸ Ico rarõsar rumo omboyevi chupe aipo ehi: ‘Che rerecuar, ãgüe tehiño vite tẽi rane co araviter; amonguhira ivi chupe. Ipare amondora ivi sũ vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepeii mbituhusa ari pipe Jesús oporombohe judío tũparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa viresco, carugar tẽi omboyepami uca sereco. Sese ndoicatui opũha tupri uguata. ¹² Osepiase rumo Jesús, “Erio” ehi chupe.

—Cuña, cõritei nanembaheasi iri eico cute —ehi.

¹³ Evocoiyase omondose opo sese, aheseve voi cuña oyemohivi. Ipare omboetei Tũpa oico. ¹⁴ Judío tũparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui ãgua; ahe ari pipe peyura peposano ãgua, ndahei chira mbituhusa ari pipe —ehi.

¹⁵ Evocoiyase ahe mbia upe omboyevi aipo ehi:

—Pe Tũpa reroyasar angahu tẽi peico vahe, ¿nombohui vo pe pãhu pendar acoi güeimba tivii iyavei guaricu mbituhusa ari pipe yuvireco yepi no? ¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pĩha evocoiyase imbogüerasa mbituhusa ari pipe? —ehi tũparo pendar rerecuar upe.

¹⁷ Aipo ehise, opacatu yamotarẽhisar yuvinochi tẽi yuvireco ichui. Ambuae ava rumo oyembovahaño opacatu Jesús rembiapo osepiase yuvireco.

Yembohesa mostaza rãhi suindar

¹⁸ Evocoiyase Jesús aipo ehi avei: “¿Mbahe nungar pĩha Tũpa povri pendar, iyavei mbahe rese vo amboyoyara? ¹⁹ Oyoya tupri ité mostaza rãhi rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese vĩrai rehii oyapo guaitirã” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese p̄ha amboyoyara Tūpa povri pendar?
²¹ Oyoya tupri co pan mboapeposa rese, acoi cuña omboyeseha tupri vahe mbosapi s̄ahambri trigo cuhi rese opacatu imboapepo āgua yepi” ehi oporombohe.

Jesús peri icāhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepe mbia oporandu chupe aipo ehi:

—Che Yar, ¿supi eté p̄ha moviromi tēi ava oñepisirora yuvienco? —ehi.

Ahe evocoiyase omboyevi chupe:

²⁴ —Peyemoviracua tupri catu peique āgua oquendipi cāhimi rupi. Esepia niha, supi eté setá ava osāha tēira yuviroique vaheñā ahe oquenda rupi yuvienco viña, ndoyuviroique catui chira rumo yuvienco. ²⁵ Supi eté ahe inungar oi yar ouse oquenda mboya viña. Amove ava evocoiyase ocarve yuvienco vite vahe omota tēira oquenda, ‘Ore yar, emboimi tēi oreu’ ehi tēira yuvienco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi tēira yuvienco: ‘Ore niha orocarua vahe, oroihu vahe nde p̄iri, iyavei ore mbohe ore rocar rupi eve yepi’ ehi tēira yuvienco chupe. ²⁷ Ahe rumo aipo ehira: ‘Ñepe reseve niha acoi, Ndopocuai vahe, ahe p̄eu. ¡Pesiri che sui, pe opacatu mbahe-mbahe tēi aposar!’ ehiñora chupe. ²⁸ Pe rumo imombopri ra pe recocuer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuviencoise Tūpa povri ve ivave. ²⁹ Iyavei ava yugüerura añihivei coti sui, caharu coti sui, norte coti sui iyavei irohí coti sui, ahe evocoiyase yuviroguapira ocaru Tūpa mborerecuasave ipiri yuvienco. ³⁰ Supi eté amove ava ndoyavi ipa tēi vahe seique āgua ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavi ahe rane oique vaheñā ivave viña. Ahe rumo ipa tēi yuviroiquera —ehi Jesús ava rehi upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tēi Jesús upe yuvienco:

—Eyepepiño ave sui. Esepia, Herodes niha nde yuca pota oico —ehi tēi yuvienco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepiñora ava sui carugüereta vichico, ambogüerañora ava imbaherasisa sui, curi ayihive evocoiyase amombara che cuaita’ peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvienco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovri ve, ēgüe ahe pota tēi pe rereco viña, pe rumo ndapeipotai eté! ³⁵ Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14*Jesús ombogüera mbia iruru sui*

¹ Ñepe mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvienco. ² Aheve avei mbia iruru vahe seci. ³ Evocoiyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbítuhusa ari pipe imbaheasi vahe mbogüera ãgua; aní tie? —ehi.

⁴ Ahe rumo noñehiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tñvi ovñapise ivicuar pipe mbítuhusa ari pipe viña? —ehi.

⁶ Ahese nomboyeví catui eté ñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapñi chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epñha evocoi sui, co mbñia toguapñi eipeve’ ehira yandeu. Evocoyase yande yachñ tñira yaso ipami tñi yaguapñi. ¹⁰ Yande soho ucase rumo yuvireco, yaguapñira evocoyase ipa; yande soho ucasar ouse, aipo ehira yandeu: ‘Mborñ, erio cohava tenda imboeteipri catu vahesave ore pñri’ ehira. Ëgñe yahera imboeteipri yaico acoi ava yuviroguapñi vahe rovaque yande pñri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegñe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rñta cotñdar imbahe eta vahe. Esepia niha, ahe omboyevira ndeu, nde soho ucara oyepñri yuvireco; Ëgñe ehira evocoyase mbahe imboyevñpa yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipñ chutu vahe, ipñri-pñri vahe, ndasesapñsoi vahe avei. ¹⁴ Esepia niha, ahe ndoicatui mbahe mboyevñ yuvireco ndeu. Opase rumo ocuerayevñ ava seco catupñri vahe yuvireco, ahese erevñharetera eico. Esepia, ereipñsira mbahe aviye vahe Tñpa suñdar —ehi.

Jesús oporombohe carusa rese

¹⁵ Ñehe renduse rumo, ñepei mbñia yuviroguapñi vahe mesave, ahe aipo ehi Jesús upe:

—¿Sovasapñri catu ava Tñpa pñri ocaru vahe imborerecuasave! —ehi.

¹⁶ Evocoyase aipo ehi ahe mbñia upe:

—Oime mbñia oyapo vahe carusa guasu, oichoho uca ava setá oyepñri. ¹⁷ Ipare oyepotase ari caru ãgua, ahese aipo ehi güembiguai mondo: ‘Toyugñerupa che pñri ichohopri. Esepia niha, mbahe opa oingatu cute’ ehi. ¹⁸ Opacatu rumo ava, ‘Eñemosañomi tñi cheu’ ehi pñve yuvireco. Yipñdar mbñia aipo ehi: ‘Che rumo arocua ivñ; iya ité aso sepia. Sese eñemosañ cheu’ ehi chupe. ¹⁹ Ambuae mbñia aipo ehi: ‘Che arocua ramo diez tupri tñvi, ahe asñha ranera. Sese eñemosañ cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tñi ndasoi chira’ ehi. ²¹ Oyevisse mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipñ chutu vahe, que ndasesapñsoi vahe, anise que ava ipñri-pñri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoyase aipo ehi güembiguai upe: ‘Eguata iri ambuae perñ tecua ivñrñdar rupi avei toyugñerumi che rñtave yuvireco che pñri, tomboapñpopa ité che rñta yuvireco’ ehi. ²⁴ ‘Esepia niha, acoi yipñdar ava aichoho uca vahe ndipoi chietera que ñepei ocaru vaherñ che pñri’ ehi güembiguai upe —ehi Jesús ahe mbñia mbohe.

Yavai Cristo rupi guata ãgua

²⁵ Ava rehii Jesús raquicuei uguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi uguata ãgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco ãgua. ²⁷ Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi uguata ãgua, ahe chupe ndiyai che remimbohe seco ãgua” ehi. ²⁸ “Que ava pe pãhu pendar omopuha potase oi, ¿ndoyapisaca ranei chira ‘¿amomba angara pãha?’ oyapave? ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñora ³⁰ aipo ehira yuvireco: ‘Aye evocoi mbia omopuha pota tēi oi viña, ndoicatu eté rumo imboaviye’ ehira yuvireco chupe. ³¹ Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri ãgua ‘¿yaicatura pãha setá catu vahe rese yavava?’ ohesave. ³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu ãgua chupe. ³³ Ëgüe ehi avei pe recocuer ndapeseya potaise pe mbahe opacatu, Ëgüe ehi vahe ndahei eté che remimbohe” ehi.

Yande recocuer inungar yucri

³⁴ “Yucri aviye vahe ité yandeu; nasehe irise rumo, ndayaicatu chietera imoehe iri ãgua. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaheerã. Evocoyase ahe imombopri tēi vaheerã. Sese aipo ahe acoi ava oyapisaca pota vahe, toyapisacaño” ehi.

15

Porombohesa ovesa ocañi tēi vahe resendar

¹ Opacatu ava sui guarepochi reroquasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu ãgua yuvireco. ² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroñro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipãhuve no—ehi.

³ Evocoyase Jesús omombehu ovesa resendar yembohesa: ⁴ “Que ñepe pe pãhuve virecose cien ovesa güeimba, ipare co ocañira ñepe ichui viña, oseya ranera evocoyase evocoi noventa y nueve tēi aviye vahesave seco ãgua. Ipare oyevira ocañi vahe reca oso, oyosu rane itera viña. ⁵ Oyosuse, osupira oachihive voriveteseta pipe. ⁶ Ipare oyepotase güëtave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté Ëgüe ehi aveira oime toriveteseta guasu catu ivave acoi ñepe ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepe guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté Ëgüe ehi aveira oime toriveteseta Tüpa rembiguai va pendar rehii upe que ñepe ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chñhivahe catu vahe aipo ehi oyesupa upe: ‘Che ru, embou mbahe che mombahesa cheu’ ehi. Iyesupa evocoyase omboyaho ombahe imondo chupe. ¹³ Ipare coiye catumi, omonuhapa

opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. ¹⁵ Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rāro āgua. ¹⁶ Aheve oyemohitaro pota tēi cuchi rembihu pipe oico viña. Ndipoi eté rumo omondo vahe chupe. ¹⁷ Evocoyase oyemomahenduha tēi güeta pendar oporaviqui vahe rese: ‘¡Che ru rētave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che rieporēhi che rereco cohove!’ ¹⁸ Sese ayevíra che ru rētave. Aipo ahera chupe: Ayemboangaipa Tūpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. ²⁰ Evocoyase oyeví iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. ²¹ Ahese tahir aipo ehi chupe: ‘Che ru, ayemboangaipa Tūpa rese, nde rese avei; ndiya iri nde rahir che reco āgua’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuã penda sese, pitaqui avei. ²³ Iyavei guaca iquirá catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secoi viña, cūritei rumo oyeví iri cheu’ ehi. Ēgüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevíse ou güeta rerovicave, osendu voi ipieta guasu vahe yuvireco. ²⁶ Evocoyase oporandu mbiguai upe mbahe oime vahe rese. ²⁷ ‘Nde rivri mo co oyeví tupri iri ou. Sese nde ru oyuca uca guaca iquirá vahe iyevisa resendar’ ehiño. ²⁸ Evocoyase tiquehir oñemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe. ²⁹ Evocoyase tahir omboyeví chupe aipo ehi: ‘Che niha setá araviter rupi oropitiví vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta āgua’ ehi vu upe. ³⁰ ‘Indó, cūritei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquirá vahe chupe’ ehi.

³¹ “Evocoyase tu: ‘Eyapisacaño, che rahir, nde niha nderesirí vahe che sui. Opacatu che areco vahe rumo nde mbahe ité yepi. ³² Cūritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. ² Evocoyase serecuar ñepi opitivíisar omondo seca, ahe güeruse, ‘¿Mbahe vo aipo ereyapo eico; ayandu cūritei nde rerācua? Emoingatupa tupri voíño nde poraviquisa resendar cheu’ ehi, ‘Nandehañeco iri chira cohove mbahe rese cheu’ ehi, ‘Nandehañeco iri chira cohove mbahe rese cheu’ ehi chupe. ³ Evocoyase mbahe rese ñangarecuar: ‘¿Mara ahera pīha co evocoyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui āgua. Achí eteanga aveira rumo mbahe rese che porandu āgua’ ehi tēi. ⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherā oyepiri’ ehi. ⁵ Evocoyase oñehe ñepi-peí güerecuar sui mbahe vinose tēi vahe rese chupe. Yipindar vahe upe oporandu: ‘¿Mbovi mbahe erenose tēi yande rerecuar sui?’ ehi. ⁶ ‘Cien tupri chereve aceite siru tuvichagüe vahe rese’ ehi. Evocoyase, ‘Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta

rupindar año' ehi chupe. ⁷ Ichui ambuae mbahe vīnose tēi vahe upe oporandu no: '¿Mbovi mbahe vo erenose tēi yande rerecuar sui?' 'Cuatro ciento quintar rupindar' ehi. Evocoiyase, 'Co oime cuachiar sesendar. Yaicuachiara rumo tresciento veinte quintar rupindar' ehi. ⁸ Evocoiyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu āgua. Supi eté ava ndoicuai vahe Tūpa oicua catu mbahe moingatu āgua oyeupe Tūpa reroyasar sui.

⁹ "Sese che aipo ahe pēu: peiporu pe guarepochi pereco vahe co ivi pipe pe mboripar reime āgua. Ichui opa tēise pe guarepochi, oimera pe pisi vaherā teco apirēhisave.

¹⁰ "Acoi ava mbahe tupri chīhi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe chīhi vahe rese, ēgüe ndehi chiaveira mbahe tuvichá vahe rese. ¹¹ Evocoiyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco āgua. ¹² Iyavei acoi ndapemboaviye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

¹³ "Iyavei ndipoi chietera ñepe mbiguai omboyeroya vahe ñuvirío güerecuar. Esepia, ñepe osaisu catura imboyeroya pipe, ambuae evocoiyase ndoyambotai chira imboyeroya potaēhisa pipe. Ēgüe peye avei ndapeicatui Tūpa mboyeroya guarepochi pota raisa pipe" ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco. ¹⁵ Evocoiyase aipo ehi fariseo eta upe: "Pe co ava rembiepiave pe recocuer aviye angahu pe reco viña. Tūpa rumo oicua opacatu pe pihañemoñetasa. Esepia, yepe ava rovaque ndoyavi aviye ai vahe pe recocuer viña, Tūpa uve rumo mbahe tēi eté" ehi.

Mborocuaita iyavei Tūpa mborerecuasa rese ñehesa

¹⁶ "Yipisuive Moisés porocuaita iyavei Tūpa ñehes mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mborerecuasa resendar, sese ava iquerēhi catu cūrítei aheve yuviroique vaherā.

¹⁷ "Yavai catura que ñepe Tūpa porocuaita mboaviyeēhi āgua co iva, ivi opa vaherā sui" ehi.

Jesús oporombohe mendasa sui poiēhi āgua

¹⁸ "Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei" ehi Jesús.

Ava mbahe yar iyavei Lázaro

¹⁹ "Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, 'Tomboumi tēi que güembihu rahicuer ovipi vahe mesa sui' ehi mbahe yar upe viña. Aheve mbahe yar reimba cave oyemboya sese, icaracha osere yuvireco. ²² Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ "Ahese oso Tūpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. ²⁴ Evocoiyase osapucái pīrata: '¿Che ramoi Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuā pipe. Esepia, che paraisu etepri co tata pīratagüer pipe vitu' ehi. ²⁵ Evocoiyase Abraham omboyevi aipo ehi chupe: 'Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico' ehi. 'Cūrítei

rumo Lázaro oviharete oico cohave, nde evocoyase nde paraisu eipeve eico. ²⁶ Iyavei oime co ivicuar ipicucu vahe rasaēhi āgua oreu iyavei pēu no' ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro ²⁸ che rivri poyandepo vahe upe, chupe iñehe āgua. Ahe tosecuñaro güecocuer yugüeruēhi āgua co tecocuer mbahe tēisave’ ehi. ²⁹ Abraham rumo, ‘Vireco niha Moisés porocuita iyavei Tūpa ñehe mombehusar rembicuachiagüer yuvireco. ¡Ahe toviroya yuvireco!’ ehiño chupe. ³⁰ Evocoyase, ‘Taa, che ramoi Abraham, que omano vahecuer pāhu pendar rumo yuvirasose chupe, ahe evocoyase omoingatura güecocuer yuvireco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tūpa ñehe mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti āgua. ¡Ahe imboangaipa ucasar rumo iparaisu itera! ² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo āgua chihivahemi nungar mboangaipa uca rāgüer sui. ³ ¡Sese peñearo tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarēhi vitese rumo siete yupagüer ñepe ari pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tūpa rese oime pñratasa

⁵ Co doce tupri apóstol aipo ehi chupe:

—Emboumi oreu Tūpa rese ore yeroya catu āgua —ehi yuvireco chupe.

⁶ Evocoyase yande Yar omboyevi chupe:

—Supi eté, Tūpa rese pe yeroyasa, yepe ndoyavi chira mostaza rāhi tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tūpa rese pe yeroyasa pipe, ahe evocoyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pāhu pendar virecora güembiguai oporaviqui vahe ivi mboyere cove, anise que guaca rāro yuvi rupi viña; ichui iyevise, ¿‘Eique, eguapi terecaru’ ehira pñha sereciar chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurā avei. Ipare nde erocarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Ēgüe peye avei mbiguai nungar pe opacatu Tūpa pe cuaitarā ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucái yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. ¹⁵⁻¹⁶ Evocoyase ñepe ipāhu pendar, Samaria pendar, osepia ocuerasa, oyevi chupe osapucái pñrata Tūpa upe imboeteisave. Oñenopiha oso sovai, oyavi, “Aviye ndeu” ehi Jesús upe.

¹⁷ Evocoyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? ¹⁸ ¿Co mbia ambuae ivi pendar güeraño rumo oyevi ‘aviye ndeu’ ohesave Tüpa uve! —ehi.

¹⁹ Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tüpa mborerecuasa yande pãhuve secoi

²⁰ Ñepe arí pipe fariseo eta, “¿Marase vo aipo oura Tüpa omborerecuasa pipe mbahe moingatu ãgua?” ehi Jesús upe yuvireco. Ahe omboyevi chupe:

—Tüpa mborerecuasa ndahei acoi yasepia vahe. ²¹ ‘Co secoi, aheve secoi’ ndapeyei chira chupe. Esepia, ahe oicove ité pe pãhuve —ehi fariseo eta upe.

²² Ipare aipo ehi güemimbohe eta upe:

—Oimera arí pe peipota tẽira aico vaheã pe piri que ñepe arí rupi che, Ava Riquehĩ, che recosa pipe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tẽira yuvireco cheu. Ndapesaquicue moñai chira rumo. ²⁴ Esepia, inungar acoi overa vahe osesape guasu iva rese ocua yepi, ãgüe ahera che, Ava Riquehĩ, vitu arí osupitise che yevi ãgua curi. ²⁵ Yipĩndar rumo co ivi pipe che paraisu ranera ava cũriteindar mara-mara tẽi che rerecose yuvireco che repia potaẽhisave. ²⁶ Inungar ava Noé recose yuvirecoi aracahe, ãgüe ehi tupri aveira che, Ava Riquehĩ, yevi ãgua renonde. ²⁷ Esepia, ocaru, oihu, omendaño avei yuvireco. Oyepotase rumo arí ipapapri amarusu viapi ãgua, ahese Noé yuviroique arca pipe. Ambuae ava rumo opa ocañi tẽi yuvireco. ²⁸ ãgüe ehi avei aracahe Lot recose, ava ocaru tẽi, oihu tẽi, virocua tẽi mbahe omahera yuvireco iyavei mbahe mondosar tẽi, mbahe tĩsar tẽi, oi aposar tẽi avei yuvirecoi oyapisacaẽhisa pipe. ²⁹ Osẽse rumo Lot tecua Sodoma sui, aviyeteramo tẽi oviapi tata amar nungar iva sui. Opa tupri oyuca ava rehĩ aracahe. ³⁰ ãgüe ahe aveira aviyeteramo tẽi che, Ava Riquehĩ, ayemboyecuara curi.

³¹ “Ahe arí pipe acoi ava güeta harive secoi vahe, ahe toi que iri eme güeta pipe ombahe renose. Iyavei ava que rupi tẽi secoi vahe, toyevi iri eme güetave. ³² Sese peyemomahenduha co aracahendar Lot rembireco rese. ³³ Opacatu güecocuer osaisu vahe, ahe ocañi tẽira. Iyavei setecuer tẽi ocañi vahe, ahe rumo oñepisirora” ehi.

³⁴ “Ahe pĩtu pipe oimera que ñuvirío ava vupave yuviroque vahe yugüeru: ñepe acoi che reroyasar serasosara, ambuae rumo opitara. ³⁵ Ahese avei ñuvirío cuña ohichora yuvireco: ñepe serasosara, indugüer rumo opitara. ³⁶ ãgüe ehi aveira ñuvirío ava amombri güecua sui yuvirecoi vahe: ñepe serasosara, indugüer rumo opitara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo ãgüe ehira mbahe curi? —ehi.

Ahe evocoyase,

—Mbahe rehõgüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querẽhisa pipe yerureño ãgua arí yacatu rupi ² aipo ehi: “Ñepe tecuave oime mbia mborerecuar mbahe moingatusar ndosiquiyei vahe Tüpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rõtave, ‘Oime ava oyapo mbahe tẽi eté cheu, tomboepi cheu’ ehi chupe. ⁴ Yipĩndar rumo noipitivi potai. Coiye catu rumo cuña ombopihavĩracua tẽise, ipihañemoñeta iri: ‘Yepe che ndasiquiyei vahe Tüpa sui, ava sui avei ndasiquiyei vahe

ité,⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihīēhi āgua' ehi opihañemoñetasave" ehi.

⁶ Ipare yande Yar aipo ehi: "Peyapīsaca aipo mborerecuar naporai vahe ñehe rese. ⁷ Tūpa avei niha omoingatura mbahe güembiporavo oyeupe yeruresar ari, pītu rupindar upe yepi. Nosaro tēi chiranera opītivī āgua yuvireco. ⁸ Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riquehīr, ayevisē co ivi pipe vitu, oimera ava moviromi tēi oyeroya vite vahe che rese yuvireco" ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secōi oyeupe viña, iharive rumo viroīro ambuae ava. ¹⁰ "Ñuvirío ava yuvirasō tūparove oyerōqui. Ñepi ava fariseo, ambuae evocoyase ava sui guarepochi rerocuasar. ¹¹ Evocoyase fariseo oso tenonde ava rembiepiave oyerōqui aipo ehi: 'Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rerocuasar nungar tēi aico no. ¹² Iyavei ñuvirío yupagüer ñepi semana pipe ayecuacu ité nde recocuer rese, iyavei ñepi-pei cien guarepochi che poraviqui repri aipisi vahe sui amboyaho diez che porerecosa ndeu' ehi. ¹³ Ava sui guarepochi rerocuasar rumo opitaño amombri ichui. Aheve nomahei iva rese oyerōqui āgua oangaipa mboasisa pipe. Oyepochihanupa-nupa aipo ehi: 'i Tūpa, che paraisuerecomi eve, che angaipa viyar aico!' ehi oyerōqui" ehi. ¹⁴ "Sese aipo ahe pēu: co mbia ava sui guarepochi rerocuasar opa oipisi ñerosa Tūpa suindar güētave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi" ehi.

Jesús osovasa chīhivahe eta

¹⁵ Iyavei chīhivahe güeru Jesús uve yuvireco sovasapirã. Evocoyase semimbohe osepiase yuvireco, "¿Mahera vo peruño tēi chīhivahe?" ehi opihavīracuasa pipe serusar upe yuvireco. ¹⁶ Jesús rumo aipo ehi:

—iMahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa povrive. ¹⁷ Supi eté acoi ndoipisii vahe che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipipe —ehi.

Ñepi mbia mborerecuar imbahe eta vahe omoñeta Jesús

¹⁸ Ñepi mbia mborerecuar oporandu Jesús upe:

—Pormbohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁹ Jesús evocoyase aipo ehi ahe mbia upe:

—¿Mahera vo, "Aviye vahe" ere cheu? Oime rumo ñepi aviye vahe ité, ahe Tūpa secōi.

²⁰ Ereicua niha co porocuita aipo ehi vahe: 'Nandeaguasai chira, ndereporoyucāi chira, nandemondai chira, nanderemirai chira ambuae ava rese, eremboyeroyara nde ru, nde si avei' ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chīhivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepri evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyemboivhai tēi. Esepia niha, mbahe yar ité secōi. ²⁴ Sese omahe aipo ehi:

—¡Yavai eté rumo ava mbahe yar reique ãgua che Ru Tũpa mborerecuasave! —ehi—. ²⁵ Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁶ —¿Ava angahu pĩha evocoyase oñepĩsirora yuvireco viña? —ehi sendusar chupe.

²⁷ Evocoyase ahe chupe aipo ehi:

—Ava tẽi upe mbahe yavai eté, Tũpa upe rumo ndayavaimi eté —ehi.

²⁸ Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

²⁹ Evocoyase aipo ehi güemimbohe upe:

—Supi eté acoi oseya vahe que güêta, güembireco, viquehĩr, vivri, oyesupa, que guahĩr Tũpa mborerecuasa rese, ³⁰ ahe setá iteanga catu oipĩsira mbahe aviye catu vahe co ivi pipe oseya vahe sui. Ipore rumo tecua ambuaeve oipĩsi aveira tecovesa apirẽhi vahe curi —ehi.

Jesús omombehu iri omano ãgua

³¹ Evocoyase yande Yar opa viraso co cotĩmi doce güemimbohe. Aheve aipo ehi: “Cũritei yasora tecua Jerusalén ve yaico, aheve omboaviyera co Tũpa ñehe mombehusar rembicuachiagüer co che, Ava Riquehĩr, resendar ñehesa. ³² Che imondopri aicora ndahei vahe yande mu upe mara-mara tẽi che rereco ãgua. Che reroĩro-ĩrora iyavei ondivi-ndivira yuvireco che rese” ehi. ³³ “Iyavei che nupa-nupara. Ipore che yucara yuvireco. Imombosapĩsa ari pipe rumo acuerayevira omano vahe pãhu sui” ehi.

³⁴ Semimbohe rumo ndosenducuai eté iñehe yuvireco. Esepia niha, yavai eté senducua ãgua yuvireco chupe.

Jesús ombogüera ñepi mbia ndasesapĩsoi vahe

³⁵ Evocoyase Jesús ovirovise tecua Jericó oso, aheve mbia ndasesapĩsoi vahe oguapi oĩ peri popive porerecosa oyeupe mondo ãgua rese. ³⁶ Osenduse ahe ndasesapĩsoi vahe ava rehĩ piambu, ahese, “¿Mbahe vo pẽu?” ehi ava upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe. ³⁸ Evocoyase ahe güendapeve oñehe pĩrata:

—¡Jesús, David suindar, che paraisuerecomi tẽi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pĩrataño ité chupe.

⁴⁰ Evocoyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapĩsoi vahe upe:

⁴¹ —¿Mbahe vo ereipota ayapo vahe rã ndeu? —ehi.

—Che Yar, che mbosarecomi tẽira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapĩsoi vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tũpa yuvireco.

19

Zaqueo osepia pota Jesús

¹ Ichui Jesús oi que tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi rero cuasar rerecuar. ³ Osepia pota tẽi Jesús ‘taicua ité’ oya viña. Ndoicatu rumo opucuehise ava rehĩ pãhuve sepia ãgua. ⁴ Evocoyase ahe oña tenonde oso ‘tasepia ité’ oyapave, oyeupi ivira rese ivate oĩ senonera. ⁵ Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rõtave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesa pipe oipisi. ⁷ Sepiase rumo opacatu ava, “Yangai pa guasu vahe rêtave tēi oso” ehi yuvireco chupe. ⁸ Evocoyase Zaqueo opūha aipo ehi chupe:

—Che Yar, esendu rane, amboyaho tupri ra che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyeve ãgua —ehi chupe.

⁹ —Co pipe Tūpa oipisiro ité co mbia. Esepia, ahe niha Abraham suindar avei seci. ¹⁰ Esepia, che, Ava Riquehir, ayu co ivi pipe ava ocañi tēi vahe p̄siro ãgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tūpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vahe rã amombri oivi pendareta rerecuarã oyevise. ¹³ Oso ãgua renonde oichohopa uca diez tupri güembigua. Ahe opa omondo ñepeipei upe guarepochi sepirusu vahe, aipo ehi chupe: ‘Pepraviqui co guarepochi rese imboeta ãgua che yevise nara’ ehi. Ipare oso. ¹⁴ Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarã seci ãgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyeve ou cute. Opa uca oichoho oguarepochi p̄sisarer ‘¿mbovi-mbovi p̄ha oipisi oyacatu yuvireco?’ oya. ¹⁶ Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoyase mborerecuar guasu omboyeve chupe: ‘Mbiguai aviye vahe ereico, nde cuaita co nde poraviquisa ch̄himi vahe eremboaviye ité. Sese ereicora diez tecua guasu pendar rese hañeco ãgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoyase ereicora cinco tecua pendar rese hañeco ãgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoyase mborerecuar guasu aipo ehi chupe: ‘Nde mbiguai ndaseco p̄rai vahe ereico. Nde ñehes sui aicuara nde recocuer. Ereicuase ēgüe che hesa viña, ²³ evocoyase, ¿mahera ru ndereyapocatu che guarepochi guarepochi apocatusave che yevise voi senose ãgua cheu imboyeve catumi ãgua viña?’ ehi. ²⁴ Evocoyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarēhimbar, ndache potai vahe mborerecuarã yuvireco, ahe opara peru cohava che rovai yucapa ãgua’ ehi” ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoyase coiye catu tecua Betfagé iyavei Betania rerovicave, ivitri Olivo ip̄imi, aheve omondo ñuvirio güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi,

‘¿Mahera vo peyora?’ ehise que ava pëu, ‘Yar oiporu pota’ peyeñora chupe —ehi güemimbohe upe.

³² Evocoyase semimbohe yuviraso, semimombehu rupi tupri ité osepia mbahe yuvireco. ³³ Evocoyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyepi sese oso água. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi água oso, opacatu ava seroyasar supi uguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe ³⁸ aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoyase amove fariseo yuvirecoi vahe supi aipo ehi chupe:

—Porombohesar, eñehe nde rupi uguata vahe upe imonguiriri água —ehi tēi yuvireco.

⁴⁰ Evocoyase aipo ehi:

—Supi eté amombehu pëu: co ava iquiririse yuvireco, ita rumo evocoyase osapucái pĩratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducua tarahu co co ari pipe teco tupri a mondo pota vahe pëu viña, cūrítei rumo ocañi tupriño pe sui, ndapeicatui eté sepia!” ehi oyaseho. ⁴³ “Oimera rumo ari imombehupri naporai vahe pëu curi. Pe amotarēhimbar oñachi irira pe recua. Ipare oyere tupri vahe yuvireco pe rese pëu ovava água. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tüpa ouse pëu pe pĩsiro água” ehi Jerusalén pendar rese oyaseho.

Jesús omombopa ava mbahe rerecosar tũparo pipe sui

⁴⁵ Ichui Jesús oi que judío tũparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri arachendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tũparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pĩha yuca uca água viña?’ ehi yuvireco chupe. ⁴⁸ Ndoicatui rumo yuvireco. Esepia, ava rehii oyapisaca iporombohesa rese yuvireco.

20

Jesús mborerecuasa

¹ Ñepeí ari Jesús judío tũparo guasu pipe güecose, ombohe ava eta, omombehu ñehesa pĩsirosa resendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

³ Ahe omboyevi chupe:

—Che avei aporandura mbahe rese pëu. Pemboyevira cheu —ehi—. ⁴ ¿Ava vo Juan ombou ava ãpiramo água: Tüpa pĩha, ava tēi tie? —ehi ahe ava yuvirecoi vahe upe.

⁵ Ahese, “¿Mara yahera pĩha?” ehi-ehi tēi oyeupe yuvireco. “‘Tüpa’ yahese chupe, ‘¿Mahera ru ndaperoyai?’ ehira yandeu. ⁶ Anise, ‘Ava tēi remimbu’ yahese chupe,

opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tũpa suindar’ ehi eté yuvireco chupe” ehi tẽi oyeupe yuvireco. ⁷ Evocoyase ahe ava, “Ndoroicuai rumo Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pẽu —ehi mborerecuar guasu upe.

Ava mbahe tẽi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi. ¹⁰ Evocoyase oyepotase ari uva pohosa, ahese omondo ñepegi güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyevi tupri tẽi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tẽi avei ipogüer tẽi imboyevi imondo yuvireco. ¹² Ichui omondo iri tẽi imombosapisa rese ambuae güembiguai no. Ahe oyapicha-pichaño imosẽ imondo yuvireco.

¹³ “Coie miti yar aipo ehi: ‘¿Mara ahera pĩha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara pãve topita co ivi’ ehi oyeupe yuvireco. ¹⁵ Evocoyase ovinose miti pãhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? ¹⁶ Oura evocoyase ahe ava mocañipa ãgua, omondora ambuae ava upe oivi rese oporaviqui vahe rã” ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

¹⁸ Acoi que oviapi vahe evocoi ita harive, opa tẽira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuita rese, iñehe viteseve, oipisi pota tẽi Jesús yuvireco. Esepia, osenducua ité oyesendar iporombohesa yuvireco. Osiquiyẽño rumo ava rehi sui yuvireco.

Judío rerecuar osecoãha iri tẽi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe iñehe ãgua ‘toyavi angahu oñehe’ oya viraso vahe rã mborerecuar Pilato rovai.

²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoavirati vahe nde ñehe yepi. Nde rumo ereporombohe mbahe supi tupri vahe Tũpa recocuer rese. ²² ¿Aviyera pĩha yamondo guarepochi Roma pendar mborerecuar ivate catu vahe upe viña? ¿Ani tie? —ehi yuvireco chupe.

²³ Opa rumo oicua iñehe porombopasa tẽi. Sese,

²⁴ —Pemboyecua ru ñepegi guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tũpa upendar pemondoño ité Tũpa upe —ehi ahe ava upe.

²⁶ Ndoyavi uca catui eté iñehe ava rovaque ipisi ãgua yuvireco. Ahe rumo oyeupe imboyevisẽ, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸—Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiēhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi. ²⁹ Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiēhiseve. ³⁰ Ichui tivri omenda sese. Ahe omanoño avei guahiēhiseve. ³¹ Ipare imombosapisa tivri omenda iri tēi sese. Ēgüe ehi tupriño avei chupe. Ambuae ichuindar Ēgüe ehi tupri avei omanopa yuvireco guahiēhiseve. ³² Coiye cuña avei omano cute. ³³ Evocoyase opase ocuerayevi yuvireco, ¿uma rembireco itera pñha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaheerã, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tũpa rahir, Tũpa rembiguai eta iva pendar nungar yuvireco. ³⁷ Moisés rembicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tũpa” ehi. ³⁸ ¡Tũpa ndahei omano vahe Tũpa! ¡Ahe rumo oicove vahe ité Tũpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerēhi iri eté mbahe rese oporandu ãgua yuvireco chupe.

¿Ava suindar pñha Poropñirosar?

⁴¹ Evocoyase Jesús aipo ehi ahe ava upe:

—¿Mahera ru, “Poropñirosar David suindar ité” ehi yuvireco? ⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarēhimbar ñenopiha ãgua nde povrive yuvireco’ ehi David aracahe.

⁴⁴ ¿Mahera ru, “Poropñirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei tenda porañete catu vahe güenara otũparo pipe, carusave avei oseca tenda aviyee catu vahe yuvireco. ⁴⁷ Iyavei virocua-rocuano tēi cuña imer mano vahecuer rēta ichui. Oarondaguã tēi avei oyeriqui pucu-pucu yuvireco. Ahe rumo oipisira Tũpa ñemoirosa ipñrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerrecosa

¹ Ipare Jesús osepia ava imbahe eta vahe omondose oporerrecosa guarepochi riru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerrecosa. ³ Evocoyase Jesús aipo ehi:

—Supi eté co cuña iparaisu vahe omondo catu oporerrecosa opacatu mbahe yar sui.

⁴ Esepia, ava imbahe eta vahe, oguarepochi rumbirer tēi omondo oporerrecosa Tũpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporerreco ãgua Tũpa upe —ehi.

Jesús omombehu tũparo guasu monduru ãgua

⁵ Evocoyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cũritei pesepia vahe pipe ndipoi chietera que ñepeí ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa íva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropĩsĩrosar aico, cũritei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyeyi chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepeí ivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi rirĩi tuvichá vahe, tiavor, mbahe rasi opacatu-catu tẽi tecua rupi. Iyavei pesepiara íva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tẽi reime renondeve rumo pe pisira yuvireco che recocuer sui mara-mara tẽi pe rereco ãgua. Pe reraso aveira pẽu porandu ãgua tũparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tẽi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapeyeyi chira pepihañemoñeta rereco pe yeepi ãgua. ¹⁵ Esepia, che amondora che mbahecuasa pe ñehe ãgua. Ndoicatui chietera evocoyase pe amotarẽhimbar imboveyi yuvireco pẽu. ¹⁶ Pe amotarẽhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pãhu pendar yuvireco. ¹⁷ Opacatu ava ndape ambotai chira che recocuer sui tẽi yuvireco. ¹⁸ Nocañi chietera rumo que ñepeí pe ha pe ãca sui. ¹⁹ ¡Peyemoviracua evocoi nungar mbahe upe pe ñepisiro ãgua!

²⁰ “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tẽi reime ãgua yuvireco chupe. ²¹ Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvĩnose poyava avei ichui. Iyavei acoi que rupi yuvirecoi vahe, ahe toyeyi iri eme yuvireco. ²² Esepia, ahe ari oimera Tũpa ñemoirosa. Ahe omboaviyera icuachiapri aracahendar pipe imombehupri. ²³ ¡Iparaisu itera ahe ari pipe cuña ipuruha vahe, imembi pitani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Íva rese iporẽhira poromondiisa, ari rese, yasi rese, yasitata rese; iyavei ivi pipe, opacatu tecua rupi ava ndayaracua iri chira yuvireco. Oyembosiquiye guasu-guasú tẽi aveira yuvireco para guasu riapugüer renduse. ²⁶ Ahese ava setá yaracua cañi tẽira osiquiyepave yuvireco opihañemoñeta guasu aise co ivi pipe mbahe oime vaherã sui. Ahese avei íva resendar opacatu mbahe oririra. ²⁷ Ahese ramo opacatu ava che, Ava Riquehir, che repiara yuvireco, agüeyise íva quihá rese che piratasa rendigüer porañetesa pipe. ²⁸ Omboipise evocoi nungar mbahe, peyemonguerẽhi catura, peyemopoase pe querẽhisa pipe. Esepia, pe renosesa pihavira mbahe tẽi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramosa, yaicua cõimi ari saca vahe yepota água yandeu yepi. ³¹ Na ehi aveira pẽu che ñehe rupi tupri mbahe pesepiase. Sese peicuara Tũpa mborerecuasa cõimi eté secoise.

³² “Supi eté yuvirecove vitera ava osepiã vahe co mbahe opase yaviye. ³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya água mbahe tẽi aposa pipe, pe caguar tẽisa pipe, co ivi pipendar tecocuer rese pe pihañemoñeta tẽisa pipe avei. Evocoyase toposapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe tẽi sui pe yepẽpi água, pe yemboyecua tupri água che, Ava Riquehir, rovai” ehi güemimbohe eta upe.

³⁷ Eẽgüe ehi Jesús oporombohe ari rupi tũparo guasu pipe. Pĩtu pipe evocoyase opita ivitri Olivo rese. ³⁸ Iyavei opacatu ava yuviraso añihiveive tũparo guasu pipe ñehe rendu água yepi.

22

Yemomborandusa Jesús yuca água

¹ Ovirovise Pascua pieta pan ndayapepoi vahe hu água, ² ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tẽi Jesús yuca água yuvireco.

³ Evocoyase Carugar oi que Judas piha pipe, ahe acoi doce tupri semimbohe pãhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tũparo rãrosar yuvirecoi vahe upe avei imoñeta água, “Tamondo Jesús pe povrive” ehi. ⁵ Ahe evocoyase oyemboviharate yuvireco. “Yamondo guarepochi chupe” ehi voi eté yuvireco. ⁶ Judas evocoyase, “Aviye” ehi. Oseca voi ava porẽhiseve Jesús mondo água yamotarẽhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu água. Ahe pipeve avei ovesa Pascua pieta resendar yucapri seropovẽhesa yepi. ⁸ Evocoyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru água Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sõtave supi. ¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoyase ahe omboyecua oi guasu, ivatendar pẽu. Aheve pemoingatura yande caru água —ehi güemimbohe upe.

¹³ Ipare ahe yuviraso, semimombehu rupi tupri ité osepiã mbahe. Aheve omoingatu carusa Pascua pieta resendar yuvireco.

¹⁴ Osupitise icaru água apóstol reseve yuviroguapi mesave. ¹⁵ Evocoyase aipo ehi:

—¿Cuesave tẽi eté niha aipota acarú vaheã pe piri Pascua pieta resendar rese che mano água renonde! ¹⁶ Esepia niha, ndayapo iri chira pieta Pascua resendar acoi yaviyese voi eté Tũpa mborerecuasa pipe —ehi.

¹⁷ Evocoyase oipisi igua riru, “Aviye ndeu” ehi Vu upe, iyavei aipo ehi:

—Co amondora pẽu, perova-rova peyacatu. ¹⁸ Esepia, co pipe suive ndaihu iri chira uva ricuer acoi ouse voi Tũpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa pipe che rese yepi —ehi.

²⁰ Ëgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pëu nara, ahe che ruvi ipiyerepirã pe recocuer rese nara. ²¹ Cüritei rumo oime mbia mesave yande piri che mondo vaheã che amotarëhimbar upe. ²² Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

²³ Evocoyase aipo ehise, semimbohe oporandu-randu tēi oyeupe: “¿Ava pīha ãgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. ²⁵ Evocoyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. ²⁶ Pe rumo ãgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma pīha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pãhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe. ²⁹ Sese che amondo pëu pe mborerecuasa inungar che Ru ombou cheu che mborerecua ãgua. ³⁰ Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu ãgua” ehi güemimbohe upe.

Jesús, “ ‘Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha ãgua rese. ³² Che rumo ayeroqui nde rese nde yeroyasa paneñhi ãgua. Ereyevise cheu, emonguerëhi catu ambuae nde rivireta imoviracua uca ãgua yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoãha ãgua

³⁵ Evocoyase Jesús oporandu güemimbohe eta upe:

—Opomondose acoi mbahe riru porëhi, guarepochi riru porëhi, ambuae pe pitaqui ndugüer rerasoëhise, ¿ipane vo acoi mbahe ahese pëu? —ehi.

—Aní eté —ehi yuvireco chupe.

³⁶ Evocoyase,

—Cüritei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã.

³⁷ Supi eté amombehu pëu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoyase semimbohe aipo ehi yuvireco:

—Ore Yar, cohava oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyeroqui Getsemaní ve

³⁹ Ipare Jesús osē oso ivitri Olivo ve. Ahe ivitrive oso yepi, aheve semimbohe yuviraso yuvireco supi. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoēhi āgua —ehi.

⁴¹ Ipare oyepepi güemimbohe sui, inungar ita imombosa vahe amombrimi, aheve oñenopiha, oyerogui ⁴² aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

⁴³ Evocoyase oyemboyecua Tūpa rembiguai chupe, seco momirata āgua. ⁴⁴ Mbahe-mbahe tēi porarasa pipe oyerogui catu. Ahese sacuvor inungar tui osē ichui otiqui ivive.

⁴⁵ Oñarapuhase oyeroguisa sui, oyeve oso güemimbohe uve. Ahe rumo opaño yuviroque yuvirocua oviharēhisa pipe. ⁴⁶ Evocoyase,

—¡Mahera opaño peque! Peñarapuha, peyeroqui catu pe viapiēhi āgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehe vitesese, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite āgua. ⁴⁸ Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepe rumo supindar, pahi rerecuar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose tūparo pipe pe pāhuve ari yacatu rupi, na ndapeyapoi eté co nungar cheu. Aviyēño rumo, oyepota ité niha pēu imombehupri Carugar pīratasa pipe mbahe-mbahe tēi apo āgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombrimi rupive tēi osaquicue moñaño oso. ⁵⁵ Aheve ñachimbrimi pipe oyatapi yuvireco, oyere tupri tata rese oyephe yuvinoi. Aheve avei Pedro ipāhuve chini. ⁵⁶ Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepe hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe vitesese, oñehe tacura. ⁶¹ Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. ⁶² Ahese osē, oyasehó iteanga oso.

Sārosar mara-mara tēi Jesús vireco yuvireco

⁶³ Evocoiyase ava Jesús rãrosar iguayî tẽi yuvĩrocua-rocuva yuvĩreco sese. ⁶⁴ Osesacua yuvĩreco. Ipare oporandu yuvĩreco chupe:

—¿Eicua ité ru, ava evocoi ocua nde rese! —ehi yuvĩreco chupe.

⁶⁵ Iyavei setá mbahe rese oñehe-ñehe tẽi yuvĩreco chupe.

Jesús serasosa ava ñemonuhasa ivate catu vahesave

⁶⁶ Ahe arî pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuita rese oporombohe vahe yuvĩreco Jesús reraso uca ãgua ava ñemonuhasa ivate catu vahesave, oporandu mbahe rese yuvĩreco chupe:

⁶⁷ —¿Supi eté vo nde Poropĩsĩrosar ereico? Emombehu ru oreu —ehi yuvĩreco chupe.

—Amombehuse rumo pẽu, ndache reroyai chietera peye —ehi judío rerecuar upe—.

⁶⁸ Inungar che aporanduse mbahe rese pẽu, pe avei ndapemboyevĩ chietera cheu viña no. ⁶⁹ Co pipe suive rumo che, Ava Riquehĩ, aguapĩra Tũpa mbahe mboavaisarẽhi acato cotĩ —ehi.

⁷⁰ Ichuĩ opacatu ava oporandu yuvĩreco chupe:

—Evocoiyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoiyase ahe aipo ehi yuvĩreco:

—¿Indó! ¿Ava iri vo evocoiyase mbahe omombehura yandeu? Yasendu niha iñehe ité cute —ehi mborerecuar oyeupe yuvĩreco.

23

Jesús serasosa mborerecuar Pilato rovai

¹ Evocoiyase opacatu ava opũha yuvĩreco Jesús reraso ãgua mborerecuar Pilato rovai.

² Aheve oiñhengapo aipo ehi yuvĩreco:

—Orosepia co mbĩa oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsĩrosar mborerecuar ivate catu vahe aico” ehi oico —ehi yuvĩreco Pilato upe.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevĩ Pilato upe.

⁴ Evocoiyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbĩa que mbahe oyapo vaheerã —ehi

⁵ Ahe ava eta rumo,

—Supi eté opacatu ava oipihañemoñeta mboyeaviratĩ uca opacatu tecua rupindar. Yipindar omboipĩ Galilea rupĩ oico. Cũritei co Judea ve ãgũe ehiño ité —ehi ava eta Pilato upe yuvĩreco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pĩha co mbĩa Galilea iguar?” ehi. ⁷ “Ahe pendar ité” ehise yuvĩreco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá arî osepia pota tẽi serãcua anduse yepi. Evocoiyase oipota ité poromondiisa oyapo vaheerã oyeovaque viña. ⁹ Sese oporandu ati mbahe rese chupe. Nomboyevĩ eté rumo Herodes upe. ¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroĩrosave oñemoñeta-ñeta tẽi sese Herodes rovaque yuvĩreco. ¹¹ Evocoiyase Herodes osundao eta reseve iñehe mara-mara tẽi Jesús upe sese oguayî tẽisa pipe yuvĩreco. Omboyemonde avei turucuar iporañete vahe pipe yuvĩreco. ãgũe ehi imboyevĩ Herodes Pilato upe. ¹² Ahe arî pipe suive oyemborĩ Pilato Herodes rese. Ndoyeambotai vahe tie yipindar yuvĩreco viña.

“¡Tayaticasa!” ehi Jesús upe yuvireco

¹³ Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mbia cohava cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano água’ ehi. Sese omboyevño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepe soquendapri mose água.

¹⁸ Opacatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tēi mopuhasa sui iyavei oporapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose água. ²¹ Ahe rumo osapucái pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca água, ainupa uca tēira rumo. Ipare amoseñora —ehi.

²³⁻²⁴ Ava rehii rumo osapucái pĩratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe.

²⁵ Ëgüe ehi imose co mbia Barrabás, acói soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo água sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica águaave, ahe mbia upe, “Nde terevosii curusu rese Jesús raquicuei” ehi voiño tēi yuvireco.

²⁷ Ava rehii yuviraso saquicuei. Cuña avei setá oyaseho oviharēhisave yuvireco sese.

²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei. ²⁹ Esepia, oura ari naporai vahe. Ahese aipo peye tēira: ‘Aviye catu acói cuña nimembii vahe iyavei ndoicuai vahe imocambu omembri’ peye tēira. ³⁰ Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. ³¹ Esepia, Ëgüe ehise ivira yivive vitesé, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirã yuvireco.

³³ Oyepotase Ava Ñca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepe mbahe rese ipocosa coti, ambuae evocoyase mbahe rese ipocoēhisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayño Jesús turucuar rese oyeupe imboyaho-yaho água yuvireco. ³⁵ Ava rehii osepia yuvireco; mborerecuareta avei seroĩrosave aipo ehi yuvireco chupe:

—Oipĩsiro ambuae ava, toñepisiro ru ahe ae ité cute Tũpa Rembiporavo Poropĩsirosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropĩsirosar ereicose, eñepisiro ru nde ae, ore avei ru ore pĩsiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tũpa sui? Nde avei niha ocañi tēi vaherã. ⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoñhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

⁴³ Evocoyase omboyeví chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbit̄er ari, opa tupri pĩtu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tũparo asiãsa avei mbit̄er rupi tupri ovo. ⁴⁶ Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tũpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco. ⁴⁹ Opacatu avei ava oicua vahe Jesús, ipãhuve cuña Galilea sui yugüeru vahe, osepiãño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secói. Ahe mbia viroya vahe ité Tũpa ombou vaherã omborerecuasa pipe mbahe moingatu ãgua. Sese ndahei ipihañemoñeta rupi co mborerecuar oyapo vahe mbahe Jesús upe yuvireco.

⁵² Evocoyase ahe oso Pilato rētave oporandu ãgua Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. ⁵⁴ Esepia, ahe ari omoingatu mbahe mbit̄uhusa ari upe nara, ahe mbit̄uhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatuse yuvireco. ⁵⁶ Oyevise güētave yuvireco omoingatu mbahe sñacua vahe tehögüer resendar ipichi ãgua.

24

Jesús ocuerayeví

Ahe cuña opituhu mbit̄uhusa ari pipe judío porocuita reroayasave yuvireco.

¹ Cõhe ramomise domingu pipe, oyeví yuviraso tuvipave mbahe sñacua vahe reseve.

² Oyepotase yuvireco tuvipave, osepia soquendasa ita guasu ndipo irise güendagüerve.

³ Evocoyase yuviroique voi tuvipa pipe. Ndoyosui rumo yande Yar rehögüer yuvireco.

⁴ Ndoyembovihai tēi; ndoicatu iri. Ahese aviyeteramo tēi osepia ñuvirío mbia iturucuar sendi vahe oipive yuvireco. ⁵ Opañño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe! ⁶ Ndipoi mo cohave; ocuerayevi mo ahe. Peyemomahenduha ñehengagüer ivi Galilea rupi omombehu vahecuer rese, ⁷ “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñehengagüer rese yuvireco. ⁹ Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

¹² Pedro rumo yandu ramoseve voi, osē, oña oso tuvipave. Omahaese tuvipa pipe, turucuar güeraño osepia co cotimi tuisse. Evocoyase oyepihamondi tēi ‘¿mara ehi rutei pãha?’ oya oyevi oive oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuviraso opacatu co mbahe oime vahecuer rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepia tēi, ahe rumo ndoyepiacua ucai eté chupe. ¹⁷ Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. ¹⁸ Ipãhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehugar seco pĩrata vahe opacatu mbahe apo água, mbahe mombehu água avei Tūpa rovaque iyavei opacatu ava rovaque. ²⁰ Omondo pahi rereciar iyavei yande rerecuareta yamotarēhisave yuca uca água curusu rese yuvireco. ²¹ Ore rumo oroyeroya ité sese. “Ahe yande pĩsirora yande amotarēhimbar sui” orohe chupe viña. Cūritei rumo opa mbosapi ari yucare. ²² Ore pãhu pendar cuña ndore mbovihai eté oyevise suvipa sui yuvireco. Esepia, yipendar yuvirasose añihiveive tuvipave, ²³ ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūritei” ehi. Ahe evocoyase yugüeru imombehu oreu. ²⁴ Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

²⁵ Evocoyase aipo ehi ahe ñuvirío mbia upe:

—¡Ndapeicuai eté rumo pe piha pipe seroya tupri água opacatu Tūpa ñehe mombehugar remimombehugüer! ²⁶ ¿Ndapeicuai vo Poropĩsiosar iparaisu rane itera mbahe-mbahe tēi virecosa pipe güecua porañetesave güeique água renondeve? —ehi.

²⁷ Ipape opa omombehu icuachiapri Moisés cuachiar pipendar iyavei opacatu Tūpa ñehe mombehugar cuachiar pipendar oyese ñehe agüer.

²⁸ Oyepotase ahe tecuave yuviraso, Jesús rumo aviye oguataño vite vaherã senonde. ²⁹ Co mbia rumo oñehe yuvireco chupe:

—Epitaño ore piri, caharu etepri. Pĩtura moco ndeu —ehi yuvireco chupe.

Evocoyase oique, opitaño ipiri yuvireco. ³⁰ Oguapise yuvinoi mesave, oipisi pan, “Aviye ndeu” ehi Tūpa upe. Ipape ombóhi co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cūriteimi ndoyemboyecua iri sovai chupe. ³² Evocoyase aipo ehi oyeupe yuvireco:

—Yande mbopihañemoñeta pĩratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe viteseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hägüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaëhisa pe piha pipe! ³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseve omboyecuapa opo, opi avei chupe. ⁴¹ Ahe rumo vorivetesa pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

⁴² Evocoyase omondo pira apiremi oyi vahe yuvireco chupe. ⁴³ Ipare oipisi, ohu opacatu güemimbohe rovaque. ⁴⁴ Ipare aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tũpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Ëgüe ehi evocoyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropĩsirosar iparaísura omano ãgua. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tũpa upe pëu ñeroi ãgua” hesara. ⁴⁸ Pe niha peico opacatu co nungar mbahe repiasar imombehu ãgua. ⁴⁹ Che amboura che Ru remimombehu pe harive. Pepitañora rumo cohava tecua Jerusalén ve acoi peipisise voi pĩratasa iva suindar —ehi güemimbohe eta upe.

Ivave Jesús so agüer

⁵⁰ Evocoyase Jesús yuvinose tecua sui yuviraso tecua Betania popive. Aheve ñuvirío opo omopuha, osovasa mbahe tupri reime ãgua chupe. ⁵¹ Ipare oyepepi güemimbohe sui. Ahe ramoseve serasosa ivave. ⁵² Semimbohe evocoyase osapucái imboeteisave. Ipare oyevi Jerusalén ve vorivetesa pipe yuvireco. ⁵³ Iyavei ahe ari yacatu rupi yuviraso tũparo guasu pipe osapucái Tũpa mboeteisave yuvireco yepi. Aipo rupive.

JUAN REMBICUACHIA JESUS RECOCUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe secói. Ahe oicove mbahe apoēhi viteseve Tūpa rese. Esepia, ahe niha Tūpa secói. ³ Ipipe avei Tūpa opacatu mbahe oime vahe oyapo; ndipoi eté mbahe sembiapoēhi. ⁴ Jesús niha vireco tecovesa apirēhi vahe oyese. Ahe tecovesa tesapesa nungar secói opacatu ava upe. ⁵ Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatui eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombehusar tēi rumo secói. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisii yuvireco. ¹² Opacatu rumo acói oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pipe. ¹⁵ Juan niha oñehe sese ava upe aipo ehi: “Co uve niha acói aipo ahe vahe cuese: ‘Acoi ou vaherã che raquicuei, ahe ivate catu vahe che sui. Esepia, yipive ité secói che yesuēhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuaite yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepe vahe, secói vahe ité ipiri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipitivisareta imondo Juan uve ‘¿Ava vo nde? tehi yuvireco chupe’ oyapave icua āgua. ²⁰ Ahe rumo oyemombehu ité aipo ehi:

—Che ndahei eté Poropisirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acói Tūpa ñehe mombehusar ou vaherã? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¿Emombehu oreu ore oromombehu vaherã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pēu. Ahe inungar acói Tūpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Poropĩsirosar, ndahei avei Elías, ndahei eté Tũpa ñehe mombehupri ereico. ¿Mahera ru evocoyase ereporoãpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. ²⁷ Ahe co ivi pipe ou vaherã che raquicuei. Che rumo ndahei eté seco catupri vahe aico ipitaquisã yora ãgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

Tũpa remimbou Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “iPesepia, co Tũpa remimbou Ovesa nungar seropovẽhepirã opacatu ava angaipa mocañi ãgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. ³¹ Che rumo yipindar ndaicuai ahe yande remiaro ou vaherã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espiritu Santo ogüeyise iba sui inungar apicasu, opita tupri iharive” ehi.

³³ “Yipindar rumo ndaicuai eté. Tũpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’ ehi. ³⁴ Che niha asepia ité. Sese, ‘Co Tũpa Rahir ité secoi’ ahe pẽu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu:

—iPesepia, ndo co mbia Tũpa remimbou Ovesa nungar seropovẽhepirã! —ehi oreu.

³⁷ Aipo ihe ramoseve, oroguata voi eté supi. ³⁸ Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

⁴⁰ Simón Pedro rivri, Andrés, ahe che ndugüer ahese. ⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

⁴² Ipare voi, viraso Simón Jesús uve. Osepia, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi. ⁴⁵ Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuita re-sendar pipe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higeravrive ereicose —ehi Natanael upe.

⁴⁹ —Porombohesar, jnde niha Tūpa Rahir ereico, Israel iguar rerecuar guasu! —ehi Natanael chupe.

⁵⁰ —¡Che reroya voi eté acoi, “Oroepia iviravrive” che he sui tēi eve! Eresepiara rumo co mbahe sui avīye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyeveise avei ivave yuvireco —ehi.

2

Mendasa tecua Caná ve

¹ Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve. ³ Ëgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

⁵ Ichī rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepe-pe cambuchi pipe oique cincuenta litro, amove oique setenta litro i ipipe. Ahe judío oiporu pietase oyepoi ñgua yuvireco Tūpa porocuita mboavīye ñgua yepi. ⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. ⁸ Evocoyase aipo ehi ava ihañeco vahe upe:

—Penosemi chīhi, peraso pieta rese hañecosar uve —ehi.

Ëgüe ehi eté yuvireco. ⁹ Ihañeco vahe pieta rese osāha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñhe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer avīye catu vahe yipindar. Ipare acoi ava hītaropase yuvireco, omondo ndasepi vahe. Nde rumo ereyapocatupaño avīye catu vahe, ahe cūrītei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco pīratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepiā tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apī iguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe cūrítei ave sui! —ehi—. ¡Aní che Ru rēta mbahe mondosea tēi pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cūrítei? —ehi yuvireco chupe.

¹⁹ Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pñha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi. ²² Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secoi vitesse Jerusalén ve Pascua pieta pipe, setá ité ava viroya osepiase poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pñhañemoñeta mombehu āgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pñhuvise secoi vahe. ² Ahe oso Jesús pñri pñtu pipe, aipo ehi chupe:

—Porombohesar, oroicua ité Tūpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tūpa oyese secoñhise —ehi.

³ Evocoyase,

—Supi eté aipo ahe ndeu: acoi ava ndoyesu pñasu iri vahe, ndoi quei chietera Tūpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyese pñasu iri ocuacua pipe viña? —ehi—. ¿Oicatu irira pñha osi aviterve oique oyese iri āgua? —ehi Jesús upe.

⁵ Jesús ombovevi chupe:

—Supi eté aipo ahe ndeu: acoi ava i pipe iyavei Espiritu pipe ndoyesu vahe, evocoi nungar ndoyuviroiquei chira Tūpa mborerecuasave. ⁶ Acoi oyese vahe co ivi pñendar oyese sui, inungar tupri avei ahe; Espiritu pipe oyese vahe rumo, ahe espíritu. ⁷ Ereyepihamondi rene, ‘Peyesu pñasu irira’ ahese ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyese vahe Espiritu pipe —ehi Jesús chupe.

⁹ —¿Mara ehi pñha aipo evocoyase? —ehi Jesús upe.

¹⁰ —¡Nde niha porombohesar ivate vahe Israel pñdar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehese tēi niha mbahe co ivi pñendar rese pñu; ndache reroyai eté rumo peye. Tahetru revo mbahe iva pñdar amombehuse pñu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe pñu. ¹⁴ Inungar Moisés osupi ivate mboi rahanga ivi iporupirēhisa rupi

aracahe. Ēgüe ehi aveira che, Ava Riquehir, rerecosa ivate che rupira yuvireco¹⁵ opacatu ava che reroyasar tecovesa apirēhi rereco āgua yuvireco” ehi Jesús Nicodemo upe.

Tūpa poroaisusa ava upe nara

¹⁶ “Supi eté Tūpa osaisú iteanga opacatu ava. Sese ombou Guahir ñepi vahe ‘tocañi tēi eme che Rahir reroyasar yuvireco’ oya, ‘tovireco tecovesa apirēhi vahe’ ohesave. ¹⁷ Esepia, nomboui Tūpa Guahir co ivi pipe ava mocañi tēi āgua; ahe rumo ombou ava pīsiro āgua.

¹⁸ “Ava viroya vahe Tūpa Rahir, ndahei eté ocañi tēi vaheerā; acoi ava ndoviroyai vahe rumo, oipisi itera cañisa yuvireco Tūpa Rahir ñepi vahe reroaēhisa pipe. ¹⁹ Ēgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pītumimbi vahesave güeco āgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tūpa remimbotar oyapo vahe cua uca āgua opacatu ambuae ava upe —ehi.

Juan Oporoāpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoāpiramo. ²³ Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca āgua. ²⁴ Co rumo mbahe yaposa Juan roquendaēhi viteseve.

²⁵ Evocoyase Juan remimbohe omboipi ambuae omu judío rese oyeecopi-copi vaheerā i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūrítei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoyase aipo ehi güemimbohe upe:

—Ava ndoicatu mbahe apo Tūpa nombouise chupe. ²⁸ Pesendu tupri ité che ñehe cuese: “Che ndahei Poropīsiosar aico, che rumo senonde imboupri tēi aico” ahese pēu. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohā, oyemboviharete sese. Ēgüe ahe avei che cūrítei, ayemboviharete Jesús rese. ³⁰ Ahe niha seco ivate catu-catuño itera arí rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndoviirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoāpiramo catuse avei Juan sui ² (ndahei eté rumo Jesús oporoāpiramo; semimbohe

têi rumo ãgüe ehi yuvireco). ³⁻⁴ Jesús oicuae aipo nungar, osẽ Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oĩ. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chĩhi nde i taihu —ehi.

⁹ Cuña, Samaria pendar, rumo omboeyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehi vahe ité ava Samaria pendar upe yuvireco yepi.)

¹⁰ Evocoyase omboeyevi cuña upe:

—Ereicuase Tũpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose ãgua. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. ¹² Esepia, co igua ore ramoi Jacob oseya oreu. Cohave suiño ité niha ahe oiñu, tahir avei oiñu yuvireco ichui iyavei opacatu seimba. ¿Nde pĩha ivate catu ereico ichui? —ehi cuña chupe.

¹³ —Opacatu ava oiñu vahe co i, ihuseiño itera yepi, —ehi cuña upe—. ¹⁴ Acoi ava oiñu vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriẽhi ãgua, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cũritei erereco vahe nde resendar tẽi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tũpa ñehi mombehusar ereico cheu —ehi—. ²⁰ Ore ramoi eta omboetei Tũpa co ivitri rese yuvireco. Pe rumo, judío peico vahe, “Jerusalén ve yamboeteira Tũpa yepi” peye —ehi.

²¹ —Che reroya eve cuña, virovi ari pẽu peso iriẽhi ãgua Tũpa mboetei co ivitri rese iyavei Jerusalén ve. ²² Pe Samaria pendar peico vahe pemboetei tẽi pe rembiguaẽhi. Ore rumo oroicua oromboetei vahe. Esepia, ñepisiroso ou judío sui. ²³ Oyepota rumo ari cute, ahe ité co cũritei co pipe suive supi eté Tũpa omboetei vahe, Tũpa Espiritu pipe omboeteira yuvireco. Supi eté Tũpa, “Ëgüe tehi che mboetei yuvireco” ehi. ²⁴ Esepia, Tũpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Poropisrosar yu ãgua (ahe ‘Cristo’). Acoi ahe ouse, omombehu tupri opacatu mbahe yandeu —ehi cuña chupe.

²⁶ —Che niha ahe aico añehi vahe ndeu —ehi cuña upe.

²⁷ Aheseve semimbohe eta oyevi yuvireco, nombovihaipei güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehi co cuña upe?” ehi vahe yuvireco chupe. ²⁸ Ahese cuña oseya tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pĩha ahe Poropisrosar? —ehi omu eta upe.

³⁰ Evocoyase ava rehi yuvínose tecua sui, yuviraso Jesús recosave sepia. ³¹ Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

³² —Oimera rumo ambuae mbahe cheu che moviracua āgua. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. ³⁵ Esepia, pe aipo peye: ‘Ipane vite irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivirindar ava eta rese. Opa ité opiha omoingatu yuvireco, ahe inungar mbahe miti ha yaviye vahe.

³⁶ Acoi oporaviqui vahe Tūpa upe ava hā pisi āgua rese, ahe oipisira sepi yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco.

³⁷ Supi eté co ñehesa aipo ehi vahe: ‘Ñepe eté omaheti vahe; imonuhasar rumo ambuae ité’ ehi. ³⁸ Che opocuai ava hā pisi āgua ambuae ava poraviquisave; yipindar rumo ambuae oporaviqui ité yuvireco sese. Pe evocoyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoyase ava rehi Samaria pendar yuviraso chupe ‘epitami ore piri’ oya. Evocoyase opita ipiri ñuvirío ari rupi.

⁴¹ Setá catu iri ava viroya yuvireco iñehe ité renduse. ⁴² Evocoyase ava eta aipo ehi cuña upe yuvireco:

—Cūrítei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, orocua avei ahe supi eté opacatu ava pīsirosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osē ivi Samaria sui, osoño ivi Galilea ve. ⁴⁴ Ahe ae ité aipo ehi: “Tūpa ñehe mombehusar ndasaísusai ivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüerami che rahir omano pota vahe cheu’ oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteēhiseve —ehi mborerecuar chupe.

⁵⁰ —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. ⁵¹ Amombri seco viteseve, yuvinoña voi sovaichi sembiguai imombehu:

—¿Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca āgua ivi Judea sui oyevis Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. ³ Aheve ava eta imbaheasi vahe oñeno yugüeru ivi rupi: ndasesapiso vahe, ndoguatai vahe, ndipindugüei vahe avei i ñemomiisa osãro yuvireco yepi. ⁴ Esepia, amove tẽi Tũpa rembiguai ogüeyi ahe ivicuarve i momii ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera ãgua? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaherã i pipe i ñemomiise. Asãha tẽi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epũha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, uguata voi oico. Mbituhusa ari pipe tupri rumo ãgüe ehi. ¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosiã ãgua —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi ãgua. Esepia, Jesús aviyeteramo tẽi ndoyecua iri ava rehii pãhuve. ¹⁴ Coiye rumo Jesús osepiã iri tũparove ahe mbia, aipo ehi chupe:

—Ereicua co nde cuerasa cũritei, aní ereyemboangaipa iri mbahe tẽi catu reime iri ãgua ndeu —ehi chupe.

¹⁵ Ahe mbia evocoyase oso voi eté judío eta rereciar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tẽi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tũpa nungar, Tũpa uve ‘che Ru’ ohe angahu tẽisa pipe” ehi yuvireco chupe.

Tũpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tũpa Rahir ndoicatui eté mbahe apo oyesui tẽi, Vu rembiapo mbahe oicua; aheño tupri avei oyapo yepi. ²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tẽi ãgua chupe. ²¹ Esepia, che Ru ombogüerayevi omano vahe iyavei omondo tecovesa chupe. ãgüe ehi avei Tahir omondo tecovesa ava upe güemimbotar rupi. ²² Iyavei Tu nomondo iri ava upe sembiapo reprim. Esepia, ombou Guahir upe opacatu pĩratasa ava upe sembiapo reprim mundo ãgua. ²³ ãgüe ehi Guahir upe opacatu ava imboetei ãgua yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pëu: acoi oyapisaca vahe che ñehe rese, viroya vahe avei che mbousar, ahe viorecora tecovesa apirëhi vahe; ndahei chietera imocañipri. Esepia, osë manosa sui oipisi tecovesa. ²⁵ Supi eté aicua uca pëu: oura ari imombehupri, cüritei eté co ari oyepota, ava eta omano vahecuer osendura Tüpa Rahir ñehe. Acoi osendu vahe, oicoveño itera. ²⁶ Esepia, Tu viresco tecovesa oyese. Ëgüe ehi avei Guahir upe imondo tecovesa rereco ãgua. ²⁷ Ombou avei imborerecua ãgua chupe ava recocuer rese iporandu ãgua. Esepia, ahe Ava Riquehir secoi. ²⁸ Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura iñehe. ²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirëhi rereco ãgua; acoi oyapo vahe rumo mbahe naporai vahe, ocuerayevira yuvireco Tüpa ñemoirosa pisi ãgua” ehi Jesús judío rerecuar upe.

Jesús omboyecua tupri omborerecuasa

³⁰ “Che ndaicutui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo ãgua. Che Ru, che mbousar remimbotar rumo ayapo. ³¹ Que cheyese ae tēi añehese, ahese ndache reroyai chira peye viña. ³² Oime rumo ambuae che mombehusar. Ahe supi eté che mombehu pe seroya ãgua; ahe Juan. ³³ Pe niha, pemondo ava chupe imboporandu mbahe rese. Ahe semimombehu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro ãgua. Sese aipo ahe pëu. ³⁵ Juan niha inungar tataendi, Ëgüe ehi omboyecua mbahe supi eté vahe. Sese pe peyembovaha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo ãgua. Co mbahe ayapo vahe, ahe ité omboyecua che Ru Tüpa che mbousar. ³⁷ Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoiqueei eté pe rese. Ipipe niha ndache reroyai eté peye che Ru che mbose. ³⁹ Pe peicua tupri pota icuachiapri ‘icuapa tupri pipe revo tecovesa apirëhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirëhi rereco ãgua.

⁴¹ “Ndaipisii eté ava che mboeteisa tēi. ⁴² Iyavei opocua Tüpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicutui eté che reroya ãgua peye. Esepia, pe ae tēi peyemboetei; ndapesecai eté Tüpa ñepe vahe suindar yemboeteisa. ⁴⁵ Ndapepihãñemoñetai chira che pe recocuer mombehu ãgua rese che Ru rovai. Moisés peroya vahe ité niha oicuachía pe Tüpa reroyaëhisa chupe imombehu ãgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoyase ndapeicutui chietera che remimombehu reroya ãgua” ehi Jesús oamotarëhimbar upe.

6

Jesús oyopoi cinco mil ava

¹⁻⁴ Ipare Pascua pieta ipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi.

⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoyase Felipe omboyevi chupe:

—Dosciento denario pan ndosupiti chietera que chñhi-chñhimi ava retacuer viña —ehi.

⁸ Aipo hese, ñepei semimbohe pãhu pendar, Simón Pedro rivrí, Andrés aipo ehi chupe:

⁹ —Co chñhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoyase aipo ehi:

—Pemombehu opacatu upe toguapí yuvireco —ehi güemimbohe upe.

Capihi reimesave opa omboguapí yuvireco cinco mil ava. ¹¹ Evocoyase oipisi cinco vahe pan, “Aviye ndeu” ohe pare Vu Tũpa upe, opa ombohi-mbohi imondo ava rehí upe.

Ëgüe ehi avei pira upe, imondopa semimbotar rupi-rupi yuvireco. ¹² Opase ava ihĩtaro,

—Pemonuhapa sumbirer iyemombucaẽhi ãgua —ehi güemimbohe upe.

¹³ Evocoyase omonuha doce iruova sumbirer yuvireco pan cincomi vahe sui.

¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tũpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opĩratasa pipe tẽi güeraso pota ãgua mborerecuar guasu vireco ãgua oyeupe nara yuvireco, ahese oyeupi iri oso ivate catu. Aheve ahe ae güeco ãgua.

Jesús oguata i hari rupi

¹⁶ Pĩtu ramose ogüeyi yuviraso Jesús remimbohe ipave, ¹⁷ yuviroha carite pipe sasa

ãgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei

eté. ¹⁸ Ahese oipeyu pĩrata ivitu, i avei ohitu pĩrata. ¹⁹ Yuviraso pucumi tẽi cinco, anise seis

kilómetro rupi. Ahese osepia Jesús yuvireco osupiti senise carite. Ahe i hari rupi oguata

oso chupe. Evocoyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tẽi oyepota yuviraso oyuvirasosave.

Ava eta oseca Jesús

²² Ahere ayihive ava rehí opita vahe sovai yuvireco, “Semimbohe año rumo yuviraso ñepei vahe carite pipe. Jesús rumo ndosoi eté güemimbohe rupi” ehi tẽi yuvireco.

²³ Aheseve rumo ambuae carite viroyepota seru yuvireco tecua Tiberias pendar, acoi

Jesús ava remihura pan reroyeroqui agüer rerovicave. ²⁴ Evocoyase ava rehí oicuase

Jesús semimbohe reseve iporẽhise yuvireco, yuviroha yuviraso ãgua co ambuae carite pipe tecua Capernaum ve seca.

Jesús, pan nungar, tecovesa apirẽhi vahe secoi

²⁵ Oyepotase ava rehí ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pẽu. Pe rumo che reca peye che pe mbocarusa rese tẽi, ndahei co che poromondiisa reroyasave ité peico pota che rupi. ²⁷ Peporaviqui eme catu tembihu

ndasecosei vahe rese; iyacatu rumo peporaviqui tembihu secose vahe rese omondo

vahe tecovesa apirẽhi. Co tembihu che, Ava Riquehir, amondora pẽu. Esepia, che Ru

Tũpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tũpa upe? —ehi yuvireco.

²⁹ —Tũpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaherã nde reroya tupri catu ãgua? ³¹ Esepia, aracahe ore ramoi eta yuvirohu ivi iporupirẽhisa rupi.

Icuachiapri arachendar pipe omombehu: ‘Omondo pan iva pendar semihura’ ehi — ehi ava eta yuvireco chupe.

³² —Supi eté amombehu pëu: ndahei Moisés omondo pan iva pendar chupe, che Ru rumo omondo chupe. Cūritei che Ru ombou pëu pan supi eté vahe iva sui. ³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe — ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu — ehi yuvireco chupe.

³⁵ —Che ité ahe pan aico tecovesa mondo āgua. Acoi ou vahe cheu ndiyumbiasí iri chietera iyavei acoi che reroya vahe ndihusei chiaveira. ³⁶ Aipo ahe niha acoi pëu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui iva sui mbahe che remimbotar apo āgua tēi; ayu rumo che mbousar porocuita apo āgua. ³⁹ Che Ru che mbousar ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. ⁴⁰ Che Ru oipota avei opacatu ava oyeroya vaheñā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi — ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? — ehi yuvireco chupe.

⁴³ Evocoyase judío eta upe aipo ehi:

—Pepoño che reroñrosa sui. ⁴⁴ Ndipoi chietera que oicatu vahe ou cheu, nomonguerēhise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tūpa ñehe mombehusar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeí ava osepiā vahe che Ru; acoi ichui ou vaheño ité, ahe güeraño tupri ité osepiā. ⁴⁷ Supi eté aipo ahe pëu: acoi che reroya vahe vireco tecovesa apirēhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoí eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco. ⁵⁰ Che rumo añehe pan iva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirēhi vaheñā ité. Co pan amondo vaheñā, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rereciar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? — ehi yuvireco.

⁵³ —Supi eté aipo ahe pëu: ndapehuisse Ava Riquehir rete, ndapehuisse avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirēhi iyavei che ambogüerayevira ari ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ēgüe ehi aveira che husar che sui yuvirecovera. ⁵⁸ Añehe pan iva sui ogüeyi vahe rese. Co pan ndahei maná pe ramoí eta yuvirohu vahe nungar. Esepia, yande ramoí opaño ité omano yuvireco. Acoi ohu vahe rumo co che rete, oicovera apirēhi vaheñā ité — ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya água; ¿ava vo viroya tẽira viña? —ehi yuvireco.

⁶¹ Jesús rumo oicua voi eté ñehe-ñehe tẽise co mbahe rese yuvireco, evocoyase oporandu:

—¿Pemboasiño tie che ñehe? ⁶² ¿Mara peyera pĩha che repiase peye che, Ava Riquehir, ayeupise che reco agüerve vicho viña? ⁶³ Espíritu ité niha omondo tecovesa; yande retecuer rumo êgüe ehi tẽi vahe. Co amombehu vahe pẽu ahe espíritu iyavei tecovesa.

⁶⁴ Oime vite rumo amove pe pãhuve ndache reroyai vahe —ehi ava rehii upe.

Esepia, Jesús oicua ité yipisuiwe uma ndoviroyai chira, oicua avei uma ava omondora yamotarẽhimbar upe ⁶⁵ aipo ehi:

—Sese niha acoi aipo ahe pẽu: “Ndipoi chietera que ava ou vaherã cheu che Ru nomonguerẽhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirẽhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tũpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pãhu pendar caruguar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarẽhimbar upe.

7

Jesús ndoviroyai tivri yuvireco

¹ Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo água yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaẽhisave tẽi avei tivri aipo ehi yuvireco chupe. ⁶ Evocoyase vivri upe aipo ehi:

—Ndehi vitei rumo ari che so água. Pe guata água rumo opacatu ariño tẽi aviye.

⁷ Esepia, pe ndape amotarẽhi eté ava co ivi pipendar; che rumo che amotarẽhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe.

¹¹ Judío eta oseca tẽi yuvireco pietasave aipo ehi:

—¿Que pĩha acoi mbia? —ehi tẽi yuvireco.

¹² Ava rehii pãhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tẽi vahe ava” ehi yuvireco.

¹³ Nomboyecuai eté rumo oñehe yuvireco sese güereciar sui osiquiyepave.

¹⁴ Pieta mbiterse, Jesús aviyeteramo tēi oique ava pãhuve tũparo pipe ava mbohe.
¹⁵ Judío eta rerecuar evocoyase,
 —¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepepe pe pãhu pendar oyapo potase Tũpa remimbotar, oicua che porombohesa ndahei vahe che suindar, ahe Tũpa suindar ité. ¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ãgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pẽu. Que ñepepe pe pãhu pendar rumo ndipoi eté omboyeroa vahe. ¿Mahera ru che yuca pota peye?” ehi.

²⁰ —¡Nde erereco caruguar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ãgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chĩhivahe mbocircuncida ãgua mbituhusa ari pipe tupri pẽu, peyapoño rane ité mborocuita mboaviye ãgua. ¿Mahera ru cheuño pemboasi ñepepe mbia mbituhusa ari pipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté pĩha?’ pe yapave —ehi Jesús ava eta upe.

Jesús oñehe güecocuer Tũpa suindar rese

²⁵ Evocoyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca ãgua yuvireco? —ehi—. ²⁶ Ahe ité co niha co ava pãhuve oñehe oico, ndipoi eté que mara ehi vahe yuvireco chupe. ¿Omoha pĩha mborerecuar co mbia Poropĩsirosar seco ãgua yuvireco? ²⁷ Yande rumo yaicua que sui turi. Acoi ouse rumo Poropĩsirosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe vitesesevẽ tũparove, oñehe pĩrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pẽu —ehi.

³⁰ Aipo ihese, oipisi pota yuvireco soquenda ãgua viña. Aní eté rumo. Esepia, ndoyepota vitei ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropĩsirosar, ¿oyapo catura pĩha mbahe poromondiisa co mbia sui? —ehi yuvireco.

Fariseo oyocuai sundao tũparo rãrosareta Jesús pisi ãgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tũparo rãrosar Jesús pisi ãgua yuvireco. ³³ Jesús rumo aipo ehi:

—Aicove vitemira pe rese chĩhi rupive. Ipare voi ayevira che mbousar piri vicho —ehi—. ³⁴ Che reca tẽira peye, ndapeicatui chietera rumo che reca. Esepia, ndapeicatui chiaveira peso vaherã che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pĩha aipo osora yande sui seca iriẽhi ãgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe ãgua? ³⁶ ¿Mara oya pĩha evocoyase aipo, ‘Che reca tẽira peye, ndapeicatui chietera rumo che reca. Esepia,

ndapeicatui chiaveira peso vaheerã che recosave' ehi yandeu? —ehi-ehi tēi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pĩrata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—.

³⁸ Esepia, inungar aipo ehi vahe icuachiapri pipe, che reroyasar pĩha sui osēra iai ndopai vahe nungar —ehi.

³⁹ 'Che reroyasar oipisira Espiritu curi' ohesave aipo ehi. Espiritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehi oyemboyaho Jesús recocuer sui yuvireco

⁴⁰ Osenduse ava rehi aipo nungar, amove aipo ehi:

—Supi eté co mbia Tũpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropĩsirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tēi oura Poropĩsirosar viña? —ehi—. ⁴² Icuachiapri pipe rumo aipo ehi Poropĩsirosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tēi. ⁴⁴ Amove ava viraso pota tēi yuvireco soquenda; ndipoi eté rumo ěgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tũparo rãrosar oyeve yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tũparo rãrosar evocoyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuaeta evocoyase aipo ehi yuvireco:

—¿Pe avei eté rumo peyembopa uca chupe? —ehi—. ⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehi tēi ěgüe ehi yuvireco. Ahe rumo ndoicuai vahe Tũpa porocuita yuvireco, sese iñemoirosavrive ité yuvirecoi —ehi sundao tũparo rãrosar upe yuvireco.

⁵⁰ Evocoyase Nicodemo, acoi oso vahe pĩtu pipe Jesús piri, ahe avei eté fariseo pãhuve secoi, ahe aipo ehi:

⁵¹ —Yandeundar porocuita mboaviye ěgua ndiyai, “Ereyavi mbahe” yahe voiño tēi que ava mbahe sembiapocuaēhi viteseve —ehi.

⁵² Evocoyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñepeu ou vahe Galilea sui Tũpa ñehe mombehusar —ehi mborerecuaeta Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepeu-pei güēta rupi.

8

¹ Jesús rumo oso ivitri Olivo ve. ² Ahere ayihive cõhese, oyeve tũparove. Ahese opacatu ava oyemboya yuvireco sese. Ahe evocoyase oguapi oĩ oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehi rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepeí ava.
⁵ Moisés porocuita rumo ore cuai co nungar cuña yuca ãgua ita piípe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoãhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuachía ocuã piípe ivi rese. ⁷ Evocoyase oporandu vitesse ava yuvireco, opūha aipo ehi:

—Que ñepeí pe pāhu pendar ndoyemboangaipai vahe, ahe rane toyapi ita piípe —ehi.

⁸ Oyaivi iri, ombahecuachía ivi rese. ⁹ Osenduse rumo judío rerecuareta, omboipi ñepeí-peí yuvínose yuvireco, cuacua catu vahe sui rane yuvínose. Opacatu yuvínosepase, Jesús güerañomi cuña rese opita yuvireco. ¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepeí opita vahe nde mocañi ãgua? —ehi

¹¹ —Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe piípe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyapri eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri ãgua ava tēi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ãgüe ahe, che Ru, che mbousar rumo secoi che rese. ¹⁷ Porocuita pēu icuachiapri piípe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicua viña —ehi fariseo eta upe.

²⁰ Jesús aipo ehi tūparo piípe, guarepochi monuhapri riru ipive oporombohe ohã. Ndipoi eté rumo ahese osoquenda vaheerã. Esepia, ndoyepota vitei eté ahese ihari chupe.

Jesús, “Che sosave pe ndapeicatui chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pemanu pe angaipa reseve. Che sosave ndapeicatui chietera peso vaheerã —ehi.

²² Aipo ihese, judío eta aipo ehi yuvireco:

—¿Oyeyucara piha ahe ae; ayeve piha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. ²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemañoora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pëu. ²⁶ Setá iteanga areco che ñehe ãgua pëu mbahe pe rembiavi rese. Che mbousar niha supi eté vahe. Ahe ñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese ñehese yuvireco. ²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pëu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. ³⁵ Mbiguai tēi ndahei güereciar rēta pipe nara ité; tahir rumo opitaño itera güeta pipe nara. ³⁶ Sese Tahir pe renosese mbiguai tēi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¿Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tūpa che mbohe mbahe supi eté vahe rese” ahe tēi pëu. Pe evocoyase che yuca potaño ité peye. ¿Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¿Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrteí cohava aico. Ndahei cheyesui tēi ayu, Tūpa rumo che mbou. ⁴³ ¿Mahera pñha ndapesenducua catui eté mbahe che remimombehu? Esepia, ndapeyapisaca potai eté che ñehe rese. ⁴⁴ Peyesupa niha Caruguar ité, sese niha pe ahe tupri avei peico. Peyapo pota mbahe semimbotar tēi. Esepia, Caruguar yipisuive ité oporoyuca serai vahe. Ndoypoi vahe ité mbahe supi tupri vahe, noñehi avei mbahe supi eté vahe rese. Semirasa ñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pñha pe pñhu pendar oicua mbahe che rembiavi? ¡Aní eté! Che añehe mbahe supi eté vahe rese pëu, ¿mahera ru evocoyase ndache reroyai eté peye? ⁴⁷ Acoi ava Tūpa suindar, ahe osendu pota rai ñehe; pe rumo ndahei eté Tūpa suindar peico. Sese ndapesendu potai eté ñehe —ehi Jesús judío eta upe.

Poropñisrosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese — ehi yuvireco chupe.

⁴⁹—Che ndarecoi eté carugar cheyese. Che rumo che Ru amboetei; pe rumo ndache mboetei eté peye. ⁵⁰Iyavei che ndasecai ava che mboetei āgua. Oime rumo ñepei oipota vahe. Ahe niha omondora ava rembiapo repri chupe. ⁵¹Supi eté aipo ahe pēu: acoi omboyeroa vahe che ñehe, nomanoi chietera yuvireco — ehi judío eta upe.

⁵²Evocoyase judío omboyevi yuvireco chupe aipo ehi:

—Cūritei oroicua ité cute nde ererese carugar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! — ehi yuvireco chupe.

⁵⁴—Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroa iñehe. ⁵⁶Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité — ehi judío eta upe.

⁵⁷Evocoyase judío eta:

—¿Mara erera vo aipo Abraham repia ndererecomi viteise cincuenta araviter? — ehiño yuvireco chupe.

⁵⁸—Supi eté aipo ahe pēu: che aicove vahe Abraham yesuēhi viteseseve — ehi.

⁵⁹Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹Jesús oguatase ocar rupi, osepia mbia ohasa suive ndasesapisoi vahe. ²Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? — orohe chupe.

³—Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua. ⁴Sese oime vitesese ari yandeu che mbousar poraviquisa apo āgua, iya ité ahe yayapo. Esepia, pītura, ahese ndayaicatui chietera mbahe apo. ⁵Co ivi pipe che recove vitesese rumo, che aico ava upe tesapesa nungar — ehi oreu.

⁶Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷Ipare aipo ehi chupe:

—Eso, tereyovai igua Siloé serer vahe pipe — ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité.

⁸Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co uguapi oī guarepochi rese oporandu yepi? — ehi yuvireco.

⁹Amove ambuae ava aipo ehi:

—Taa, ahe ité — ehi.

Ambuae rumo aipo ehi yuvireco:

—Ndahei ahe. Avīye tupri ité rumo ahe — ehi.

Ahe mbia rumo aipo ehi:

—Taa, che ité niha ahe aico — ehi.

¹⁰Evocoyase oporandu yuvireco chupe:

—¿Mara ere vo co esareco? — ehi.

¹¹—Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹²—¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera água. Sese viraso ndasesapisoi vahecuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaquí vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihanemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichoho uca rane ité iyesupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūritei osareco no? —ehi iyesupa upe yuvireco.

²⁰ —Ore rahir ité niha co, ndasesapisoi oha. ²¹ ¿Mara ehi vo catu co cūritei osareco? iyavei ¿ava vo catu ombogüera? ¡Ndoroicuai eté! Peporandu chupe. Ocuacua niha; ahe ae oicua ucara pēu —ehiño iyesupa yuvireco fariseo upe.

²² Iyesupa rumo osiquiyepave tēi aipo ehiño yuvireco. Esepia, fariseo opa ité oyemoin-gatu yuvireco ava “Jesús Poropisrosar secoi” ehi vahe oñemonuhasa sui ñepei reseve imombo água. ²³ Sese niha iyesupa aipo ehiño yuvireco: “Peporandu chupe. Ocuacua niha” ehiño.

²⁴ Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndachere-sapisoi vahecuer aico; cūritei rumo asareco —ehi.

²⁶ Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pēu. Pe rumo ndache reroyai eté peye. ¿Mahera vo peipota amombehu vite vaherã pēu? ¿Pe avei tie peguata pota supi? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoí aracahendar Moisés rupi oroguata vahe. ²⁹ Esepia, oroicua ité Tüpa oñehese Moisés upe. Aipo mbia rumo ndoroicuai eté que sui osē —ehi yuvireco chupe.

³⁰ —¡Mara peye rutei pe ndapeicuai que suindar ahe! Che rumo che mbosareco.

³¹ Supi eté, yaicua Tüpa ndosendi eté ava angaipa viyar ñehe; ava omboeteisar iyavei

vıroyasar ñehe güeraño ité niha osendu. ³² Esepia, ndipoi eté que avañõ tēi ava oyesu sui ndasesapısoi vahe ombogüera vahe. ³³ Ahe rumo ndaheise Tūpa suindar ou vahe viña, ndoicatui chietera revo mbahe apo viña —ehi fariseo eta upe.

³⁴ Evocoiyase fariseo eta aipo ehi yuvıreco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepeı reseve oñemonuhasa sui yuvıreco.

Jesús reroyasarēhi ndasesapısoi vahe nungar tēi

³⁵ Jesús oicua ndasesapısoi vahecuer mombosa. Vupitise aipo ehi chupe:

—¿Ereyeroıa nde Ava Rıquehir rese? —ehi.

³⁶ Mbıa evocoiyase aipo ehi chupe:

—Che mbohesar, emombehumı cheu; tayeroıa catu ru sese —ehi.

³⁷ —Eremahe niha co sese; che ité ahe aıco —ehi ndasesapısoi vahecuer upe.

³⁸ Evocoiyase mbıa oñenopiha sovai:

—Orovıroıa, che Yar —ehi chupe.

³⁹ Ichui aipo ehi:

—Che ayu co ivı piıpe mbahe supı tuprı vahe apo āgua; ava ndasesapısoi vahe nungar upe mbahe supı eté vahe che Ru suindar mboyecua āgua iyaveı ava oicua tēi vahe mbahe Tūpa suindar mboesapısoēhi irı āgua —ehi.

⁴⁰ Evocoiyase ambuae fariseo eta yuvırecoı vahe cōımi ichui osenduse aipo ñehesa, oporandu yuvıreco chupe:

—¿Ore aveı tie ndasesapısoi vahe nungar oroıco? —ehi.

⁴¹ Evocoiyase omboyevı ahe fariseo upe:

—Peıcose ndasesapısoi vahe nungar viña, “Peyavı mbahe” ndehı chietera Tūpa pe angaıpa rese pēu viña. Pe rumo, “Ore oroıcua tuprı Tūpa suindar mbahe” peıe tēi. Sese Tūpa, “Peyavı mbahe” ehi eté pēu —ehi Jesús fariseo eta upe.

10

Jesús ovesa rārosar nungar

¹ “Supı eté aipo ahe pēu: acoı ava co cotı rupı tēi yuvıroıque vahe ovesa rēta piıpe, ahe imonda rai vahe tēi yuvırecoı. ² Oıque vahe rumo oquendıpi rupı eté, ahe sārosar ité secoı. ³ Oquendıpi rārosar omboı chupe. Evocoiyase ovesa rārosar oñehe serer rupı güeimba ovesa upe senose āgua sēta sui. Ahe evocoiyase oicua iñehe yuvıreco. ⁴ Güeimba ovesa renose pare oguata senonde; seimba ovesa evocoiyase oguata saquıcuerıve. Esepia, oicua ité iñehe yuvıreco. ⁵ Ndoguataı eté rumo oıarēhi rupı yuvıreco; yuvınoña-noñaño ichui. Esepia, ndoıcuai eté iñehe” ehi ⁶ omboyoıa güecocuer ovesa rārosar rese. Ava rumo ndosenducuai eté yuvıreco.

Jesús ava rārosar avııye vahe

⁷ Evocoiyase Jesús aipo ehi irı: “Supı eté, aipo ahe pēu: che año ité oquendıpi nungar aıco ovesa upe. ⁸ Opacatu ava yugüeru vahe che renonde, imonda rai vahe nungar tēi yuvırecoı. Ava cheundar rumo ndovıroııai eté yuvıreco. ⁹ Che rumo oquenda nungar aıco. Acoı oıque vahe che rupı, ahera ipısiropıırā yuvırecoı. İyaveı inungar acoı ovesa oıque vahe güēta piıpe, ichui osē capıhi reca āgua igua yepı, ēgüe ehıra che reroyasar yuvıreco.

¹⁰ “Imonda rai vahe rumo omonda āgua tēi ou, oporoyuca āgua, mbahe mocañı āgua tēi aveı. Che rumo ayu ‘tovıreco ava tecovesa ndopai vaheıā ité yuvıreco’ viıa. ¹¹ Che ité ava rārosar avııye vahe aıco. Sese ayemoıngatu tuprı che recocuer mondo āgua ava cheundar repıırā; ¹² acoı guarepochı repıırā tēi oporavıquı vahe rumo, osepiase mahembiar oñaro ai vahe, oseıyapaño güemiario, oña osó. Esepia niha, ovesa ndaheı eté seimba, ndaheı aveı eté ahe sārosar ité secoı. Evocoiyase mahembiar oñaro ai vahe

omondi-mondii eté ipisi ãgua. ¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiario ovesa.

¹⁴⁻¹⁵ “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. ¹⁶ Areco avei ambuae ité che reimba ovesa. Ahe avei aru pota che mboyeroya vaherã yuvireco. Ahese ñepeí reseve guasu che remiario yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira. ¹⁸ Ndoicatui chira ava ahe ae tēi che yuca ãgua; che teieté rumo amondora che recocuer che remimbotar rupi eté. Che areco ité pĩratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sōhisa vahe pipe tecua Jerusalén ve tũparo rovasagüer pieta oyepota. ²³ Ahese Jesús oguata oico tũparo Salomón oyapo vahecuer rocupe ivi rupi. ²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsirosar nde recosa oreu? Emombehu tupri catu ñepeí reseve oreu —ehi yuvireco chupe.

²⁵ —Amombehu niha acoi pēu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa; ²⁶ pe rumo ndache reroyai eté peye. Esepia, pe ndahei eté che remiario ovesa peico. ²⁷ Che remiario ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirēhi yuvireco chupe icañiēhi ãgua; ndipoi chietera que ava virocua iri vaherã che sui. ²⁹ Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepeí ava oicatu vahe serocua che Ru sui. ³⁰ Che Ru iyavei che oroico ñepeíño ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi ãgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ēgüe orohera ndeu. Esepia, nde ereñehe rai tēi Tũpa rese. Nde moco ava tēi ereico. Nde rumo ereyeapo Tũpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pēundar mborocuaita icuachiapri pipe niha aipo ehi: ‘Che aipo ahe pēu: pe tũpa pāve ité peico’ ehi. ³⁵ Yaicua niha icuachiapri pipendar ndiyai yayamotarēhi. Esepia, Tũpa aipo ehi: ‘Pe tũpa pāve ité peico’ ehi evocoi ava oñehe pisisar upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tēi Tũpa rese’ peye cheu, ‘Che Tũpa Rahir aico’ ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua

ñepei reseve che Ru secoise che rese iyavei che sese che recosa —ehi oamotarẽhimbareta upe.

³⁹ Osoquenda pota iri yuvireco viña; Jesús rumo osoño ipãhu sui.

⁴⁰ Oyevi ïai Jordán rovai. Aheve acoi Juan yipindar oporoãpiramo. Aheve opita. ⁴¹ Ava rehi yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe siacua vahe yande Yar pi rese. Ipare oiquiti oha pipe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano ãgua ité. Ëgüe ehi rumo Tüpa reco porañetesa mboyecua ãgua iyavei Tahir reco porañetesa mboyecua ãgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaherasisa, opita viteño ité ñuviño ari güecosave. ⁷ Ipare omombehu ore supi oroico vahe upe:

—Yayevi iri ïvi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tõi acoi judío rerecuareta ahe pendar nde yuca pota ita pipe yuvireco; ¿cũritei co ereso pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ïvi resapesa; ¹⁰ acoi oguata vahe rumo pĩtu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tõi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tõi, ocuerara —orohe.

¹³ ‘Omano ité’ oyapave tõi aipo ehi. Ore rumo orepihañemoñeta: “Oque tõi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, Ëgüe ehise ité aviye catura pẽu pe che reroya ãgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaheã supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombrimi Jerusalén sui, tres kilómetro tupri. Evocoyase ore oroye-pota senise ahe tecuave, orosendu “cũritei irungatu ari opa Lázaro tĩre” ehi vahe. ¹⁹ Setá judío yuviraso Marta iyavei María piri iquivri mano agüer sui imboviha ãgua. ²⁰ Oicuase Marta Jesús yepota seni, oso voi eté sapeve; María rumo opitaño oi pipe. ²¹ Evocoyase Marta aipo ehi voi chupe:

—Che Yar, ehi cohavereicose, nomanoi chietera revo ore quivri viña. ²² Che rumo aicua Tüpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo. ²⁶ Acoi che reroya vahe güecoveseve, nomanoi chietera. ¿Eroya aipo che hesa? —ehi Marta upe.

²⁷ —Orovroya ité, che Yar. Nde niha Poropĩsirosar ereico Tũpa Rahir, ore remiaro ereyu vaherã co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vıteı eté tecua pipe; Marta rese oyoepiasave vıteño ité secoi. ³¹ Osepıase María sē poyava, judıo eta sētave yuvırecoı vahe imbovıhasar yuvıraso voi saquıcuerıve, “Oquıvrı ruvipave revo osora oyaseho” ehi yuvıreco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereıcoveño itese cohava, che quıvrı nomanoi chietera viña —ehi María chupe.

³³ Osepıase María yaseho iyavei judıo eta yuvıraso vahe supı, opıha pipe oyandu ité ovıharēhısa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvıreco chupe:

—Ore Yar, erıo, teresepia —ehi.

³⁵ Ahese Jesús oyaseho. ³⁶ Judıo evocoyase aipo ehi yuvıreco:

—¡Esepıa, osaisu ité! —ehi oyeupe yuvıreco.

³⁷ Ambuae rumo ipãhu pendar aipo ehi yuvıreco:

—Co mbıa omomahe vahe acoi mbıa ndasesapısoı vahe, ¿ndoıcatui chıra pıha Lázaro manoēhi āgua mbahe apo cuese rahe viña? —ehi yuvıreco.

Lázaro mbogüerayevi agüer

³⁸ Jesús oyemboya suvipave ovıharēhısa pipe; ahe suvipa ita hoprı, sovapısa ita aveı.

³⁹ —Perocua sovapısa ita ichui —ehi.

Marta, omano vahe reındrı, rumo aipo ehi:

—Che Yar, iné ité revo. Esepıa, opa niha irungatu ari imanore —ehi.

⁴⁰ —¿“Che reroyase eve, Tũpa pıratasa eresepıara” ndahei vo acoi ndeu? —ehi Marta upe.

⁴¹ Aipo ihe pare, vırocua ita yuvıreco ichui. Evocoyase omahe ıva rese aipo ehi:

—Che Ru, “Avıye ndeu” ahe ndeu. Esepıa, eresendu che ñehe. ⁴² Che aicua nde eresenduño ité che ñehe yepı, che rumo aipo ahe co ava eta rembiepiave ‘tovıroya aveı nde che mbousa co ivı pipe yuvıreco’ che yapave —ehi.

⁴³ Aipo ohe pare, oñehe pırata aipo ehi:

—¡Lázaro, esē eıpeve sui! —ehi.

⁴⁴ Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judıo rerecuareta oyemborandu Jesús pısi āgua yuvıreco

⁴⁵ Osepıase co poromondiısa, judıo eta yuvıraso vahe María rupı setá ité Jesús vıroya yuvıreco. ⁴⁶ Ipãhu pendar rumo movıro yuvıraso voi ava farıseo rerecuareta uve sembiapo mombehu āgua. ⁴⁷ Evocoyase farıseo rerecuareta iyavei pahı rerecuareta oñemonuha guasu yuvıreco aipo ehi:

—¿Mara yahera vo sereco? Co mbia setá ité oyapo poromondüisa oico. ⁴⁸ Ndayayapoise mbahe chupe, opacatu tiête ava viroyara yuvireco viña iyavei aviyeteramo mborerrecuar Roma iguar yanduse, yugüerura yande tũparo mondurupa iyavei omocañi tẽi uca aveira yande recua yande sui —ehi oyeupe yuvireco.

⁴⁹ Ñepe rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviye catura ñepe mbia omanose yande recocuer rese, ndahei que opacatu yande mocañi tẽi ãgua —ehi omboetasa eta upe.

⁵¹ Ahe rumo ndahei oyesui tẽi aipo ehi; Tũpa ité aipo ombohe uca. Esepia, ahe ité mborerrecuar guasu chini ahese. Sese aipo ehi: “Jesús omanora yande recocuer rese” ehi. ⁵² Iyavei ndahei chira ahe ava reseño, omanora opacatu ava Tũpa Rahir oñemosai tẽi vahe ñepe reseve imonuha ãgua. ⁵³ Ëgüe ehi ahe ari pipeve judío eta rerecuar oyemoingatupa voi yuca ãgua yuvireco.

⁵⁴ Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo ãgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei ãgua renondeve.

⁵⁶ Oseca tẽi Jesús yuvireco. Ipare tũparove yuviroique, oporandu-randu oyeupe yuvireco:

—¿Mara peye pe, oura pãha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi ãgua” ehi yuvireco chupe.

12

Ñepe cuña omondo Jesús rese mbahe sãcua vahe

¹ Seis ari ipane vites Pascua pieta ãgua, Jesús oso tecua Betania ve, aheve acoi Lázaro ombogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. ³ Evocoyase María güeru medio litro mbahe sãcua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Sãcuá iteanga evocoyase opacatu oi pipe. ⁴ Evocoyase ore mboetasa Judas Iscariote, ahe acoi omondo vaheã ava yamotarẽhimbar uve, aipo ehi:

⁵ —¿Mahera vo ndimondosai co mbahe sãcua vahe tresciento denario rupi ava iparaisu vahe pãtivii ãgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tẽi. Setá rupi guarepochi virocua güembiporugã tẽi. ⁷ Evocoyase Jesús aipo ehi:

—Toyapoño cheu. Esepia, ahe che mano ãgua renonde ãgüe ehi cheu. ⁸ Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

Pahi rerecuar oyamotarẽhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, ãgüe ehi rumo imbogüerayevipri Lázaro repia avei. ¹⁰ Evocoyase pahi rerecuar, “Yayuca avei Lázaro” ehi yuvireco oyeupe. ¹¹ Esepia, ahe ichui tẽi niha setá iteanga judío oyepepi pahi rerecuar sui Jesús reroya ãgua yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota água ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovaichi água, osapucai yuvireco chupe:

—¡Imboeteipri, sovasapri secoi ou vahe yande Yar Tũpa rer pipe! ¡Tũpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumi. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquirei rene, Sión pendar; pesepia, pe rerecuar guasu guaricumi harive ou pẽu” ehi.

¹⁶ Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tẽi sepiase.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvinose voi sovaichi ipisi água. Esepia, oicua ité ahe mbahe poromondiisa guasu yapose yuvireco. ¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, jopacatu guasu ité ava uguata cũritei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pãhuve yuviraso vahe pieta repia Tũpa mboetei água tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirio voi Jesús upe imombehu. ²³ Evocoyase chupe aipo ehi:

—Oyepota ari cheundar che, Ava Riquehir, che yevi iri água che recua porañetesave.

²⁴ Supi eté aipo ahe pẽu: inungar acoi trigo rãhii nañotisaise, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tẽi, ocañi tẽira; acoi ndosaisui vahe rumo güecocuer co ivi pipendar tẽi che recocuer rese, evocoi nungar virecora tecovesa apirẽhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tũpa evocoyase omboeteira ahe sereco —ehi chupe.

Jesús omombehu omano água

²⁷ “¡Cũritei ayandu ité mbahe-mbahe tẽi oime vaherã cheu! ‘¿Mara ahera pĩha?’ ahe tẽi. ¿Aipo ahera: ‘Che Ru, che pĩsiro eve cũritei cheu oime vaherã mbahe tẽi sui’ ahera viña? ¡Che rumo aicua evocoi nungarã ité ayu! ²⁸ Che Ru, emboyecua nde pĩratasa nde rer porañetesa mboetei água” ehi oyeroku.

Ichui oyeendu iva sui ñehesa aipo ehi vahe: “Ëgüe ahe niha amboyecua che pĩratasa vichico, ãgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tũpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pẽundar. ³¹ Cũritei oimera ñemoirosa co ivi pipendar ndache reroyai vahe upe, cũritei avei imombosara Carugar co ivi pipendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano. ³⁴ Aipo ihese ava eta aipo ehi:

—Ore rumo orosendu mborocuaíta icuachiapri pïpe aipo ehi vahe: “Poropĩsirosar apirẽhi vaheĩ ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chíhi rupive tesapesa pe pãhuve. Peguata catu supi seime viteseve. Aviyeteramo pe resapiha tẽira pĩtumimbi vahe. Esepia, acoi oguata vahe pĩtumimbisa rupi, ndoicuai que güecosa. ³⁶ Peroya co tesapesa cũritei pereco viteseve, ipipe ité pe reco ãgua —ehi.

Aipo ohe pare, Jesús osẽ ava rehii pãhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboaviyesa rane itera Tũpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pĩratasa eremboycuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tũpa nomboesapisoĩ ava iyavei nombopihañemoñeta tupri iri mbahe rese yuvireco. Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera ãgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepei reseve yuvireco’ oya. ⁴³ Esepia, ahe oipota catu ava tẽi suindar yemboeteisa Tũpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitesese ava rehii upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pïpe ava che reroyasar pĩtumimbisave yuvirecoiẽhi ãgua. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pïpendar mocañi ãgua, che rumo ayu ipĩsiro ãgua. ⁴⁸ Acoi ava che reroiro vahe, ndoviroyai vahe avei che ñehe, oime rumo imocañi ãgua: Co che ñehesa supi eté vahe reroyaẽhisa pïpe oyemocañi ucara arĩ ipa vahe pïpe. ⁴⁹ Esepia, che nañehei eté cheyesui tẽi; che Ru, che mbousar rumo che cuai che ñehe ãgua, che porombohe ãgua avei. ⁵⁰ Che aicua co cheundar porocuaíta güeru tecovesa apirẽhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya ãgua oso vaheĩ Vu piri. Ahe osaisu vahe ité ava oyeupendar co ivi pïpe yepi. Ëgüe ehi saisu arĩ ipa vahe rupi.

²⁻⁴ Carugar oique ité Simón rahir, Judas Iscariote, pïha pïpe imondo ãgua yamotarẽhimbar uve. Jesús rumo oicua ité Vu Tũpa sui ousa, oicua avei oyevi iri ãgua Vu Tũpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opũha, osequi oturucuar yohasa. Ipare omonde ambuae turucuar vumbicuasa rese. ⁵ Evocoyase omondo i yepoisa riru pïpe, oyosei güemimbohe pi, omombiru turucuar vumbicuasa rese vireco vahe pïpe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cūritei. Ipare rumo eresenducua —ehi Pedro upe.

⁸ Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ëgüe peye ndipoi eté mbahe pe rese; ndaopacatui rumo ëgüe peye —ehi.

¹¹ Ahe aipo ehi: “Ndaopacatui rumo ëgüe peye” ehi. Esepia, oicua ité uma omondora yamotarëhimbar upe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pëu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeí-peí peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, ëgüe ahe pëu. ¹⁶ Supi eté aipo ahe pëu: ava mbiguai tēi, ahe ndahei ivate catu güerecuar sui; ëgüe ehi avei imbouprí ndahei ivate catu secoi ombousar sui. ¹⁷ Pesenducuae co nungar mbahe, peyapo tuprise, ahese peviharete catura peico —ehi.

¹⁸ “Che nañehei opacatu pe rese, che rumo aicua uma yuvirecoi vahe che rebiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe. ¹⁹ Senondeve amombehu pëu. Evocoyase ëgüe ehise ité cheu, che reroyara peye che ité niha aipo ahe vahe vichico. ²⁰ Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepeí pe pãhu pendar che mondora che amotarëhimbar upe” ehi

²¹ Aipo ohe pare, Jesús ndoyembovichai eté iyavei mbahe oime vahe rã omboyecua tupri ité,

—Supi eté aipo ahe pëu: ñepeí pe pãhu pendar che mondora che amotarëhimbar upe —ehi.

²² Evocoyase ore oromahe-mahe tēi oreyese, “¿Ava upe pãha aipo ehi?” orohe tēi oreyeupe. ²³ Che sembiaisu catu yípive acarú vīte. ²⁴ Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. ²⁵ Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe.

²⁷ Judas oipisise pan, oguapi voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸ Que ñepeí rumo mesave orocarú vahe, ndorosenducuai eté aipo ihesa. ²⁹ Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osē voi eté oso pītuse.

Porocuita ipiasu vahe

³¹ Judas sē pare, Jesús aipo ehi:

—Cūrítei oyecuara che, Ava Riquehír, reco porañetesa. Che Ru Tūpa reco porañetesa avei oyecuara che rese. ³² Acoi amboyecuase che Ru Tūpa reco porañetesa, ahe avei omboyecuara che reco porañetesa, ěgüe ehira imboyecua pihavi. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo porocuita ipiasu vahe pēu ñepeí-peí peyeaisu āgua inungar che opoaisu. ³⁵ Peyeaisuse ñepeí-peí, opacatu tupri ité ava oicuara yuvireco che remimbohe supi eté pe recosa —ehi.

Jesús, “Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cūrítei ndiyai peso vaheṛā che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrítei voi ndiyai nde rupi che so āgua? ¡Ayemoingatu ité amano vaheṛā nde rese! —ehi Pedro chupe.

³⁸ —¿Supi eté pīha ereyemoingatu ité che rese nde mano āgua? Nde rumo cōhe potase tacura ñehe renondeve, mbosapi oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya. ² Esepia, che Ru rētave setá oime pe reco āgua; ěgüe ndehise rumo, namombehui chira aipo pēu viña. Sese che asora pe recuarā moingatu. ³ Imoingatu pare ayevíra pe reca che recosave pe reraso āgua cheyepiri. ⁴ Pe peicua que vo asora iyavei peicua mara peyera pe yepota āgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so āgua? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vīteí eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vīte cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pēu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pēu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pēu. Ipipe che amboyecuara che Ru reco pīratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espíritu Santo pēu” ehi viroyasar upe

¹⁵ “Che raisuse ité peye, pemboyeroya catu che porocuita. ¹⁶ Che aporandura che Ru upe ombou vaheṛā Espíritu supi eté vahe pe pītivii āgua, ahe secoi vaheṛā ité pe rese. ¹⁷ Ava Tūpa ndoicuai vahe rumo, ndoicatui chietera ipisi. Esepia, ndosepiai, ndoicuai

avei yuvireco. Pe rumo peicua ité. Esepia, ahe ité secoi pe rese. Ipare oique itera pe piha pipe.

¹⁸ “Ndopoeyai chira pe güeraño tēi; ayevíra niha pe rese aico vaheṛā. ¹⁹ Chīhi tēi oime vīte ari che reroyasarēhi che repia vīte vaheṛā yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuita, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreño ereyemboyecua; mahera ru ndereyemboyecua iri chira ava nde reroyasarēhi upe? —ehi chupe.

²³ Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaheṛā sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vītese, opa co mbahe amombehu vichico pēu. ²⁶ Espíritu Santo rumo, Poropīvīisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pēu che ñehe agüer rese.

²⁷ “Aseya teco tupriṣa pēu, ahe che reco tupriṣa; ndahei rumo avaño tēi rembiapo nungar amondo pēu. Aní, ‘¿Mara yahera pīha?’ peyera; aní chiaveira pesiquiye. ²⁸ Pesendupa niha acoi, ‘Asora, ipare ayeví irira pe rese aico vaheṛā’ che hesa. Supi eté che raisuse peye, pevíharetera peicuase che Ru piri che sosa. Esepia, ahe ivate catu vahe ité che sui. ²⁹ Sese amombehupa voi co mbahe tenondeve pēu, ēgüe ehise ité, ahese peroyara.

³⁰ “Namombehu pucu iri chira mbahe pēu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui ³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohava sui” ehi güemimbohe eta upe.

15

Jesús uva hi nungar

¹ Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. ² Ahe oyasia sāca ndihai vahe ichui yepi; iha vahe rumo omoatiro tupri iha catu āgua. ³ Pe pe recocuer imoatiroproi ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva rāca oise ohí sui, ndiha iri ahe ae tēi; pe avei ēgüe peyera peyepēise che sui” ehi oreu.

⁵ “Che niha uva hi nungar aico; pe evocoyase sāca nungar peico. Acoi secoi vahe che rese, che avei aico sese. Inungar mbahe miti iha ati vahe, ēgüe ehira ahe. Supi eté ndapeicatui chietera che porēhi mbahe apo. ⁶ Acoi ndasecoi vahe che rese, ahe imombosara inungar acoi uva rāca yipi vahe. Ipare imonuhasa sapi āgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pēu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroya che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

11 “Che aipo ahe p̄eu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. 12 Co che porocuita: Peyeaisu ñepeipei, inungar che opoaisu. 13 Ndipoi eté que poroaisusa ivate catu vahe co sui omondose que ava güecocuer omboripar rese nara. 14 Pe che mboyeroyase peye, ahese che mboripar peico. 15 ‘Pe mbiguai peico’ ndahe iri p̄eu. Esepia, mbiguai ndoicuai eté mbahe güerecuar p̄ihañemoñetasa. Sese, ‘Che mboripar’ ahe p̄eu. Esepia, aicua ucapa ñehesa che Ru cheu omombehu vahe p̄eu. 16 Pe niha ndache poravoi peye. Che rumo opoporavo iyavei opocuai peporaviqui vaherã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe p̄eu. 17 Co rese opocuai: Peyeaisu catu ñepeipei peyacatu” ehi Jesús güemimbohe upe.

Jesús amotarẽhimbar, supindar amotarẽhimbar avei

18 “Acoi ava ndoicuai vahe Tũpa pe amotarẽhise, peicuaño che rane che amotarẽhi yuvireco yipindar. 19 Pe peico vitese ava Tũpa ndoicuai vahe pãhuve, evocoyase pe raisu aira yuvireco viña. Che rumo opoporavo ipãhu sui yuvireco. Sese tẽi ndape ambota iri yuvireco. Esepia, pe ndahe iri ipãhu pendar peico. 20 Peyemomahenduha p̄eu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarẽhimbrĩ aico, pe avei pe amotarẽhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco. 21 Co opacatu mbahe che recocuer sui tẽi ãgũe ehira p̄eu. Esepia, ndoicuai niha che mbousar yuvireco.

22-24 “Che ndayuse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tũpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarẽhiño, che Ru avei oyamotarẽhi yuvireco. Sese, ‘Pereco ité mbahe pe rembiavi peyese’ ehi Tũpa chupe. Esepia, acoi che amotarẽhi vahe, che Ru avei oyamotarẽhi yuvireco. 25 Co rumo ãgũe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoẽhi pipe sui tẽi che amotarẽhi yuvireco’ ehi vahe.

26 “Acoi ambouse rumo Porop̄itivĩisar, Esp̄ritu supi eté vahe che Ru sui p̄eu, ahe omombehura che recocuer. 27 Pe avei pemombehura che recocuer. Esepia, yip̄isuive ité peico che rupi” ehi.

16

1-2 “Pe mocañehi ãgua che rese pe yeroyasa aipo ahe opacatu co mbahe imombehu p̄eu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tũpa uve nara revo na yahe’ ehira yuvireco viña. 3 Evocoi rumo ãgũe ehira yuvireco che Ru cuaẽhi pipe iyavei che cuaẽhi pipe yuvireco. 4 Amombehu aipo p̄eu acoi ãgũe ehise, peyemomahenduhara che remimombehugũer rese.

Esp̄ritu Santo rembiapo

“Yip̄isuive rumo namombehui co mbahe p̄eu. Esepia, aicoveño ité pe rese. 5 Cũritei rumo asora che mbousar p̄iri iyavei ndipoi que ñepeipei p̄ãhu pendar ‘¿que vo aipo eresora?’ ehi vahe cũritei cheu. 6 Pe rumo ndapeyembovihaiño aipo mbahe amombehuse p̄eu. 7 Supi eté rumo aipo ahe p̄eu: aviye catura p̄eu che asose. Esepia, ndasoise viña, ndoui chietera pe rese Porop̄itivĩisar. Asose rumo, che amboura p̄eu. 8 Ouse ahe, oicua ucara ava che cuaẽhisar upe yangaipa, oicua uca aveira tecocuer ñivisa iyavei cañisa ndaseco p̄orai vahe upendar. 9 Oicua ucara yangaipa chupe ndache reroyaise yuvireco; 10 oicuara rumo che reco ihĩvi tupri vahe yuvireco. Esepia, asora che Ru recosave, ahese pe ndache repia iri chietera peye; 11 iyavei oicuara Tũpa poromocañisa. Esepia niha, Carugar, ahe co ivi pipendar rerecuar oip̄isira che Ru Tũpa ñemoirosa.

¹² “Setá iteanga mbahe oime amombehu vaherã pëu. Pe rumo ndapeicatui chira cūrítei senducua. ¹³ Ouse rumo Espíritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaherã. ¹⁴ Ahe che mboeteira. Esepia, oicua ucara opacatu mbahe cheundar pëu. ¹⁵ Opacatu mbahe che Ru vireco vahe, che mbahe. Sese niha, ‘Espíritu oipisira opacatu mbahe cheundar, oicua uca aveira pëu’ ahe.

¹⁶ “Aviyeteramo tēi ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoyase ore oroporandu-randu tēi oreyeupe aipo orohe:

—¿Mara oya pñha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu pñri no? ¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo iñhesa —orohe oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—. ²⁰ Supi eté aipo ahe pëu: peyasehora pe viharēhisa pñpe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera. ²¹ Inungar acoi que cuña imembira potase, tasi chupe oyepotase ari imembira ãgua; pñtani oha pare rumo, nimahenduha iri tasicuer rese; soriveteño omembri rese. ²² Ègüe peye avei; pe cūrítei tasi avei pëu, ayevi irira rumo pe repia ãgua, ahese peviharetera. Ahe viharetesa ndipoi chietera que ava virocua vaherã pe sui.

²³ “Ahe ari pñpe, ndapeporandu iri chietera mbahe rese cheu. Supi eté aipo ahe pëu: che Ru omboura opacatu mbahe pëu che rer pñpe peporanduse. ²⁴ Cūrítei rumo ndapeporandu vitei mbahe rese che rer pñpe. Peporandu catu sese, ahese peipisira. Ipñpe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pëu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pëu che Ru recocuer resendar. ²⁶ Ahe ari pñpe pe peporandura mbahe rese che rer pñpe; che rumo, ‘Ayerquirira pe rese che Ru upe’ ndahei pëu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. ²⁸ Asē che Ru sui co ivi pñpe vitu; cūrítei rumo aseayara co ivi, ayevira che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehi tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu ãgua mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co pñpe ité peyemosaipara che sui; che reyara che aemi peye. Ndahei rumo che ae aico. Esepia, che Ru secói che rese. ³³ Amombehu co opacatu pëu che rese mbahe tupri pñpe pe reco ãgua. Peparaisu itera co ivi pñpe; peyemonguerēhi catura rumo. Esepia, che opa ité asecoi co ivi pñpendar mbahe tēi —ehi.

17

Jesús oyeruqui güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipñpe sui avei che nde Rahir toromboetei. ² Supi eté niha, nde erembou che mborerecua ãgua opacatu ava ivi pñpendar harive iyavei tecovesa apirēhi mondo

ãgua opacatu ava nde cheu erembou vahe upe. ³ Co niha tecovesa apirêhi, tande cua nde Tûpa ñepei supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cûritei che reco porañete ãgua, inungar acoi yipindar areco vahe nde rese ivi apoêhiseve.

⁶ “Co nde rembiporavo ava co ivi pipendar pãhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cûritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbose yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarêhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohawe yuvireco. Che evocoyase asora nde piri. Che Ru, seco maranehi vahe, esãro nde pĩratasa pipe nde remimbou cheu oyese yuvirecoi tupri ãgua inungar yande yaico. ¹² Aicose co ivi pipe, asãro tupri nde rer pĩratasa cheu erembou vahe pipe; chemahemoha yuvireco sese mbahe tẽi sui. Ndipoi eté que ñepei ocañi tẽi vahe; acoi yipive ocañi vaheño ité rumo ocañi tẽi; nde ñehe rupi tupri ité êgüe ehi.

¹³ “Cûritei asora nde recosave. Co ivi pipe che reco viteso rumo, amombehu co mbahe chupe ‘tovireco che viharetosa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarêhi rumo oyamotarêhiño yuvireco. Esepia niha, ndahe iri Caruguar povri pendar yuvirecoi inungar che ndahei ipovri pendar aico. ¹⁵ ‘Enose ava Caruguar povri pendar pãhu sui’ ndahei ndeu, che rumo aipota eresepira Caruguar sui. ¹⁶ Inungar che ndahei Caruguar povri pendar aico, êgüe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pãhuve, êgüe ahe avei che imondo ava pãhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaheã rese. ²¹ Aporandu avei ndeu toyuvirecoi tupri ité yuvireco oyese inungar ñepei vahe, êgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbose yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi ãgua, inungar yande ñepei vahe yaico. ²³ Che aico yuvireco sese, nde evocoyase ereico che rese ahe yuvirecoi tupri ãgua inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaheã teco porañetesa cheu erembou vahe yuvireco. Nde niha yipive ité che raisu eve ivi apoêhiseve. ²⁵ Che Ru, seco catupri vahe, ava co ivi pipendar tẽi nande cuai yuvireco; che rumo orocua ité, co avei oicua nde che mbose yuvireco. ²⁶ Orocuca uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rêta, ipipe Jesús ore reroique ore reraso. ² Iyavei Judas omondo vaheerã yamotarêhimbar upe oicua avei aheve secosa. Esepia, setá rupi Jesús rese orofñemonuha aheve yepi. ³ Sese Judas oyepotaño ité aheve sundao rehíi reseve iyavei sundao tũparo rãrosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuvirasó. ⁴ Yipive ité rumo oicua oyeupe mbahe oime vaheerã. Sese osẽ voi eté yuvireco chupe oporandu:

—¿Ava vo peseca? —ehi.

⁵ Ahe ava rehíi omboyeví yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehíi upe.

Judas ipãhuve secoi imondo água yamotarêhimbar upe. ⁶ “Che niha ahe aico” ehise ava upe; guaquicuei coti pãve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo ñehe mboaviye água êgüe ehi: “Acoi che Ru ombou vahe cheu, nocañi eté que ñepeche sui” ehi. ¹⁰ Evocoyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosaña itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua. ¹³ Yipindar viraso Anás rêtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi. ¹⁴ Caifás ité aipo ehi omboetasa upe: “Yandeu aviye catu itera que ñepeche mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rêta pipendar opa ité che cua yuvireco. Sese aiqueño ité Jesús raquicuei mborerecuar rêtave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asẽ, aporandu oquendipi rãrosar uve Pedro reique água rese. ¹⁷ Evocoyase oquendipi rãrosar oporandu Pedro upe:

—¿Ndaheche vo nde avei co ava rupindar? —ehi chupe.

—Aní, ndaheche ahe —ehi oquendipi rãrosar upe.

¹⁸ Sõhisá iteanga ahe pĩtu pipe. Evocoyase mborerecuar rembiguai iyavei sundao eta oyatapí yuvireco oyepehe água. Pedro avei aheve ipãhuve oyepehe tata ipive ohã.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añeche opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté añeche vaheerã.

²¹ ¿Mahera vo evocoyase cheu tẽi ereporandu? Eporandu catu che ñeche rendusar upe. Ahe tomombehu che oyeupe ñehesa yuvireco ndeu. Ahe niha oicua che ñeche agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoiyase omboyevi ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoiyase che rovapete eve? —ehi.

²⁴ Evocoiyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¿Aviye acoi nde ité oroepia vahe mbahe miti rēta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoiyase viraso Jesús Caifás rēta sui Roma pendar mborerecuar guasu recosave yuvireco. Cōhe potase ēgüe ehi. Judío rumo ndoyuviroiquei eté mborerecuar recosave oyemboangaipaēhi āgua. Esepia, ahe icuaita yuviroiquei, ndiyai chietera Pascua resendar ovesa roho hu āgua yuvireco chupe viña. ²⁹ Sese Pilato osē ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoiyase aipo ehi ava upe:

—Peraso, pe ae peyapo mbahe pēundar ité porocuita rupi sese —ehi.

Judío rerecuar evocoiyase omboyevi yuvireco:

—Ore judío oroico vahe upe rumo ndipotasai oroyuca vahe rã que ava —ehi.

³² Ēgüe ehi Jesús ñehe imano āgua resendar yaviye. ³³ Ahese Pilato oi que iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¿Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoiyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarēhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoiyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu āgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osē iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepei ava soquendapri Pascua pieta pipe yepi; ¿peipota amose vahe rã judío rerecuar? —ehi.

⁴⁰ Aipo ihese, opacatu osapucaí pĩratá yuvireco aipo ehi:
—¡Evocoi aní! ¡Barrabás catu emose! —ehiño yuvireco.
Barrabás rumo imonda rai vahe secoi.

19

¹ Evocoyase Pilato oporocuai Jesús nupa ãgua. ² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco. ³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osẽ iri ava upe aipo ehi:

—Pesepia, anose pẽu pe icua ãgua che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahesé Pilato aipo ehi:

—¡Ndo co aipo mbia cute! —ehi.

⁶ Osepiase pahí eta rerecuar, sundao rerecuar avei, omboipi osapucaí:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tẽi Tũpa Rahir —ehi yuvireco.

⁸ Aipo ñehesa renduse, Pilato oyembosiquiyé catu. ⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñhe chupe. ¹⁰ Evocoyase Pilato aipo ehi chupe:

—¡Mahera ndereñehi eté cheu! ¿Ndereicuai vo che mborerecuar aico nde atica uca ãgua, mbahe tẽi sui nde renose ãgua avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tẽi Jesús renose ãgua; judío rerecuar rumo osapucaí voiño yuvireco chupe:

—¡Acoi eremose co mbia, ndahei chietera nde mborerecuar ivate catu vahe mboripar ereico! ¡Opacatu oyemomborerecua tẽi vahe, ahe evocoyase mborerecuar ivate catu vahe amotarẽhimbar tẽi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vinose uca Jesús ocarve, oguapi mborerecuar guasu renda harive. Ahe mbahe rese porandusa rer hebreo ñhe pipe Gabata ‘ita apopri’ oya. ¹⁴ Mbiter ari Pascua pieta ãgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucaí pĩratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahí eta rerecuar rumo omboyevi yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatíca uca ãgua. Ichui viraso yuvireco.

Jesús yaticasa curusu rese

¹⁷ Evocoyase Jesús vinose curusu seraso “Ava Ñacagüer” serer vahesave (ahe serer hebreo ñhe pipe Gólgota). ¹⁸ Aheve oyatica yuvireco. Seseve avei oyatica ñuvirío ava

yuvireco, ñepeí-peí yique iví. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyerogui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyevi:

—Co aicuachía vahe, ēgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho āgua yuvireco. Oipisi avei iturucuar ivri pendar nimbovisai vahe, ñepeí reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayño sese, ¿ava ité pīha oipisira? —ehi yuvireco.

Ēgüe ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayi yuvireco sese” ehi vahe. Supi tupri ité ēgüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yipive, che güembiasu, aipo ehi osi upe:

—Che si, evocoi nde membirã ererectora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoingue ichi che rētave asãro vaherã.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye āgua aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepeí ari Pascua pieta uve ipane vahe pipe aipo ēgüe ehi. Sese judío ndoipotai ava retecuier pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherã sundao curusu rese yaticapri rētima mope āgua ‘tomano’ oyapave curusu sui setecuier reroyipa āgua yuvireco. ³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepeí sundao rumo oicutu yiqueve lanza pipe. Ahe ramoseve voi osē suvi, i reseve.

³⁵ Che asepi vahe ité; supi eté aipo ahe. Evocoyase amombehu pēu pe seroya āgua.

³⁶ Esepia, co mbahe ēgüe ehi icuachiapirer mboaviye āgua aipo ehi vahe: “Ndimopesai chietera que ñepeí icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso āgua rese. José aipo Jesús rupindar. Ndoyecua ucai rumo omboetasa judío eta upe pahi rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. ³⁹ Nicodemo avei oipitivi, acoi oso vahe Jesús upe pītuse.

Ahe güeru mbahe s̄iacua vahe mirra, áloe rese oyeseha vahe, treinta kilo, sehögüer rese nara. ⁴⁰ Ëgüe ehi José, Nicodemo reseve v̄iraso sehögüer yuvireco iyavei oimama tupri turucuar secose vahe imoiacuapri pipe yuvireco. Ëgüe ehi judío oyapo ava omano vahe t̄i ãgua yuvireco yepi. ⁴¹ Namombrii Jesús aticasa sui oime mbia remiti r̄eta. Aheve ité oime tuvipa ita hopri, ipiasu vahe iporupir̄ehi. ⁴² Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei v̄irov̄i ité judío pituhusa ari.

20

Jesús cuerayev̄isa

¹ Domingu pipe María Magdalena oso tuvipave p̄itu v̄itemiseve. Ahe osepia ita tuvipa rovap̄isa ndahe irise güendave ih̄ai. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndroicuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro t̄ei, turucuar güeraño rumo asepiya aheve. Ndaiquei rumo ipipe. ⁶ Ipare Pedro oyepota che raquicuei, oi que voi tuvipa pipe. Ahe avei osepia turucuar imama agüer t̄ei. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepiya Ëgüe ehi vahe. Ahese aroya voi eté. ⁹ Ore rumo ndorosenducua v̄itei eté icuachiapri: “Ocuerayev̄ira omano vahe p̄ahu sui” ehi vahe. ¹⁰ Ipare oroyev̄ipa oroso ore r̄etave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tūpa rembiguai iturucuar morochí vahe uguapi yuvinoi sehögüer rupagüerve. Ñepeu uguapi oñ ñaca rupagüer coti, ambuae ipi rupagüer coti. ¹³ Ahe Tūpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer v̄iraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti r̄eta r̄ārosar revo’ oya viña, aipo ehi chupe:

—Nde ererasose sehögüer, emombehuñomi t̄ei cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepocoi rene che rese. Esepia, ndayeupi v̄itei che Ru recosave. Esoño, emombehu che reroyasar upe: “Jesús oyeupira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe arí pípave, domingu pípave, pítuse, ore ore ñemonuhasave oroyeoquenda tuprí judío rerecuareta sui ore siquiyepave. Ahese Jesús oi que ore pãhuve. Ore mboavirave.

—¡Peico tuprí! —ehi oreu.

²⁰ Aipo ohe pare, omboyecua opo, oi que avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tuprí! Inungar che Ru che mbou, ãgüe ahe aveira co che pëu —ehi oreu.

²² Ichui ore peyu:

—Peipisi Espíritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisi chira ñeroisa —ehi oreu.

Tomás osepia yande Yar icuerayevise

²⁴ Ñepe ore mboetasa rumo Tomás icõi vahe, ndipoi eté ore pãhuve Jesús oyemboyecua oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pípave iyavei amoinguese che po yique cutu agüerve, ahese ramo aroyara —ehi oreu.

²⁶ Ocho arí pare, ore oroñemonuha iri oi pípave oroico. Aheve ramo Tomás seci ore pãhuve. Yepe oroyeoquenda tuprí ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tuprí! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerëhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tüpa! —ehi chupe.

²⁹ Ahese aipo ehi Tomás upe:

—¿Cüritei che reroya che repiase eve cute? ¡Aviye catu ava che repiaëhi pípave che reroya vahe! —ehi chupe.

Co icuachiapri Jesús reroya ãgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pípave. ³¹ Co rumo aicuachía ‘toviroya Jesús, Poropísirosar, Tüpa Rahir secosa; ipípe tovíreco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pípave. Ahe pítu pípave rumo ndorombohai eté pira. ⁴ Cõhe potase rumo, Jesús oyemboyecua imbehi ivi. Ore rumo ndoroicuai eté Jesús secose.

⁵ Evocoyase aipo ehi oreu:

—Mbía chñihivahe, ¿ndapembohaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovínose catui eté ipi sui pira mbohasa oroico. Esepia, savapipo tupri ité pira ipipe. ⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. ⁸ Ore evocoyase oroviroyepota ité carite ndatipimisave, oroichoho pira rehi imbohasa pipe seraso, cien metro tēi oroico imbehi sui. ⁹ Orovínosese ivi ātasave, orosepia tātapī harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoyase Simón Pedro oha carite pipe, oichoho ndatipisave pira guasu rehi imbohasa pipe, ciento cincuenta y tres tupri; yepe setá viña, imbohasa rumo ndosoroi eté. ¹² Evocoyase aipo ehi:

—Perio, tapecarumi rane —ehi oreu.

Ndipoi eté que ñepe ore pāhuve “¿ava vo nde ereico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, Ëgüe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuerayevire.

Jesús osecóãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tupri che reroyasar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovīhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chīhivahe catu vītese, ereyemonde vīte nde ae, ereguata vīte avei nde remimbotar rupi; nde cuacua catuse rumo, ereyevīvamoatara, ambuae evocoyase nde mboyemondera, nde reraso aveira nde so potaēhisave —ehi.

¹⁹ Jesús rumo omboyecua aipo ohe pipe mara ehira Pedro omano Tūpa mboetisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yīpive añ acoi aporandu chupe: “Che Yar, ¿ava vo nde mondora nde amotarēhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyevī Pedro upe:

—Che aipotase secove vīte āgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tēi aipo che namanoi chivaherā ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vīte āgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supí tuprí vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo iví viña. Aipo rupive.

APOSTOL REMBIAPO LOS HECHOS

Tūpa omboura Espíritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer.

² Ocuerayevire, ivave oso renondeve, Jesús omombehu oporocuaíta Espíritu Santo pīratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

⁴⁻⁵ Oicove vītese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tūpa güemimombehu, ahe acoi amombehu pēu. Juan niha pe āpiramo i pipe tēi; Tūpa rumo Espíritu Santo pipe pe āpiramora. Movīromi tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrītei Israel iguar upe pīratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tūpa año ité vireco omborerecuasa ahe mbahe apo āgua. ⁸ Peipisira rumo Tūpa pīratasa oiquese Espíritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tūpa vīraso ivave. Ichui Jesús oi que iva quiha pāhuve. Evocoyase ndosepia iri eté yuvireco cute. ¹⁰ Omahe vīteseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tūpa vīraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyevi yuvīraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi imombehusa judío guata āgua mbītuhusa ari pipe yepi.

¹³ Yuvīroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu ari yacatu rupi oñemonuha oyoya guasu oyerogui āgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí ari pipe oñemonuha guasu ciento veinte ava yuvireco. Ipāhuve Pedro opūha aipo ehi ava upe: ¹⁶ “Che mu eta Jesucristo reroyasar, iya ité co imboaviyesa Tūpa Ñehengagüer Judas recocuer resendar. Ahe imombehupri David upe Espíritu Santo pipe aracahe. Evocoi Judas vīraso vahe Jesús amotarēhimbar ipisi uca āgua. ¹⁷ Ahe acoi secoi yande pāhuve co mboraviquisa rese yande pītivii āgua avei viña. ¹⁸ Evocoi güembiapo ai repri pipe omboepi ivi. Ipāre ñaca iviso oviapi oso ivive, oyetiapiipa.

¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñhe pipe ‘Ivi Tuvi resendar’ oyapave. ²⁰ Esepia, icuachiapri Salmo pipe aipo ehi:

‘Taseyasa sēta yuvireco.

Tipo iri eme ava ipipe' ehi.

Iyavei ambuae aipo ehi:

‘Toime ambuae secoyar iporaviqui rãgüer pisi ãgua’ ehi vahe.

²¹ “Evocoyase cohawe oime ava yande Yar Jesús secoi vitesse yande pãhuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepepe ipãhu pendar yande rupi icuerayevi agüer mombehu ãgua” ehi omboetasa upe.

²³ Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías. ²⁴ Ipare oyeroqui yuvireco aipo ehi: “Nde, ore Yar, opacatu ava pãha ereicua. Emboyecua cohawe nde rembiporavo oreu; ¿uma vo ereipota ²⁵ eremondo vaherã icuaitarã apóstol seco ãgua Judas recuñara? Ahe oangaipa pipe oyemocañi uca tẽi vahe oico” ehi Tũpa upe yuvireco.

²⁶ Evocoyase osãha iporavo yuvireco. Matías ité vinose iporavopri sui yuvireco. Ichui tupri ité oique once apóstol pãhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvireco. ² Aheve oi pipe aviyeteramo tẽi ivitu ipĩrata vahe nungar siapu guasu ou iva sui. Ahe siapugüer oyendupa tupri oi pipe. ³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tũpa omoingue evocoi ava pãha pipe oEspíritu Santo. Ichui ahe Espiritu omoñehe uca ambuae ñehesa pipe yuvireco.

⁵ Ahe arĩ pipe setá iteanga judío yuvirecoi Jerusalén ve omboaviye vahe ocuaita Tũpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati tẽi yuvireco oyese. Ndoyemboaracuai tẽi yuvireco ambuae ava oñehe pipe ñehese. ⁷ “¡Too!” ehi tẽi oyepihamondĩisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera pãha co ñepepei oñehe yande ñehe pipe yuvireco? —ehi tẽi oyeupe yuvireco—. ⁹ Esepia, cohawe yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tũpa rembiapo icatupri vahe! —ehi.

¹² Opacatu oyepihamondĩi, ndoicuai opihañemoñeta ãgua yuvireco.

—¿Mara ehi pãha co na oya yuvireco? —ehi-ehi tẽi yuvireco oyeupe.

¹³ Ambuae ava rumo seroĩrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro opũha opacatu once vahe apóstol pãhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaherã pẽu; peyapisaca tupri che ñehe rese: ¹⁵ ndosavaipo moco co mbia yuvireco. ¿Ndapesepiai vo añihivei vite cũritei? ¹⁶ Co niha Tũpa ñehe mombehusar Joel oicuachía vahe aracahe:

¹⁷ ‘Tũpa aipo ehi:

Coiye, arĩ cañi renonde, amondora che Espiritu Santo opacatu ava upe.

Ipĩratasa pipe pe rahĩ, pe rayri oñehera yuvireco.

Mbia chĩhivahe osepiara oquer pendar nungar mbahe yuvireco.

Oime aveira queraisa supĩ eté vahe cuacua vahe upe.

18 Supi eté ahe ari pipe amondora che Espíritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipĩratasa pipe.

19 Amboyecuara poromondiisa iva rese.

Ëgüe ahe aveira poromondiisa mboyecua ivi pipe:
tuvia, tata iyavei tātachi.

20 Yande Yar ari tuvichá vahe imboeteipri renonde ohara pĩtu, yasi oyeapora tuvĩ nungar.

21 Opacatu ava, che Yar che pĩtívii eve, ehi vahe, ahe oñepisirora yuvireco' ehi Joel icuachía aracahe.

22 “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tũpa pĩratasa pipe pe pãhuve güeco maranehi mboyecua ãgua. Ahe niha peicua opacatu. 23 Ipare rumo evocoi Jesús imondosa pẽu yuca ãgua. Ahe rumo Tũpa remimbotar rupi. Esepia, yipive ité Tũpa oicua pe peipisira yuca uca ãgua curusu rese ava naporai vahe upe. 24 Tũpa rumo ombogüerayevi manosa sui. Esepia, manosa ndoicatui sereco ãgua. 25 Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tẽi pipe che viapiẽhi ãgua yepi.

26 Sese avihaño ité vichico, asapucai avei che rorivetsa pipe.

Iyavei che yeroya tuprisave asãrora mbahe aviye vahe che recove iri ãgua.

27 Esepia, nde ndereseyai chira che hã omano vahe pãhuve, nderemonduyu ucai chiaveira nde rembiguai seco maranehi vahe retecuer.

28 Co tecovesa ereicua uca cheu.

Che mbovihara eve nde rese che recose' ehi David aracahe.

29 “Che mu eta, supi eté yande ramoi David omano, ñotisa ita hopri pipe aracahe. Ahe suvipa ouve vite cohove yande pãhuve. 30 David rumo Tũpa ñehe mombehusar, oicua Tũpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara' ehi vahe. 31 Ahe ndoyavii osepia vahe ité Poropĩsirosar cuerayevisa. Evocoyase aipo ehi oñehe sese: ‘Thã ndopitai chira omano vahe pãhuve iyavei setecuer ndituyui chira' ehi aracahe. 32 Evocoi Jesús, Tũpa remimbogüerayevi secoi. Ahe imombehusar opacatu ore oroico. 33 Ipare Tũpa viraso oacato coti imboguapi. Ahe oipisi imombehupri Espíritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cũritei peico. 34 Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohove che acato coti che piri.

35 Asecopipa uca ranera nde amotarẽhimbar ndeu, ehi Yar che Yar upe' ehi David aracahe.

36 “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tũpa omoingo opacatu yande Yarã iyavei yande pĩsiro ãgua” ehi Pedro ava rehii upe.

37 Aipo renduse, tasí iteanga ipiha pipe yuvireco. Evocoyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoyase? —ehi.

38 Evocoyase aipo ehi ahe ava upe:

—Pemboasi pe angaipa; peyevi Tũpa upe. Iyavei peñeapiramo opacatu Jesucristo rer pipe. Evocoyase Tũpa iñerora pe angaipa rese. Iyavei omondora Espíritu Santo pẽu.

39 Esepia, co ñehesa imombehupri, ahe pẽu nara, pe suindar upe nara iyavei opacatu amombri Tũpa sui yuvirecoi vahe upe nara avei, ahe acoi opacatu yande Yar Tũpa oyeupe nara güeru pota vahe —ehi.

⁴⁰ Ëgüe ehi oñehe vite ava mboaracua aipo ehi:

—¡Peyepipi co ava secocuer co coti tēi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyeroqui iyavei oñemonuha oyeupe pan mboyaho-yaho ãgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyemboviihasa pipe, opihañemoñeta tuprisa pipe avei. ⁴⁷ Osapucaí yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoyase ari rupi omboeta catu ava iñepisiro ãgua Jesucristo viroya vahe pãhuve.

3

Ndoguatai vahe cuerasa

¹ Ñepei ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeroqui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepei ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoyase oipisi ipo yasu cotindar imopuha. Ahe ramoseve opa tupri ipi, ipiñuha avei oviracua. ⁸ Evocoyase opūha, opo, oguata; oique oso tūparove supi. Opo-opo vorivetesave iyavei osapucaí Tūpa upe. ⁹ Opacatu ava osepia yuvireco iguatase iyavei Tūpa upe isapucaise. ¹⁰ Omahecuase sese, “¡Too!” ehi tēi yuvireco. Iyavei ndoyemboviihai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tūparo Corero Salomón serer vahevrive

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise. ¹² Pedro evocoyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavii co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña. ¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoí eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoyase ndapeipotaiño imose ãgua chupe. ¹⁴ Ahe seco maranehi vahe, seco ñvi vahe renose rãgüer pipe, peporandu: ‘Tosē oporapichi vahe’ peye. ¹⁵ Ëgüe peye acoi tecovesa ombou vahe yuca. Tūpa rumo ombogüerayevi omano vahe pãhu sui. Ahe niha ore oromombehu oroico pēu. ¹⁶ Co Jesús rer rese yeroya pipe ité niha oipisi

pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

17 “Che mu eta, che aicua acoi pe peipĩtivii vahe pe rerecuar Jesús yuca uca água pe icua tupriēhi pipe cuese. 18 Ēgüe ehi Tũpa imboaviye aracahendar opacatu oñehe mombehusar upe güemimombehugüer: ‘Che Rembiporavo Poropĩsirosar oiporarara mbahe-mbahe tēi rasicuer omano’ ehi vahe. 19 Sese pemboasi pe angaipa; peyevi Tũpa upe. Ipípe sui tomocañi pe angaipa pe sui. Aviyeteramo co sui omboura yande Yar pe reco morohisa água, 20 ombou aveira Jesús, ahe yipisuipe iporavopri pe pĩsiro água. 21 Cũritei rumo Jesucristo ivave vite secoi acoi Tũpa opase voi omoingatu opacatu mbahe iyevi água. Aipo ehi acoi imoñehe uca aracahendar oñehe mombehusar ndaseco marai vahe. 22 Moisés yande ramoi yuvirecoi vahe upe aipo ehi imombehu aracahe: ‘Yande Yar Tũpa omopuhara ñepeí oñehe mombehusar pe pãhuve che nungar. Ahe iñehe pesendura, pemboyeroa catu aveira. 23 Opacatu ndoviroyai vahe iñehe Tũpa omocañira güembiporavo pãhu sui’ ehi.

24 “Ēgüe ehi opacatu Tũpa ñehe mombehusar Samuel suive aracahe omombehu avei co ari cũritei yasepia vahe yuvireco. 25 Pẽu nara niha Tũpa ñehe mombehusar remimombehugüer aracahendar. Pẽu nara avei acoi Tũpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pĩpendar ahe sovasapri yuvirecoira nde suindar sui’ ehi. 26 Acoi Tũpa Guahir ombogüerayevise, pẽu rane ombou pe rovasa água ‘toseyapa ñepeí-peí güecocueraí yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

1-2 Pedro, Juan reseve oñehe viteseve ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi. 3 Ichui oipisi seraso soquenda yuvireco ‘ayihive voi yanosera mbahe rese porandu água’ ohesa pipe. Esepia, caharuse tēi osoquenda yuvireco. 4 Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

5 Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe, 6 pahi rerecuar ivate catu vahe Anás, Caifás, Juan, Alejandro, opacatu omu reseve. 7 Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

8 Evocoyase Pedro, Espíritu Santo pĩratasa pipe, aipo ehi chupe:

—Pe, mborerecuareta co tecua pĩpendar, pe avei pahi rerecuar: 9 peporandu niha co ava imbaheasi vahe ndoguata catui vahe mbogüera agüer rese oreu —ehi chupe —. 10 Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tũpa rumo ombogüerayevi iri omano vahe pãhu sui. 11 Co Jesús pe remieroĩro, ahe rumo yande vĩracuasa. Pe evocoyase inungar oi mopuhasar omomboño vahe ita aviye catu vahe oi movĩracuasa rãgüer yepi. 12 Ndipoi que ambuae ava sui poropĩsirosa, Jesús güeraño ité oicatu oporopĩsiro. Esepia, Tũpa nomboui ambuae ava tēi co ivi pipe yande pĩsiro água —ehi.

13 Mborerecuar osepiase iyembosiquiyeēhisa yuvireco, “¿Mara ehi pĩha co mbia? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco. 14 Iyavei acoi ava semimbogüeragüer supive ité secoise, sese ndoicatu

chupe oñehe mara ãgua yuvireco. ¹⁵ Ipare, “Pesẽ ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ëgüe ndehi” yahe chupe. ¹⁷ Yambosiquiye ava upe Jesús rer rese ñehe iriñhi ãgua yuvireco. Ipape sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeviño rumo oñehe yuvireco chupe:

—¿Mara ehi pe pihave? ¿Uma piha aviye catu Tũpa rovai? ¿Pe porocuita tie oroviroya catura Tũpa ore cuaisa sui! ²⁰ Ndiyai rumo mbahe ore rembiepia, mbahe orosendu vahe avei mombehuñhi ãgua oreu —ehi.

²¹ Aipo ihese, mborerecuar ombosiquiye catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe. ²² Evocoi ava oipisi vahe Tũpa poromondiisa ocuera ãgua, ahe oñiaro catu cuarenta araviter vireco vahe sui.

Jesús reroyasar oporandu Tũpa upe siquiyeñhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco. ²⁴ Aipo rendu pare, oyoya guasu oyeroqui yuvireco Tũpa upe aipo ehi: “Ore Yar, nde niha Tũpa opacatu ìva, ìvi, para guasu, opacatu ipor reseve aposar ereico. ²⁵ Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarẽhi yuvireco?

¿Mahera vo ipihañemoñeta rai tẽi yuvireco?

²⁶ Mborerecuar guasu eta, ambuae mborerecuar reseve co ìvi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

²⁷ “Ëgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropĩsirosar Jesús, seco maranehi vahe, amotarẽhi ãgua.

²⁸ Ëgüe ehi yapo opacatu nde pihañemoñeta arachendar rupi tupri ité yuvireco. ²⁹ Iyavei cũritei, ore Yar, emahere amotarẽhisar rese. Embou nde pĩratasa nde rembiguai oroico vahe upe siquiyeñhisa pipe nde ñehengagüer mombehu vite ãgua. ³⁰ Ipape, nde pĩratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyeroqui.

³¹ Iyeroqui pare, Tũpa omboriri opacatu mbahe ñemonuhasave yuvireco chupe. Ahese Espiritu Santo opa oique yuvireco sese. Sese osiquiyeñhisa pipe omombehu tupri Tũpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipĩratasa pipe icuerayevi agüer yuvireco. Ipape Tũpa osovasa catu vite opacatu yuvireco. ³⁴ Ndipoi eté ipãhu pendar mbahe ndovirecoi vahe. Esepia, opacatu ìvi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ëgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovĩhasar’ oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho seprí, ñepei iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. ³ Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espiritu Santo mbopa água, eremboyahoño tēi nde ivi repri guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo conungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. ⁶ Ipare mbia chihivahe yugüeru, osupi sehögüer, oipoque seraso yuvireco ñoti água.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoãha água yande Yar Espiritu! Coi yugüeru nde mer tisarer. Nde avei nde reraso água yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chihivahe yuviroiquese, oipoque voiño ité sehögüer seraso imer ivi ñoti água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tūpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiyepave. Ava rehi rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehi vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave. ¹⁸ Sese oipisi osoquendapa uca yuvireco. ¹⁹ Ipare rumo, pītu pipe, Tūpa rembiguai i va pendar ou omboi oquenda, vinose ichui, aipo ehi chupe: ²⁰ “Peso tūparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe água.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha água ivate catu vahesave; omondo yuvireco güembiguai apóstol reru água soquendasa sui aheve nara viña. ²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tũparo rãrosar rerecuar, pahi rerecuareta avei yuvireco, ipihañemoñeta tẽi: “¿Que rupi vo opoira co mbahe sui yuvireco?” ehi tẽi yuvireco oyeupe. ²⁵ Aheseve ñepei mbia oyepota imombehu:

—Evocoi pesoquenda vahecuer, ahe mbia cũritei oporombohe tũparove yuvireco —ehi chupe.

²⁶ Evocoiyase tũparo rãrosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiẽtera ava yuvireco yaru raise” ehi yuvireco.

²⁷ Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tũpa mboyeroya, ndahei chira rumo ava tẽi rane oromboyeroyara —ehi yuvireco chupe—. ³⁰ Yepe peyatica, peyuca uca Jesús curusu rese viña, yande Ru Tũpa rumo acoi yande ramoi eta viroya vahe, ahe ité ombogüerayevi. ³¹ Ipare osecomboivate ivave oacato coti imboguapi imoi. Ahe niha Mborerecuar guasu, Poropĩsirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tũpa Israel suindar upe. ³² Ore Tũpa rembiapo repiasarer imombehu ãgua oroico, Espiritu Santo avei oñehe ore ñehe rupi ava upe, ahe acoi Tũpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. ³⁴ Mborerecuar pãhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opũha oporocuai, “Toyuvinose raimi ocarve apóstol” ehi. ³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo ãgua renondeve co mbia upe yuvireco —ehi—. ³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tẽi yuvireco. Ahe peve secocuer opa. ³⁷ Coiye catu, omombehuse mborerecuar Roma pendar ava retacuer cua ãgua, ahese Judas, Galilea pendar, oyemomborerecu. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tẽi yuvireco —ehi—. ³⁸ Sese cũritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopi chira oyapose opĩratasa pipe tẽi yuvireco. ³⁹ Tũpa suindarse rumo ndapemombituhu catui chietera. Peicua catu, aní chira yayamotarẽhi Tũpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰ Ichui rumo güeru iri apóstol inupa uca ãgua iñehe iriẽhi ãgua Jesucristo rese yuvireco. Inupa pare opa omose yuvireco. ⁴¹ Ipipe apóstol ovihareté iteanga yuvireco. Esepia, Tũpa ombou chupe iparaisu ãgua yuvireco Jesús rer rese iyeroyasa sui tẽi. ⁴² Ipare ndopoi eté ari yacatu Poropĩsirosar Jesús recocuer mombehusa sui yuvireco. Omombehuño ité tũparo pipe iyavei opacatu ava rêta rupi yuvireco.

6

Siete iporavosa iparaisu vahe pĩtivii ãgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropĩtivisa imondosase chupe” ehi oñehe

yuvireco. ² Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropĩiviisa mondo ãgua rese tēi —ehi yuvireco—. ³ Sese ore rivireta, peiporavo siete mbia seco aviye vahe pe pãhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mboraviquisa rese yuvireco. ⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyerogui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa pĩratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pãhuve. ⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco. ¹⁰ Ndoicatu rumo iñehe recopi ãgua yuvireco. Esepia, ahe oñehe mbahecua Espiritu Santo omondo vahe pipe. ¹¹ Evocoyase yamotarẽhimbar omboepi ambuae ava upe semira tēi ãgua sese yuvireco. “ ‘Ore orosendu co mbia oñehese mbahe naporai vahe rese Moisés amotarẽhisave, Tūpa amotarẽhisave avei’ aipo peyera peñehe” ehi yuvireco chupe. ¹² Evocoyase ahe ava oyamotarẽhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vaherã sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarẽhisave, Moisés porocuita amotarẽhisave avei. ¹⁴ Ore orosendu iñehe: “Jesús Nazaret pendar omo-cañira tūparo guasu iyavei Moisés yande mbohesa avei aipo osecuñarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai iva pendar rova.

7

Esteban oñehe oyeepisa pipe

¹ Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyevi chupe: “Che mu eta, peyapisaca che ñehe rese: Tūpa imboeteipri oyemboyecua yande ramoi Abraham upe aracahe. Mesopotamia ve secoi vitesa, icho renondeve Harán ve seco ãgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecua ndeu’ ehi Tūpa chupe. ⁴ Evocoyase osẽ Caldea ivi sui oso tecua Harán ve güeco ãgua. Omano pare tu Harán ve, Tūpa ombou cohava yande recosave. ⁵ Yepe oyepota tēi cohava aracahe, Tūpa rumo nomondoimi eté que chĩhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vitei ahese). ⁶ Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguirã semimombaraisugua tēi avei yuvirecoira cuatrociento araviter rupi’ ehi. ⁷ Tūpa rumo aipo ehi avei Abraham upe: ‘Che rumo, aicuara evocoi ava nde suindar

nombaraisusar upe yuvireco. Ipare yuvinosera ipovri sui che mboetei iri ãgua cohava yuvireco' ehi Tũpa chupe aracahe. ⁸ Tũpa oyocuai güemimbotar pipe Abraham guahir mbocircuncida ãgua rese. Sese Abraham ombocircuncida guahir Isaac iha pare ocho arı pipe. Isaac ěgũe ehi avei guahir Jacob upe. Jacob ěgũe ehi avei guahireta upe, ahe doce vahe Israel suindar" ehi.

⁹ "Ipare yuvirecoi vahe yande ramoi Jacob rahir omondo vivri guarepochi repirã yamotarẽhisa pipe yuvireco. Ahe tivri rer José omondo vahe Egipto pendar upe yuvireco. Tũpa rumo secoiño ité sese. ¹⁰ Ichui vinose opacatu iparaisusa sui. Omondo ombahecuasa chupe iyavei seco aviye tupri ãgua Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco ãgua opacatu ava ivi Egipto pendar cuai ãgua iyavei güeta pipendar cuai ãgua avei.

¹¹ "Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹² Oyanduse rumo Jacob Egipto ve oime vitese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. ¹³ Ichui yuviraso yupagũe irise Egipto ve, ahese José oyecua uca viquehir upe. ěgũe ehi faraón upe oicua uca uma sui oyesu. ¹⁴ Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ ěgũe ehi Jacob yuviraso Egipto ve yuvirecoi ãgua opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶ Imano pare rumo, suminogũer viraso icangũer yuvireco tecua Siquem ve. Aheve oñoti yuvireco. Aheve acoi Abraham virocua tuvıpa Hamor rahir sui aracahe" ehi mborerecuar upe.

¹⁷ "Ipare, virovise arı ipapapri Tũpa Ñehengagũer Abraham upendar, ahese yande ramoi setá catu-catu iri oyesu Egipto ve yuvireco aracahe. ¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. ¹⁹ Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pıtani. Ahe oyocuai iyesupa aipo ehi: 'Peseya pe rahir oha ramomi vahe, tomanoño' ehi yande ramoi upe aracahe. ²⁰ Aheseve avei aipo Moisés oha. Ahe pıtani aviye ité Tũpa uve. Ihare, iyesupa mbosapı yasımi rupive vireco oyese güetave yuvireco. ²¹ Oseyase rumo iyesupa ive yuvireco, ahese faraón rayrı oseca ahe i rupi sui. Ichui vinose seraso güetave, omboacua omembri nungar ité sereco. ²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipırata ité oñehese iyavei oyapose mbahe.

²³ "Virecose rumo Moisés cuarenta aravıter, ipihañemoñeta: 'Tasepia rane che mu israelita cohava yuvirecoi vahe' ehi. ²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repıcave. ²⁵ Ahe rumo, 'Oicua revo che mu Tũpa vinose uca ãgua Egipto sui yuvireco cheu' ehi viña. Imu rumo nomohai eté Moisés vinose ãgua yuvireco evocoi ava po sui. ²⁶ Ahere ayihive oso omu pãhuve. Aheve osepia ñuvırío mbıa ovavase oyeupe yuvireco. Ahe rumo oipota tẽi iñero ãgua oyeupe yuvireco viña, aipo ehi chupe: 'Che mu, oñemu mo peico, ¿mahera vo pevava peyese ae?' ehi tẽi chupe. ²⁷ Oyemovıracua catu vahe rumo omombo oyesui. Ichui ahe aipo ehi chupe: '¿Ava vo nde moingue ore pãhuve ore rerecuarã ore recocuer moingatu ãgua?' ehi chupe. ²⁸ '¿Che yuca pota avei tie eve inungar ereyuca evocoi Egipto pendar irapıpe!' ehi chupe. ²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opıta pucu. Ahe ivi rumo ndahei secua ité. Aheve oyesu ñuvırío tahir.

³⁰ "Omboaviyese cuarenta aravıter Madián ve, Tũpa rembiguai oyemboyecua ivıtri Sinaı rerovıcave ivi iporupırẽhisave caha rese tata rendigũer pãhuve chupe. ³¹ Osepıase mbahe sendı vahe oyepıhamondıi, oyemboya catu sese sepıa tupri ãgua viña. Ahese osendu Yar ñehe aipo ehi vahe: ³² 'Che nde ramoi Tũpa aico. Nde ramoi Abraham, Isaac iyavei Jacob che reroya vahecuer yuvireco' ehi. Evocoyase Moisés orırıi osıquıyesa pipe

nomahē pota iri sese. ³³ Evocoyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe. ³⁴ ‘Che asepia tupri ité Egipto ve nde mu che rembiporavo paradisuse; asendu avei ipoãse tēisa yuvireco yepi. Sese agüeyi ndeu nde oromondora aheve senosepa āgua’ ehi Tūpa Moisés upe aracahe.

³⁵ “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu āgua?’ ehiño yuvireco chupe, Tūpa ité rumo oyocuai güembiguai imbogüeyi tata rendigüer pāhuve imoñehe Moisés upe iporocuai āgua, ava renosepa āgua avei ivi Egipto pendar mborerecuar povri sui. ³⁶ Ipare ahe ité vinose yande ramoi eta Egipto sui, oyapo avei mbahe poromondisa aheve ‘toicua Tūpa yuvireco’ oya, para guasu Pira vaheve avei oyapo poromondisa iyavei ivi iporupirēhisa rupi avei cuarenta araviter rupi. ³⁷ Ahe avei aipo ehi israelita upe: ‘Tūpa vinosera pe pāhu sui ñepei oñehe mombehusar che nungar’ ehi. ³⁸ Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou āgua.

³⁹ “Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi āgua rese yuvireco. ⁴⁰ Evocoyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata āgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tēi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vaherã yuvireco iyavei oyemboviha pieta apo yuvireco güembiapo ucagüer rese tēi. ⁴² Sese Tūpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

⁴³ Pe rumo che mboeteiēhisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguã.

Sese che opovinosera pe recua sui pe mondo Babilonia cupe coi coti’ ehi Tūpa chupe aracahe.

⁴⁴ “Ivi iporupirēhisa rupi yande ramoi eta vireco Tūpa porocuita rēta oyeupive yuvireco aracahe mbahe mimba pিরer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. ⁴⁵ Ahese coiye catu yande ramoi eta vireco co oi Tūpa rēta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe sereco yuvireco mborerecuar guasu, David, secoise aracahe. ⁴⁶ Ahe David aviye ité Tūpa upe, oyapo pota setarã ‘toime tūparoguã yande ramoi Jacob rembieroya upe’ oya. ⁴⁷ Tahir Salomón rumo omopuha ité ahe tūparo. ⁴⁸ Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

⁴⁹ ‘Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu āgua?

⁵⁰ Che niha opacatu co mbahe aposar aico’ ehi Tūpa icuachiapri pipe” ehi mborerecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espíritu Santo amotarēhimbar tēi inungar pe ramoi aracahe yuvirecoi. ⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūritei ou ndaseco marai vahe cute. Pe avei evocoyase ahe yuca uca āgua peporocuai. ⁵³ Pe pereco tēi Tūpa porocuita acoi Tūpa

rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco. ⁵⁵ Esteban rumo vireco ité Espíritu Santo oyese. Evocoyase iva rese omahese, osepia Tūpa porañetesa. Osepia avei Jesús opūha ohã Tūpa acato coti. ⁵⁶ Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehır Vu acato coti ihã —ehi.

⁵⁷ Mborerecuareta rumo osapucaí pĩrata, oyopiño oapisacuar yuvireco ichui. Ahese yuvinoña guasu yuvireco chupe. ⁵⁸ Viraso güecua ivi yuvireco. Aheve oseyá oyeaosa Saulo pive ‘tosãro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tūpa upe: “Che Yar Jesús, eipisi che hã” ehi. ⁶⁰ Ipare oñenopiha, oñehe pĩrata Tūpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo osecá Jesús reroyasar mocañipa ãgua oico

Ahe ari pipeve omboipi Jesús amotarēhimbar seroyasar reca mara-mara tēi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tūpa mboeteisar yuvirecoi vahe, ahe viraso Esteban rehögüer ñoti yuvireco. Itĩ pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaēhi ãgua viña. Yuviroique-iqueño tēi aipo sēta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoi Jesús Tūpa Rembiporavo ava pĩsiro ãgua” ehi. ⁶ Ahese ava rehii oñemonuha Felipe ñehe rendu ãgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. ⁷ Iyavei setá ava carugar rerecosar sui omose carugar. Osēse ava sui, sãse yuvireco. Iyavei setá ava nomii vahe, ndoguatai vahe avei ombogüera. ⁸ Evocoyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa. ¹⁰ Evocoyase opacatu ava, cuacua vahe iyavei chíhivahe catu vahe oyapisaca tupri iñehe rese, aipo ehi yuvireco: “Co niha Tūpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tūpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñhengagüer yuvireco. Evocoyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitei yuvireco sese;

oñeapiramoño tēi vite yande Yar Jesús rer pīpe yuvireco. ¹⁷ Pedro iyavei Juan oyerurese, omondo opo iharive yuvireco. Ahese Espiritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espiritu Santo sese yuvireco —ehi Simón.

²⁰ Omboyevī rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaherã nde guarepochi pīpe viña —ehi chupe—. ²¹ Ndeu ndiyai co nungar mbahe apo ãgua. Esepia, nde pīhañemoñetasa ndahei ihīvi vahe Tūpa rovaque.

²² Sese epoi nde pīhañemoñeta raisa sui, eyerure Tūpa upe. Aviyeteramo iñerora ndeu —ehi—. ²³ Aicua nde pīha naporai vite iyavei nde pīhañemoñeta raisa pīpe vite ereico —ehi chupe.

²⁴ Evocoyase Simón omboyevī chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa pīsirosa resendar Samaria pīpendar tecua rupi yuvireco. Ēgüe ehi oyepota yuviroyevī Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipate Tūpa rembiguai oyemboyecua Felipe upe aipo ehi chupe: “Epūha, eso irohī coti nde yepota ãgua evocoi perī ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. ²⁷ Evocoyase opūha oso perī rupi. Aheve osovañchi ñepe i ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tūpa mboetei ãgua. ²⁸ Oyevise ocãreto pīpe, oyerogui Tūpa ñehes mombehusar Isaías rembicuachiagüer rese ou.

²⁹ Evocoyase Espiritu aipo ehi Felipe upe: “Eyemboya cãretomi rese” ehi.

³⁰ Evocoyase vīrovise ahe ava, osendu iyeroqui Isaías rembicuachiagüer pīpe oĩ. Ahese oporandu chupe:

—¿Eresenducua aipo Tūpa Ñehengagüer nde yeroquisa eĩ? —ehi chupe.

³¹ Etiopía pendar mbia omboyevī chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipate, “Erio, eyeupi, tereguapi cohava che pīri” ehi Etiopía pendar chupe. ³² Ahe Isaías rembicuachía oyerogui vahe pīpe aipo ehi:

“Inungar ava vīraso ovesa yuca ãgua, Ēgüe ehi avei ahe mbia seraso yuca ãgua yuvireco. Iyavei inungar ovesa nasasei eté guagüer rerocuase, Ēgüe ehi avei ahe mbia noñehi eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pīpe.

³⁴ Oyerogui pare ahe Etiopía pendar oporandu chupe:

—Emombehumi cheu: ¿Ava rese pīha aipo Isaías oñehes: oyese ae pīha, ambuae ava rese tie? —ehi.

³⁵ Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe. ³⁶ Ipate oguata catuse yuvireco, Etiopía pendar osepiase i. Aheve ahe aipo ehi chupe:

—Esepia co i tui. ¿Ndiyai vo cohava che ãpiramomi tēi eve viña? —ehi.

³⁷ Ahese omboyevī chupe:

—Ereroya itese opacatu nde pīha pīpe, iya ité ndeu —ehi.

—Aroya ité niha Jesucristo ahe Tūpa Rahir secoi —ehi.

³⁸ Evocoyase omombita uca ocãreto, ichui ogüeyi ìve yuviraso. Aheve Etiopía pendar Felipe oñapiramo. ³⁹ Yuvinosese ì sui, yande Yar Espiritu viraso ahe Etiopía pendar sui. Ahese ndosepia iri; ãgüe ehiño vorivete oso peri rupi. ⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. ãgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohavende rer pipe” ehi, “evocoyase eremombehura cuachiar pipe Damasco pendar tũparo rerecuar upe” ehi pahi rerecuar ivate catu vahe upe. ³ ãgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tẽi osesape guasu ìva sui chupe. ⁴ Evocoyase oviapi oso ìvive. Osendu ìva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epũha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa ìva suindar yuvireco. Esepia, ndosepiai eté ivate oñehe vahe yuvireco. ⁸ Ipare Saulo opũha, omahe tẽi; ndoicatu rumo mbahe repia. Ichui supindar oipisi iyiva rese seraso Damasco ve yuvireco. ⁹ Aheve mbosapi ari ndasesapiso, ndocarui, ndohui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyevi chupe.

¹¹ Evocoyase yande Yar aipo ehi chupe: “Epũha, eso calle Ihivi serer vahe rupi. Eporandu Judas rõtave Saulo, tecua Tarso pendar, rese. Ahe oyerogui cũritei. ¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyevi chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tẽi oyapo vahe nde reroyasar reco maranehi upe Jerusalén ve. ¹⁴ Cũritei ou rutei ahe mbia pahi rerecuar porocuita rupi opacatu nde rer rese oyeroya vahe roquendapa ãgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheã ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecua setá mbahe tẽi chupe oiporara vaheã che remimbotar mboaviye ãgua” ehi yande Yar chupe.

¹⁷ Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri ãgua. Toique avei catu Espiritu Santo nde rese —ehi Saulo upe.

¹⁸ Ahese voi eté pira pিরer nungar mbahe oviapipa sesa sui. Ahese voi sesapiso iri. Ichui opũha. Ipare voi Ananías oñapiramo. ¹⁹ Ipare Saulo ocaruse, ipĩrata catu iri. Moviro ari tẽi opita iri Jesús reroyasar piri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe. ²¹ Ava opacatu osendu vahe ñehese,

—¿Mara ehi p̄ha co? —ehi t̄i yuv̄ireco—. ¿Ndahei vo acoi co mb̄ia Jerusalén ve Jesús reroyasar mara-mara t̄i v̄ireco vahe? ¿Ndahei vo acoi co avei ou cohava ava Jesús reroyasar ha pendar p̄si ãgua serasopa ãgua avei Jerusalén ve pahi rerecuar upe viña? —ehi yuv̄ireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús T̄upa Rembiporavo ava p̄siro ãgua secosa. Sese ndoicatui judío ñehe mboyevi yuv̄ireco.

Saulo oñemi omu sui oamotar̄hise

²³ Setá ari pare judío ahe pendar omboguai yuca ãgua Saulo yuv̄ireco viña. ²⁴ Ahe rumo oyandu omboguaisa judío osãrose tecua ãchisa roquendipive ari, p̄itu momba yuv̄ireco yuca ãgua viña. ²⁵ Jesús reroyasar rumo p̄itu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuv̄ireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota t̄i Jesucristo reroyasar rese. Osiquiye rumo yuv̄ireco ichui. “Aviyeteramo co Saulo, ‘Aroya Jesucristo cute’ ehi tupri t̄ira yandeu” ehiño oyeupe yuv̄ireco. ²⁷ Ipare rumo Bernabé v̄iraso Saulo apóstol yuv̄irecoi vahe upe. Aheve Bernabé omombehupa chupe aipo ehi: “Co mb̄ia Saulo osepia yande Yar per̄i rupi iyavei yande Yar oñehe chupe. Ichui co oñehe osiquiyeẽhisa pipe Damasco ve Jesús recocuer rese” ehi. ²⁸ Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeẽhisave. ²⁹ Oñehepoepi avei secocuer rese judío griego pipe oñehe vahe yuv̄ireco. Ichui rumo oyuca potaño yuv̄ireco. ³⁰ Oicuase rumo Jesucristo reroyasar yuv̄ireco, v̄iraso voi eté Saulo Cesarea ve. Ichui omondo Tarso ve yuv̄ireco.

³¹ Evocoyase opacatu Jesús reroyasar yuv̄irecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuv̄ireco yande Yar mboeteisa pipe, Espiritu Santo oip̄itiv̄i iyemboeta catu ãgua yuv̄ireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mb̄ia Eneas serer vahe, ahe ndoguatai vahe. Vupave t̄i tui vahe ocho arav̄iter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepia opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuv̄ireco.

Dorcas cuerayevi agüer

³⁶ Ahe arav̄iter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporop̄itiv̄i yepi. ³⁷ Imbaheasi guasu rumo. Coiye omano. Ipare ava sehögüer oyosei yuv̄ireco. Ichui viroyeupi oi ivate vahesave seraso yuv̄ireco. ³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuv̄irío mb̄ia seru poyava ãgua Jope ve yuv̄ireco.

³⁹ Evocoyase Pedro oso supi yuv̄ireco oyepota yuv̄iraso Jope ve. Aheve viroyeupi oi ivateve seraso tehögüersave yuv̄ireco. Opacatu cuña imer mano vahecuer oyere ati voi, oyaseho Pedro iv̄i yuv̄ireco. Omboyecua avei oturucuar ihari pendar reseve Dorcas rembiapogüer yuv̄ireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure T̄upa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehõgüer upe.

Aipo oyeupe hese, Tabita omboi güesa. Pedro repiase, oñarapuha oĩ. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serãcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tũpa opacatu guahir, güembireco reseve yepi. Iyavei omondoño ité judío pĩtivi ãgua guarepochi, oyerogui avei Tũpa upe yepi. ³ Ñepi ari, caharuse las tres rupi, osepia oquer nungar pipe Tũpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tũpa rembiguai rumo omboyevi chupe: “Tũpa oipisi nde yeruresa; osepia avei nde poroparisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pিরer mopitasar piri. Ahe sêta para guasu popive chini” ehi chupe.

⁷ Orose Tũpa rembiguai ichui, Cornelio oñehe ñuvirío güembiguai upe iyavei ñepi sundao Tũpa mboeteisar upe, sese acoi oyeroya vahe yepi. ⁸ Opacatu Tũpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter ari senise oyerogui ãgua. ¹⁰ Vieporẽhise ocaru pota viña. Omoingatu viteseve rumo semihura yuvireco, aviyeteramo tẽi osepia mbahe oquer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbrĩ ipopi yacatu ou chupe. ¹² Ahe turucuar pipe, osepia opacatu mahembiar vai, mboi, vĩrai vai tẽi avei. ¹³ Ahese osendu ñehesa aipo ehi vahe: “Pedro, epũha, eyuca, ichui ehu” ehi chupe.

¹⁴ Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarẽhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tũpa remimbocatupri upe, ‘Ava remimbotarẽhi, ndihusai vahe’ nderei chira” ehi.

¹⁶ Egüe ehi mbosapi oyupagüer rupi chupe. Ipare turucuar oyevi ivave oso. ¹⁷ Pedro ipihañemoñeta vitese mbahe osepia vahecuer rese oquer nungar pipe: “¿Mbahe rese pĩha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rẽta roquendipive yuvireco. ¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta viteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pĩha?’ erei rene. Esepia, che ambou evocoi mbia nde reca” ehi Espiritu Santo Pedro upe.

²¹ Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyevi iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ñvi vahe, Tũpa mboeteisar opacatu judío osaisu, oipota rai yuvireco. Tũpa rembiguai oyocuai nde rese ereso vaherã sêtave, ahe osendu vaherã nde ñehesa —ehi yuvireco Pedro upe.

²³ Evocoyase omoinguepa, omombitapa oyepiri ñepi pĩtu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuvıraso sētave. Cornelio rumo osāro opacatu omu eta rese yuvıreco iyavei omborıparete güembisoho reseve avei. ²⁵ Oyepotase sētave oso, Cornelio rane osē voi, osovaıchi, oñenopiha sovai imboeteisa pıpe. ²⁶ Pedro rumo aipo ehi chupe:

—Epūha, che niha nde nungar avei aico —ehi chupe.

²⁷ Evocoyase ahe omoñeta seroique seraso oi pıpe. Aheve ava oñemonuha vahe setá osepia yuvıreco. ²⁸ Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío pıri. Anı chiaveira pembori evocoi ava peico” ehi acoi —ehi Cornelio rēta pıpendar upe—. Tūpa rumo omombehu cheu che quer nungar pıpe: “ ‘Ava remimbotarēhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoyase nacheatēhi che yu āgua pēu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tuprı avei, che cohava che rētave aicose, ndacarui eté che yerure āgua Tūpa upe. Aheseve oyemboyecua mbıa Tūpa rembiguai iturucuar rendı iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pırer mopıtasar. Ahe sēta para guasu popıve chini” ehi cheu. ³³ Sese amondo voi eté nde reca āgua. Aviye nde ereyu cohava. Cūrıtı co opacatu yaico cohava Tūpa rovaque. Orosendu pota opacatu nde ñehe yande Yar nde cuai vahe nde ñehe āgua oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supı eté Tūpa nomboyahoi yande raisu. ³⁵ Sese ambuae ivı pıpendar omboetei vahe Tūpa, oyapo vahe avei mbahe tuprı yuvıreco, ahe oıpısıra Tūpa. ³⁶ Aracahe Tūpa oñehe avei Israel suindar upe, omombehu ñehesa tuprı yeamotarēhiēhısa resendar Jesucristo rembiaporā sui, ahe opacatu ava co ivı pıpendar yuvırecoi vahe Yar. ³⁷ Pe peicua tuprı ité co mbahe oime vahe opacatu judío ivı rupi. Ahe omboıpı Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opıratasa, oEspıritu Santo avei. İpare Jesús oguata opacatu rupi mbahe tuprı apo oıco. Ombogüera avei opacatu ava iparaisu vahe carugar povrıve yuvırecoi vahe. Esepia, Tūpa secoi sese. ³⁹ Ore orosepia opacatu Jesús rembiapogüer Judea ivı rupi, tecua Jerusalén pıpe avei. Aheve imu oyatica uca curusu rese yuca yuvıreco. ⁴⁰ Tūpa rumo ombogüerayevı imombosapısa ari pıpe. İpare omboyecua iri oreu. ⁴¹ Nomboyecuai rumo opacatu ava upe, omboyecua ore sembıporavo oroıco vahe upeñomi. Ore pıri niha ocaru, oıhu avei ocuerayevı pare. ⁴² İyavei ahe ore cuai: “Pemombehu ava upe. Co che Jesucristo, Tūpa Rembıporavo, aico opacatu ava recocuer rese porandu āgua oicove vıte vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvıreco aracahe aipo ehi: “Opacatu acoi seroyasar, ahe vırecora Tūpa ñeroısa serer pıpe angaıpa rese yuvıreco” ehi —ehi Pedro Cornelio rēta pıpe yuvınoi vahe upe.

Espıritu Santo oıque ava ndahei vahe judío pıha pıpe

⁴⁴ Pedro oñehe vıteseve, Espıritu Santo ogüeyı opacatu ava osendu vahe rese. ⁴⁵ “ıToo! Evocoyase ndahei vahe judío upe avei Tūpa omondo Espıritu Santo inungar ombou yandeu” ehi Jesús reroyasar judío yuvırecoi vahe Pedro rupi yugüeru vahe yuvıreco. ⁴⁶ Esepia, osendu ahe oñehese ñehesa ndıcuasai vahe pıpe yuvıreco Tūpa upe.

⁴⁷ Evocoyase aipo ehi vupındar upe:

—¿Oime pıha ndoıpotai vahe co ava ñeapiramo āgua yande pāhu pendar? Esepia, co oıpısi Espıritu Santo yuvıreco inungar yande —ehi vupındar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñhengagüer yuvireco. ² Oyevisse rumo Pedro Jerusalén ve oso, ahese setá judío Jesucristo reroyasar viroïro sovai eté yuvireco, ³ aipo ehi:

—¡Mahera eresoi tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai i va sui. ⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tūpa remimbotatupri upe, ‘Ava remimbotarēhi’ erei rene” ehi cheu. ¹⁰ Ēgüe ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espiritu Santo che cuai che so āgua che atēhiēhisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipare aheve oroyepotase oroso, oroque Cornelio rētave. ¹³ Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru āgua. ¹⁴ Ahe omombehura ndeu nde ñepisiro āgua iyavei opacatu nde rēta pendar ñepisiro āgua avei” ehi Tūpa rembiguai Cornelio upe —ehi—. ¹⁵ Añehe ramoseve chupe, Espiritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñhengagüer rese aipo ehi vahecuer: “Supi eté i pipe Juan oporoāpiramo, pe rumo Espiritu Santo pipe peñeapiramora” ehi vahe. ¹⁷ Tūpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tūpa ombou avei ndahei vahe judío upe secocuer recuñaro āgua, tecovesa apirēhi vahe rereco āgua! —ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar pīratasa vireco yuvireco. Evocoyase setá ava viroya; oseyá ité yipindar güembieroya yuvireco yande Yar reroya āgua.

²² Serācua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase aheve, osepia Tūpa sovasase. Ahese sorivete aipo

ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepei araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipindar, “Cristo reroyasar” ehi yuvireco.

²⁷ Aheseve Tüpa ñehe mombehusar yugüeru Antioquía ve Jerusalén sui. ²⁸ Ñepei ipáhu pendar, Agabo serer vahe, opüha aipo ehi Espíritu Santo pīratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). ²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pītivi água yuvireco ocatugüer rupi. ³⁰ Ēgüe ehi yande Yar reroyasar rārosar Judea pendar upe porerecosa mondo. Bernabé, Saulo ahe porerecosa virašo yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sãro água yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoyase Pedro opita voquendasave sãrombri tupri chini. Jesús reroyasar rumo oyerocu pīrata Tüpa upe yuvireco sese.

Tüpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pītu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive. ⁷ Aviyeteramo tēi Tüpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epüha poyava!” ehi chupe. Ipühase, opa voi oyera carena ipo sui. ⁸ Ahese Tüpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeasa, eyu che raquicuei” ehi chupe.

⁹ Ēgüe ehi oso saquicuei. Ahe rumo ndoicuai Tüpa rembiguai oyeupe ēgüe ehise. Ndoyavii iquerve tēi ēgüe ehi vahe chupe. ¹⁰ Ichui yuvinose, oñocua yipindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose água yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tēi Tüpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tüpa ombou cheu güembigui che renose água Herodes povri sui. Tüpa che pīsiro judío rerecuar che yuca rāgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyerocu yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osē imboi água chupe. ¹⁴ Osenduse rumo Pedro ñehe, oquenda omboi rāgüer sui, oña oique oi pipe vorivetesave, omombehu: “Pe Pedro ihãi oquendipive” ehi oi pipendar upe. ¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tēi sepiase yuvireco. ¹⁷ Pedro rumo opo omopuha imonguiriri ãgua. Ichui opa omombehu yande Yar opisiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que pñha Pedro?” ehi tēi oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sãrosar yucapa ãgua. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaherã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuita sui oipisi mbahe güemihura yuvireco. ²¹ Herodes evocoyase omombehu ari oñehe vaherã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive uguapi oñ. Aheve oñehe ava rehii upe. ²² Evocoyase ava rehii osapucái pñrata yuvireco aipo ehi: “¿Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave. ²³ Ava aipo iheseve voi, ñepi Tūpa rembiguai oyapo mbaherasi guasu chupe. Ichui mbahe rasoi ocaru yaviter rupi yuvireco. Esepia, nomboetei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

13

Tūpa oiporavo Bernabé, Saulo oyeupe mboraviqui apo ãgua

¹ Evocoyase Jesús reroyasar Antioquía pendar pãhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avañ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepi ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espiritu Santo yuvireco chupe.

³ Evocoyase oyerocui pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

Apóstol yuvirecoi Chipre rupi

⁴ Evocoyase Bernabé, Saulo Espiritu Santo remimondo yuviraso Seleucia ve. Ichui yuviraso carite pipe caha pãhu Chipre ve. ⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipitivi ãgua.

⁶ Opase ité uguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar

yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe. ⁸ Ipaye vahe rer griego ñehe pīpe Elimas. Ahe ndoviroya ucai güereciar upe ñehesa supi eté vahe. ⁹ Evocoyase Saulo, Pablo serer vahe, vireco ité vahe Espíritu Santo opīha pīpe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipīhai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroñrosa sui. ¹¹ Eyapisaca, cūrītei yande Yar nde mombaraisura. Nande mboesapīsoi chira moviro ari rupi. Ichui ndereicatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso āgua upe. ¹² Ahe mbahe repiase, mborereciar viroya yande Yar. Oyepīhamondiī porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pīpe

¹³ Evocoyase Pablo, supindar avei, yuvirasos carite pīpe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuvirasos Antioquía ve, ahe namombriī Pisidia sui. Aheve, mbituhusa ari pīpe, yuviroique judío tūparove oguapi yuvinoi. ¹⁵ Oyeroqui pare Tūpa porocuita resendar cuachiar pīpe, Tūpa ñehe mombehusar cuachiar pīpe avei, tūparo pendar rereciar omondo oñehe Pablo upe:

—Ore mu, perecose mbahe pemombehu vaheerã co ava monguerēhi āgua, pemombehumu yandeu cūrītei —ehi.

¹⁶ Evocoyase Pablo opūha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—. ¹⁷ Israel iguar Tūpa oiporavo yande ramoī oyeupe nara, ahe Egipto ivi pīpe omboeta secua ambuae vahe secosa pīpe. Ipare opīratasa pīpe vinošepa ahe ivi sui aracahe. ¹⁸ Ipare Tūpa oñemosañō yande ramoī reco ai upe cuarenta araviter rupi, oguatase yuvireco ivi iporupirēhisar rupi. ¹⁹ Ipare omocañi ava eta Canaán pīpendar siete tupri yuvirecoi vahe sereciar reseve-seve. Ipare omondo Canaán ivi yande ramoī upe nara. ²⁰ Ēgüe ehi cuatrocientos cincuenta araviter rupi yapo yuvireco —ehi.

“Ipare Tūpa ombou ava recocuer moingatusar oporocuai vaheerã. Ipa vahe ipāhu pendar serer Samuel aracahe. Ahe Tūpa ñehe mombehusar avei. ²¹ Ahese yande ramoī eta oporandu yuvireco Tūpa upe mborereciar guasu rese. Evocoyase Tūpa omondo Saúl chupe, ahe Cis rahir, ahe yande ramoī Benjamín suindar secoi. Oporocuai cuarenta araviter rupi oico. ²² Ipare Tūpa virocua imborerecuasa ichui; omondo David upe yande ramoī cuai āgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuita’ ehi Tūpa. ²³ Ahe David suindar sui, Tūpa ombou Jesús Israel iguar pīsiro āgua. Aracaheve Tūpa omombehu co yande ramoī upe. ²⁴ Yande Yar yu renondevē, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo āgua’ ehi chupe. ²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande pīsiro, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora āgua ipi sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa pīsirosa resendar. ²⁷ Jerusalén pendar rereciar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pīpe oyeroquise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehusar rembicuachiagüer pīpendar yuvireco. ²⁸ Yepe ndoyosui mbahe sembiapoi rai yuca uca āgua yuvireco viña, ahe rumo oporandũño Pilato upe yuca uca āgua rese

yuvireco” ehi. ²⁹ “Ichui omboaviyese opacatu icuachiapri pipendar yuvireco, oviroyi uca curusu sui ñoti ãgua yuvireco. ³⁰ Tũpa rumo ombogüerayevi iri. ³¹ Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cũritei ahe ava ité omombehu Jesús recocuer ava upe yuvireco” ehi tũparo pendar upe.

³² “Sese che mu eta, cũritei oromombehu pẽu evocoi ñehesa aviye vahe Tũpa omondo vahe yande ramo upe aracahe. ³³ Tũpa omboaviye ramo güemimombhugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tũpa chupe. ³⁴ Tũpa omombehu avei güemimbogüerayevi sete tuyuẽhi ãgua icuachiapri pipe aracahe aipo ehi: ‘Che niha oroovasara acoi David upe che ñehes maranehi supi tupri vahe mboaviye ãgua’ ehi. ³⁵ Sese omombehu avei ambuae icuachiapri pipe: ‘Nde, Tũpa, ndereseyai chira nde rembiguai Ava seco maranehi vahe rete ituyupa ãgua’ ehi. ³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pãhuve yuvireco. Ahe setecuer rumo opaño ité ituyu” ehi. ³⁷ “Acoi Tũpa ombogüerayevi vahe retecuer rumo ndituyui eté” ehi tũparo pendar upe imombehu. ³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pẽu. Moisés porocuita sui ndipoi ñeroisa angaipa rese yande reco mohivi ãgua. ³⁹ Jesús recocuer sui rumo oime ñeroisa ñepeipei viroya vahe upe” ehi. ⁴⁰ “Peicua catu co mbahe sui, toviapi eme pe harive acoi Tũpa ñehes mombehusar rembicuachiagüer pipe aipo ehi vahe:

⁴¹ ‘Esepia, pe seroĩrosar peico vahe. Peyepihamondi, ipare pecañi tẽira. Esepia, che ayapora mbahe pe recoveseve. Yepe ambuae omombehu tupri itera pẽu che rembiaporã viña, pe rumo ndaperoyai chietera’ ehi Tũpa” ehi Pablo tũparo pendar upe.

⁴² Yuvinos potase tũparo sui, omombita Pablo yuvireco: “Teremombehu irimi eremombehu vahe ñehesa ambuae mbĩtuhusa ari pipe oreu” ehi yuvireco chupe.

⁴³ Yuvinosese ava rehi tũparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tũpa pe rovasasa pipe” ehi ava upe yuvireco.

⁴⁴ Ambuae mbĩtuhusa ari pipe seni opacatu ava ahe pendar oñemonuha yuvireco Tũpa Ñehengagüer rendu ãgua. ⁴⁵ Osepiase ava rehi, judío rereciar oñemoiró iteanga Pablo upe, supindar upe avei yuvireco. Viroĩro Pablo ñehes ava upe yuvireco. ⁴⁶ Evocoiyase Pablo, Bernabé reseve oñehes yuvireco judío upe osiquiyeẽhisave:

—Tũpa ore cuai pẽu rane ore ñehes ãgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirẽhi vahe. Evocoiyase orosora, oroñehes ava ndahei vahe judío upe. ⁴⁷ Esepia, yande Yar ombou ore cuaitarã co ñehes rese aracahendar aipo ehi vahe:

‘Che oroporavo tataendi nungar nde reco ãgua ndahei vahe judío yuvirecoi vahe upe piĩsirosa reroguata ãgua opacatu ivi rupi’ ehi.

⁴⁸ Ava ndahei vahe judío osenduse co ñehes, oviharete yuvireco, omboetei avei Tũpa Ñehengagüer. Opacatu ava iporavopri tecovesa apirẽhi vahe pisi ãgua, ahe viroya yuvireco. ⁴⁹ Evocoiyase Tũpa Ñehengagüer omombehu opacatu ahe ivi rupi yuvireco. ⁵⁰ Judío rumo omonguerẽhi cuña imboyeroyapri Tũpa mboeteisar iyavei mbia seco ivate vahe Pablo, Bernabé mose uca ãgua güecua sui yuvireco yamotarẽhisave. ⁵¹ Ahese Pablo, Bernabé oipipete opitaqui ivi sui yuvireco ‘Tũpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espiritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío. ² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. ³ Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opīratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yovi yuvireco: ñepe judío pihañemoñetasa rupindar; ambuae evocoyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oī ⁹ oyapisaca Pablo ñehese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua. ¹⁰ Evocoyase aipo ehi pīrata chupe:

—¡Epūha! —ehi.

Ahese opo, opūha, oguata voi. ¹¹ Osepiase ava rehii mbahe sembiapo yuvireco, osapucaí pīrata Licaonia ñehese pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihñemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehese vahe. ¹³ Ahese co tūpa Zeus pahi güeru tivi, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tivi Pablo, Bernabé mboetei āgua yuvireco viña. ¹⁴ Oicuse rumo Bernabé, Pablo, ahese omondo oturucuar yuvinoña ava pāhuve; oñehese pīrata yuvireco:

¹⁵ —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ēgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe i va, i vi, para guasu, opacatu ipor reseve. ¹⁶ Aracahe rumo Tūpa, “Ēgüe tehi oguata ndahei vahe judío oipihñemoñetasa rupi yuvireco” ehi viña. ¹⁷ Tūpa rumo ndasesarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ēgüe ehi mbahe tembihu imbou iyavei viharetasa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei āgua viña.

¹⁹ Ahese oyepota moviro judío Antioquía sui, Iconio sui avei. Oipihñemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivii. Ipihñemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinose oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar

upe. ²³ Ipore oiporavo ava Jesús reroyasar rãro ãgua ñepeipei ñemonuhasa rupi. Oyeroqui iyavei oyecuacu. Ipore viropovêhe yande Yar upe iporaviqui ãgua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipore yuviraso Pisidia rupi, oyepota Panfilia ivi rese. ²⁵ Omombehu Tũpa Ñehengagüer yuvireco Perge ve. Ipore yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tũpa upe sovasapri yuvirecoi mboraviqui apo ãgua. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tũpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya ãgua yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tũpa oyocuai Moisés yande ramoi cuai ãgua: ‘Pembocircuncida opacatu pe mu cuimbahe cheu nara’ ehi Tũpa aracahe” ehi yuvireco. “Cũritei acoi êgüe ndapeyeise Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu ãgua yuvireco.

³ Êgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracadendar aracuasa Tũpa rupi oguata ãgua yuvireco” ehi. Ahese opacatu Jesús reroyasar oyemboviharete yuvireco senduse.

⁴ Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve omombehu Tũpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opũha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye ãgua yuvireco —ehiño ité yuvireco.

⁶ Ahese apóstol, Jesús reroyasar rãrosar avei oñemonuha oyemomborandu ãgua aipo mbahe rese yuvireco. ⁷ Yemomborandu viteseve, Pedro opũha ipãhuve aipo ehi:

—Che mu, peicua niha aracaco Tũpa che poravo pe pãhu sui co ñehesa poropisirosa resendar mombehu ãgua ava ndahei vahe judío upe ‘toviroya yuvireco’ oyapave. ⁸ Tũpa oicua ité opacatu ava pihañemoñetasa. Chupe avei omondo Espiritu Santo inungar yandeu. Ipipe sui yaicua Tũpa oipisi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tũpa. Esepia, opacatu oyoya pãve Tũpa upe yaico. Sese omoatiro ipihañemoñeta rai sui oyese yeroyasa pipe. ¹⁰ ¡Pe tie pesecoãha pota Tũpa! ¡Mahera peyocuai uca pota co Jesús reroyasar mbahe yavai rai vahe apo ãgua! Aní rumo. Esepia, yande ramoi ndoicatui Tũpa porocuita mboaviye ãgua yuvireco, yande avei êgüe yahe —ehi—. ¹¹ Co rumo, yaroyase yande Yar Jesucristo, yande pĩsirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepia vahe poromondiisa Tũpa

oyapo uca ava ndahei vahe judío pãhuve yuvireco chupe. ¹³ Osendupase ñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: ¹⁴ Simón omombehu yandeu Tũpa osaisu avei ava ndahei vahe judío. Sese oiporavo ahe ava oyeupe nara —ehi—. ¹⁵ Oyoya tupri Tũpa ñehe mombehusar rembicuachiagüer rese. Ñepe ipãhu pendar oicuachía aracahe aipo ehi:

¹⁶ ‘Coie catu ayevíra vitu. Ahese ayapo piásu irira che rēta David oyapo uca vahecuer, ahe oi imocañipirer. Ambopiásu irira oitipa vahecuer yuvireco.

¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

¹⁸ Evocoi yande Yar rembiaporã icuapri aracahe suive’ ehi Tũpa ñehe mombehusar aracahe.

¹⁹ “Sese chepihañemoñeta iya ndayayocuai chira Moisés porocuita rupi oñecuñaro vaheñã ndahei vahe judío Tũpa rupi oguata ãgua yuvireco” ehi. ²⁰ “Aviye rumo yaicuachiasa chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi. ²¹ “Esepia, opacatu tecua rupi yuvirecoi ava omombehu vahe Moisés porocuita ñepeipei mbituhusa ari pipe judío tũparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco.

²³ Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. ²⁴ Oroyandu amove ava ore pãhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe pihañemoñeta rerova.

²⁵ Sese oyoya orepahañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pēu. ²⁶ Ahe acoi oyemondo vahe mbahe-mbahe tēi povrive yande Yar Jesucristo recocuer rese yuvireco. ²⁷ Oromondo Judas, Silas avei pēu: ahe teieté omombehura opacatu cuachiar pipendar pēu yuvireco. ²⁸ Aviye Espiritu Santo upe, oreu avei co porocuita güeraño oromondo vahe rese pēu. Ndape cuaisa pota iri rumo ambuae mborocuita rese. ²⁹ Pehui rene mbahe mimba yucapri seropovēhepri mbahe rahanga tēi upendar, ndapehui chiaveira mbahe ruvi, mbahe mimba yucapri suvi renosepirēhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. ³¹ Ahe cuachiar rese oyerouise, oyemboviharete yuvireco. ³² Judas, Silas Tũpa suindar ñehesa mombehusar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe. ³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe. ³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coie Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pãha ahe yuvireco? —ehi.

³⁷ Ahese Bernabé viraso pota Juan Marcos oyeupi viña. ³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyañ oyeptase yuvireco Panflia ve. “Taipitiviño iporaviquisa rese” ndehi chupe. ³⁹ Nomoingatuise mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve. ⁴⁰ Pablo rumo oiporavo Silas oyeupi icho ãgua. Yuvinose ãgua Antioquia sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo. ⁴¹ Ipare yuviraso Siria, Cilicia rupi Jesús reroyasar monguerẽhi catu ãgua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego. ² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircuncida uca seroĩroẽhi ãgua judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoyase opacatu tecua iguatagüer rupi omombehu ahe mborocuita apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco arĩ rupi.

Tũpa omondo uca Pablo Macedonia ve iquer nungar pipe

⁶ Espiritu Santo ndoipotai Asia rupi yuviraso vaherã Tũpa Ñehengagüer mombehu ãgua. Sese oyahuva yuviraso Frigia rupi, Galacia rupi avei. ⁷ Ëgüe ehi oyeptota Misia popive yuvireco. Ichui yuviraso pota tẽi Bitinia ve. Jesús Espiritu rumo ndoipotai icho ãgua supi. ⁸ Ahese osasaviño yuviraso Misia sui carite guasu yemboyasa Troas ve oyeptota ãgua yuvireco. ⁹ Oyeptase aheve, ahe pĩtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pĩtivii ãgua viña” ehi ohã chupe. ¹⁰ Ipare ore oroyemoingatu voi eté Macedonia ve ore so ãgua. Esepia, ore oroicua ité Tũpa aheve ore mondora ñehesa pĩsirosa resendar mombehu ãgua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro arĩ tẽi oroico. ¹³ Mbituhusa arĩ pipe orosẽ evocoi tecua sui iai popive. “Aheve oñemonuhara judío oyerokuĩ ãgua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pĩsirosa resendar yuvireco chupe. ¹⁴ Ñepeĩ imboetasa, Lidia serer vahe, Tiatira pendar, oyapisaca ore ñehese rese oĩ. Ahe Tũpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ãgua Pablo remimombehu rese. ¹⁵ Sese ñapiramosa, opacatu sãta pendar reseve. Ipare ore mombita pota güetave.

—Che reroyase peye yande Yar reroyasar che recose, pepitara che rõtave —ehi oreu.

Ëgüe ehi ore monguerẽhi. Sese oropita sõtave ipiri.

¹⁶ Ipare ambuae arĩ oroso irise oroyeroqui ãgua, cuñatai ore rovaĩchi, ahe cuñatai caruguar pĩratasa pipe mbahe mombehusar. Oicatu ava upe mbahe oime vaherã mombehu. Omombehuse mbahe, setá oipisi sepri guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tũpa ivate catu vahe upendar oporaviqui yuvireco omombehu: “Na ehira Tũpa yande pĩsiro” ehi yuvireco! —ehi pucu-pucu ore mombehu ava upe.

¹⁸ Setá ari ěgũe ehi oico oreu. Omañeco tẽise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esẽ co cuñatai sui —ehi.

Aheseve voi carugar osẽ ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. ²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogũeru vahe peu, judío tẽi yuvirecoi. Ayeve omboavũ guasu tẽi yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña ãgua —ehi yuvireco mborerecuar upe.

²² Evocoyase ava eta oyamotarẽhi Pablo iyavei Silas yuvireco iyavei mborerecuar, “Pesequii iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pĩrata soquendapri rãrosar yuvireco, “Esãro tupri” ehi yuvireco chupe. ²⁴ Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pĩtu mbiter rupi rumo Pablo, Silas oyerogui, osapuca Tũpa mboeteisave yuvireco. Ambuae ava soquendapri evocoyase osenduño tẽi yuvireco isapuca.

²⁶ Ahese aviyeteramo tẽi ivi oriri eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca ãgua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tẽi ndeyeupe! ¡Esepia, opacatu oroicoveño cohavel —ehi pucu soquendapri rãrosar upe.

²⁹ Evocoyase soquendapri rãrosar, “Emboumi tataendi” ehi ondugũer upe. Ichui oña oique, oriri, osiquiyepave oñenopiha Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro ãgua vichico? —ehi chupe.

³¹ —Eroya yande Yar Jesucristo. Ichui ahe nde pĩsirora, nde rẽta pendar avei —ehi yuvireco chupe.

³² Ahese omombehu yuvireco Tũpa Ñhengagũer soquendapri rãrosar upe, opacatu sẽta pendar upe avei. ³³ Ahe pĩtu pipeve avei soquendapri rãrosar viraso oyeupi, yapichasa oyoseipa chupe. Ahese Pablo, Silas oñapiramo guãrosarer, sẽta pendar avei yuvireco. ³⁴ Viraso pare sãrosar güõtave, ombocarũ. Ahe sẽta pendar avei oviharete ité yuvireco Tũpa reroyasa rese.

³⁵ Cõhese mborerecuareta omondo sundao ava rese icuapri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. ³⁶ Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose ãgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tẽi yuvireco. Ipare aipo ava rembiepiaẽhive tẽi ore mosepa uca pota viña. ¡Aní eté rumo! Ahe teieté ru toyugũeru ore mose ãgua —ehi soquendapri rãrosar upe.

³⁸ Ipare sundao ava rese icuapri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso

Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia rêtave. Oñemonuha irise ambuae Jesús reroyasar pãhuve, omonguerêhi catu yuvireco. Ipare yuviraso ichui.

17

Ava yaïvu guasu t̃ei Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ëgüe ehi oyepota tecua Tesalónica ve yuvireco. Aheve oime judío tũparo. ² Secocuer rupi eté mbituhusa ari pipe Pablo oi que judío tũparove, oñemoñeta ava eta upe mbosapi mbituhusa ari rupi Tũpa Ñehengagüer rese. ³ Omboyecua tupri imombehu Tũpa Rembiporavo ava p̃siro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe p̃eu, ahe ité niha Tũpa Rembiporavo ava p̃siro ãgua — ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tũpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoïrombave secatêhi ava rese yuvireco. Sese omonuha ava yuvireco t̃ei vahe, ndipihai vahe yuvireco. Imonuha pare, ahe omboai vu guasu uca t̃ei ahe ava upe opacatu güecua pipe yuvireco. Yuviraso Jasón rêtave Pablo, Silas reca, vinose pota ava rehii pãhuve yuvireco viña. ⁶ Ndoyosuse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūritei oyepotapa yuvireco cohave! ⁷ Co Jasón omombituhu güêtave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco. ⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tũpa Ñehengagüer Berea ve yuvireco

¹⁰ Ahe p̃itu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tũparo pipe. ¹¹ Berea pendar ava aviye catu ava Tesalónica pendar sui. Ëgüe ehi ipisi ohãpisiêhisa pipe ñehesa yuvireco iyavei ari yacatu rupi oseca Tũpa Ñehengagüer pipe ‘¿supi eté p̃iha Pablo ñehesa?’ oyapave yuvireco. ¹² Evocoyase setá avei Pablo ñehereoyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tũpa Ñehengagüer rese Berea ve. Sese yuviraso aheve imboai vu guasu t̃ei uca ãgua ava upe yuvireco. ¹⁴ Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco. ¹⁵ Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehereoyasar Silas upe iyavei Timoteo upe avei yuvireco yuviraso voi ãgua Pablo piri ahe tecuave yuvireco.

Pablo Atenas ve secoi

¹⁶ Pablo osãro viteseve Silas iyavei Timoteo Atenas ve oico, ndoyemboviihai osepiase opacatu rupi tũpa rahanga-anga t̃ei. ¹⁷ Sese judío tũparo pipe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe. ¹⁸ Evocoyase amove mbia

oyembohe vahe epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbia iñehe papa rai ava upe oico? —ehi.

Ambuae aipo ehi yuvireco:

—Ndoyavi co mbia oñehe vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuerayevisa resendar. ¹⁹ Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? ²⁰ Supi eté niha erembobehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²²⁻²³ Evocoyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepia pe tũpa eta pemboetei vahe. Ahese asepia ñepe tũpa upe seropovẽhepri renda. Sese asepia icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

²⁴ “Evocoi Tũpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tũparo ava tẽi rembiapo pipe. ²⁵ Ndahei ava rembiapo pipe sui tẽi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pĩtuhesa iyavei opacatu mbahe oime vahe ivi, ivave” ehi.

²⁶ “Tũpa oyapo opacatu-catu tẽi ava ñepe ava sui ava yesu ãgua opacatu ivi rupi. Omondo ivi ava yemboerecua ãgua ñepe-pe upe. Ari avei omondo co ivi pipe iyemboerecua ãgua yuvireco chupe. ²⁷ Ègüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ègüe ehi rumo Tũpa yande resevemi eté. ²⁸ Esepia niha, Tũpa sui yaicove, ipĩratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tũpa suindar’ ehi yuvireco. ²⁹ Sese yande Tũpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tũpa’ ndayahei chira. Esepia, mbahe rahanga ava rembiapo tẽi, ndahei Tũpa” ehi. ³⁰ “Pe ramoĩ ndoicua tupriise yuvireco aracahe, Tũpa oñemosañño mbahe sembiapo rese chupe. Cũritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca ãgua güecocuer ñvi tupriisa pipe ñepe güembiporavo upe. Ahe ombogüerayevi güembiporavo omano vahe pãhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroĩrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osẽ ipãhu sui oso. ³⁴ Moviro rumo mbia oyemboya sese, viroya ité vahe iñehesa yuvireco. Ahe ipãhuve secoi mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osẽ Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvĩnose ñepe tecua Italia rupindar Roma

sui oyocuaise mborerecuar guasu Claudio: “Toyuvínose ité opacatu judío Roma sui” ehise. Pablo oso, ³ opíta Aquila piri oporaviqui água. Esepia, Pablo, Aquila avei ahe mbahe pírer mbovívísar pãve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tũparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu água rese güeraño judío eta upe aipo ehi: “Jesús niha Tũpa Rembiporavo ava pĩsĩro água secoi” ehi. ⁶ Ñehe-ñehe tẽi rumo seroĩrosave yuvireco chupe. Sese Pablo oipĩpete oturucuar sovaque ‘oimera mbahe tẽi pẽu’ oya, iyavei aipo ehi chupe yuvireco:

—Pe ae niha peseca Tũpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pẽu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osẽ judío tũparo sui, oique mbia Ticio Justo serer vahe rõtave, ahe Tũpa mboeteisar avei secoi. Ahe sẽta judío tũparo iqueve. ⁸ Crispo, ahe judío tũparo rerecuar viroya avei yande Yar, opacatu sẽta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. ⁹ Ñepeĩ pĩtu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca água. Supi eté che areco setá che rahĩrã co tecua pipe” ehi yande Yar chupe. ¹¹ Evocoyase opíta ñepeĩ araviter yemombitesa rupi Corinto ve oico. Aheve ombohe Tũpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarẽhisave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tẽi ava oTũpa mboetei água. Ndahei rumo Roma pendar porocuita rupi ãgüe ehi yuvireco —ehi yuvireco seroĩrosave chupe.

¹⁴ Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerẽhira che yapısaca água pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tũpa rer resendar iyavei pe Tũpa porocuita resendar rese tẽi. Pemoingatu pe ae pe recocuer; ndaipotai aipo nungar mbahe moingatu água —ehi Galión ahe ava upe.

¹⁶ Ipare opa omboyepipi porandusa sui. ¹⁷ Ahese opacatu griego oipisi judío tũparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo secoi pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye água. Ipare yuviraso carite pipe Siria ve. ¹⁹ Siria piar rupi yuviraso Efeso ve. Aheve opíta Aquila, Priscila yuvireco. Ichui Pablo oique judío tũparo pipe Jesús resendar ñehesa mombehu água chupe yuvireco. ²⁰ Ahe pendar omombita pota vite tẽi yuvireco viña, Pablo rumo ndopita potai aheve. ²¹ Evocoyase, “Aviye, taso rane” ehiño chupe yuvireco. “Tũpa oipotase cheu, ayevi irira vitu pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo água Jesús reroyasar upe. Ipare oso Antioquía ve. ²³ Opíta pucu pare aheve, osẽ, oguata iri Galacia rupi, Frigia rupi opacatu Jesús reroyasar monguerẽhi catu água.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tūpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oāpiramo agüer güeraño tēi. ²⁶ Ahe osiquiyeehiseve judío tūparo pipe omombehu Tūpa Ñehengagüer. Osenduse Aquila, Priscila ñehesa, omombita yuvireco oyepiri. Ahese omombehu tupri catu Tūpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri āgua. Ipare oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu āgua yuvireco. ²⁸ Omboyecua opacatu rovaque judío pihañemoñetasa co coti tēi vahe. Ahese opa osecopi ñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava pīsiro āgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo āpiramosa peipisi? —ehi.

—Juan poroāpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyeveise Tūpa upe. Ipare rumo omombehu ava upe: “Peroya ahe eté vahe ou vaherā che raquicuei” ehi. Ahe ou vaherā, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco.

⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tēi ñehe ambuae ñehesa pipe iyavei omombehu Tūpa suindar ñehesa yuvireco. ⁷ Ēgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tūpa Ñehengagüer judío upe osiquiyeehiseve itūparo pipe ipihañemoñeta rerova āgua Tūpa mborerecuasa resendar reroya āgua rese. ⁹ Amove rumo judío ipihaviracua ité seroyaēhi āgua yuvireco. Ipipe ñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tūpa omondo güeco pīratasa Pablo upe poromondiisa apo āgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose āgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyepupa judío pahii rerecuar secoi. ¹⁵ Carugar rumo omboyevi

chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipãhuve oso. Opacatu opĩratasa pipe opa ité osecopi siete mbia yuvirecoi vahe. Omomara-mara tēi uguayihisa pipe imonanipa tupri imondo. ¹⁷ Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi ãgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri. ²⁰ Ëgüe ehi Tũpa opĩratasa pipe ombouvicha oñehengagüer iyavei iñehe pĩratasa oyecua catu ava rese.

²¹ Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. ²² Evocoyase omondo ñuvirío opĩtivisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa rēta rahanga guarepochi apopri guarepochi pisi ãgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiyu guasu uca ãgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tũpa ité’ ohesa pipe yande rembiapo uve. Ndahei rumo cohapeño Ëgüe ehi, opacatu Asia rupi Ëgüe ehi avei imombehu. ²⁷ Aviyeteramo mbahe tēi oimera yandeu yande poraviquisa mocañi tēi ãgua, tũparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroĩrora yande rembiapo catupriisa yuvireco” ehi.

²⁸ Osenduse aipo ihe ava yuvireco, oñemoĩrosa pipe virosapucái aipo ehi yuvireco: “¡Imboetepri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tēi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oique pota tēi ava rehii pãhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucái pĩrata ñepe mbahe rese, amove osapucái ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?” ehi tēi setá ipãhu pendar yuvireco. ³³ Amove rumo ava rehii pãhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu ãgua ava rehii rovaque yuvireco. Alejandro evocoyase omopuha tēi opo ava monguiriri ãgua viña. Osepi pota omu judío ava rehii rovaque viña. ³⁴ Ava rehii rumo oicuae Alejandro judío secose yuvireco. Opacatu guasu osapucái pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ëgüe ehi ahe osapucái ñuvirío hora rupi rutei yuvireco.

³⁵ Evocoyase tecua pipendar mbahe cuachiasar oicatusave ava monguiriri ãgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa

tũparo rese yande hañecosa iyavei sahanga iva sui oviapi vahe rese avei hañecosa. ³⁶ Ndipoi niha ava, ‘Aní’ ehi vaherã che remimombehu rese. Sese peyemonguiririño, peyapoi rene mbahe pe yapısacaẽhisave. ³⁷ Peruño tẽi eté co ñuvirío mbia cohave, ndoyapoi rumo mbahe tẽi Artemisa upe yuvireco. Nimondai mbahe rese itũparove, ndoviroĩroi avei serer yuvireco. ³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu ãgua. ⁴⁰ Mborerecuar revo oyandura yande rembiapo co pipe, ‘¿Mahera peavıu guasu tẽi? ¿Che amotarẽhimbave tie ãgũe peye?’ ehi tiẽtera yandeu. Oporanduse yandeu, ndayaicatui chitiẽtera imboyevi ãgua iñehe chupe. Esepia niha, co yañemonuha yande remimbotar tẽi cohave” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava avıu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Avıye” ohe pare, oso Macedonia ve. ² Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opıta mbosapı yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyevi iri oso Macedonia ve ivı rupi. ⁴ Yuviraso moviro mbia supi, ipãhuve ñepeı Berea pendar, Pirro rahır Sópater; ñuvirío Tesalónica pendar, Aristarco, Segundo; ñepeı Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoi mbia yuviraso Pablo renondeve sãro ãgua Troas ve. ⁶ Pieta pan ndayapepoi vahe hu pare, orosẽ tecua Filipo sui carite pipe, cinco arı rupi oroyepota Troas ve. Ahe tecuave oropıta siete arı rupi.

Pablo Troas ve secoi

⁷ Domingu pipe, ore oroñemonuha pan hu ãgua. Ahese Pablo oporombohe oico pıtu mbıter rupi. Esepia, ahe osẽ pota ahere ayihive voi ichui. ⁸ Ahe oi ivate vahesave ñemonuhasa pipe setá tataendi. ⁹ Mbia chıhivahe, Eutico serer vahe, metanave oguapı oı. Pablo rumo oñehe pucú iteanga. Evocoyase omboopesıi ahe chıhivahe. Ipare oquẽ; avıyeteramo tẽi oviapı oi ivate vahe mbosapısa sui. Ahese ava ogüeyı sehögüer rupi ivı sui yuvireco. ¹⁰ Evocoyase Pablo ogüeyı ou chupe, oñeno oso sese icuhaguã. Ipare aipo ehi Jesús reroyasar upe:

—Pesıquıyeı rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. ¹² Evocoyase co mbia chıhivahe viroyevıse secosave, opacatu oyembovıha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivı rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi. ¹⁴ Oroyoepiase aheve, oha carite pipe ore pıri. Ichui oroso cute Mitilene ve. ¹⁵ Ahere ayihive carite pipe oroñocua Quıo oroso. Ambuae arı rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tuprı güeco ãgua. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya. ¹⁸ Oyepotase yuvireco chupe, aipo ehi: “Peıcua niha che recocuer avıye ité yıpısuıve arı che reıque ramosa resendar co Asia ve. ¹⁹ Arı yacatu rupi

aporaviqui yande Yar upe pe pãhuve vichico che reco asiẽhisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicutui ñehesa aviye vahe mombehuẽhi pẽu mbahe aviye ãgua yepi. Che opombohe ava rehi rovaque, opombohe avei ñepepei-pe pe rẽta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tũpa upe, peroya avei yande Yar Jesús’ ahe” ehi. ²² “Cũritei asora Jerusalén ve vichico. Aheve che so ãgua Espiritu che cuai che piha pipe. ‘¿Mara ehira piha yuvireco peve cheu?’ aipo ahe. ²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda ãgua iyavei che mombaraisu ãgua yuvireco yepi” ehi. ²⁴ “Ndacherecatẽhi rumo cheyese che mano ãgua. Che rumo amboaviye potaño ité che poraviquisa Tũpa upe, ahe yande Yar Jesucristo che cuai vahe co ñehesa icatupri vahe mombehu ãgua. Co Tũpa oporoaisusa pipe ombou ñepepei vahe Guahir ava pĩsiro ãgua” ehi.

²⁵ “Opa niha Tũpa mborerecuasa amombehu pẽu. Che rumo aicua ndache repia iri chira peye. ²⁶ Sese tapeicua cũritei: ndayavii eté che cuaita mboaviye ãgua co tecocuer aviye vahe mombehu pipe pẽu. ²⁷ Esepia, ndaicuacui eté Tũpa Ñhengagüer mombehu; che rumo amombehuño ité opacatu Tũpa recocuer pẽu. ²⁸ Sese peñearo tupri, pesãro avei opacatu Jesús reroyasar Espiritu Santo porocuita rupi. Inungar ovesa rãrosar, ãgüe peye tuprira sãro. Ahe Tũpa remimboepi yuvirecoi. Esepia, Jesús oipiyere vuví opacatu ava angaipa repirã. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pãhuve opacatu Jesús reroyasar mocañipa pota ãgua. ³⁰ Oime aveira que ava pe pãhu pendar pe mbopa pota aveira yuvireco pe reraso ãgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pĩtu, ari yacatu rupi avei che yasehosa pipe pe rereco” ehi.

³² “Sese, che rivireta, opoeyara Tũpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pẽu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pãhuve. ³⁴ Peicua niha acoi che po pipe ité aporaviqui che recove ãgua, che rupindar recove ãgua avei. ³⁵ ãgüe ahe amboyecua che recocuer pẽu. Supi avei ãgüe peyera; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

³⁶ Oñehe pare, oñenopiha oyerure ãgua opacatu omboripar reseve. ³⁷⁻³⁸ Ndoyembovihal eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tẽi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaherã Fenicia ve, ahe ipipe oroha, oroso. ³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoẽhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. ⁴ Aheve orosepia Jesús reroyasar yuvirecoi vahe. Ahese ropita siete ari ipiri. Yepe ahe Jesús reroyasar aipo ehi Pablo upe yuvireco: “Espiritu Santo oñehe oreu. Evocoyase eresoi rene Jerusalén ve” ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure ãgua.

⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güëta ve.

⁷ Tiro sui oroso Tolemaida ve. Oroyepotase, oroso Jesús reroyasar repia água. Aheve oropita ñepei ari. ⁸ Ahere ayihive oroso Cesarea ve. Aheve oroique, oropita Felipe rëta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve. ⁹ Evocoi Felipe vireco irungatu guayri ndomendai vahe. Tayri Tüpa ñehe mombehusar pãve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tüpa ñehe mombehusar secoi. ¹¹ Ouse ore pãhuve, vïrocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tõi chupe. ¹³ Omboyevi rumo oreu:

—¡Mahera peyaseho che rese, ndache mbovïhai peye! Che rumo ayemoingatu voi che ãpichi uca água, che mano água rese avei Jerusalén ve yande Yar Jesús recocuer rese —ehi oreu.

¹⁴ Ndorocatuisse ipihañemoñetasa rerova água, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so água Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rëta ve. Ahe ore moingue oyepiri. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisi ore pisi yuvireco.

¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tüpa mbahe oyapo uca vahe ava ndahei vahe judío pãhu rupi. ²⁰ Osenduse, omboetei guasu Tüpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerëhi vahe Moisés porocuita aracahendar mboaviye água yuvireco —ehi—. ²¹ Osendu tõi nde rembiapo yuvireco. Omombehu tõi avei aipo nde he yande mu ambuae tecua rupindar yuvirecoi vahe upe: “‘Peseya Moisés porocuita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tõi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepia, oyandura nde yepotasa cohava yuvireco.

²³ Aviye catu ereyapora ore porocuita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tüpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tüpa upe icuavëhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicuara ava semira tैसे mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tõi upendar seropovëhepri, pehui rene mbahe ruvi, pehui rene mbahe mimba yucapri suvi renosepirëhi vahe iyavei peaguasai rene” orohe chupe —ehi yuvireco.

Judío oipisi Pablo tũparo guasu pipe yuvireco

²⁶ Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tũparo guasu pipe, omombehu

yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porrecosa Tūpa porocuita rupi icuavēhepirã” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ava rehii tūparo pendar. Ipare ipisise, ²⁸ sãse yuvireco: “¡Ore mu, ore pítivii peye co mbia oroipisi vahe rese! Esepia, oguata opacatu rupi. Oñehe tēi yande rese, Moisés porocuita rese, yande tūparo rese avei iyavei viroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cūriteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco. ³¹ Oyuca potase yuvireco, ahese yaivu rēracua oyepota sundao rereciar guasu upe. ³² Cūriteimi sereciar viraso sundao, yuvinoña yaivu vahe upe yuviraso. Osepiase ava sundao rereciar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rereciar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoiyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. ³⁴ Ahese amove ava ñepe mbahe rese oñehe, ambuae, ambuae mbahe rese tēi yuvireco. Evocoiyase sundao rereciar ndoicatui supi eté vahe mbahe rendu āgua yaivu guasu vahe pāhuve. Sese, “Peraso quartelve” ehi. ³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. ³⁶ Ava rehii rumo yuvirasoño ité saquicuei, “¡Tomanol!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rereciar guasu upe: —¿Iyacatu vo yañemoñeta raimi? —ehi.

Evocoiyase, omboyevi mborereciar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pāve cuatro mil tupri ivi iporupirēhisarup rupi —ehi sundao rereciar chupe.

³⁹ Evocoiyase,

—Che judío, tecua Tarso pendar aico. Ahe tecua Cilicia pipendar imboeteipri vahe secui. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoiyase mborereciar, “Aviye” ehi chupe. Ipare opūha yeupisave harive, omopuha opo ava eta monguiriri āgua. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi āgua pēu cūritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tūpa mboetei āgua rese vichico inungar pe peico cūritei. ⁴ Che yipindar aseca-seca catu ava co Tecocuer Piasu rupi oguata vahe yamotarēhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rereciar ivate catu vahe iyavei opacatu tecua pendar rereciar oicua che reco yuvireco. Ichui niha aipisi cuachiar aru vahe rã yande mu tūparo rereciar Damasco pendar upe, ‘Taso Damasco ve

pahi rerecuar rer pīpe ava Jesús reroyasar pīsi āgua. Ichui tarupa cohava imombaraisu āgua’ ahe viña.

Pablo omombehu oñecuñaro agüer

6 “Evocoyase aso Damasco ve. Ahe ipiar rupi arovise vicho mbiter ari rupi, aviyeteramo tēi osesape guasu iva sui oreu. 7 Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. 8 Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. 9 Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. 10 Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporã’ ehi cheu. 11 Sendí iteanga vahe, ndache mboesapisoise, ahese che rupindar che po pīsi che reraso Damasco ve yuvireco” ehi.

12 “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuaíta; sese opacatu judío secua pendar: ‘Co mbia aviye vahe ité’ ehi yuvireco chupe. 13 Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu. 14 Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua āgua. Oipota avei eresepia vaherã ichuindar ava seco ivi vahe, eresendu aveira iñehe’ ehi. 15 ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. 16 ‘Evocoyase, cūrítei ndiya iri eresãro’ ehi. ‘Epūha, toroãpiramo. Eporandu yande Yar upe nde reco moatiro āgua nde angaipa sui’ ehi Ananías cheu.

“Tūpa che mondo ava ndahei vahe judío upe” ehi Pablo

17 “Coíye catu, ayevi irise Jerusalén ve, ayerure tūparo guasu pīpe. Ahese che quer nungarve asepia mbahe. 18 Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. 19 Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tūparo yacatu rupi’ ahe. 20 Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyeño oyucase yuvireco. Sese asãro yucasar yeaosa vihã’ ahe chupe. 21 Che Yar rumo omboyevi cheu: ‘Eso, oromondora coi rupi ava ndahei vahe judío pãhuvé’ ehi che Yar cheu” ehi Pablo ava rehí upe.

Pablo sundao rerecuar guasu povrive secoi

22 Aipo rupi osendu iñehe yuvireco. Ahese rumo osapucaí pĩrata yuvireco chupe: “¡Tomano co mbia! ¡Toicove vite iri eme co ivi pīpe!” ehi yuvireco chupe. 23 Osapuca-pucaí, osequiipa oyeaosa oñemoĩrombave yuvireco iyavei omombo-mombo ivi cuhi ivate coti yuvireco yamotarēhimbave. 24 Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse ati yamotarēhimbave ava yuvireco chupe” ehi osundao upe. 25 Oñapichise rumo inupa āgua yuvireco, Pablo omombehu ñepei sundao rerecuar upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduēhiseve? —ehi mborerecuar upe.

26 Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

27 Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

28 Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuase Pablo romano secosa rese, osiquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rerecuar guasu oicua tupri pota: ¿Mbahe sui pñha judío oyamotarēhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pñhañemoñeta tupriisa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. ³ Ahese Pablo omboyevi chupe:

—¡Tũpa nde nupara, nde aviye tupri tēi angahu vahe ereico! Nde mbahe rese porandu ãgua cheu porocuita rupi erei. Evocoyase, ¿mahera ereporocuai che yurupete ãgua mborocuita mboyeroaēhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pãhuve amove oime saduceo, amove fariseo. Ahese oñehe pñrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramosese voi, fariseo, saduceo oñeñehopoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tũpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sãse guasu yuvireco. Ahese oime amove opũha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tũpa rembiguai revo oyemboyecua mbahe mombehu ãgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

¹¹ Ahe pñtu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyēhisa pipe cohava Jerusalén ve, ēgüe ere aveira che mombehu Roma ve” ehi.

Omboguai Pablo yuca ãgua yuvireco

¹² Ahere ayihive setá judío oñemonuha, omboguai Pablo yuca ãgua yuvireco: “Tũpa rovaque ndayayucase Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tũpa rovaque Pablo; ndorocarui chira ndoroyucase —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe

sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar vīraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepēpi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vāherā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucaise yuvireco. Cūrītei oyemoingatu, osāro vīteño nde porocuita yuvireco —ehi mbia chīhivahe chupe.

²² Ipare sundao rerecuar guasu omboyevī imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuvirasos vāherā opī rese, ambuae setenta sundao cavayu harīve iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. ²⁴ “Pemoingatu uca avei cavayu Pablo yeupi āgua. Ēgüe peye pesāro tuprīra seraso yande rerecuar Félix upe” ehi. ²⁵ Evocoyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca āgua viña. Che rumo aicua romano seco rese, ahese araso sundao sepi āgua judío eta sui ²⁸ ‘¿mbahe rese pīha ndoyambotai yuvireco?’ viya. Sese araso judío porandusa ivate catu vahe pendar upe ñemonuhasave yuvireco. ²⁹ Ahese aicua yamotarēhisā judío porocuita sui tēi iyavei ndoyapoi mbahe tēi oreu. Sese ndiyai yuca āgua oreu, soquenda āgua avei. ³⁰ Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peoporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe pītu pipe sundao viroguata Pablo ocuita rupi yuvireco, vīraso Antīpatris ve yuvireco. ³² Ahere ayihive sundao yuvirasos vahe opī rese oyevī yugūeru cuartelve. Sundao cavayu arī pendar güeraño rumo yuvirasos vīte. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe.

Evocoyase oyocuai opītivīisar Pablo rāro āgua güētave Herodes rembiapogüer pipe.

24

Pablo oyoepi mborerecuar Félix rovai

¹ Cinco arí pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar p̄tiv̄isar oñehe vaheã Pablo amotarēhi uca āgua, ahe serer Tértulo. Ahe yugüeru Pablo recocuer mombehu āgua mborerecuar Félix upe. ² Evocoyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tupri sa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ëgüe ehi ore tūparo momara. Sese co oroipisi —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe op̄iratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ëgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesa pipe —ehi Félix upe—. ¹¹ Nde ereicua tupri potase, ereporandura supi eté co pipe doce arí ramo opa che yepotare Jerusalén ve Tūpa mboetei āgua. ¹² Co judío oicua yuvireco nañehengatai ava upe tūparo guasu pipe, namboai vu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatui eté mbahe che rembiavi mombehu seroya tupri āgua yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rembieroya Tecocuer Piasu p̄ihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—. ¹⁵ Inungar co mbia, ëgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco p̄orai vahe avei coiye. ¹⁶ Sese ayemoviracua tupri che p̄ihañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mundo āgua. Ahese avei mbahe m̄imba ayuca uca Tūpa upe seropovēhe āgua. ¹⁸⁻¹⁹ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehi che rupi, namboai vu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña. ²⁰ Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe p̄iratase ipāhuve: ‘Che aroya ava ocuerayevira coiye. Sese che reraso pe rovai co pipe che recoãha āgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rãro āgua: “Eremondomira rumo que mbahe semimbotar apo āgua chupe iyavei imboripar yugüeruse, tihañecoño yuvireco sese. Ëgüe ere sãro” ehi Félix sãrosar upe.

²⁴ Moviro ari pare Félix viroyepota güembireco Drusila, ahe judía avei. Ahe Félix güeru uca Pablo, osendu pota ñehe Jesucristo reroyasa resendar yuvireco. ²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tüpa oporandura mbahe yande rembiapogüer rese yandeu ari cañise coiye” ehise, ahe Félix osiquiyepave aipo ehi Pablo upe:

—Esoño rane. Arecose ari nde ñehe rendu iri ñgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osë ñgua’ oya viña. Sese osáro pucu tēi. Iyavei setá oyupagüer güeru uca oyeupe oñemoñeta ñgua sese. ²⁷ Ñuvirío araviter pare rumo, Porcio Festo oi que Félix recuñara. Ahe Félix judío mbovîha ñgua, osey Pablo soquendasave.

25

Festo rovai Pablo imondosa

¹ Mbosapi ari oyepotare Festo osë Cesarea sui, oso Jerusalén ve. ² Aheve oyepotase, pahî rerecuareta, judío rerecuareta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohava oreu” ehi yuvireco ‘yayuca perî rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbîa rembiapo, aheve to-mombehu yuvireco cheu sembiapocueraî sereco mara ñgua —ehi Festo chupe.

⁶ Evocoyase Festo opîta Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayîhive oguapi güendave ava reco moingatu ñgua oî. Aheve oyocuai Pablo reru ñgua. ⁷ Oyepotase Pablo oso, aheve judío yugüeru vahe Festo rupi, oyemboya yuvireco sese. Aheve omombehu-mbehu tēi Festo upe Pablo rembiapo yuvireco, ndoicatui eté rumo seroya uca ñgua yuvireco. ⁸ Esepia, Pablo aipo ehi oyoepîsave:

—Ndayemboangaipai judío porocuita rese, judío tûparo rese, yande rerecuar guasu Roma pendar Cesar rese avei —ehi.

⁹ Festo rumo ombovîha pota judío, sese oporandu Pablo upe:

—¿Ndequerēhi vo Jerusalén ve ereso vaheerã? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeve chupe:

—Cûritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—. ¹¹ Ayapose que mbahe naporai vahe, aviyeño che yuca uca ñgua eve; ndayapoise rumo co judío omombehu vahe yuvireco ndeu, ndiyai che mondo ñgua evocoi ava povrîve eve. Che rumo aso pota mborerecuar Cesar îvate catu vahe upe cheu mbahe rese porandu ñgua —ehi.

¹² Aheve Festo oñemoñeta opîtivîisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo ñgua Festo upe yuvireco. ¹⁴ Opîtase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeî mbîa soquendapri osey vahe Félix cheu —ehi—. ¹⁵ Asose Jerusalén ve, judío pahî rerecuareta, tecua pendar rerecuareta avei omombehu yuvireco cheu secocueraî, ‘Tayucasa, tehi chupe’ oya yuvireco viña —ehi—. ¹⁶ Aheve aipo ahe yuvireco chupe: “Ndiyai eté romano mborerecuar omondo vaheerã que ava uve sese oñemoñeta

vahe rese mbahe moingatuēhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohawe yuvireco, aporandu voi pota secocuer rese chupe. Evocoiyase ñepeí ari pare aguapi che rendave porandusave. Ahese ayocuai che pítiviisar evocoi mbia reru água —ehi—. ¹⁸ Evocoiyase opūha sese oñemoñeta vahe sembiapo ai mombehu água. Asendu renondeve che pihañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—. ¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu água ndeu?” ahe chupe —ehi—. ²¹ Pablo rumo oporandu cheu Cesar upe oso água. Oipota mborerecuar ivate catu vahe oyeupe mbahe güembiapo rese porandu água. Sese asoquenda ucaño vite sereco imondo água Cesar upe —ehi Agripa upe.

²² Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opítiviisar Pablo reru água yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohawe Cesarea ve. Osapucái pīrata tēi yuvireco ‘jtomano ité evocoi!’ oya yuvireco cheu —ehi—. ²⁵ Ndayosui rumo mbahe sembiapo yuca uca água iyavei oporandu oso água mborerecuar ivate catu vahe Cesar upe. Sese che ayemoingatu ité imondo água chupe. ²⁶ Ndarecoi rumo mbahe naporai vahe aicuachía vaherã imondo água chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—. ²⁷ Chepīhañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe água aipo ehi: ² “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai. ³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteēhisendar

⁴ “Opacatu judío che cua vahe yuvireco, oicua tupri che recocuer che chīhivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cūritei che reru nde rovai yuvireco che recocuer rese nde porandu água. Esepia, aroya Tūpa remimombehugüer ore ramoi uve omombehu vahe aracahe” ehi. ⁷ “Doce ore ramoi suindar opacatu judío yuvirecoi, osãro vite evocoi Tūpa remimombehugüer aviye vahe yuvireco. Sese yuviroique tūparove ari, pītu pipe avei Tūpa mboetei água yuvireco. Ore rerecuar Agripa, eyapisaca tupri che

ñehe rese. Evocoi Tūpa remimombehugüer reroyasa sui judío eta semira-mira tēi che amotarēhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tūpa porombogüerayevisa?” ehi.

Pablo omombehu yipindar Jesús reroyasar amotarēhi agüer

⁹ “Yipindar che avei che pihañemoñeta rai aracaco mbahe tēi apo āgua rese ava Jesús, Nazaret pendar, rer amotarēhisave. ¹⁰ Ēgüe ahe Jerusalén ve. Ombouse pahí rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ēgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

¹² “Evocoiyase aso avei Damasco ve Jesús reroyasar mombaraisu āgua, pahí rerecuar ombouse oporocuita apo āgua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei. ¹⁴ Orovipipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu. ¹⁵ Evocoiyase amboyeví: ‘¿Ava vo nde ereico, mbía?’ ahe chupe. Omboyeví cheu: ‘Che Jesús aico, che niha co che amotarēhi eve. ¹⁶ Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaherā chupe curi, viya ndeu’ ehi. ¹⁷ ‘Oropisírora judío sui iyavei oromondora ava ndahei vahe judío upe. Ereguatase ipāhuve, oropisíro aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipipe sui toyuvireco iri eme carugar povrive yuvireco; toguata catu Tūpa rupi; ēgüe tēi che reroya yuvireco. Ahese oipisíra ñeroisa oangaipa rese yuvireco iyavei oipisíra Tūpa porerecosa oime vaherā opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoiyase, che rerecuar Agripa, che quer nungarve asepia vahe íva pendar, aroya ité. ²⁰ Aipo ahe ava upe: ‘Pemboasi pe angaipa; peyeví Tūpa upe. Peicove tupri, ipipe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tēi judío che pisi tūparo pipe che yuca pota yuvireco” ehi. ²² “Tūpa che pītivísa pipe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, ‘Oimera mbahe aviye vahe’ ihe agüer sui. ²³ Aracahe omombehu yuvireco: ‘Tūpa Rembiporavo Poropisírosar omano ranera’ ehi. Ahe rumo yipindar ocuerayeví vaherā omano vahe pāhu sui. Omombehu aveira tesapesa ñepisírosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyeví chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—. ²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu

ãgua chupe. Esepia, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoi Tūpa ñehe mombehúsar rembicuachía? Che aicua ereroya ité —ehi Agripa upe.

²⁸ Ahese Agripa omboyeví chupe:

—Moviro tēi ñehesa ipane cheu Jesús reroya ãgua —ehi chupe.

²⁹ Ahe omboyeví Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ãgüe ehi tarahu Tūpa pēu viña che nungar pe reco ãgua. Ndahei chira rumo soquendapirã peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirã; ndiyai avei soquendapirã viña —ehi yuvireco oyeupe.

³² Ahese Agripa aipo ehi:

—Ahe ndoporanduisse Cesar upe oso ãgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoyase mborerecuar opihañemoñeta omboyoya yuvireco ore mondo ãgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehí rerecuar secoi, ahe yuvirecoi vahe rer Mborerecuar upendar. ² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saísupave Pablo upe aipo ehi: “Eguata tupri nde mboripar rēta rupi nde rese ihañeco tupri ãgua yuvireco” ehi chupe. ⁴ Sidón sui orosirise, oroso Chipre ivi rupi ivitu sui ore ñemoha ãgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui. ⁵ Evocoyase oroguata para guasu pipe Cilicia, Panfilia ivi rupi. Ipore oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vahe rã Italia ve. Evocoyase ahe ipipe opa voi ore mboha. ⁷ Ichui oroguata mbegüe setá ari. Oroporaviquí iteanga oreypota ãgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ëgüe orohe oroso Creta cupe rupi. ⁸ Supi yavai rai ore guata ãgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota ãgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite ãgua. Yaguata vites, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. ¹² Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivi rupi.

¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti

sui. ¹⁵ Oyepotase oreu, ndoroicatu iri eté sovañchi. Evocoyase, “Tayande rerasoño” orohe chupe. ¹⁶ Oroñoocua caha pãhumi serer Cauda. Ahe oroñoocuasave oroviroha sã ore caritemi ore carite guasu pipe. ¹⁷ Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiëtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguataño. ¹⁸ Ivitu rumo ombohitú iteanga para guasu. Sese ahese ayihive oporaviqui vahe omboipi carite vosiita mombo yuvireco. ¹⁹ Imombosapisa ari pipe, omombo vite mbahe carite resendar yuvireco. ²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihanemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya voira peye viña, nayasēise Creta sui, ahese ndipoi chira co mbahe yandeu cūritei viña —ehi—. ²² Cūritei, peyemonguerēhi catuño. Esepia, ndipoi chira yande pãhu pendar omano vahe, carite güeraño rumo ocañi tēira. ²³ Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. ²⁴ Ahe aipo ehi cheu: “Pablo, eresiquiyeyi rene. Ereyepotaño itera Cesar upe. Tūpa oipisiro aveira opacatu nde rupindar carite pipendar” ehi cheu. ²⁵ Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—. ²⁶ Yande mohañira rumo imbehi coti caha pãhumi rese yande mondo —ehi.

²⁷ Ñuvirío semana ivitu ore reroguata pare ahe pĩtu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osãha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osãha iri, tipigüer veintisiete metros tēi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. ³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cõhe ramose Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pĩha co yaico?’ pe hesa pipe. ³⁴ Evocoyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu ãgua. Ahe imbohi pare, ohu. ³⁶ Evocoyase opacatu ava oyemonguerēhi yuvireco ocaru ãgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosiita para guasu pipe iposiēhi ãgua yuvireco.

Carite ocañi

³⁹ Cõhese, osepiase ivi, “¿Que pĩha yaico?” ehi tēi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tēi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yãcua vahe pipe. ⁴¹ Oroguatase rumo, oroyapi ivi cuhi. Aheve carite opãha ité sese. Ndoicatu eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiëtera, oñemi yuvireco. Sese yayucapa” ehi yuvireco chupe viña. ⁴³ Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane

toyuvirocui ive, toyuvínose ivi rese yuvireco” ehi. ⁴⁴“Ambuae evocoyase ivirape, carite yecacuer rese toyasecoño yuvínose água ivi rese” ehi. Ēgüe orohe orosēpa ivi rese oroso.

28

Caha pāhu Malta ve Pablo secoi

¹ Ore ñepisiropare, ahese ramo oroicua caha pāhu rer Malta revo rahe. ² Ahe pendar ava nihapisi ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyepemi” ehi yuvireco oreu. ³ Evocoyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraño ité. ⁶ Ahe pendar opacatu osāro tēi yuvireco, “Irirura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimaraño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rerecuar secoi. Ivi namombriimi ichui. Ahe nihapisi ore repia güetave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oique chupe. Ahese oyerocui Tūpa upe sese, omondo opo iharive. Ēgüe ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha água ambuae carite pipe, opacatu mbahe ore guatasa rupi ipanehi água güeru yuvireco oreu.

Pablo oyepota Roma ve

¹¹ Co carite mbosapi yasi osāro vahe ari mbahe tēi vahe pituhu água. Ipipe oroso. Ahe carite yugüeru Alejandría sui. Ahe ichi rese ñuvirío itūpa rahanga yuvireco: ñepi rer Cástor, ambuae evocoyase Pólux. ¹² Ahese oroso oroyepota yemboyasa Siracusa ve. Aheve oropita mbosapi ari. ¹³ Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güetave yuvireco ñepi semana. Ipare oroso Roma ve ivi rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda água yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao rerecuar co coti omondo Pablo ñepi sundao upe saro uca água.

Pablo omombehu Roma ve Tūpa Ñehengagüer

¹⁷ Mbosapi ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, narioi avei yande ramoi recocuer viña. Che roquendasa rumo iyavei imondopri aico Romano sundao rerecuar povrive. ¹⁸ Ahe mborerecuar oporandu che recocuer rese yuvireco. Oicuse che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca água yuvireco. ¹⁹ Evocoi judío rumo ndoipotaiño ité chupe. Ahese ayu pota cohava Cesar upe che yoepi água. Nayamotarēhi uca potai rumo che mu Jerusalén pendar Cesar upe —ehi—. ²⁰ Che yoepi água oposoho uca. Opomoñeta pota yande remiaro rese. Co Tūpa Rembiporavo ava pisiro água resendar reroyasa rese carena pipe ñapichimbri aico —ehi.

²¹ Ahese ahe ava omboyevi yuvireco chupe:

—Ndooripisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroïro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuaita icuachiapri pipe sui iyavei Tũpa ñehe mombehusar rembicuachía pipe avei ‘toviroya yuvireco’ oyapave. Ëgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihañemoñetasa nomboyoyaise yuvireco, yuvinosépa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramoi upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tẽira mbahe viña,

ndapesenducuai chira rumo.

Iyavei pesepia tẽira mbahe viña,

ndapemahecuai chira rumo sese’ ere chupe.

²⁷ Esepia, co ava ipiharátá iteanga seroyaẽhisave.

Ndoyemboapisaiño yuvireco.

Iyavei osapĩvii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoyase ndoyevi potai cheu güecocuer moingatú yuvireco” ehi Espiritu Santo remimombehu chupe aracahe —ehi—. ²⁸ Sese tapeicua co pipe suive Tũpa omboyecua ucara oporopĩsĩrosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvinosé iñehe rese oyeecopi-copi yuviraso.

³⁰ Ipare Pablo opita ambuae ava rêtave ñuvirío araviter rupi omboepi oque ãgua oico. Aheve nihapisii opacatu ava rese oyepiri oyepotase yepi. ³¹ Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyehisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropĩsirosa resendar mombehu água.

² Tüpa niha yipisuiwe omombehu uca co ñehesa ava oñehe mombehusar upe icuachi-apri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, ahese opĩratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopĩtivíisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui tovíroya che Rahir yuvireco' oya. ⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vaherã. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tupriisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espiritu suindar mbahecuasa mondo pëu pe pĩtivíi água 'toyemoviracua tupri catu Cristo rese yuvireco' che yapave. ¹² Che aipota ité yande ñepeipei yañepĩtivíi catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tẽisa pe piri yepi. Cũritei rumo ndaicatuiño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipãhuve" ahe pëu, inungar opacatu ambuae ivi rupi ãgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecuai vahe upe avei no. ¹⁵ Sese pe Roma ve peico vahe upe avei ayemonguerẽhi voi eté co ñehesa pĩsirosa resendar mombehu água.

Ñehesa pĩsirosa resendar pĩratasa

¹⁶ Che nachĩ eté co ñehesa pĩsirosa resendar aviye vahe sui. Esepia, ahe Tüpa pĩratasa opacatu viroyasar pĩsiro água, judío rane yipindar, ipare opacatu ambuae ava-ava tẽi avei. ¹⁷ Supi eté co ñehesa omboyecua Tüpa ava reco mbocatupriisa. Oyese yande yeroyasa pipeño ité ãgüe ehi yandeu. Esepia, icuachiapri arachendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirẽhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarẽhi upe, ndaseco põrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tẽi mbahe Tüpa suindar yuvireco. Esepia, Tüpa ité niha omboyecua chupe. ²⁰ ãgüe ehi eté Tüpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tüpa ité secoi iyavei ipĩratasa apirẽhi vahe. Sese ava angaipa viyar ndiyai, "Eñemosañõ tẽi

rane oreu” ehi vaheŕã yuvireco chupe. ²¹ Esepia, yepe ahe oicua tẽi Tũpa yuvireco viña, nomboetei rumo Tũpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ãgũe ehi tẽi vahe rese. Ipipe sui mbahe ndosenducua catu iri eté yuvireco. ²² Yepe, “Ore mbahecua vai” ehi tẽi viña, ndoicuai eté rumo mbahe ipipe yuvireco. ²³ Esepia, ahe Tũpa nomanoi vahe seco porañete vahe mboetei rãgũer sui, omboetei ava ocañi tẽi vaheŕã rahanga yuvireco iyavei vĩrai, opacatu mbahe mĩmba, mboi tẽi avei omboetei yuvireco.

²⁴ Sese Tũpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiẽhisa pipe yuvireco. ²⁵ Esepia, mbahe supi vahe reroya rãgũer sui temira tẽi viroya catu yuvireco. Iyavei Tũpa ité mboyeroya rãgũer sui omboetei catu mbahe sembiapocuer tẽi yuvireco. Yaposar ité ru timboeteisa catu yepi.

²⁶ Sese Tũpa opoi eté ichui, “Toyapoño poromochisa mbahe tẽi güemimbotarai pipe yuvireco” ehi chupe. Evocoyase cuña avei cuimbahe rese güeco rãgũer sui yuvirecoi oyese ae. ²⁷ Cuimbahe avei cuña rese güeco rãgũer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tũpa supi eté vahe” ndehise seroyaẽhisa pipe yuvireco, Tũpa evocoyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. ²⁹ Ahe evocoyase yuvirecoi opacatu mbahe-mbahe tẽi pipe; oyemboaguasaguasa tẽi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tẽi ava upe. Ahe oñemoiro ambuae ava mbahe pota raisave tẽi, oporapichi, ivava serai, iporombopa serai, ipihañemoñeta ava reco momara ãgua tẽi iyavei imahechiroi ai ipipe yuvireco. ³⁰ Iyavei ambuae ava cupe cotive mara ehi-ehi tẽi vahe, ahe Tũpa amotarẽhisar yuvirecoi, viroiro avei ava, oyemboivate ai, oyeecomboivate ai tẽi avei oñehe pipe yepi, oseca-seca tẽi mbahe naporai vahe güembiaporã, nomboyeroyai avei oyesupa yuvireco, ³¹ ndoyapisaca potai eté Tũpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua tẽi Tũpa “oimera evocoi nungar aposar upe cañisa” ehi vahe, oyapo viteño rumo mbahe tẽi yuvireco iyavei ambuae ava oyapose mbahe tẽi, ovihareteño sepiase yuvireco.

2

Tũpa omondo ava upe sembiapogũer rupi tupri ité

¹ Oimese que pe pãhu pendar ‘co oyapo mbahe tẽi; tocañi’ ohesave ambuae upe, ahese ahe ae oyemocañi tẽi uca. Esepia, ahe inungar tupri avei. ² Yaicua rumo Tũpa omocañise evocoi nungar mbahe tẽi aposar recocuer, ahe evocoyase oyapo mbahe supi tupri vahe. ³ Pe opase ava recocuer pesenoi, pe avei rumo ãgũe peye tupri peico. Pe avei eté evocoyase ndapeñemi chietera Tũpa ñemoirosa sui. ⁴ ¿Peroiro tie Tũpa oyapo vitesese mbahe aviye vahe oñemosase, seco mbegũe tupri ai vitesese avei pẽu? ‘Tosecuñaro güecocuer yuvireco’ oyapave rumo ãgũe ehi pẽu. ⁵ Pe rumo pepiharãta viteño ité Tũpa upe pe yevi potaẽhi ãgua. Sese pereco catu viteño ité Tũpa ñemoirosa peyese, acoi ari oyepotase Tũpa güeco tuprisa pipe yande renoipara yande mocañi ãgua, anise yande pĩsiro ãgua curi. ⁶ Ahese opara omboepi ñepeipei yande rembiapogũer rupi yandeu. ⁷ Omboura tecovesa apirẽhi vahe yandeu yasecase teco ori, Tũpa suindar poromboeteisa iyavei mbahe apirẽhi vahe yande mbahe tupri aposa pipe. ⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rãgũer sui viroya vahe mbahe tẽi. ⁹ Judío opacatu mbahe-mbahe tẽi aposar ranengatu oiporarara mbahe rasícuer yuvireco, iparera ndahei vahe avei judío. ¹⁰ Tũpa rumo opacatu seco catupri vahe upe omondora imboetei ãgua ‘toipisi teco ori iyavei toyuvirecoi mbahe

tupri pipe' oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoaviratii yande rereco. ¹² Ēgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiyé. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco. ¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaēhisa reprimi pisi āgua Jesucristo upe, co ñehesa pisirosa resendar amombehu vahecuer rupi tupri ēgüe ehira curi.

Ñehesa judío resendar, Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri āgua Tūpa rovaque viña. Iyavei ipipe peyecomboivate ai Tūpa rese peicose. ¹⁸ Peicua semimbotar. Ahe porocuita pe mbohe avei mbahe aviye catu vahe poravo āgua. ¹⁹ Pe, “Aicatu ité ndasesapiso vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi. ²⁰ “Aicatu avei ava mbahe ndosenducuai vahe mboaracua iyavei ava chīhivahemi nungar mbohe āgua. Esepia, areco co mborocuita vireco vahe opacatu mbahecuaa iyavei mbahe supi tupri vahe ité” peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? ²² Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. ²³ Peyecomboivate ai co mborocuita rerecosa rese; ndapemboetei rumo Tūpa ipipe ahe mborocuita mboaviyeēhi pipe. ²⁴ Supi eté icuachiapri arachendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tuprise rumo, pe evocoyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi āgua yuvireco. Esepia, yepe pereco Tūpa porocuita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ēgüe yahera. Iyavei circuncisión supi eté vahe ndahei yande retocuer rese güeraño tēi avei no. ²⁹ Judío ete ité rumo opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

3

¹ Evocoyase, ¿mbahe vo co aviye judío yande reco āgua? ¿Yande yembocircuncidasa piha aviye? ² Supi eté. Esepia, yipindar Tūpa omondo oñehe judío eta upe imboaviye āgua. ³ Amove yepe ipāhu pendar nombocircuncidase ocuita viña, ¿Tūpa avei tie ēgüe ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri arachendar pipe aipo ehi:

“ ‘Supi tupri vahe Tūpa’ ehira nde ñehe rese yuvireco.

Sese ereiqueese ava porandusave, eresẽ tupriñora eso ichui” ehi.

⁵ Yande reco rai pipe tẽi yamboyecuaese Tūpa reco tupriisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tẽi viña.) ⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri ãgua chupe viña.

⁷ Aviyeteramo oimera ava aipo ehi vahe: “Yande remira pipe sui tẽi ava omboetei catuse Tūpa supi eté vahe, ¿mahera pĩha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime ãgua” ehi. Amove ava, “Pablo ondugüer reseve aipo ehi eté oporombohe” ehi tupri tẽi yuvireco oreu. Aipo ehi tẽi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tẽi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tẽi pipe yuvireco, co coti tẽi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Ñehesa mbahe tẽi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tẽi vahe.

¹⁴ Ipipe oñehe rai opihavĩracuá iteangasa pipe yuvireco.

¹⁵ Ndayipitii oporapichi ãgua yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri ãgua yuvireco.

¹⁸ Ndipihañemoñetai eté Tūpa sui osiquiye ãgua yuvireco” ehi.

¹⁹ Yande niha opa yaicua opacatu co mbahe omombehu vahe mborocuaita aracahendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi ãgua yuvireco’ ohesave aipo ehi. ²⁰ Esepia, ndipoi chietera que ñepei seco aviye vahe Tūpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

Cristo rese yande yeroya pipe Tūpa yande pĩsirora

²¹⁻²² Cũritei rumo Tūpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri seci porocuaita aracahendar pipe, iñehe mombehusareta rembicuachi-agüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahir Cristo oipiyere vaherã vuvu yande angaipa rese ñero ãgua. Sese yande yeroya pipe oime ñeroisa yandeu. Ipipe omboyecua güeco ivi tupriisa. Yipisuive rumo güeco asiẽhisa pipe oñemosañõ aracahendar ava angaipa upe; cũritei rumo omboyecua ité güeco ivisa yandeu, seco iiviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai ãgua sovaque! Esepia, ndahei porocuita mboaviye rese êgüe ehi, ahe rumo Cristo rese yande yeroya pipe êgüe ehi yandeu. ²⁸ Sese yaicua Tũpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuita mboaviyesa sui tẽi.

²⁹ ¡Tũpa niha opacatu ité ava Tũpa, ndahei ore judío oroico vahe Tũpa güeraño! ³⁰ ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Êgüe ehi tẽi vahe” yahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita êgüe ndehi tẽi vahe.

4

Abraham recocuer sui yembohesa

¹ Iyavei, ¿mara ehi pĩha yande ramoi Abraham recocuer aracahe? ² Acoi mbahe güembiapo pipe sui tẽi oipisise güeco tupri ãgua Tũpa sui, oyemboivate aira oico ipipe viña. Ndiyai eté rumo êgüe ehi Tũpa rovaque. ³ Esepia, icuachiapri arachendar pipe aipo ehi: “Abraham oyeroya ité Tũpa rese. Sese Tũpa, ‘Co seco catupri vahe’ ehi chupe” ehi. ⁴ Co rumo yande yayapose mboraviqui, ahe yaipisi vahe ndahei porerecosa tẽi, ahe rumo mboraviqui repri ité yaipisi. ⁵ Yande rumo, yayeroyase Tũpa rese, Tũpa evocoyase yande pisira, ‘co seco catupri vahe’ ohesave. Esepia, ahe êgüe ehi vahe ité oyese oyeroya vahe upe, yepe ndoyapo chira mbahe aviye vahe chupe viña. ⁶ David mborerecuar arachendar avei oñehe ava rorivetesese rese Tũpa seco catupri vahe nungar pisisa rese. Ahe rumo ndahei mbahe sembiapogüer rese tẽi oipisi. ⁷ Ahe aipo ehi aracahe:

“¡Sorivete acoi ava Tũpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tũpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tũpa, “Co seco catupri vahe secoi” ehi Abraham upe oyese iyeroyasa rese. ¹⁰ ¿Marase pĩha oipisi oyeupe nara sereco? ¿Oyembocircuncida renondeve pĩha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvireco” ehi Tũpa chupe. Sese imbocircuncidapri secoi. Êgüe ehi Abraham opacatu ava oyeroya vahe Tũpa rese, ndoyembocircuncidai vahe yesupa nungar secoi. Êgüe ehi Tũpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tũpa rese oyeroya vahe yesupa avei secoi. Abraham rumo oyeroya vahe Tũpa rese ndoyembocircuncida viteiseve.

Tũpa remimombehu imboaviyesara sese yeroyasa pipe

¹³ Esepia, aracahe Tũpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe êgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroyasar güeraño oipisise co mbahe oime vaherã chupe viña, evocoyase yande yeroyasa Tũpa rese êgüe ehi tẽi etera, Tũpa remimombehugüer evocoyase êgüe ehi tẽi vahe aveira viña no. ¹⁵ Esepia, co mborocuita mboaviyeẽhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaẽhisa.

¹⁶ Sese mbahe Tũpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tũpa rese oyeroya vahe upe nara. Evocoyase ahe opacatu yande ramoi secoi. ¹⁷ Icuachiapri arachendar pipe aipo ehi: “Orombou ava eta ivi rupindar

ramoirã” ehi. Co Tũpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya ãgua viña, Abraham rumo oyeroya ité Tũpa oyeupe ñehesa rese; sese ava eta ivi rupindar ramoi eté secoi Tũpa ñehes: “Setá oimera ava nde suindar” ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi ãgua yuvireco viña. ²⁰ Ndopoi eté Tũpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tũpa vireco opiratasa opacatu oñehengagüer mboaviye ãgua” ehiño ité opiha pipe. ²² Sese Tũpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri secoi yande angaipa repirã. Ipare Tũpa ombogüerayevi yande pisi ãgua seco catupri vahe nungar oyeupe.

5

Tũpa, “Peyavi mbahe” ndehi iri

¹ Sese yaico mbahe tupri pipe Tũpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tũpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tũpa piri yande reco ãgua imborerecuasave. ³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosã ãgua, ⁴ iyavei yañemosañose, yasẽ tupri yande recoãhasa sui, ahese yaicua yaipisi vahe rã mbahe aviye vahe Tũpa suindar yepi. ⁵ Iyavei ahe yande remiaro nayamoha tẽi chira sereco. Esepia, Tũpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro ãgua yande recocuera sui, Cristo rumo opacatu ari chupe, omano opacatu yande angaipa rese. ⁷ Aviyeteramo oimera que ñepeí ava omano vahe rã ambuae ava aviye vahe upe nara; yepe que ava recocuera supi eté aviye aira viña, seni rumo ndipoi eté que ava, “Che tamano sepirã” ehi vahe rã chupe. ⁸ Yepe yande angaipa viyar yaico yipindar, Tũpa rumo omboyecua yande raisusa; ombou Cristo imano ãgua yande angaipa repirã. ⁹ Ipipe sui cõritei, “Peyavi mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarẽhimbar yaico viteise, ahe Guahir manosa pipe sui yande reroyevi iri oyeupe mbahe tupri pipe; ocuereyevisa pipe evocoyase oicatu ité yande pisi. ¹¹ Ndahei co reseño ãgüe yahera, yaviha catu aveira Tũpa rese, yande Yar Jesucristo rese avei. Ichui niha ndipo iri mbahe Tũpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. ¹³ Ndipo viteise Moisés porocuaíta, oime voi eté angaipa co ivi pipe. Yepe tie ndicuasa vitei angaipa porocuaíta ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. ãgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaíta mboaviyeẽhisa resendar rese viña. Ahe Adán rese omboyecua mbia ou vahe rã.

¹⁵ Tũpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tũpa ombou oporecosa poropisirosa yandeu. Ahe rumo aviye catu vahe ava eta upe nara. ¹⁶ Ahe ñepeí ava angaipa rumo ndoyoyai eté Tũpa poropisirosa ombou vahe rese yandeu.

Esepia, ñepei ava angaipa sui ou Tũpa ñemoirosa; oporerecosa rumo Tũpa ombouño ité ava eta mbahe oyavi ati vahe upe nara yangaipa mocañi ãgua. ¹⁷ Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipĩrata catu vahe ichui, ahe Tũpa porovasasa tuvichá vahe ité iyavei iporerecosa, “Peyavi mbahe” iheẽhisa resendar. Sese yareco ité tecovesa apirẽhi vahe yandeyeupe nara ñepei ava sui, ahe Jesucristo.

¹⁸ Evocoyase inungar Adán rembiapo ai güeru Tũpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tũpa ñemoirosa pisiẽhi ãgua ‘tovireco tecovesa apirẽhi yuvireco’ oya. ¹⁹ Esepia, ñepei ava Tũpa reroyaẽhisa sui setá oime ava angaipa viyar; ãgüe ehi aveira ñepei ava mboyeroyasa sui setá aveira ava vireco güeco catuprisa Tũpa rese yuvireco.

²⁰ Supi eté porocuita ouse aracahe, ahese angaipa yaposa catu ité. Yepe ãgüe ehi viña, Tũpa porovasasa rumo ivate catu ité ichui. ²¹ Evocoyase inungar angaipa ipĩrata yandeu yande mano ãgua viña, ãgüe ehi avei rumo Tũpa oporovasasa ipĩrata vahe pipe yande pisi seco catupri vahe nungar yande rereco ‘toipisi tecovesa apirẽhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pĩha yayapo vite angaipa yaico Tũpa yandeu oporovasasa mboyecua catu ãgua? ² ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pipe, ndoyavi yamano vahe ité sese? ⁴ Yande ñeapiramose, aviye acoi ñotimbri yaico Cristo rupive yande mbogüerayevi iri ãgua iyavei yande recocuer mopiasu ãgua avei, inungar acoi Cristo ocuerayevi Vu reco pĩratasa pipe.

⁵ Yande omano vahe nungar yaicose supive, ãgüe yahe aveira yande yacuerayevi supi. ⁶ Yaicua avei niha yipĩndar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tẽi nungar yande recoẽhi ãgua. ⁷ Esepia, acoi omano vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoyase yayeroya avei yaicove vaherã sese. ⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi ãgua; cũritei rumo oicove Tũpa upe nara. ¹¹ ãgüe peye avei pe, “Che omano vahe nungar aico angaipa upe” peyera; “Che rumo Tũpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pĩratasavrive pe cuai ãgua pe remimbotarai mboyeroyasa pipe. ¹³ Aní peyemondo angaipa upe mbahe tẽi apo ãgua. Peyemondo catu Tũpa upe. Esepia, pe inungar ava ocuerayevi iri vahe peico. Sese peyemondo tupri ité Tũpa upe mbahe tupri apo ãgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tũpa porovasasa pipe peico.

Yembohesa mbiguai tẽi recocuer sui

¹⁵ Ndayaico iri mborocuita pipe tẽi, yaico rumo Tũpa porovasasa pipe. Evocoyase, ¿“Tayapo vite angaipa” yahera pĩha? ¡Aní chietera! ¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Caruguar angaipa apo ãgua, ahe evocoyase pe reco mocañi tẽira. Tũpa pemboyeroyase rumo, ahe evocoyase pe reco mohivira. ¹⁷ Aviye Tũpa upe. Esepia, pe yipĩndar mbiguai tẽi nungar peico angaipa pipe viña, cũritei rumo pemboyeroya pe pihave ité prombohesa peipisi vahe. ¹⁸ Ñepei reseve pe angaipa sui Tũpa pe renosese, pe evocoyase mbiguai nungar mbahe supi tupri vahe apo ãgua peico. ¹⁹ (Che amboyoya tecocuer mbahe co ivi pipendar rese

imombehu p̄eu. Esepia, yavai vite ité p̄eu co ñehesa renducua tupri ãgua.) Yipindar pe retecuer pereco mbahe t̄ei pipe mbahe naporai vahe apo ãgua. Ēgüe peye rumo pe cūritei pe reco mohivi ãgua peico mbahe tupri pipe ñepei reseve Tūpa upe pe reco ãgua.

²⁰ Pe peico v̄itese mbiguai t̄ei nungar pe angaipa pipe, ahese ndapeyapo vitei mbahe supi tupri vahe; ²¹ cūritei rumo pechĩ t̄ei ichui, ahe niha ndape p̄itivii eté pe recocuer rese, iyavei pe reraso pota manosa apir̄ehi vahesave yepi. ²² Cūritei rumo angaipa sui senosepri peico Tūpa povrive pe reco ãgua. Ichui mbahe tupri oime p̄eu. Ahe niha ombou oyeupe nara ité pe reco tupri ãgua. Ipipe sui peicora apir̄ehi vaherã. ²³ Angaipa niha ombou manosa t̄ei yandeu, Tūpa rumo oporerecosa ombou tecovesa apir̄ehi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuaita, peicua avei ahe porocuaita povriveño ité opacatu yaico yaicove v̄itese co ivi pipe. ² Esepia, inungar cuña omenda vahe, imer oicove v̄itese, iporocuaitavrive viteño ité secoi yepi. Omanose rumo imer ichui, ahe cuña ndahe iri omer porocuaitavrive secoi. ³ Acoi cuña omer recove v̄iteseve, v̄irecose ambuae cuimbahe, oyemboaguasa t̄ei evocoyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa t̄ei cute.

⁴ Che rivireta, pe niha Ēgüe peye avei Cristo rese peico vahe; Cristo manosa sui ndahe iri Moisés porocuaitavrive peico Cristo rese peico ãgua. Ahe niha acoi ocuerayevi vahe. Sese yande recocuer Ēgüe ndehi t̄ei vahe Tūpa upe. ⁵ Esepia, yande yaicove v̄itese yande reco ai pipe, ahe porocuaita renduse, yaipota catu mbahe t̄ei pipe yande reco ãgua. Ipare rumo ahe manosave t̄ei yande reraso ucara viña. ⁶ Cūritei rumo yande omano vahe nungar yaico acoi porocuaita pipe yaico vahecuer sui. Ēgüe yahe, yasē ichui Tūpa upe mbahe apo ãgua Espiritu sui yande reco piasu pipe. Ndahe iri mborocuaita icuachiapri yipindar vahe pipe yaico.

Angaipa oime vahe yande rese

⁷ ¿“Tūpa porocuaita angaipa” yahera p̄iha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaita pipe, ahese ndaicuai chaveira che mbahe pota raisa viña. ⁸ Aicuase mborocuaita, ahese angaipa ipirata catu cheu. Ahe mborocuaita apo potaēhisa pipe che quer̄ehi catu opacatu che remimbotarai t̄ei apo ãgua. Esepia, mborocuaita por̄ehi angaipa av̄iye ndipoi vahe viña. ⁹ Yipindar Tūpa porocuaita ndaicua viteise, ndoyav̄ii av̄iye vahe ité che reco areco viña. Porocuaita aicuase rumo, aipota rai angaipa apo ãgua. ¹⁰ Che evocoyase acañi t̄ei vaherã aico ipipe viña. Ahe porocuaita che recove apir̄ehi ãgua mbou rāgüer sui, che mondo ucaño itera manosa apir̄ehi vahe pipe t̄ei viña. ¹¹ Esepia, angaipa ahe porocuaita pipe che mbopa ité. Ahe ipipe avei che mocañi t̄eira viña.

¹² Evocoyase co porocuaita ndaseco marai vahe ité, supi tupri vahe ité, av̄iye vahe avei. ¹³ ¿Co porocuaita av̄iye vahe p̄iha che rereco che mano ãgua t̄ei? ¡Aní eté! Angaipa t̄ei rumo Ēgüe ehi che rereco. Evocoyase co porocuaita cuasa sui oipota catu uca mbahe t̄ei apo ãgua cheu. Ipipe aicua angaipa oime vahe che rese. Ēgüe ehi avei ahe porocuaita omboyecua tupri ité angaipa mbahe t̄ei vahe yandeu.

¹⁴ Yaicua niha porocuaita Tūpa suindar, che t̄ei rumo imondopri aico angaipa mboyeroya ãgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotar̄ehi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaita av̄iye vahe.

¹⁷ Evocoiyase ndahei cheyesui eté ãgüe ahe, angaipa tãi rumo ãgüe ehi che mbohe uca. ¹⁸⁻¹⁹ Esepia, che aicua ndipoi eté mbahe avïye vahe che reco ai rese; sese yepe che ayapo pota ité mbahe avïye vahe viña, ndaicatui eté rumo yapo. Iyavei yepe ndayapo potai mbahe tãi viña, che rumo ayapoño ité. ²⁰ Sese ayapo vïteño itese mbahe ndayapo potai vahe, ndahei rumo che ité ayapo, che pïha pïpe angaipa oime vahe, ahe tãi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe avïye vahe yepi viña, ahe rumo oyapo uca pota voïño ité mbahe naporai vahe cheu yepi. ²² Che pïha pïpe rumo Tũpa porocuita aipotá iteanga tãi, ²³ che rumo aicua che pïha pïpe oime ambuae mbahe, mbahe tupri apo potaẽhisar cheu, ahe angaipa tãi oime vahe che rese. Ahe mbiguai nungar tãi che rereco.

²⁴ “¡Che paraisu ité!, ndaicatu iri eté, ¿uma pïha co mbahe tãi sui che renosera viña?” ahe cheyeupe vichico. ²⁵ Tũpaño ité oicatu Guahïr Jesucristo rese. “Avïye” yande Ru Tũpa upe. ãgüe ehi ahese mbahe cheu; Tũpa porocuita amboavïye pota viña, che remimbotarai tãi rumo che rereco uca angaipa povrive.

8

Yaico vaherã Tũpa Espïritu rese

¹ Cũritei rumo ndipo iri Tũpa ñemoïrosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espïritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicatui Moisés porocuita mboyeroya ãgua, ahe avei evocoiyase ndoicatui eté yande reco moingatu. Tũpa rumo oicatuño ité. Esepia, Guahïr ombou yande nungar tupri ité ‘toyemondo ava angaipa repirã’ oya. ãgüe ehi imocañi opacatu yande angaipa yande sui, yande remimbotarai avei. ⁴ Ahe ãgüe ehi yande yamboavïye vaherã mborocuita. Esepia, ndayaico iri yande remimbotar tãi pïpe. Yaico rumo Espïritu avïye vahe rese.

⁵ Esepia, acoi yuvirecoi vahe rumo güemimbotar tãi pïpe, güecocuerei reseño tãi ipihañemoñeta yuvireco; Espïritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tãi ipihañemoñeta vahe, ahe omano itera apirẽhi yuvireco. Ipihañemoñeta vahe rumo Espïritu suindar mbahe rese, virecora tecovesa apirẽhi vahe mbahe tupri pïpe yuvireco. ⁷ Esepia, acoi güecocuerei reseño tãi ipihañemoñeta vahe, ahe Tũpa amotarẽhimbar yuvirecoi. Ndoipotai eté iyavei ndoicatui Tũpa porocuita mboyeroya ãgua yuvireco. ⁸ ãgüe ehi eté, acoi yuvirecoi vahe güemimbotarai pïpe, ndoicatui eté Tũpa remimbotar apo ãgua yuvireco.

⁹ Pe rumo ndapeico iri pe remimbotarai pïpe. Peico rumo Tũpa Espïritu rese, ahe perecose peyese. Acoi ndovirecoi vahe rumo Espïritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tãi vaherã angaipa sui viña, pe espïritu rumo oicoveño ité. Esepia, Tũpa, “Peyavi mbahe” ndehi iri pẽu. ¹¹ Acoi Tũpa Espïritu secoise pe rese, Tũpa evocoiyase omondora tecovesa pïasu pe retecuer upe oEspïritu pe rese secoi vahe pïratasa pïpe. Esepia niha, ipipe ité ombogüerayevi Guahïr Jesucristo.

¹² ãgüe ehi che rivireta, yareco yande cuaita, ndahei rumo yande remimbotarai pïpe yande reco ãgua. ¹³ Esepia, pe peicoño itese pe remimbotarai pïpe, ahese pecañi tãira; pemombopase rumo Espïritu pïpe peyesui, ahese peicovera apirẽhi vaherã.

¹⁴ Esepia, opacatu Tũpa Espïritu ombohe vahe, Tũpa rahir ité yuvirecoi. ¹⁵ Supi eté pe Espïritu peipisi vahe ndapembosiquiye uca iri pe rereco, ahe rumo pemoingo Tũpa rahir ité pe reco ãgua. Ahe avei, “¡Che Ru!” pe mbohe uca chupe. ¹⁶ Co Espïritu avei oicua uca yande espïritu upe Tũpa rahir yande recose. ¹⁷ Evocoiyase yaipisi aveira mbahe yande

Ru Tūpa ombou vaherã yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaherã teco porañetesa ipiri curi.

Teco porañetesa ou vaherã curi

¹⁸ Cūritei rumo yande paraisusa ndoyoyai eté teco porañetesa yande rese ou vaherã rese. ¹⁹ Opacatu Tūpa rembiapocuer osãro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese. ²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osãroño ité ²¹ güeco opa tēi vaherã sui ñepisiro āgua teco porañete vahe Tūpa rahir vireco vahe rupiti āgua curi. ²² Yande niha yaicua aracahe suive opacatu mbahe Tūpa rembiapo oiporara mbahe rasi cuer yuvireco cuña imembi rasi vahe nungar. ²³ Ndahei rumo ahe güeraño ēgüe ehi yuvireco, yande avei ēgüe vahe. Yande yareco ité Espiritu, ahe yipindar vahe yaipisi vaherã ichui curi. Yayemombaraisu, yasãro vite yande querēhisa pipe Tūpa guahir ité yande rereco āgua, yande retecuer recuñaro āgua avei. ²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasãro iri. Ndipoi ava osãro vite tēi vahe mbahe güembiepia. ²⁵ Acoi mbahe yande remiaro ndayasepia viteise rumo, yasãro vite yande ñemosasa pipe sereco.

²⁶ Ēgüe ehi avei Espiritu yande p̄tivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pipe. ²⁷ Iyavei Tūpa, ahe oicua vahe opacatu yande p̄hañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave. ²⁹ Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara vahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! ³² Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande p̄tivii āgua Tahir rese yande recose. ³³⁻³⁴ Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirã, iyavei ocuerayevise. Cūritei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe p̄ha yande mboyepipira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarã ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca āgua yuvireco ndeundar yaicose, ovesa yucapirã nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove viteise. Ndayande mboyepipi chiaveira ichui que Tūpa rembiguai, que seco ivate vahe, seco p̄rata vahe ndayasepiyai vahe, que cūritei mbahe oime vahe yandeu, anise que mbahe oime vaherã curi. ³⁹ ¡Ndayande mboyepipi chiaveira que iva pendar mbahe, anise que mbahe ivi

p̄ipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer p̄ipe yandeu!

9

Tūpa oiporavo Israel oyeupe nara arácahe

¹ Che Cristo reroyasar che reco p̄ipe supi eté añehe, ndopombopai. Tūpa Espiritu oicua ité che p̄ihañemoñetasa supi vahe. ² Ndavihai eté che p̄iha p̄ipe; oime mbahe tasi vahe cheu yepi. ³ Che aipota t̄ei opacatu che mu judío ñepisiro ãgua yuvireco viña. “Tacañi t̄ei Cristo por̄ehi icañi t̄eiñi ãgua yuvireco” ahera viña. ⁴ Ahe niha Israel suindar yuvirecoi, aracahe Tūpa oiporavo vahe guahirguã. Ahe ip̄ahuve avei secoi güendigüer porañetesa p̄ipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa p̄ipe che r̄etave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramo i yip̄indar vahe suindar yuvirecoi, Tūpa Rembiporavo Porop̄isrosar avei ahe ichuindar oyesu vahe. Ahe Porop̄isrosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ëgüe tehi apir̄ehi!

⁶ “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembi c̄oi, ahe ic̄oi vahe yesupa rumo ñepeño ité. ¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yip̄indar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asāisu ité Jacob, Esaú rumo ayamotar̄ehi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese p̄iha Tūpa upe, “Ndaseco tupri vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparāisuerecora ava, asāisu aveira che remimbotar rupi” ehi. ¹⁶ Supi eté ndahei yande remimbotar rupi t̄ei, ndahei avei yande p̄iratasa rupi Tūpa oyapo mbahe; ahe rumo oporoparāisuerecosa p̄ipe mbahe oyapo yandeu. ¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco ãgua che p̄iratasa mboyecua ãgua nde sui, che rer mboetei ãgua avei opacatu ava upe co ivi p̄ipe” ehi. ¹⁸ Ëgüe ehi oporoparāisuereco güemimbotar rupi. Güemimbotar rupi avei omboavai viroya ãgua ava upe.

¹⁹ Aviyeteramo oimera que amove pe p̄ahu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he ãgua yandeu. Esepia, ndipoi eté niha ava, ‘¡Aní!’ ehi vaherã Tūpa remimbotar upe” ehira. ²⁰ “Ndiyai eté rumo Tūpa poepi ãgua ndeu” ahera aipo ehi vahe upe. Inungar ñāihu mbahemoinda ndiyai, “¿Mahera che apo rai t̄ei eve?” ihe ãgua oaposar upe. ²¹ Ñāihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirã t̄ei apo ãgua.

²² Tūpa rumo oñemosa pare iya ité oñemoirora, op̄iratasa mboyecua ãgua ocañi t̄ei vaherã upe. ²³ Ëgüe ehi avei yapo güemimbotar rupi güeco porañetesa ivate vahe mboyecua ãgua yandeu. Esepia, yande parāisuereco iyavei yip̄isuive teco ori porañetesa omoingatu yandeu aheve yande reique ãgua. ²⁴ Yande avei yande renoi oyeupe, que

judío, anise que ndahei vahe judío yande recose. ²⁵ Esepia, Oseas rembicuachiagüer pïpe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saïsupri yuvirecoi, chupe, ‘Che rembiaïsu ité’ ahera” ehi.

²⁶ “ ‘Pe ndahei vahe cheundar peico’ ehi vahesave, ahe chupe, ‘Tũpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisirova yuvireco. ²⁸ Esepia, yande Yar omboaviye voira oñehe ava viroyasarēhi mocañi ãgua co ivi pïpe” ehi. ²⁹ Oyoya avei ambuae Isaías remimombehugüer yipindar vahe rese:

“Yande Yar seco pĩrata catu vahe noipĩsiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pĩsirosa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroyasa pïpe rumo vireco ité güeco catupriisa Tũpa rovaque. ³¹ Judío yuvirecoi vahe rumo oipota tēi güeco tupri ãgua ité Tũpa porocuita mboyeroya pïpe viña, ndoicatu eté rumo supiti yuvireco. ³² Esepia niha, ndahei oyeroyasa pïpe ité oseca oñepisiro ãgua, ahe rumo co mborocuita mboyeroya sui tēi Tũpa rese yuvirecoi pota viña. Ahe evocoyase ndoyavi oyepiapi vahe “ita yepiapis” rese yuvireco. ³³ Aipo ehi tupri icuachiapri arachendar pïpe:

“Che amondo Sión ve ñepe ita yepiapis, ahe oporoeti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pïpe ité iyavei ayerure Tũpa upe che mu judío recocuer rese ‘toñepisiro yuvireco’ che yapave. ² Supi eté iquerēhi ité Tũpa upe mboraviqui apo ãgua yuvireco viña. Oquerēhisa sui rumo oyavi senducuaēhisa pïpe yuvireco. ³ Esepia, ndoicua potai mara ehi Tũpa ava pisi oyeupe. Sese oyesui tēi oseca güecocuer tupriisa pïpe ‘tomoingatu Tũpa opiha yande pisi ãgua’ ohesave yuvireco viña. Ipipe sui nomboyeroyai eté Tũpa remimbotar güeco mbocatupri ãgua ité yuvireco. ⁴ Esepia, Cristo recocuer pïpe imboaviyasa tupri Moisés porocuita, “Peyavi mbahe che ñemoirosa pisi ãgua” ehiēhi ãgua Tũpa oyese oyeroya vahe upe.

⁵ Co yande reco catupri ãgua porocuita pïpe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi. ⁶ Tũpa, “Peyavi mbahe che ñemoirosa pisi ãgua” heēhi ãgua rumo yande yeroyasa pïpe, “Ava vo oyeupira ivave Tũpa Rembiporavo reroyi ãgua” ndapeyei chira. ⁷ Iyavei, “Ava vo ogüeyira omano vahe pãhuve Tũpa Rembiporavo mboyeupi uca ãgua” ndapeyei chiaveira. ⁸ ¿Mara peyera evocoyase pe piha pïpe? “Co ñehesa namombriveimi pe sui, pe yuru pïpe ité, pe piha pïpe avei secoi” peyera. ⁹ “Jesús, che Yar” peyese, pe piha pïpe peyeroyase avei Tu imbogüerayevisa rese, ahese ipisiroproi peicora. ¹⁰ Esepia, yande piha pïpe yayeroya Jesús rese. Ahese Tũpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipisiroproi yaicora.

¹¹ Esepia, icuachiapri arachendar pïpe Tũpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepia, icuachiapri arachendar pïpe aipo ehi: “Acoi opacatu osenoi vahe yande Yar rer, ipisiroproi yuvirecoira” ehi. ¹⁴ Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei

sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe p̄sirosa resendar!” ehi.

¹⁶ Ndahei rumo opacatu che mu judío viroya co ñehesa p̄sirosa resendar yuvireco. Isaías niha aipo ehi avei aracahe: “Che Yar, ¿uma p̄ha viroya ore ñehes yuvireco?” ehi.

¹⁷ Sese yayeroya Jesucristo rese co ñehesa p̄sirosa rendusa pipe.

¹⁸ ¿Osendu p̄ha judío co ñehesa yuvireco? ¡Osendu ité! Esepia, aipo ehi avei acoi icuachiapri aracahendar pipe:

“Sendusa niha opacatú ivi rupi ñehes” ehi.

¹⁹ Iyavei, ¿osenducua p̄ha yuvireco? ¡Osenducuaño ité! Esepia, yip̄indar Moisés omombehu icuachiapri pipe aipo ehi:

“Perecatēhira che porovasasa rese oip̄isise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeñhisave Tūpa ñehes aipo ehi vahe:

“Acoi ava ndache recaí vahe, ahe che p̄isi ité yuvireco.

Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi añehes tēi ava che reroyasarēhi ndiporeroyai vahe upe vichico” ehi aracahe.

11

Moviro tēi ava Israel pendar Tūpa oiporavo oyeupe nara

¹ Evocoyase, ¿omombo p̄ha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico. ² Yip̄isuive ité niha Tūpa, “Co ava cheundar ité” ehi ore ramoí israelita upe. Sese cūritei ndore momboí eté oyesui. Peicua niha acoi Elías resendar icuachiapri aracahendar oyerocu tēise omu israelita rese aipo ehise Tūpa upe: ³ “Che Yar, nde ñehes mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potañō avei eté rumo yuvireco” ehi. ⁴ Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. ⁵ Ēgüe ehi avei cūritei opita viteño moviro judío, ahe niha Tūpa oiporavo oporoaisusa pipe. ⁶ Ipipe ité niha ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oip̄isi yuvireco. Ambuae upe rumo Tūpa omboavai catu viroya āgua. ⁸ Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūritei ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesap̄isoi vahe yuvireco.

Icuhapri nungar ayase toyuvirecoi apirēhi vaherā” ehi.

Ndahei vahe judío ñep̄siro agüer

¹¹ Evocoyase areco iri che porandusa p̄eu: ¿Apirēhi vaherā ité p̄ha judío eta ndoyeroyai Jesucristo rese oñep̄siro āgua yuvireco? ¡Aní eté! Ahe rumo ēgüe ehi ava ndahei vahe judío p̄sirosa p̄isi āgua yuvireco. Ipipe sui oyemonguerēhi catura judío ip̄isi āgua yuvireco curi. ¹² Evocoyase judío eta rembiavi sui tuvichá Tūpa

poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pëu pe ndahei vahe judío. Tūpa niha che cuai oñehe mombehu ãgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. ¹⁴ Sendusa sui aviyeteramo oimera ipãhuve oyemongerêhi vahe pĩsirosa Tūpa suindar pisi ãgua oyeupe nara yuvireco. ¹⁵ Esepia, judío mombosa pipe sui Tūpa omoime ñerosa opacatu ava co ivi pipendar upe. ¿Mara ehira pĩha evocoyase Tūpa ipisise? Ahese oipisira tecovesa apirêhi vahe yuvireco, evocoyase ndoyuvireco iri chira omano vahe nungar Tūpa upe. ¹⁶ Esepia, yipindar panguã sui yapopri seropovêhese Tūpa upe, opacatu panvi evocoyase sovasapri avei ichui. Iyavei inungar ivira rapo seropovêhese Tūpa upe viña, sãca avei evocoyase opacatu êgüe ehi aveira viña.

¹⁷ Amove che mu judío inungar Olivo rãca yasiapri. Pe evocoyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vīracuasa pe recove ãgua. ¹⁸ Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua ãgua yuvireco, pe rumo yipindar ichui eté peipisi pe yemoviracua ãgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita vaherã” peye revo. ²⁰ Supi eté, co rumo Tūpa reroyaêhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. ²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pëu avei êgüe ehira ndapemboyeroyaise. ²² Peyapisaca tupri, Tūpa niha aviye vahe ité. Seco pĩrata vahe avei rumo ava vīroyaêhisar upe. Pëu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaêhisa sui, Tūpa evocoyase vīroyevi irira oyeupe nara. Esepia, chupe iya ité ipisi iri ãgua. ²⁴ Pe ndahei vahe judío ivira caha pipendar rãca yasiapri nungar peico, Tūpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tūpa remimbotar icuapirêhi oyemboivate aiêhi ãgua yuvireco” ahe pëu. Esepia, amove Tūpa judío upe omboavai vīroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pëu, ²⁶ ahese ramo opacatu ava judío yuvirecoi vahe Tūpa oipisirora. Esepia, icuachiapri aracahendar pipe aipo ehi:

“Oura ava Pĩsirosar judío recua Sión pãhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Êgüe ehi cūrítei judío eta ndosendu potai ñehesa pĩsirosa resendar yuvireco. Sese Tūpa amotarêhisar yuvirecoi. Pëu mbahe tupri ãgua rumo êgüe ehi. Tūpa rumo osaisu vite. Esepia, yipive ité oiporavo tamoi eta oyeupe. ²⁹ Supi eté, Tūpa ndoviroyevi iri eté mbahe güemimondo iyavei ndovirova-rova tēi vahe opĩhañemoñetasa güembiporavo sui. ³⁰ Yipindar niha pe ndapemboyeroyai eté Tūpa. Cūrítei rumo judío eta ndoviroyaise yuvireco, pe paraisuereco Tūpa. ³¹ Êgüe ehi avei judío eta cūrítei ndoviroyai yuvireco. Tūpa pe paraisuereco uca ãgua rumo êgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco. ³² Esepia, Tūpa ité, “Opacatú oyavi mbahe che reroyaêhisa pipe” ehi ‘oicuse mbahe güembiavi, tiquerêhi opacatú che poroparaisuerecosa pisi ãgua yuvireco’ oya.

³³ ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicutui avei secocuer cuapa tupri āgua. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevī cheu’ ohesave. ³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recovesave chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vaherā chupe. ² Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipape sui opacatu pe recocuer oñecuñarora. Ēgüe peyese, peicua Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Ēgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepe-pe opacatu upendar yaico.

⁶ Tūpa niha omboyevirati mbahecuasa imbou oporoaisusa pipe ñepe-pe upe. Evocoyase Tūpa ombouse oñehe mombehu āgua yandeu, yamombehura ñepe-pe iñehe sese yande yeroyagüer rupi. ⁷ Que ombouse mbahecuasa ambuae ava pītivi āgua yandeu, yaipītivi tupri aveira. Ombouse yande porombohe āgua, yaporombohe tupriño itera. ⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropītivi āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pītiviisar, toipītiviño avei vorivetesa pipe.

Cristo reroyasar cuaita

⁹ Iyavei peyaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. ¹⁰ Peyeaisu catu ñepe-pe oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva péndar rārosa pipe; peñemosaño mbahe rasicuer peiporarase iyavei aní chira peseya pe yeruresa yepi.

¹³ Peipītivi ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyembovīha acoi ava oyembovīha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepe-pe oyese pe yeaisusa pipe. Aní chira peyeecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri āgua opacatu ava upe. ¹⁹ Che rivireta, aní pe ae pemboyevi mbahe tēi pipe pe rereco momarasar

upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochīra pe sui” ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu. ⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. ⁵ Sese iya yamboyeroia ité mborerecuar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepi-pepi ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita. ⁹ Aipo ehi acoi Tūpa porocuita: “Ndapeyemboaguasai chira, ndapeporoyuca chira, ndapemondai chira, ndaperemirai chira, ndapeipota rai chaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñhengagüer yipindar seroyasa sui. ¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoyase tayaico sundao oyoepisa omonde vahe nungar. ¹³ Yande catu yaguata yande reco ïvi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chaveira, iyavei ndayayapoi chira mbahe tēi, ndayaicoi chaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo āgua yande remimbotarai pipe.

14

Aní perōiro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tuprira; aní peiñehepoepira ipihañemoñetasa ndahoyoyaise pe pihañemoñeta rese. ² Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu āgua rese. ³ Acoi ava opacatu mbahe ohu vahe, toviroïro eme amove ndohui vahe mbahe iyavei acoi amove ndohui vahe mbahe,

toviroĩro eme acoi ohu vahe opacatu mbahe. Esepia, evocoi nungar ava Tũpa oipisi ité. ⁴ Supi eté pe ndiyai eté peroĩro vaheřã ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, sereciar ité oicuaru chupe. Esepia, yande Yar opĩratasa pipe osecomoingatuño itera.

⁵ Oime avei amove ava ñepei ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepei-pei opihañemoñeta rupi, “Co supi tupri vahe” ehira opiha pipe yuvireco. ⁶ Acoi que ñepei ari ava omboetei vahe, yande Yar mboeteisa pipe rumo ěgũe ehi. Iyavei ohu vahe opacatu mbahe, Yar mboeteisave avei ěgũe ehi. Esepia, ahe güembiapo rese, “Aviye ndeu” ehi Tũpa upe; iyavei acoi amove ndohui vahe mbahe, Yar mboeteisave ěgũe ehi, iyavei, “Aviye ndeu” ehi avei Tũpa upe.

⁷ Esepia, yande ñepei-pei ndayaicoi yandeyeupe nara tēi, ndayamanoi avei yandeyeupe nara. ⁸ Esepia, yaicove vıtese, yaico yande Yar upe nara; yamanose, yamano yande Yar upe nara avei. ěgũe yahe yande yaicove vıtese, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco āgua que omano vahe, anise que oicove vite vahe upe avei.

¹⁰ ¿Mahera evocoyase peroĩro pe mboetasa Cristo reroyasar iyavei mahera ndape-sepia potai? Esepia, supi eté niha yande opacatu yasora Tũpa rovai. Ahe evocoyase opara oporandu yande recocuer rese yandeu. ¹¹ Esepia, icuachiapri aracadendar pipe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoyase yande ñepei-pei yamombehu yande recocuer Tũpa upe.

Aní pe rivireta mbahe tēi pipe pereco uca

¹³ Sese yande ndiyai yañeroĩro. Iyacatu rumo ñepei reseve pereco tupri ambuae pe rivri, angaipa pipe sereco ucaēhi āgua, iyeroyasa momaraēhi āgua avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu āgua. ¹⁵ Iyavei yande que mbahe yahuse, ipipe yamomara tēise yande rivri pihañemoñetasa Tũpa rese, ndahei evocoyase yande poroaisusa pipe ité ěgũe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviye yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. ¹⁷ Esepia, ndahei ivate catu vahe Tũpa upe yande carusa, yande igua avei ipovrive yande recose. ěgũe ehi rumo co ivate catu vahe chupe yande recocuer mohivisa, yande reco tupri sa ambuae Tũpa reroyasar pāhuve iyavei yande rorivetsa yareco vahe Espĩritu Santo sui. ¹⁸ ěgũe yahese Cristo mboeteisave, aviye aira Tũpa upe iyavei opacatu ava rembiepiave avei no.

¹⁹ Sese opacatu yande recoeté pipe yasecara yaico tupri vaheřã yandeyeupe. Ipipe sui yande yaicatura yañepitivii yande yemoviracua tupri āgua yande Yar rese. ²⁰ Aní pemocañi uca tēi ava recocuer Tũpa remipĩsiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara āgua. ²¹ Aviye catu ndayahuse mbahe roho, que ndayahuse uva ricuer iyavei que ambuae mbahe ndayayapose, ambuae ava Cristo reroyasar angaipa pipe seiti uca iriēhi āgua. ²² Yande pihañemoñetasa yareco vahe rumo yarecoño itera yandeyeupe ité Tũpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pĩha?” ndehi irise opihañemoñetasa pipe! ²³ Acoi que ava, “¿Mara ehi pĩha?” ehise tembihu upe. Ipare rumo ohuse, ahe evocoyase

oyemboangaipa ipipe. Esepia, ndohui Tūpa rese oyeroyasa pīpe. Iyavei ava, “¿Mara ehi pīha?” ehi vītese que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pīpe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pīpe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaherā Tūpa reco porañetesa yande ñemosasa pīpe iyavei yande pīhamonguerēhisa pīpe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pīhamonguerēhisa avei yandeu, tape pītiviī oyoya guasu pe reco tupri āgua ñepeipei peyese Jesucristo recocuer rupi. ⁶ Ipipe sui pe opacatu oyoya guasu ñepeipei pīhanemoñetasa pīpe, pe ñehe pīpe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tupri ñepeipei, inungar Cristo pe pīsi tupri oyeupe nara Vu mboetei āgua. ⁸ Che rumo aipo ahe pēu: Jesucristo ou judío pītiviī Tūpa remimombehugüer mboaviye āgua judío ramoi aracahendar upe. Ēgüe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe: “Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pīpe” ehi.

¹⁰ Iyavei acoi ambuae icuachiapri pīpe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pīpe avei aipo ehi no:

“Pe opacatu ivi pīpendar ava, ipemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pīpe. Ipipe sui tombou yasāro vaherā ahe mbahe aviye vahe Espiritu Santo pīratasa pīpe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeipei peyeupe pe yemboaracua āgua. ¹⁵ Co tecocuer rese rumo aicuachía opacatu che siquiyeēhisa pīpe pēu pe resaraiēhi āgua ichui. Esepia, ayapo Tūpa che cuaita ombou vahe che raisusa pīpe cheu ¹⁶ Jesucristo rese che poraviqui āgua ava ndahei vahe judío recocuer aviye āgua. Evocoyase judío pahi nungar che cuaisa pīpe amombehu co ñehesa Tūpa ombou vahe pīsirosa resendar yuvireco chupe imoporēhi āgua Tūpa rovai inungar mbahe seropovēhepri aviye vahe Tūpa upe Espiritu Santo pīpe yepi.

¹⁷ Supi eté che Jesucristo reroyasar che recosa pīpe aviharete Tūpa che cuaita rese.

¹⁸ Esepia, cheu ndiyai añehe vaherā que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaherā. Esepia, amonguerēhi Tūpa reroya āgua yuvireco che ñehe rese, che rembiapo

sui avei. ¹⁹ Ëgüe ahe poromondiisa mbahe yavai vahe apo Tüpa pĩratasa pĩpe. Ahe ayapo Espĩritu Tüpa suindar pĩratasa pĩpe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequerēhi avei co ñehesa pĩsirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pĩpe omombehu vahe:
 “Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicutui aso pe pĩri, yepe setá rupi aso pota tēi viña. ²³ Cũritei rumo opa amboaviye che poraviqui co ivi rupi, iyavei opa tēi setá araviter pe pĩri che sosa rāgüer. ²⁴ España ve che soseve, apita pucumira vicho pe pĩri yande yemboviha āgua. Iyavei pe sui che sē potase, che pĩtivimira peye aheve che so āgua. ²⁵ Cũritei rumo che asora Jerusalén ve. Arasora porerecosa ahe pendar yande mboetasa Jesús reroyasar pĩtivii āgua. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pĩtivii āgua yuvireco. ²⁷ Ahe Ëgüe ehi güemimbotar rupi yuvireco iyavei iya ité imboyevi āgua yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tüpa suindar ahe ava ndahei vahe judío yuvirecoi vahe upe. Sese iya ité imboyevi āgua co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe pĩri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pĩpe iyavei yeaisusa Espĩritu ombou vahe pĩpe avei aporandu pēu opacatu che rese peyeroqui pĩrata vaherã Tüpa upe che pĩtivii āgua co mboraviqui rese. ³¹ Peoporandu Tüpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa pisi tupri āgua avei. ³² Ahese Tüpa oipotase, che aviharetera ayepotase pe repia, iyavei toime pĩtuhusa yandeu che pe pĩri che sose. ³³ Ëgüe tehi Tüpa güeco tupriisa pĩpe tasecoi opacatu pe rese.

16

Pablo mahenduhasa ñepeipei-pei ava upe

¹ Co yande reindri Febe serer vahe, ahe oipĩtivii tecua Cencrea pendar Cristo reroyasar oico. ² Peipisi tupri catu yande Yar rer pĩpe; ahe niha yande cuaita Cristo reroyasar yande recose, iyavei peipĩtiviiño que mbahe chupe ipane vahe rese. Esepia, ahe setá ité oporopĩtivii iyavei che avei eté che pĩtivii no.

³ Pemombehu che mahenduha Prisca upe, Aquila upe avei, ahe niha che pĩtivii mboraviqui Jesucristo recocuer resendar rese yuvireco. ⁴ Ahe avei niha mbahe tēi pĩpe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sēlave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviqui iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei. ¹⁰ Pemombehu avei che mahenduha Apeles upe. Ahe niha güecoãhasa sui osẽ tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohove omondo avei omahenduhasa yuvireco pẽu.

¹⁷ Che rivireta, peicua catu pe pãhu pendar omboyaho pota serai vahe sui. Oime ava ěgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. ěgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo ãgua, ndahei mbahe tēi apo ãgua. ²⁰ Evocoyase Tũpa güeco tuprisa pipe pihaiivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pẽu. Ahe che pĩtivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pẽu, che avei che mahenduhasa amondo yande Yar reroyasa pipe pẽu.

²³ Omondo avei omahenduhasa Gayo pẽu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pẽu, ahe tecua mbahe guarepochi apocatusar. Yande rivri Cuarto avei omondo omahenduhasa pẽu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoẽhi suive mbahe ndicuasai vahe rese. ²⁶ Cũritei rumo oyecua uca oñehe mombehusar rembicuachía pipe Tũpa apirẽhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tũpa güeraño imbahecuá vahe yepi, ěgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água. ² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tüpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. ⁵ Ëgüe ehi secocuer pipe sui Tüpa ombou opacatu pe reco tupri catu água, pemombehu tupri vaheñã imbahecuasa, opacatu mbahe supi eté vahe cua tupri água avei. ⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité. ⁷ Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi água pesãrose. ⁸ Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peyepeye tēi aipo peico. ¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico? ¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfnas rēta pndar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroãpiramo água. Ëgüe ehi rumo che cuaita ñehesa ñepisirosa resendar mombehu água tēi. Iyavei ndahei ñehesa yavai catu vahe aiporu. Esepia, nañomi potai eté que chñi co ñehesa pñratagüer Jesucristo curusu rese imano agüer resendar ava sui.

Cristo Tüpa pñratasa, imbahecuasa avei

¹⁸ Esepia, acoi ava ocañi tēi vaheñã upe co ñehesa curusu rese Cristo manosa resendar aviye Ëgüe ehi tēi vahe viña. Yande ipñsiropri yaico vaheñã upe rumo co ñehesa vireco ité Tüpa pñratasa, ¹⁹ inungar Isaías rembicuachiagüer pipe aipo ehi: “Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracua” ehi.

²⁰ ¿Mara ehi evocoyase co ivi pīendar ava imbahecua vai vahe, ava-ava tēi aracuasa cuapar avei, iyavei ñehhe cua tupri ai vahe co ivi pīendar mbahe rese yuvireco? ¡Tūpa niha osecuñaro evocoi nungar mbahecua ãgüe ehi tēi vahe pipe! ²¹ Ëgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ãgüe ehi tēi vahe” ehi tēi ava yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipīratá vahe íva pendar yuvireco. Griego evocoyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ãgüe ehi tēi vahe yuvireco chupe. ²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa pīratasa ité, imbahecua avei. ²⁵ Esepia niha, ava upe, Tūpa suindar mbahe aviye acoi ãgüe ehi tēi vahe viña. Co Tūpa suindar rumo mbahecua aviye catu vahe ité ava tēi mbahecua sui iyavei acoi mbahe Tūpa suindar aviye nipiratai vahe ava upe viña, ahe rumo ipīrata catu ité opacatu ava tēi pīratasa sui. ²⁶ Che rívíreta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ívate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecua vai vahe mochi ãgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi ãgua. ²⁸ Oiporavo avei co ivi pipe ava remieroïro seco mbegüemi vahe, ava seco ivi coti catu vahe pe pāhu pendar co ava seco ívaté vahe reroyi ãgua ²⁹ ‘toyemboívate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua ãgua, yande reco mohivi ãgua avei ‘toyuvirecoi cheu nara’ ohesave iyavei ‘ipísiproi toyuvirecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyeecomboívate ai pota vahe, toyecomboívate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rívíreta, che asose cuese, añehese pēu Tūpa suindar ñehesa supi eté vahe yipīndar ndicuasai vahe pipe, nañehi co ivi pīendar tēi ava mbahecua pipe, ñehesa ívate ai vahe pipe avei. ² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pīhañemoñeta vichico. ³ Iyavei ndachepīratai, ariríi avei che siquiyepave pēu che sose. ⁴ Iyavei acoi añehese ñehesa pīsirosa resendar rese pēu, ndaiporui eté rumo ñehesa ívate ai vahe pe pīhañemoñetasa rerova ãgua. Che rumo Tūpa Espíritu pīratasa pipe añehhe pēu ⁵ ‘toyeroya catu Tūpa pīratasa rese yuvireco’ che yapave pe yeroyaēhi ãgua ava tēi mbahecua rese.

Tūpa oEspíritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerrecuar co ivi pīendar tēi aracuasa nungar. Esepia, ahe imborerrecuasa ocañi tēi vahe rā. ⁷ Oroñehhe catu aracuasa Tūpa suindar ndicuasai vahe rese, ahe yipive vireco vahe ivi apoēhi víteseve, ahe co omboyecua ramo vahe yandeu yaico vahe rā teco ori apirēhi vahesave. ⁸ Co ivi pīendar ava mborerrecuareta rumo ndosenducuai eté co ñehesa. Osenducua rese rumo mborerrecuar Jerusalén pendar yuvireco viña, ndoyatica

ucaí chira yande Yar seco ivate, porañete vahe curusu rese yuvireco viña. ⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espíritu pipe yandeu cute. Esepia, Espíritu oicua tupri catu ité opacatú secocuer oico.

¹¹ Ëgüe ehi eté, inungar opacatu ava pãhuve ndipoi eté que ñepeí ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ëgüe ehi avei Tūpa Espíritu güeraño ité oicua Tūpa pihañemoñetasa. ¹² Yande evocoyase ndahei co ivi pipendar tēi espíritu yaipisi, Ëgüe ehi rumo Espíritu Tūpa suindar yaipisi yaicua vahe rã iporerecosa oporoaisusa pipe ombou vahe yandeu. ¹³ Ahe niha oromombehu Tūpa Espíritu ore mbohe vahe, ndahei ñehesa ava tēi aracuasa sui. Ëgüe orohe co supi eté vahe ñehesa Espíritu suindar oromombehu Espíritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espíritu opiha pipe, ndoipisii eté mbahe Tūpa Espíritu suindar yuvireco. Esepia, chupe evocoi mbahe aviye Ëgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espíritu pipeño ité. ¹⁵ Acoi ava vireco vahe rumo Tūpa Espíritu opiha pipe oicatu opacatu mbahe cua água. Ndipoi chira rumo ambuae ava ndovirecoi vahe Espíritu opiha pipe ahe ava recocuer cua tupri água. ¹⁶ Esepia, icuachiapri aracahendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tuprii Espíritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espíritu suindar pēu. Esepia, pe pñanimi nungar vite tēi pe pihañemoñetasa Cristo rese. ² Sese che opombohe mbahe ndayavaimi vahe rese. Esepia, pñanimi ndoicatu vitei ocaru. Sese ocambu viteño tēi. Cūritei rumo Ëgüe peye vite ité. Esepia, pe ndapesenducua catu vitei eté Tūpa Ñhengagüer yavai vahe. ³ Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar. ⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pãhuve inungar ava Tūpa ndoicuai vahe pihañemoñetasa.

⁵ Pesendu che ñehes: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepeí-peí mboraviqui yandeu chupe yayapo vahe rã. Tūpa upe ore poraviquisa pipe sui niha peroya yande Yar peico: ⁶ che rane inungar añoti vahe mbahe rãhi pe piha pipe; Apolos evocoyase inungar imboihusar; Tūpa rumo inungar omboori vahe pēu. ⁷ Evocoyase ndiyai peyeroya mbahe tñsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pēu nara. Sese ñepeí-peí Tūpa omboura porerecosa pe rese ore poraviquigüer rupi oreu. ⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui água iyavei pe inungar Tūpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi víracua água, Ëgüe ahe imombehu Cristo resendar ñehesa pēu seroya tupri água. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivíracuasa harive, Ëgüe ehi ahe pe monguerēhi catu pe mbohe

co ñehesa rese. Evocoyase inungar oï aposar amove oiporu mbahe ipocopi vahe oï apo ãgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihi, anise tacuar tēi oïguã yuvireco. Ēgüe ehi aveira pe mbohesar yuvireco. Ahe ñepeï-peï rumo iya oicua tuprira pe mbohe ãgua yuvireco. ¹³ Ahe iporaviqui agüer rumo ari cañise icuasa tuprira ñepeï-peï yuvireco. Esepia, ahe ari pipe yande Yar oura tata reseve ñepeï-peï pe mbohesar poraviqui agüer cua ãgua. ¹⁴ Acoi ava oporombohe tupri vahe inungar ava oyapo oï ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oï oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sãira tata guasu sui.

¹⁶ ¿Ndapeicuai vo pe yande Jesús reroyasar Tüpa rēta nungar yaico? IEspiritu niha secoi eté yande piha pipe. ¹⁷ Oimese que ava yande pãhuve omomara vahe Tüpa rēta, Tüpa evocoyase omboura oñemoïrosa ahe ava upe. Esepia, Tüpa rēta nimarai vahe ité; yande teieté niha Tüpa rēta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua ãgua. ¹⁹ Esepia, ava tēi aracuasa Tüpa upe Ēgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tüpa upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe Ēgüe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: ²² Ēgüe ehi eté che Pablo, iyavei Apolos, Pedro avei, opacatu ivi pipendar mbahe Tüpa omoime vahe yandeu, tecovesa, manosa avei, yasepia vahe, iyavei mbahe oime vaherã, ahe niha opacatu pēu nara, ²³ pe niha Cristo upendar, Cristo evocoyase Tüpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tüpa suindar ñehesa oyecua ramo vahe rese iporombohe ãgua” peyera oreu viña. ² Acoi vireco vahe ocuaitarã, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu ãgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherã pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi ãgua. Ahe niha omboyecua opacatu mbahe ndoyecuai vahe, iyavei omboyecuapara ñepeï-peï yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeï-peï yandeu.

⁶ Che rivireta, che añehe cheyese ae, Apolos rese avei pēu mbahe tupri ãgua rese ‘ore recocuer sui toyembohe yuvireco Tüpa remimbotar icuachiapri rupi tupri yuvirecoi ãgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tüpa suindar. ¿Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tüpa suindar mbahe pēu. Peyeupe revo ndoyavii mborerecuar guasu peico ore sui viña. ¡Ēgüe peye itera tarahu viña! Ahese, ore avei mborerecuar oroicora pe pãhuve viña. ⁹ Ore rumo apóstol oroico vahe ndoyavii cheu Tüpa ore renoi ipa tēi

vahe ore mano tēi āgua. Sese seroĩrombri oroico inungar ava imboguaipri yucapirã. Ēgüe orohe oroico opacatu ava rovaque, Tūpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pĩratai vahe oroico ava rembiepiave; aheseve avei rumo peyecomomirata tēi peico. Ore seroĩrombri tēi oroico, pe evocoyase ava pe mboetei guasu pe rereco yuvireco. ¹¹ Cūritei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité. ¹² Ore oroporaviquiño ité, oroyembogüerai tēi ipipe. Ava rumo iñhe mara-mara tēi eté yuvireco oreu; ore evocoyase oromboyeviño iñhe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosañi ité yuvireco chupe. ¹³ Iñhe-ñhe tēi ore rese yuvireco; ore rumo saisusa pipe oromboyevi iñhe yuvireco chupe. Ore rereco iti nungar tēi iyavei ore rereco inungar ava ēgüe ehi tēi vahe yuvireco. Cūritei ēgüe ehi viteño ité yuvireco oreu.

¹⁴ Ndahei pe mochi āgua aipo ahe icuachía pēu, ēgüe ehi rumo pe mboaracua āgua tēi. Inungar che rahir ité, che rembiaisu opovireco. ¹⁵ Esepia, yepe pereco ati pe pĩtivisar Cristo rese pe reco āgua viña, ndaperecoi rumo setá pe yesupa. Esepia, che amombhuse niha ñehesa pĩsirosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. ¹⁸ Amove oime pe pāhuve oyecomboivate ai vahe. “Ndou iri chietera revo cohava yande repia” ehi yuvireco cheu viña; ¹⁹ aso pĩhaiviño itera rumo pe repia yande Yar oipotase cheu. Ahese aicua tupri ra oyemboivate ai vahe reco pĩratasa yuvireco. Ndahei chira iñhe güeraño tēi aicuara. ²⁰ Esepia, Tūpa omborerecuasave, ndahei oñhe pipe tēi oporocuai, opĩratasa pipe rumo ēgüe ehi. ²¹ ¿Mbahe pĩha peipota peico? ¿Peipota pĩha che aso vaherã pēu che ñhe pĩrata pe mboaracua āgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñhe ñepeí Jesús reroyasar pāhu pendar oyemboaguasa vahe rese

¹ Ambuae mbahe, oroyandu ñepeí mbahe tēi pe pāhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tūpa reroyasarēhi ité ndoyapoi evocoi nungar mbahe tēi yuvireco. ² ¡Pe rumo peyecomboivate ai peico! ¡Iyacatu rumo ndapeyemboivhai chira evocoi nungar mbahe tēi repiase viña! Evocoi nungar ava iyacatu ité pemboyepira pe pāhu sui. ³ Yepe niha che teieté ndaicoi pe pāhuve viña, pe rese che mahenduhasa pipe rumo aicove ité pe pāhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pāhuve viña. ⁴ Acoi peñemonuhase, che avei niha aicora pe pāhuve che mahenduhasa pipe, yande Yar Jesucristo pĩratasa avei secoira pe rese. ⁵ Evocoyase ahe ava timondosa Carugar povrive secocueraí mocañi āgua. Ipípe sui iespĩritu oñepĩsirora yande Yar Jesucristo yevise curi.

⁶ Ndapeyecomboivate ai chira peico co mbahe tēi oimese pe pāhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tupri panguã rese” ehi. ⁷ Evocoi ava rembiapo ai inungar pan mboapeposa pe pāhuve. Sese pemombopa pe pāhu sui peicoēhi āgua angaipa pipe peico vaherã inungar panguã ipiasu vahe ndovirecoi vahe omboapeposa oyese. Ēgüe peye ité

niha. Esepia, yande Yar Jesucristo iparaisu omano yande repirã. Êgüe ehi ahe inungar ovesa yucapri angaipa mocañi ãgua judío pieta Pascua pipe yepi. ⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, êgüe yahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pēu: “Ndapembor̄i chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe” ahe. Co che ñehesa rumo ndahei Tūpa ndoicua v̄itei vahe upendar. Esepia niha, pe yepepi ãgua ñepe reseve evocoi nungar ava sui, pesē itera co iv̄i pipe sui viña. ¹¹ Che niha aipo ahe icuachía pēu: ndapembor̄i chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyerocu tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava piri ñepe yepe ndapecarui chietera. ¹²⁻¹³ Cheu ndiyai eté ava ndoyuvirecoi vahe Tūpa rese recocuer rese porandu ãgua. Tūpa ahe ava yuvirecoi vahe recocuer opara oicua coiyē. Pe rumo pe cuaita ité Tūpa rese yuvirecoi vahe upe pe porandu ãgua secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mb̄ia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mb̄ia rembiapo ai rese porandu ãgua! Iyacatu rumo Tūpa reroyasareta upe perasora secocuer moingatu ãgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatui p̄iha co tecocuer mbahemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co iv̄i pipendar tecocuer rese peyeupe yepi! ⁴ Perecose evocoi nungar mbahe tēi peyeupe, ¡mahera peiporu ava êgüe ehi tēi vahe tūparo pendar upe mbahe moingatu ãgua! ⁵ Che aipo ahe ité pēu pe ch̄i ãgua: ¿Ndipoimi eté vo pe pāhuve que ñepe yaracua vahe oicatu vahe que mbahe tēi peyependar moingatu ãgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu ãgua!

⁷ Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Êgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerocu vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava v̄irocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yip̄indar êgüe ehi vahe yuvireco viña, cūritei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu p̄iratasa pipe avei no.

Yande rete ipehaprî Tûpa upe nara yaguasaêhi ãgua

¹² Iyavei ambuae mbahe: Supi eté niha “aviye que mbahe che remimbotar ayapo vaheerã” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco ãgua. ¹³ Supi eté niha aipo ehi vahe: “Yande rembiyu yande aviter upe nara, yande aviter evocoyase yande rembiyu upe nara” ehi. Coiye rumo Tûpa opara omocañi evocoi nungar mbahe. Yande retecuer rumo ndicuitai yaguasa tēi vaheerã, ahe rumo yande Yar upe nara. Yande Yar evocoyase yande retecuer upe nara seci. ¹⁴ Inungar Tûpa ombogüerayevi yande Yar, êgüe ehi aveira yande mbogüerayevi opiratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoyase Jesucristo upendar yande rete mondo ãgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoyase ñepe vahe nungar ité pereco. Esepia, icuachiaprî aracahendar pipe aipo ehi yandeu: “Yepe ñuvirío ava yuvirecoi vahe viña, ñepe vahe nungar ité rumo secocuer yuvireco” ehi. ¹⁷ Acoi ava seci vahe rumo yande Yar rese, ahe secocuer evocoyase ñepeño ité.

¹⁸ Peyepipi voño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoyase omomara catu güembiapo pipe sui tēi. ¹⁹ ¿Ndapeicuai vo pe retecuer Espíritu Santo upendar ité seci, iyavei ahe Espíritu Tûpa remimbou pe rese ité seci? Sese pe retecuer ndahei pēundar ité. ²⁰ Esepia, Tûpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tûpa mboetei ãgua.

7

Poromboaracuasa mendasa resendar

¹ Cūrítei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiēhi ãgua rumo peyacatu perecora pe rembireco, cuña avei evocoyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui ãgua Tûpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ãtoi tiētera.

⁶ Ndahei che opocuai ‘tomenda yuvireco’ viya pēu. ⁷ Che rumo aipota che nungar pe mendaēhi ãgua viña. Tûpa rumo ombou yande yacatu yande recorã.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosã ãgua, pemendaño. Esepia, aviye catu itera pemenda poropota rai rãgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité. ¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña seci potaño itese sese, evocoyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe seci potaño itese sese, evocoyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco

Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi. ¹⁸ Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua. ¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu. ²⁰ Sese peicoveño peyacatu pe recocuer pēu Tūpa ombou vahe rese pe renoiēhi viteseve. ²¹ Pe mbiguai tēi peico vahe pe renoise Tūpa, pepihañemoñeta etepri eme evocoiya pe recosa sui pesē vaherā rese. Peicatuse rumo, peyepipiño itera ichui. ²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ēgüe peye viña, peroyase rumo Cristo, ahese sembiguai peico. ²³ Tūpa upe rumo perepí iteanga, sese ndiyai eté ambuae ava povrive tēi peico. ²⁴ Sese, che rivireta, peicoveño itera pe recocuer pipe inungar yipindar Tūpa pe renoise.

²⁵ Cuñatai ndomenda vītei vahe resendar rese rumo ndarecoi Yar suindar che ñehe āgua. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavaí eteanga cūrītei. ²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. ²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pipe yuvireco chupe. Sese che ndaipotai evocoi nungar mbahe pipe yuvireco vaherā.

²⁹ Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe. ³⁰ Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocuva vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. ³¹ Acoi ava ipihañemoñeta catu vahe co ivi pipendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

³² Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imboviha āgua; ³³ omenda vahe rumo ipihañemoñeta avei co ivi pipendar recocuer rese tēi, güembireco mboviha āgua rese avei. ³⁴ Evocoiyase ndahei ñepepi opihañemoñetasa vireco. Ēgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mboviha āgua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavaí vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaherā pe recoeté pipe peico.

³⁶ Acoi ava ipihañemoñeta vahe güembirecovi rese omenda ãgua, “Aviyeteramo ayavira mbahe ichui iyavei niha osupiti ité imenda ãgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda ãgua iyavei oicatu ité güemimbotar apo, ipihañemoñetase ñepeí reseve güembirecovi rese omendaēhi ãgua, ahe aviyeño ité. ³⁸ Evocoyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi ãgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tũpa Espiritu suindar.

8

Pablo oñehe tembihu mbahe rahanga upe tēi seropovēhepri rese

¹ Cũritei ambuae mbahe amombehura pēu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tēi! Yayeaisuse rumo, ahese yañepitivii catu Cristo reroya tupri ãgua. ² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri ãgua yandeu. ³ Yande rumo yasaisuse Tũpa, ahese Tũpa, “Co ava cheundar ité secoi” ehira yandeu.

⁴ Evocoyase co mbahe rahanga upe tēi seropovēhepri mbahe mimba yucapri hu ãgua rese añehe. Yande niha yaicua co mbahe rahanga ěgüe ehi tēi vahe co ivi pipe, iyavei oime ñepeí güeraño ité Tũpa. ⁵ Esepia, yepe ava upe setá tũpa ivave, ivive avei viña (setá iteanga niha oime tũpa angahu tēi, yar angahu tēi avei). ⁶ Yande rumo yaicua ñepeño ité Tũpa oime, ahe niha yande Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepeí vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tũpa rahanga upe seropovēhepri” ehi viteño yuvireco oyeupe. Ipipe sui omomara uca Tũpa rese opihañemoñetasa yuvireco. ⁸ Supi eté tembihu ndayande p̄itivii Tũpa rese yaico vaheerã. Ndahei mbahe roho husa pipe sui tēi aviye catura yaico iyavei ndayahuse, ndahei chira mbahe tēi catu yaico. ⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca ãgua chupe. ¹¹ Evocoyase co pe mbahecuasa pipe pemocañi uca yande rivri Tũpa rese noviracua tupri vitei vahe peico. ¡Cristo rumo omano ipĩsiro ãgua! ¹² Esepia, pemomarse Tũpa rese ipihañemoñetasa, ahese pe ae peyemboangaipa uca Cristo amotarēhisa pipe peico. ¹³ Sese yande mbahe roho husa pipe sui yamboangaipa ucasa yande rivri viña, ndayahu iri chietera evocoi mbahe roho yande rivri mboangaipa ucaēhi ãgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi ãgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya

yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voño itera cheu. Esepia, che remimombehu pìpe sui niha yande Yar peroya peico. Ipìpe sui avei icuasa tuprì apóstol che recosa pëu.

³ Ahe ñehesa amboyeví tuprì ava che recoãha potasar upe yuvireco yepi. ⁴ Iya ité che remihura pìsi, che iguarã avei pe sui viña. ⁵ Iyavei inungar ambuae apóstol víraso ité güembireco oyeupi yuvireco yepi, Jesús rivireta avei ëgüe ehi yuvireco, ëgüe ehi avei Pedro, ëgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove ãgua? ⁷ Esepia, sundao nomboepi sundao güeco ãgua, ahe rumo oporaviquisa reprì oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. ⁸ Che ndahei cheyesui tēi aipo ahe pëu. Esepia niha, Moisés porocuita pìpe avei aipo ehi yandeu: ⁹ “Pemondo eme tìvi yuru rese mbahe icaruëhisa mbahe rãhii oicambese yuvireco pëu” ehi. Supi eté co Tüpa aipo ehi vahe ndahei tìvi upeño. ¹⁰ Yande reco tuprì ãgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhii, oyoya osãro mbahe oipisi vaherã oporaviquisa sui oyeupe nara yuvireco yepi. ¹¹ Evocoyase ore avei oroñoti Tüpa Ñhengagüer pe pìha pìpe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pìsi ãgua oyeupe nara yuvireco pe sui. Evocoyase ore avei niha oroicatu mbahe pìsi ãgua pe sui ore poraviquisa pìpe viña.

Ore rumo ëgüe ndorohei eté. Esepia, ore oroñemosañño ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tüpa upe seropovëheprì tūparo rocarve yuvireco yepi. ¹⁴ Ëgüe ehi avei yande Yar ore cuai ‘toipisi mbahe ipane vahe co ñehesa mombehusa pìpe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pëu yepi. Ndahei ‘tombou mbahe yuvireco cheu’ che yapave aipo aicuachía imondo pëu. Che rumo evocoi nungar mbahe rese ayembovihanño ité. ¡Yepe che yucapri tēira tieporëhi viña, ndaporandui chietera rumo mbahe rese pëu! Esepia, namocañi potai eté co che yembovihanosa cheyesui.

¹⁶ Che rumo amombehuse co ñehesa pīsirosa resendar ava upe, ndiyai ayecomboivate ai ipìpe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña! ¹⁷ Tüpa ndache cuaise oñehe mombehu ãgua viña, che rumo che querëhisa pìpe amombehuse, ahese aipisira Tüpa suindar porerecosa. Ëgüe ndahei rumo. Esepia, Tüpa che cuaisa pìpe niha amombehu. ¹⁸ Ndaporanduisse mbahe rese pëu amombehuse co ñehesa pīsirosa resendar, ipìpe ayembovihan ahe che vihanosa porerecosa nungar cheu. Yepe aicatu mbahe rese che porandu ãgua viña, che rumo ëgüe ndahei eté.

¹⁹ Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerëhi vahe Cristo reroya ãgua’ che yapave. ²⁰ Esepia, aicose judío pãhuve, secocuer rupi aicoveño Yar upe imonguerëhi catu ãgua yuvireco. Ëgüe ahe ité, aicose ava Moisés porocuita povrive yuvirecoi vahe pãhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye ãgua. ²¹ Iyavei ava ndoyuvirecoi vahe Moisés porocuita povrive, ipãhuve aicose, inungar ahe yuvirecoi, ëgüe ahe tuprì avei imonguerëhi ãgua yande Yar upe vichico. Ndahei rumo Tüpa porocuita mboyeroyaëhisa pìpe aico. Esepia, Cristo porocuitavrive che recocuer. ²² Iyavei no, aicose ava yande Yar ndoviroya tuprì vitei vahe pãhuve, secocuer nungar tuprì avei aico Yar upe imonguerëhi catu ãgua. Ëgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu

mbahe ‘taseta catu co ñehesa pĩsirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ãgüe peye avei pe recocuer pipe Tũpa porerecosa pisi ãgua peico. ²⁵ Iyavei opacatu oyemoingatu vahe oguayi ãgua oñearo tupri opacatu mbahe tẽi sui oyemomaraẽhi ãgua yuvireco. Ahe ãgüe ehi porerecosa ndipocopiĩ vahe pisi ãgua tẽi yuvireco. Yande rumo yayemomborarara porerecosa apirẽhi vahe pisi ãgua yaico. ²⁶ Evocoyase che avei, ndahei ava oyahuva-huva tẽi vahe nungar aico Tũpa remimbotar apo ãgua iyavei che ndaicoi ava iguayi tẽi vahe nungar. ²⁷ Che rumo mbiguai nungar che retecuer areco, amboyeroya uca pĩhañemoñeta tupri upe. Esepia, ndaipotai ambuae ava mbohe pare imombopri tẽi nungar guayisa sui che yereco ãgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoĩ guatasa rupi mbahe pĩtu Tũpa imboguata agüer rese. Iyavei para guasu Pĩra vahe avei osasa opacatu yuvireco aracahe. ² ãgüe ehi eté opacatu oguatase mbahe pĩtuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata ãgua aracahe. ³ Iyavei oyoya guasu yuvirohu tembihu Tũpa ombou vahe chupe nara yuvireco, ⁴ opacatu guasu avei oĩhu ita sui Tũpa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe ãgüe ehi Tũpa opacatu yande ramoĩ judío upe viña, setá iteanga rumo ava ipãhu pendar ndahei aviye vahe ipĩha rupi yuvireco. Ipipe sui opa omano ivi iporupirẽhisa rupi aracahe.

⁶ Co opacatu mbahe sembiapogüer yuvireco ahe yande mbohe ãgua ‘toipota rai eme mbahe-mbahe tẽi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tẽi, inungar ahe ipãhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropũha, oyembovĩhaño pieta apo yuvireco” ehi. ⁸ Ndayayemboaguasa-guasa tẽi chiaveira inungar ahe amove ãgüe ehi yuvireco. Ipipe sui tẽi ñepeĩ arĩ pipe ahe opa omano veintitrés mil tupri yuvireco aracahe. ⁹ Ndayasecoãha-ãha tẽi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tẽi chira yande Aposar rese, inungar ahe ãgüe ehi yuvireco. Ipipe sui Tũpa ombou güembigui ava yucasar iva sui ahe ava yucapa ãgua aracahe.

¹¹ Co opacatu yande ramoĩ upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he ãgua yandeu. ¹² Sese yande “che aico tupri ité Tũpa rese” yahe vahe, yaicua catura rumo. Aviyeteramo yaviapira mbahe tẽi pipe. ¹³ Pe recoãhasa rumo oyoya tupri ité ambuae ava recoãhasa rese. Pe rumo peyeroyaño itera Tũpa rese, ahe niha oicua pe yemoviracuasa, noñocuai chira tecoãhasa imbou pẽu. Acoi mbahe tẽi oimese pe recoãhase, Tũpa ombou voiñora pĩratasa evocoi mbahe tẽi sui pe sã ãgua, chupe pe ñemosa ãgua.

¹⁴ Sese che rivireta, che rembiaisu, peyepipi mbahe rahanga mboeteisa sui. ¹⁵ Ava niha peico pesenducua vaherã mbahe, evocoyase peporandu co che remimombe-hugüer rese peyeupe icua tupri ãgua. ¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepeĩ pan sui. Sese yande ñepeĩ vahe ité yaico.

¹⁸ Peyapısaca acoi ava aracahendar Israel recocuer rese. Esepia, acoi yuvırohu vahe Tũpa upendar mbahe seropovẽhepri, ahe evocoyase chupendar ité yuvırecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavẽhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tũpa oicuavẽhe mbahe caruguar upe tẽi yuvıreco yepi. Ndahei rumo Tũpa upe nara ité ěgũe ehi yuvıreco. Che evocoyase ndaipotai eté caruguar upe nara tẽi ěgũe peye vaherã peico. ²¹ Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pĩha yande ae yande Yar ñemoiro ãgua yandeyeupe? ;Yande rumo ndahei chira ipĩrata catu vahe yaico ichui!

Yande renosesa mbiguai tẽi nungar yande recosa sui mbahe tuprı apo ãgua

²³ Amove ava, “Aviyeño opacatu mbahe yayapo yande remimbotar rupi” ehi yuvıreco viña. ěgũe ehi eté niha, ndahei rumo opacatu aviye, ndahei avei co opacatu mbahe yande pĩtivıi catu Cristo rese yande reco ãgua. ²⁴ Ndapesecai chira que mbahe aviye vahe peyeupe nara tẽi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepısa rupi sui perocua vahe. Ndapeporandui chira rumo sese Tũpa rese pe pıhañemoñetasa momaraẽhi ãgua. ²⁶ Esepia, ivı opacatu ipor reseve, ahe yande Yar upendar.

²⁷ Acoi Tũpa reroyasarẽhi pe soho ucase oyepiri pe mbocarua ãgua, peso potase ipiri, pehuñora mbahe imboupri pẽu. Ndapeporandui chira rumo sese chupe Tũpa rese pe pıhañemoñetasa momaraẽhi ãgua. ²⁸ Acoi ava, “Co mbahe roho icuavẽhepri mbahe rahanga upe” ehise pẽu, ndapehui chira ahe mbahe roho. ěgũe peyera pẽu imombehusar rereco meguaẽhi ãgua, ava pıhañemoñetasa momaraẽhi ãgua avei. ²⁹ Supi eté che añehe co ambuae ava pıhañemoñetasa rese, ndahei pe pıhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pıha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tũpa upe mbahe ahu vahe rese, ¿mahera pıha che reroĩrora yuvıreco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyaporu opacatu Tũpa mboeteisa pıpe. ³² Supi eté ndapemboyecuai chira pe recocuerai, que judıo upe, que ndahei vahe judıo yuvırecoi vahe upe, anise que Jesús reroyasar yuvırecoi vahe upe avei. ³³ Che opacatu che rembiapo pıpe aipota ité mbahe tuprı apo ãgua opacatu ava upe nara. Ndahei cheyeupeño mbahe tuprı aseca, ambuae ava upe avei mbahe tuprı aipota iñepısiro ãgua yuvıreco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvıreco yepi

² Che rivireta, che, “Aviye ité yuvırecoi” ahe pẽu yepi che rese pemahenduha vıtese iyavei peguataño vıtese che opombohe vahe agũer rupi. ³ Che rumo aicua uca tuprı pota pẽu, Cristo niha secoi ñepeı-peı cuimbahe cuaisar, cuimbahe evocoyase güembireco cuaisar secoi. ěgũe ehi avei Tũpa Guahır Cristo upe. ⁴ Acoi cuimbahe Cristo upe ñemonuhasave oãca ndıru ndosequıise oyerure ãgua, anise Tũpa Ñehengagũer mombehu ãgua, ahe ěgũe ehi güerecuar Cristo mboeteıhısa pıpe. ⁵ Iyavei acoi cuña ndoyopıise oãca oyerocuı ãgua, anise Tũpa Ñehengagũer mombehu ãgua, ahe ěgũe ehi omer mboyeroyaẽhısa pıpe. Ahe cuña evocoyase ndoyavıi oñeapıpa tuprı vahe. ⁶ Acoi cuña ndoyopı potaise oãca, tayapecãraısa tuprı. Ochıse rumo oapecãraı ãgua, evocoyase toyopıño oãca sereco. ⁷ Cuimbahe rumo ndoyopıi chira oãca sereco. Esepia, ahe Tũpa rahanga ité secoi iyavei iporañetesa omboyecua ité oyese. Cuña rumo omboyecua omer

recocuer oyese yuvireco. ⁸ Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oācapisa omer mboyeroyasa mboyecua āgua omahese Tūpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitivii oyoya yaico. Evocoyase cuimbahe ndoicatui cuña porēhi; cuña avei ndoicatui cuimbahe porēhi yuvireco. ¹² Esepia, yepe supi eté cuimbahe sui yapopri cuña. Ipape rumo cuña sui oha cuimbahe; opacatu rumo oyoya Tūpa suindar yuvirecoi.

¹³ Evocoyase peyapisaca tupri co rese: ¿Iya pīha cuña noñeacapi vahe oyerure Tūpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi āgua. ¹⁶ Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ēgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he āgua pēu. Esepia, aipo pe ñemonuhasave, mbahe tēi eté aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei āgua pe pihañemoñetasa ndahoyoyai pipe peico. Amove ayanduse pe rerācua, aroya ité. ¹⁹ Iya ité revo pihañemoñetasa ndahoyoyai vahe reime āgua pe pāhuve Jesús reroyasar supi tupri vahe cua tupri āgua! ²⁰ Peñemonuhase pe pihañemoñetasa ndahoyoyai vahe pipe pe caru āgua, ndahei yande Yar rese pe yemomahenduhase ēgüe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tēi yuvireco; ambuae rumo pe pāhu pendar aipo oyembosavaipoño yuvireco. ²² Pereco niha pe rēta aheve pe caru āgua iyavei pe ihu āgua. Pe rumo pe reco pipe opa peroño ambuae Jesús reroyasareta peico. Ipape avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pēu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pēu: ahe pītu pipe acoi Jesús mboguaisar opisī āgua renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco āgua. Ēgüe peyera che rese pe mahenduhasa pipe peico” ehi. ²⁵ Ēgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tūpa oyapora mbahe ipiasu vahe pe recorā. Che ruvi pipe rumo yaposara. Evocoyase co ari pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevi rāro peico.

Mara yahera yande Yar rese yayemomahenduhase

²⁷ Evocoyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihañemoñeta rane oyacatu güecocuer rese ava co pan hu āgua renonde, oihu āgua renonde avei co uva ricuer yuvireco. ²⁹ Esepia, acoi pe yemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setá pemaheasi, oime setá nipirata iri vahe avei pe pāhuve, oime avei omano vahe pe pāhu pendar. ³¹ Yande pihañemoñeta tuprise rumo yande reco āgua rese, yande Yar evocoyase nomoime chira mbahe tēi yandeu evocoyaya yande recosa pipe. ³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri āgua rumo ēgüe ehi yandeu, ndahei yande cañi āgua opacatu ava viroyasarēhi reseve.

³³ Sese, che riviřeta, acoi peñemonuhase pe yemomahenduha āgua yande Yar rese, peñearo ranera oyoya guasu pe caru āgua. ³⁴ Acoi ava ndasiepoise yuvireco, tocaru rane gūētave. Ahese yuvirasose ñemonuhase, ndipoī chira mbahe chupe. Iyavei che asose eipeve pe repia, opara ambuae mbahe amoingatu vicho pēu.

12

Mbahecuasa Tūpa Espiritu suindar

¹ Che riviřeta, che aicua uca pota pēu co mbahecuasa resendar ñepeī-pei pēu Espiritu omondo vahe.

² Pe niha cūritei peicua tupri ité yipindar Tūpa rese peicoēhi vītese, peyembopa uca mbahe rahanga ēgūe ehi tēi, noñehēi vahe upe peico. ³ Sese, che aipota peicua acoi ava iñehē mara Jesús upe ndahei Tūpa Espiritu pīratasa pipe ēgūe ehi. Iyavei ava ndoicatu chira, “¡Jesús che Yar secoi!” ohe āgua opīha pipe Espiritu Santo ndovirecoise.

⁴ Oime setá ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeīño ité imondosar secoi. ⁵ Setá mbahe avei oime mbahe yayapo vaheřā yande Yar upe. Ahe yande Yar rumo ñepeīño ité secoi. ⁶ Iyavei setá oime ambuae mbahe Tūpa oyapo vahe yande rese opīratasa pipe, Tūpa rumo ñepeīño ité secoi. Ahe oyapo opacatu co mbahe ñepeī-pei yande rese. ⁷ Ahe omboyecua yande Espiritu rerecosa ñepeī-pei yandeu opacatu yande reco tupri āgua. ⁸ Espiritu pīratasa pipe Tūpa omondo ñepeī viroyasar upe iñehē āgua aracuasa rese iyavei ambuae upe omondo iporombohe tupri catu āgua ombahecuasa pipe. ⁹ Ambuae upe evocoyase omondo oyese yeroya tupri catu āgua oEspiritu pipe sui avei. Iyavei ambuae upe omondo opīratasa imbaheasi vahe mbogūera āgua. ¹⁰ Ambuae oipisi pīratasa mbahe poromondiisa oyapo vaheřā yuvireco. Ahe ichui avei vireco ambuae ava omombehu vaheřā ñehesa Tūpa suindar yuvireco. Ambuae upe Tūpa omondo mbahecuasa espiritu naporai vahe iyavei Espiritu supi tupri vahe cua tupri āgua. Ambuae evocoyase ichui avei oicatu ñehesa ndicuasai vahe Tūpa suindar pipe oñehē āgua. Ahe ichui avei ambuae oicatu ahe ñehesa ndicuasai vahe mombehu tupri āgua ava upe. ¹¹ Ēgūe ehi Espiritu ñepeīño ité gūemimbotar rupi omondo ñepeī-pei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeīño ité yande recocuer

¹² Inungar yande retecuer resendar setá mbahe oime viña, ahe rumo ñepeīño ité; ēgūe ehi avei Cristo. ¹³ Ēgūe yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepeī vahe nungar yande reco āgua Espiritu ñepeī vahe pipe. Ahe ñepeī Espiritu avei opa yaipisi.

¹⁴ Supi eté yande rete resendar ndahei ñepeī mbahe, setá rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña. ¹⁸ Tūpa rumo ñepeī-pei yande rese mbahe omondo senara rupi tupri gūemimbotar rupi. ¹⁹ Yande opacatu ñepeī ava rete resendar nungar pāve tēise, ndahei evocoyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeīño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ēgūe ere tēi vahe eico!”; anise que yande āca avei, “¡Nde ēgūe ere tēi vahe eico!” ndehi chira yande pi upe. ²² Esepia, yande rete resendar mbahe aviye nipiratai vahe yandeu, ahe sese

rumo yayeroya catu. ²³ Iyavei yande rete rese mbahe ndayasaisu tupri vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopi vahe. Ëgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tupri vahe imboeteipri catu seci. ²⁵ Tipo eme pihañemoñetasa ndoyoyai vahe pe pãhuve. Oyoya pehañeco tupri ñepeipei peyese peico. ²⁶ Evocoyase que ñepeipei yande pãhu pendar upe mbahe tasise, opacatu ambuae upe avei tasi; anise que ñepeipei imboyeroyapri secoise, ambuae avei opacatu oyembovaha yuvireco sese.

²⁷ Supi eté pe inungar Cristo rete peico. Ëgüe peye ité ñepeipei chupendar ité peico. ²⁸ Ëgüe ehi Tūpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepia vahe apo ãgua, iyavei ambuae ava imbaheasi vahe mbogüera ãgua, ambuae ava pítivisar tasecoi, ambuae ava recocuer reroguata tupri ãgua tasecoi, ambuae ava evocoyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusar yuvirecoi, ndahei opacatu oporombohe yuvireco, ndaopacatu avei oyapo mbahe ndayasepia vahe yuvireco, ³⁰ ndahei opacatu vireco pĩratasa oporombogüera ãgua yuvireco, iyavei ndahei opacatu ndicuasai vahe ñehesa Espiritu suindar pipe oñehe yuvireco, ndaopacatu avei oicua evocoi ñehesa renducua uca ãgua ambuae ava upe yuvireco. ³¹ Peseca ru Espiritu suindar mbahecuasa aviye catu vahe peyeupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pëu.

13

¹ Yepe yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaisuisse rumo ava ipipe, yande evocoyase ëgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ëgüe yahe tēi yaico. ² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicua mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaisuisse rumo ava ipipe, yande evocoyase ëgüe yahe tupri tēira yaico. ³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuisse rumo ava ipipe yaico, ndayande pítivii eté evocoyase yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyembovaha; ahe rumo oyembovaha mbahe supi tupri vahe rese. ⁷ Oporoaisusa virecose oñemosañe opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa. ⁹ Esepia niha, yaicua raimi tēi mbahe iyavei chíhi raimi tēi yamombehu Tūpa Ñehengagüer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chñhivahe vite yande recose, yañehe, yandepihañemoñeta, yasenducua mbahe chñhivahe nungar; yacuacuase ité rumo cute, yaseyapa chñhivahe yande reco agüer. ¹² Cũritei yande ndayasenducua tuprii Tũpa resendar mbahe, inungar acoi yepiasa pipe yasepia hãvomi tẽi que mbahe; oyeovai eté yaicose rumo, yasenducua tupri catu itera mbahe evocoyase. Cũritei rumo yaicua raimi tẽi mbahe Tũpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaherã, ahe: Tũpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catu vahe ité ambuae sui yandeu, ahe yeaisusa.

14

Yaseca catura Tũpa suindar ñehesa mombehu ãgua

¹ Peseca catu pe yeaisu tupri ãgua peico; aheseve avei peipotara mbahecuasa Tũpa Espiritu remimbou. Ichuindar ñehesa mombehu ãgua rese catu ité rumo peicora.

² Esepia, acoi ava oñehe vahe ñehesa ndayaicuai vahe pipe, Tũpa upe ité evocoyase oñehe; ndahei ava upe tẽi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespiritu pipe. ³ Acoi ava omombehu vahe rumo Tũpa suindar ñehesa yasenducua vahe pipe, ahe oipitivi ambuae ava Tũpa rese iyeroya ãgua, oporomonguerẽhi catu, oporombovaha catu avei. ⁴ Acoi ava oñehe vahe rumo ñehesa ndayaicuai vahe pipe, ahe ae tẽi vireco catu Tũpa rese opihañemoñetasa. Acoi ava omombehu vahe rumo Tũpa suindar ñehesa icuapri ité, ahe ombopihañemoñetã catu Tũpa rese Cristo reroyasar yuvirecoi vahe.

⁵ Yepe aipotara opacatu pe ñehe ãgua ñehesa ndayaicuai vahe pipe pẽu viña, aviye catu rumo pemombehura Tũpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri ãgua, ahese aviyeño oñehe Jesús reroyasar rovaque. Ipape sui ipihañemoñeta catura Tũpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pipe pẽu, ndapesenducuai chira che ñehe viña. Amombehuse rumo Tũpa oicua uca vahe cheu que mbahecuasa supi tupri vahe resendar, anise que ñehesa Tũpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbã, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osãha yuvireco. ⁸ Anise co inungar mimbã nomoñehe tupriise vavasave nara yuvireco viña, ndipoi chietera que ava oye-moingatu voi vaherã ovava ãgua viña. ⁹ Ëgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tẽi, ndosenducuai eté rumo pe ñehe yuvireco. ¡Evocoyase peñehẽño tẽi eté! ¹⁰ Supi eté, setã iteanga co ivi pipe oime ambuae-ae tẽi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tẽi yaico vahe chupe; yandeu avei evocoyase ahe ava inungar ambuae tecua pendar tẽi yuvirecoi vahe. ¹² Pe niha peipota ité pereco vaherã mbahecuasa Tũpa Espiritu suindar yepi. Sese peporandu catu mbahecuasa Espiritu suindar rese opacatu Jesús reroyasar pitivi ãgua Tũpa rese yuvirecoi tupri catu vaherã.

¹³ Sese acoi ava oñehe vahe ñehesa ndayaicuai vahe pipe, toporandu rane Tũpa upe ambuae ava upe senducua uca tupri ãgua rese. ¹⁴ Esepia, acoi yayeroquiño tẽise Tũpa upe ñehesa ndayasenducuai vahe pipe, yayeroqui yande espiritu pipe, ndayasenducuai rumo yande yeroqui. ¹⁵ ¿Mara yahera vo evocoyase? Yayeroqui yande espiritu pipe, yande aracuasa pipe avei. Yasapucaira yande espiritu pipe, yande aracuasa pipe avei no. ¹⁶ Esepia, acoi Tũpa upe, “Aviye ndeu” yahese yande espiritu pipe güeraño, evocoyase

ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitivi chietera Tūpa rese imbopihañemoñeta catu āgua senducuaēhi pipe. ¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaherã moviromi tēi ñehesa yasenducua vahe ava mbohe āgua setá ñehesa ndicuasai vahe pipe che ñehe rãgüer sui.

²⁰ Che rivieta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua. ²¹ Porocuita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoyase co ñehesa ndayaicuai vahe pipe oñehese ava Tūpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. ²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. ²⁴ Opacatu rumo peñehese Tūpa suindar ñehesa yasenducua vahe pipe, yuviroiquese evocoi nungar ava yuviraso pe pāhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco. ²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramosa yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivieta, peñemonuhase, oime pe pāhu pendar osapucui pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepei-peí rupi; ñepei evocoyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipipe yuvireco Tūpa upe. ²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pāhu pendar oyapisaca tupri sesa yuvireco ‘¿supi eté pīha?’ ohesave. ³⁰ Que ñepei oñehe vitesa Tūpa oicua ucase mbahe ambuae ava upe, topituhuño yipindar oñehe vahe, ambuae evocoyase toñehe pēu. ³¹ Evocoyase ēgüe peyera peñehe ñepei-peí opacatu ambuae osendu vahe mbohe āgua iyavei imonguerēhi catu āgua. ³² Acoi omombehu vahe ñehesa Tūpa suindar, ahe oicatu oñehe mombituhu āgua. ³³⁻³⁴ Esepia, Tūpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñehe āgua pe ñemonuhasave. Esepia, ēgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehe āgua yuvireco chupe. Iyacatu rumo ahe imboyeroyapri yuvirecoira omer upe Tūpa

porocuita rupi. ³⁵ Oicua potase que mbahe, iya omer upe oporandura güëtave yuvireco. Esepia, cuña upe ndiyai eté iporandu água mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pëuñomi ou Tūpa suindar ñehesa. ³⁷ Acoi que pe pãhuve oimese “che Tūpa Ñehengagüer mombehusar aico” ehiño tēi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pëu, ahe yande Yar porocuita resendar. ³⁸ Ahe ndoyapisaca potaise rumo che ñehese rese, iñehese rese evocoyase ndapeyapisacai chira.

³⁹ Sese, che rivireta, peyemonguerēhi catu Tūpa suindar ñehesa icuapri vahe mombehu água peico. Ndiyai rumo ndapeipotai ambuae ava upe ñehesa ndayaicuai vahe pipe iñehese água. ⁴⁰ Peyapora rumo opacatu mbahe ñepeipei pe cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pĩsirosa resendar pëu mombehu vahecuer rese. Co ñehesa niha peipisi. Ipípe sui avei niha peyemoviracua peyese. ² Seroya pipe niha peñepisiro peico peyemoviracuase sese. Ēgüe ndapeyese rumo, peroya tupri tēi.

³ Acoi ñehesa aipisi vahe, opa uca aicua pëu. Esepia, ahe aviye catu vahe: Cristo omano yande angaipa repirã Tūpa Ñehengagüer icuachiapri rupi eté ⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūrteí; amove rumo ambuae opa omano yuvireco. ⁷ Coiye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya água. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco água viña. Esepia, che yipindar seroyasar aseca-seca catu vahe mara-mara tēi sereco água. ¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi Ēgüe ahe vichico, Tūpa rumo oporovasasa pipe secoi che rupi. ¹¹ Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pëu. Oime rumo amove pe pãhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoyase ndocuerayevii chietera viña; ¹⁴ iyavei Cristo ndocuerayeviise viña, ore secocuer oromombehu vahe evocoyase Ēgüe ehi tēi etera viña. Iyavei pe yeroyasa Cristo rese Ēgüe ehi tēi aveira viña. ¹⁵ Acoi Ēgüe ehise ité rumo viña, ore avei evocoyase oroñeheso tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tūpa nombogüerayevii chiaveira Cristo viña. ¹⁶ Ēgüe ehi eté, acoi omano vahe ndocuerayeviise yuvireco viña, Cristo avei evocoyase ndocuerayevii chietera viña; ¹⁷ Tūpa rese pe yeroyasa evocoyase Ēgüe ehi tēi vahe itera viña; angaipa pipe viteño tēi evocoyase pe recocuer viña. ¹⁸ Iyavei acoi Ēgüe ehise ité viña, evocoyase omano vahe Cristo

reroyasar, ahe avei ocañi tēira viña. ¹⁹ Ndipoise yasāro vaheṛā Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe. ²¹ Esepia, ñepi ava rembiapo sui oime manosa yandeu. Evocoyase ñepi ava rembiapo sui avei yacuerayevira. ²² Esepia, inungar acoi Adán rembiapo ai sui ava opacatu omano yuvireco, ěgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. ²³ Ñepi-pei yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pĩrata ěgüe ehi tēi vahe. Ipare omondora opovri pendar Vu Tũpa upe. ²⁵ Ahe rane ité rumo opacatu oporocuaira oico acoi Tu opase voi eté omondo opacatu yamotarēhimbar ipovrive. ²⁶ Ahese ipa manosa opa itera. ²⁷ Esepia, Tũpa osecopi opacatu mbahe imondo ipovrive, “Opacatu ité mbahe secopiri” ehise. Ndahei rumo Tu Tũpa avei secoi ipovrive. Esepia, Tu ité opacatu mbahe osecopi imondo ipovrive. ²⁸ Evocoyase, opase mbahe imondosa ipovrive, ahe ae evocoyase oyemondora Vu Tũpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cuerayevi āgua yuvireco viña, ¿mbahe rese pĩha evocoyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayevise yuvireco viña, ¿mahera ru evocoyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoyase oroyemondora mbahe tēi upe ari rupi viña? ³¹ Supi eté, che rivireta, ari yacatu aviye che amano vaheṛā opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tuprisa” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tũpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pāhu pendar oimera oporandu vahe: “¿Mara ehira pĩha omano vahe ocuerayevi irise yuvireco coie? ¿Mara ehi angahura pĩha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tēi peico! Esepia, mbahe rāhii yañotise, ituyu rane ité sorī āgua. ³⁷ Yañotise mbahe, sāhii rane ité yañoti; ndahei ihī opacatu reseve yañoti. ³⁸ Ipare rumo Tũpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā. ³⁹ Ndahoyoyai rumo que ñepi mbahe miti hi ambuae mbahe miti hi rese. ěgüe yahe avei yande yaico vahe ambuae ité yande rete mbahe mimba sui; vírai rete ambuae ité iyavei pira rete ambuae tēi no. ⁴⁰ ěgüe ehi avei niha, oime íva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese. ⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepi yasitata ambuae yasitata rese ndahoyoyai avei sendigüer yuvireco.

⁴² ěgüe ehi aveira niha omano vahe cuerayevisa; yañotise sehögüer, ahe ituyu vaheṛā. Ocuerayevise rumo ndituyu iri chietera; apirēhi vaheṛā ité secoira. ⁴³ Tehögüer ñotimbri nimomburusai vahe; coie ocuerayevise rumo, imboeteipri ité secoi. Acoi ava rehögüer

oñoti vahe yuvireco, nipurata iri eté oico, coiye ocuerayevise rumo, ipirata itera. ⁴⁴ Supi eté, acoi ava rehögüer ñotisa vahe, ahe co ivi pendar tēi setecuer. Ocuerayevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua.

⁴⁶ Yipindar oime co ivi pendar tecovesa. Ipare rumo oime co tecovesa iva pendar yandeu. ⁴⁷ Ēgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar. ⁴⁸ Inungar yipindar ava ivi suindar, ēgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ēgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; ēgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vaherā, ndoipisi chira tecocuer apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara.

⁵² Mimbí moñehese voi yande resapihara inungar yande resapiqui vahe, ēgüe ehira secuñarosapa yande rete. Aheseve avei omano vahe ocuerayevipara apirēhi vaherā ité yuvireco; yande evocoyase nayamano vitei vahe, opaño tēira yande rete secuñarosa.

⁵³ Esepia, co yande rete ocañi tēi vaherā, ahe yande rete niha opara oñecuñaro apirēhi vaherā yuvireco. ⁵⁴ Ēgüe ehise yandeu, ahese ramo osupitira Tūpa ñehe icuachiapri pipe imombepri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuita aracahendar evocoyase ombou pīratasa angaipa upe angaipa aposar mocañi uca āgua. ⁵⁷ Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ēgüe ehi tēi vahe.

16

Porerecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

² Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico. ³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata āgua rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe piri ité mbahe porañehi che mombitañora. Ipare pe che pītiviiñomira peye eipeve sui ambuae tecuave che so āgua rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico

pucu itera pe piri. ⁸ Che rumo cūritei apitaño vitera cohava Efeso ve, asepia ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepei yepe sepia potaēhisar yuvireco, iya rumo peipitivii catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūritei rumo niquerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosañó catu pe cuaita upe. Peicoveño itera Tūpa pīratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güēta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri āgua yuvireco no. ¹⁶ Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pāhu pendar Estéfanos, Fortunato iyavei Acaico cohava oyepotase che mboviha yuvireco. Esepia, ahe oyapo ité pe ndapeicatu tupri vahe apo yuvireco. ¹⁸ Ahe che monguerēhi catu yuvireco, ēgüe ehi avei revo pēu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētave yuvireco, ahe avei ombou omahenduhasa yande Yar rer pipe yuvireco pēu. ²⁰ Opacatu Jesús reroyasar coha pendar avei omondo omahenduhasa yuvireco pēu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pēu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi. ²⁴ Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

IMOÑUVIRIOSA PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. ² Tapeipisi catu yande Ru Tūpa, yande Yar Jesucristo porovasasa avei pe reco tupri água.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mbovaha água yepi. ⁴ Ahe niha yande mbovahaño opacatu yande paraिसusa pipe, yande avei evocoyase yaicatura ava iparaisu vahe mbovaha água yuvireco. Ëgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, ëgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mbovaha água ‘toñepisiro yuvireco’ ore yapave. Iyavei Tūpa ore mbovaha pe mbovaha água avei. Supi evocoyase pe peñemosañora mbegüe rupi ore paraisu agüer nungar tupri pe recose. ⁷ Ore oroyeroya ité Tūpa pe pítivií água rese. Esepia, oroicua ore paraisu agüer nungar tupri peico, ëgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoãhasa yavai vahe ité oime aheve oreu. Ndroicatu iri eté oroñemosa ore pĩrataëhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi água viña, ëgüe ehi rumo oreu oroyeroya catu água Tūpa rese, ndahei oreyese tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rãgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pítiviise peye pe yeroqui pipe. Ahese setá, “Aviye ndeu” ehira yuvireco Tūpa oporopítiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharere vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ëgüe orohe, ndahei ava co ivi pipendar mbahecuasa pipe tēi. ¹³⁻¹⁴ Esepia, che ñehe aicuachía vahe imondo pëu, aicuachía ñepei reseve pe yeroqui tupri água, pe senducua tupri água avei no. Iyavei ore cua revo chñhi peye cute. Acoi yande Yar Jesús yevise curi, ahese peyemboviharera ore rese, inungar ore oroyemboviharera pe rese.

¹⁵⁻¹⁶ Sese yipindar supi eté che pihañemoñeta aso vaherã ñuvirío yupagüer pe repia, pe mbovaha catu água viña. Ëgüe ahe ité, che pihañemoñeta pe piri rane che so água che guatasa rupi Macedonia ve. Ichui ayevi pota iri pe piri viña, ipare pe che pítivimira peye ivi Judea rupi che so água rese viña. ¹⁷ Ndachepihañemoñeta voiño tēi che so água, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté. ¹⁸ Tūpa rumo oicua ore ndahei, “Aviye” ore he voisa pëu, ahe pipeve avei, “Aní” ore hesa. ¹⁹ Esepia, Tūpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroico pëu, che, Silvano, Timoteo avei. ²⁰ Esepia, opacatu Tūpa remimombegüer imboaviyesa sese. Sese niha serer

pípe, “Ēgüe tehi” yahe Tũpa upe imboeteisave. ²¹ Tũpa niha opacatu yande momirata seseño ité yande reco ãgua, yande poravo avei. ²² Güerer omondo yande rese ‘cheu nara’ oyapave. Ombou avei oEspíritu yande pĩha pípe ‘ípípe toicua che remimombehugüer rupi tupri ité mbahe amondora chupe yuvireco curi’ oyapave.

²³ Tũpa niha oicua acoi ndayevise Corinto ve pe píri, ěgüe ahe pẽu mbahe aviye ãgua rese. ²⁴ Ndahei opocuai pota mbahe pe rembieroyarã rese. Esepia, pe Tũpa rese pe yeroyasa pípe peyemoviracuaño ité Cristo rese. Ore rumo oroipota pe pĩtivisa pe yembovĩha ãgua.

2

¹⁻² Co rese ndaso catu iri pe píri. Esepia, che aso irise pe píri ndopombovĩha catui chira viña, ¿ava vo evocoyase che mbovĩhara viña? Pe ité niha che mbovĩhasar peico. ³ Sese che aicuachía ñehesa ipĩrata vahe pẽu cuese. Esepia, ndaipotai eipeve che sose, che mbovĩhaẽhi ãgua peye. Pe rumo iya ité che mbovĩha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese. ⁴ Supi eté che aicuachise che ñehe pẽu, che ae ayepĩhamboasi ité, ayaseho avei. Esepia, aicuachía vahe pẽu ndahei pe mbovĩhaẽhi ãgua, che rumo aicuachía ‘toicua che guaisu eteprisa yuvireco’ che yapave pẽu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharẽhisa co mbahe tẽi apo pípe, ndahei che güeraño ndache mbovĩhai, pe avei rumo seni opacatu ěgüe peye. Che, “Seni” aipo ahe ité pẽu. Esepia, ndaipotai che ñehe rasi ãgua. ⁶ Co mbia upe setá mbahe peiporara uca ité, evocoi rupive iya ěgüe peye chupe. ⁷ Co suive ité rumo peñerora chupe, peipĩtivivi aveira. Esepia, aviyeteramo oviharẽhisa pípe oyemocañi tẽira. ⁸ Sese cũritei opomonguerẽhi ité pe mboyecua iri ãgua pe poroaisusa chupe. ⁹ Cuese ambuae che ñehe aicuachía co che pe mbohesa resendar pẽu pe recoãha ãgua, “¿Oyapo itera pĩha che remimombehu yuvireco?” ahe pẽu. ¹⁰ Cũritei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque ěgüe ahe pe raisusave ¹¹ Caruguar yande mbopaẽhi ãgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña. ¹³ Nambohe catui rumo che pihañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tẽi recopi

¹⁴ Aviye yande Ru Tũpa upe. Esepia, yande Cristo rese yaico vahe yande renose oamotarẽhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe sãcua vahe yasẽtu vahe opacatu rupi. ¹⁵ Esepia, inungar itaisi sãcua vahe opacatu rupi, ěgüe yahe avei yande Tũpa upe Cristo yande reropovẽhese yaico ava ipĩsiropirã upe, ava ocañi tẽi vahe upe avei. ¹⁶ Ahe ava ocañi tẽi vahe upe evocoi ñehesa yaru vahe inungar cañi tẽisa resendar; ava ipĩsiropirã yuvirecoi vahe upe rumo evocoi ñehesa ombou tecovesa. Yande ae tẽi rumo ndayaicatui evocoi nungar mbahe apo. ¹⁷ Ore rumo ndahei setá ambuae ava nungar tẽi oroico. Esepia, oromombehuse Tũpa Ñehengagüer, ndahei mbahe pisi ãgua tẽi rese ěgüe orohe, ore rumo ore pihañemoñeta tuprisa pípe oromombehu co ñehesa Tũpa rovaque Cristo rese ore recosa pípe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavii oroyecomboivate ai pota iri viña, ěgüe ndorohei rumo iyavei ndorosecai icuachía āgua ava ñehesa aviye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipota vahe, ěgüe peye peico ore piha pipe. Esepia, opacatu ava pe reco tupri repiase, oicua ore poraviqui tupri sa pe pāhuve yuvireco. ³ Pe niha pemboyecua pe reco tupri pipe ore rembiapo Cristo porocuita pipe pe pāhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tūpa oicove vahe suindar pipe rumo yapopri ava piha pipe.

⁴ Oroyeroya ité co rese Tūpa rese ore yeroyasa pipe. Cristo niha ěgüe ehi oreu. ⁵ Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo āgua. ⁶ Ahe niha ombou opiratasa oreu güemimbotar ipiasu vahe rese poraviqui āgua, ndahei Moisés rembicuachiagüer rupi oroporaviqui. Esepia, ahe imboaviyeēhisa pipe yamano tēira viña. Ahe rumo Espiritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tūpa reco porañetesa pipe ou. Israelita evocoyase Moisés rova rese nomache catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuita ava upe manosa tēi güeru vahe iporañete ai eté yipindar oico viña. ⁸ ¡Cūritei rumo iporañeté catu ité ñehesa Tūpa remimbotar ipiasu vahe resendar Espiritu Santo ombou vahe yandeu! ⁹ Supi eté yepe iporañete ai eté Moisés porocuita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cūriteindar porañete catu vahe rese. ¹¹ Acoi mborocuita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese orofnehe ava upe ore siquiyeēhisa pipe ité. ¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe. ¹⁴ ěgüe ehi ahe ndosenducua ucai eté ndoyavii sovapisa vite vahe cūritei, ěgüe ehi vite oyerouise Moisés porocuita icuachiapri yipindar vahe pipe yuvireco. Nomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe. ¹⁵ ěgüe ehi vite cūritei, senducuaēhi pipe Moisés porocuita pipe oyerouqui viteño tēi eté yuvireco inungar sovapisa vite vahe. ¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri āgua. ¹⁷ Esepia niha, yande Yar Espiritu secoi. Ahe Espiritu ava rese secoise, ndahei iri mbiguai nungar yuvirecoi. ¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ěgüe yahese, yareco catu-catu iri seco porañetesa yandeyese. Yande Yar rumo acoi Espiritu secoi vahe ěgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese. ² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñhengagüer ndorosecuñaro-ñaro tēi. Ore rumo orofnehe tupri mbahe supi

tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave. ³ Yavaise co ñehesa pĩsirosa resendar ore remimombehu renducua āgua, ahe ēgüe ehi ava ocañi tēi vaherā upe. Ahe aviye oyeovapi vite vahe. ⁴ Esepia, supi eté carugar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropĩsirosar Cristo resendar porañete vahe’ oyapave. Ahe niha Tūpa recocuer mboyecuar seci. ⁵ Esepia, oromombehuse ñehesa pēu, ndahei oreyese tēi. Ore rumo, “Jesucristo yande Yar seci” orohe oroico. Ore evocoyase mbiguai nungar tēi oroico pēu Jesús raisupave. ⁶ Esepia, Tūpa aipo ehi aracahe: “Toime tesapesa pĩtumimbi vahe resape āgua” ehi. Ahe avei osesape uca yande pihapipe ‘ipipe toicua che porañetes che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepĩrusu vahe yapocatupri ivi mbahemoinda ndipocopi vahe pipe tēi viña. Ipipe toicua opacatu ava yuvireco co pĩratasa Tūpa suindar, ndahei oreyesuindar tēi. ⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté oreyesui. ⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuer ore rese” ore hesave. ¹¹ Esepia, ore recove viteseve imboguai pri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese. ¹² Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora. ¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboeteisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. ¹⁷ Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaherā. ¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepiai vahe rese. Esepia, co mbahe yasepia vahe, ahe ēgüe ehi raimi tēi vahe; co mbahe rumo ndayasepiai vahe, apirēhi vaherā ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi. ² Supi eté yaicove vitesese co yande rete ndipocopi vahe rese, yande poāsese pipe yaipota ité yande rete iva pendar. ³ Aheve yande rete ipiasu vahe yarecose, ahese ndahei chira yande hã nani tupri vahe nungar yuvirecoira. ⁴ Ēgüe ehi eté yande retecuer pipe vite yaicose, yande poāse yande viharēhisa pipe. Esepia, ndayaipotai yande hã nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vaherā yande resendar tecovesa piasu, ndopai vahe rereco āgua” yahe.

⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesse yande rete rese, ndayaico vitei eté ivave yande Yar piri. ⁷ Esepia, cūritei yande Yar rese yeroyasa pīpe ité yaguata, ndahei mbahe yande rembiepia pīpe. ⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. ⁹ Sese yaseca yande Yar mbovīha āgua yepi, que yaicove vitesse yande rete rese, anise que yasēse ichui. ¹⁰ Esepia, yande opacatu yañecuavēhera Cristo rovai iporandusave yaipisi vahe rā ñepi-pe mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesse.

Ñehesa yande reco moingatusa resendar

¹¹ Ore niha oroicua yande Yar sui ore siquiye āgua imboyeroyasave. Sese orosāha ava pīhañemoñeta rerova Tūpa rese ipīhañemoñeta āgua yuvireco. Tūpa niha ore cua tupri, tapeicua avei ru ore recocuer. ¹² Ndorōñehi pēu ore yemboivate ai āgua tēi. Ore rumo oroñehi pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehi mbovevi āgua. Esepia, ahe ndahei ava pīha pīpendar rese oyembovīha yuvireco. ¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ēgüe orohe oroico. Yaracua vahe nungar rumo, ore rerecose peye, pēu mbahe aviye āgua rese ēgüe orohe. ¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repirā, ipipe sui yaicua opacatu ava ocañi tēi vahe rā yuvireco viña. ¹⁵ Cristo niha omano opacatu yande repirā. Yande yaicove vite vahe evocoyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pīhañemoñetaēhi iri āgua que ava rese, ava tēi pīhañemoñetasa rupi. Yepe yipīndar inungar ava ivi pīpendar tēi ēgüe orohe ore Cristo rese ore pīhañemoñeta oroico viña, cūritei rumo ēgüe ndorohe iri ore pīhañemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipīndar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu āgua ambuae ava upe secocuer moingatu āgua avei. ¹⁹ Aipo oyapave aipo ehi: Tūpa ombou Guahir Cristo co ivi pīpe ava recocuer moingatu āgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu āgua ava upe. ²⁰ Ore evocoyase Cristo porocuita rupi oroñehi vahe oroico, inungar Tūpa ité oñehera pēu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pīpe pēu. ²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco ivi āgua Cristo rupi yande guatase.

6

¹ Ore pe mboetasa co Tūpa upendar mboraviqui resendar ore recosa pīpe: “Peicua catu, pemocañi tēi rene Tūpa porovasasa peipisi vahe” orohe pēu. ² Esepia, Tūpa aipo ehi icuachiapri arachendar pīpe:

“Acoi ari aviye vahe pīpe niha che asendu pe yeruresa; iyavei ahe ari poropīsirosa pīpe opopitivi” ehi.

¡Ahe ari oyepota cute! iyavei oime ité cūritei ñepisirosa.

³ Ore niha ndoromboyecuai ore reco ai ava pāhuve. Esepia, ndoroipotai que ava Tūpa upe ore poraviquisa rese iñehi rai āgua yuvireco. ⁴ Ore rumo oromboyecua

ité Tūpa rembiguai ore recosa. Esepia, ore reco mbegüesa pipe oroñemosañõ mbahe-mbahe tēi upe yepe ipane mbahe oreu viña, iyavei mbahe yavaise; ⁵ ĕgüe orohe avei ore nupa-nupase, ore roquendase avei iyavei omonguerēhise ava rehii ore amotarēhi āgua yuvireco. Oroyapo avei mboraviqui ipīrata vahe; amove ndoroquei eté, setá rupi ndoreriepoi tēi avei. ⁶ Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. Ēgüe orohe ité niha Espiritu Santo pīratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tūpa pīratasa pipe avei oroico. Ore niha ore reco tupri pipe orosecopi mbahe-mbahe tēi. Ipipe avei oroyoepi. ⁸ Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. ⁹ Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tēi, ndore yuca eté rumo ipipe yuvireco. ¹⁰ Amove ndoyavii ndoroviñhai vahe yuvireco chupe, ore rumo oroviñaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese. ¹² Ndorehāpisii pe rese pe raisu āgua; pe rumo ĕgüe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. Ēgüe ehi eté teco ñvisa ndoyoyai teco rai rese inungar tesapesa ndoyoyai pītumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe: “Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“ Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei’ aipo ehi yande Yar güeco pīratasa pipe” ehi.

7

¹ Che rivireta, che rembiaisu, co Tūpa remimombehu imboaviyepirā yandeu. Sese yande yamoiñgatu tuprira yande recocuer chupe yarecoēhi āgua yande retecuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei. ³ Ndahei pe recocuer rese che ñehe raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu cuese. ⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondhisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyembovīha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe vīharēhi agüer cheu, pemahenduhāño ité aipo che rese pe che raisusave yepi. Aipo nungar renduse ayembovīhá catu.

⁸ Yepe che ñehe aicuachía vahecuer imondo pēu ndape mbovīhai viña, cheu rumo avīyeño cūritei. Yīpīndar rumo ayepihamboasi aicuase che ñehe tasí iteanga vahe pēu; chīhi rupi tēi rumo ndapevīhai peyeroqui pare sese. ⁹ Cūritei che avīhareté. Ndahei rumo pe vīharēhisa rese ēgüe ahe. Esepia, co pe vīharēhisa sui pemboasi pe angaipa Tūpa upe pe yevī āgua, evocoi nungar Tūpa oipota. Evocoiyase ore ñehe ndoyapoi mbahe naporai vahe pēu. ¹⁰ Esepia, co nungar vīharēhisa Tūpa oipota vahe yande angaipa mboasi uca, chupe yande yevī āgua. Ipīpe sui niha yañepisiro yande pihañemoñeta rerovaēhisa pipe. Co ivi pīpendar tēi vīharēhisa rumo manosa tēi vireco yandeu. ¹¹ Pe rumo peñemosañño pe vīharēhisa upe; ahe avīye Tūpa upe. ¡Pesepe ru co mbahe avīye vahe pe recocuer pipe oime vahe evocoi Tūpa remimbou pe vīharēhisa sui cute! Supi eté rumo, peyapisaca iyavei pe querēhisa pīpe peyoepi, pemboasi pe piha pīpe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepepi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachise evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyembovīharete.

Iyavei orovīha catu Tito yembovīhasa repiase. Esepia, pe avei niha opacatu pembovīha catu ité pe recocuer pipe. ¹⁴ “Co Corinto pendar ava avīye ité” ahe Tito upe pe mombehu cuese. Che ñehe pe resendar avīye ité, ipīpe nachī eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūritei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. ¹⁶ ¡Ayeroya ité pe rese, sese avīha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūritei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. ² Yepe ahe ava recocuer yavai eté yuvireco chupe secoāhasa pipe viña, ovīharetēño rumo ipīpe yuvireco; yepe iparaisu vahe pāve tēi, iporerecoño ité rumo yuvireco. ³ Supi eté oquerēhisa pīpe omondo ité ocatugüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipitivi ambuae Tūpa reroyasar” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipape Tūpa remimbotar rupi ēgüe ehi avei oreu yuvireco. ⁶ Evocoiyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yīpīndar ahe osose pe pāhuve, ahe pe pītivi imboipi āgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecua, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

⁸ Ndahei pe cuaisa pīpe aipo ahe pēu, che rumo ‘toicua ambuae ava rembiapo oquerēhisa pīpe oyapo vahe yuvireco’ che yapave. Sese niha peicuara, supi eté vahe

pîha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secói viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pêu mbahe aviye âgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querêhisa pipe peyapo. ¹¹ Cûritei pemboaviye catu pe porerecosa pe querêhisa yipindar pe reco vahe pipe; pemondoñora mbahe peicatugüer rupi. ¹² Esepia, acói que ava omondo pota vahe mbahe, Tûpa oipisi ahe iporerecosa que mbahe virecomi vahe; ahe rumo ndoporandui mbahe ndayarecói vahe rese yandeu.

¹³ “Toyemombaraisu ava pîtiviisa pipe yuvireco” ndahei rumo pêu. ¹⁴ Cûritei mbahe pe rembiereco eta pipe peipîtivi catu ambuae ava ipane vahe mbahe yuvireco chupe. Virecomise mbahe, ahe avei pe pîtiviira yuvireco pêu mbahe ipanese. Evocoyase pe recocuer oyoya tupri itera. ¹⁵ Inungar Tûpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acói moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tûpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerêhi oso âgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pîsirosa rese yuvireco. ¹⁹ Sese opacatu oiporavo yuvireco ore rupi iguata âgua ore pîtivi vahe ñehe avei co porerecosa reraso âgua. Ore êgüe orohe oroico yande Yar mboetei âgua rese ‘toicua ore querêhisa pipe ité oroporopîtivi yuvireco’ ore yapave. ²⁰ Ore ndoroipotai que ava oñehe tēira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tûpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboyecua ité oreu oquerêhisa opacatu mbahe güembiapo pipe. Ahe cûritei iquerêhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco pêu, “Ahe oyoya Pablo rese oporaviqui vahe pe pîtivi âgua” peyeñora. Acoi oporanduse avei ambuae yande rivri rese yuvireco pêu, “Ahe ambuae Jesús reroyasareta remimbou Cristo mboeteisar yuvirecói” peyeño aveira chupe. ²⁴ Sese, pe recocuer cua âgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovîhase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo ñahehe iri pêu. ² Esepia, che aicua pequerêhi ité ipîtivi âgua. Evocoyase che viharetasa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pîtivi âgua cuese ambuae araviter suive yuvireco” ahe yuvireco chupe. Evocoyase pequerêhise ité ipîtivi âgua, ahese setaño ité oyemonguerêhi yuvireco. ³ Che rumo amondo co yande rivri yuvireco pêu cûritei ‘êgüe tehi tēi eme che ñehesa aviye vahe sesendar yuvireco’ viya pêu. Pe yemoingatu tupri âgua ité aipo ahe pêu; ⁴ aní acói arasose Macedonia pendar cheyeupi, sembiepiave ndapeyemoingatu vîtei chira peico. Êgüe peyese ore mochi guasu uca tiêtera peye. Esepia, che ayeroya ité pe rese. Pe avei evocoyase pechîra. ⁵ Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuviraso âgua pe piri pe pîtivi âgua co porerecosa aviye vahe monuha âgua rese, acói cuese pe remimombehugüer rupi. Evocoyase ahe

pe porrecosa pe remimonuha opara pemoingatu tupri ité pe avagüer mboyecua água, ndahei chira rumo pe recatêhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepei-pei iya opihañemoñetasa rupi omondora oporrecosa Tūpa upe yuvireco, ndahei chira opiha víracuasa pipe tēi iyavei ndahei chiaveira ambuae ava ocuai pīratasa pipe tēi. Esepia, Tūpa osaisu ava oviharetasa pipe omondo vahe oporrecosa chupe. ⁸ Tūpa niha oicatu opacatu mbahe aviye vahe mondo água pēu ari yacatu rupi pereco vahe rā opacatu mbahe ipane vahe pēu iyavei sumbirer pipe opacatu ambuae mbahe aviye vahe rese pe poropītivii água. ⁹ Inungar icuachiapri pipe aipo ehi:

“Ahe iporereco ai iparaisu vahe rese yepi. Ahe mbahe aviye vahe sembiapo nocañii chietera” ehi.

¹⁰ Tūpa niha ombou mbahe rāhii ava remitira, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pītivii água. ¹¹ Tūpa ombou catura opacatu mbahe pe rembierecorā ava upe imondo catu água pe avasa pipe. Ore orovirasose porrecosa pe remibou yande rivireta upe, ahe evocoyase, “Aviye ndeu” ehira Tūpa upe yuvireco. ¹² Esepia, co pemondo vahe yande rivireta pītivii água, ndahei peipītivii mbahe ipane vahe rese güeraño, ichui avei niha, “Aviye Tūpa upe” ehira yuvireco. ¹³ Ahe evocoyase omboeteira Tūpa yuvireco. Esepia, co pe poropītiviiisa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porrecosa chupe iyavei opacatu ambuae ava upe. ¹⁴ Evocoyase ahe oyoquirā pe rese iyavei pe raisu etepirā yuvireco. Esepia, Tūpa pe pītivii eté oporovasasa pipe. ¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri água!

10

Pablo cuaita apóstol seco água

¹ Che Pablo añehe Cristo poroaisusa, seco asiêhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe pīratá iteanga” aipo ehi tēi yuvireco cheu viña. ² Che rumo asose pe repia, ndaipotai che pīratasa mboyecua água pe pāhu pendar upe. Amove rumo ava pe pāhu pendar ipihañemoñeta: “Oyapo mbahe co ivi pipendar pihañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe pīrata vahe rā. ³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa pīratasa mbahe tēi seco pīrata vahe recopi água ava aracuasa tēi recopi água avei. ⁵ Ahe ipipe ore opa orosecopi yepoepi-episa iyavei opacatu semiramira tēi vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava pihañemoñeta raisa orosecopi Cristo reroya tupri água yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi água. Pe rane rumo peroya tuprira.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayecomboivate che mborerecuasa rese pēu viña, ipipe rumo nachí eté. Esepia, yande Yar ombou mborerecuasa cheu pe recocuer moviracua tupri água, ndahei rumo pe recocuer momara água. ⁹ Aní chira, “Pablo yande mbosiquiye pota güembicuachía pipe” peye cheu. ¹⁰ Esepia, amove ava pe pāhu pendar, “Oñehe oicuachía vahe ombou yandeu, ahe ipīratá, yavai avei yandeu; ahe ité rumo aní angai vahe secoi yande pāhuve iyavei ñehe êgüe ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise,

inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tẽi oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapirasai chietera ore cuaita ore yeecomboivatesa pipe. Tũpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei. ¹⁴ Ore rumo ndoroyapirasai ore cuaita mombehusa icuachía pẽu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pẽu. ¹⁵ Ndoroyapirasai avei ore ñehe pipe ambuae ava poraviquisa sui tẽi. Ore rumo, orosãro ore oroporaviqui catu vaherã pe pãhuve Tũpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosãro ñehesa pĩsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tẽi oroyecomboivate oroico.

¹⁷ Acoi ava oyeecomboivate pota vahe, toyecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe osẽ tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osẽ tupri güecoãhasa sui.

11

Pablo iyavei apóstol angahu tẽi yuvirecoi vahe

¹ ¡Peñemosa iriñomi tẽira cheu co che ñehe ndayaracuai vahe nungar pipe che ñehese! ² Esepia, che cherecatẽhi ité pe rese, ahe tecatẽhisa ou cheu Tũpa sui. Che aipota Cristo upe opomondo vaherã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pĩhañemoñetasa rerova ãgua Cristo mboeteisa supi eté vahe sui. ⁴ Esepia, peñemosaño ava oñehe vahe pẽu ambuae Jesús rese ndoyoyai vahe ore remimombehu rese. Ichui peipisi pe querẽhisa pipe ambuae espíritu peipisi vahecuer sui. Iyavei ambuae ñehesa pĩsirosa resendar peipisi avei ndoyoyai vahe ore pẽu oromombehu vahe rese. ⁵ Che rumo namohai eté ivi coti catu tẽi aicora evocoi supi peguata vahe apóstol yemboivate ai tẽi vahe sui. ⁶ Yepe ndayembohei che ñehe tupri ãgua ité, che rumo areco che mbahecuasa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa pĩsirosa resendar pe cheu imboepi ãgua; pe recocuer mboivate catu ãgua rumo Tũpa rovaque ãgüe ahe che reco yemominisa pipe. ¿Mbahe tẽi pĩha ayapo ãgüe ahese pẽu? ⁸ Aipisi ambuae ava Jesús reroyasar sui guarepochi, pe recocuer rese che poraviqui ãgua. ⁹ Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgüe ahe che pepoisupave pe mañecoẽhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaherã co che viharetasa che sui yuvireco. ¹¹ ¿Mbahe rese pĩha aipo ahe pẽu? ¿Pe raisuẽhisave pĩha? ¡Tũpa rumo oicua che pe raisusa!

¹² Ayapoño itera rumo co mboraviqui cheu imboepiẽhisa pipe vichico co ambuae pe pãhu pendar ava pe mbopaẽhi ãgua yuvireco. Esepia, che nungar yuvirecoi pota tẽi viña. ¹³ Ahe rumo ndahei apóstol supi tupri vahe yuvirecoi, ahe oporombopa tẽi, “Ore apóstol oroico” ehi tupri tẽi yuvireco. ¹⁴ Yaicua niha Carugar rerecuar oporombopa. Esepia, oyeapo inungar Tũpa rembiguai amove. ¹⁵ Sese yaicua avei Carugar povri pendar oporombopasa pipe oyeapo inungar Tũpa ñehe mombehusar yuvireco. ¡Ahe chupe rumo oimera Tũpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pēu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañeheño ayase ndayaracuai vahe nungar, che avei evocoyase tayeecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. ¹⁹ Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe. ²⁰ Pe niha pemboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe reroirosar, que pe rova pete-petesar avei. ²¹ Che chīsa pipe aipo ahe co imombehu, jore reco mbegüe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase ēgüe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ivira pipe, ñepei rupi evocoyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepei pītu, ñepei ari avei avevui tēi para guasu aviter rupi vichico. ²⁶ Setá aguata opacatu rupi, iyavei ïai rupi mbahe-mbahe tēi oime cheu, aico avei imonda rai vahe pāhuve; che mu judío mbahe tēi vahe pāhuve avei aico iyavei ndahei vahe che mu pāhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuve aico. ²⁷ Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporēhi iyavei husei; setá rupi ndacarui; sōhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. ³⁰ Iyase che yeecomboivate ai āgua cheu, co mbahe omboyecua vahe che pīrataēhisa rese ayeecomboivate aiño itera. ³¹ Yande Yar Jesucristo Ru Tūpa, ahe imboeteipri apirēhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaherã che roquenda āgua yuvireco viña; ³³ oime rumo ava iruova guasu pipe che mogüeyi vahe tecua āchisa metana rupi yuvireco. Ēgüe ahe añemi ichui yuvireco.

12

Tūpa omboyecua Pablo upe mbahe querais nungar pipe

¹ Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cūrtei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihã güeraño tie revo. Tūpa rumo oicua. ³⁻⁴ Che rumo, “Ēgüe ehi tie revo oico” ahe aipo mbia upe, Tūpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tēi upe ndipotasai imombehu āgua yuvireco. ⁵ Evocoi

nungar mbia rese ayecomboivatera; cheyese ité rumo ndayecomboivate ai chira. Che recocuer nipiratai vahe reseño ãgüe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rãgüer sui’ viya. ⁷ Sese che yemboivate aiñhi ãgua che quer nungar mbahe che pihamondi vahe rembiepiagüer rese Tũpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tẽi che rereco vahe. ⁸ Mbosapi yupagüer yande Yar upe aporandu ité teco asisa che sui serocua ãgua rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosã ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboiha catuño itera che reco nipiratai vahe rese. ãgüe ehira Jesucristo pĩratasa oyecua che rese. ¹⁰ Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara ãgua yuvireco iyavei que mbahe yavai vahe aiporarase Cristo sui. Esepia, ayanduse che pĩratañhisa, ahese che pĩrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo ãgüe ahe. Iya rumo peñehe tuprira che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco. ¹² Che ñemosã tupri pipe mboraviqui ayapo pe pãhuve. Ayapo mbahe poromondiisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vahe rã rese. ¿Ayavi tie che cuaita, ãgüe ahese pẽu? ¡Peñero sese cheu!

¹⁴ Cũritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepia omonuha guarepochi guahir upe, ndahei tahir tẽi ãgüe ehi oyepia upe yepi. ¹⁵ Evocoyase che querñhisa pipe amondora opacatu che mbahe areco vahe pe pĩtivii ãgua iyavei opacatu che recocuer rese ayemondo pẽu pe reco tupri ãgua. Che rumo opoaisu ité, pe tie revo ndache raisu tupri eté peye.

¹⁶ Cheu mbahe ipanese, ndaporandui eté mbahe pereco vahe rese pẽu. Amove rumo ava, “Yande mbopa ãgua tẽi ãgüe ehi Pablo yandeu” ehi tẽi yuvireco. ¹⁷ ¿Opombopa uca tie ava pẽu che remimondo pipe? ¹⁸ Che Tito upe, “Eresora ipiri yuvireco” ahe. Supi avei ambuae yande rivri Tũpa reroyasar amondo. ¿Pembopa tie Tito? Oyoya tupri mbahe oroyapo Tũpa upe ñepe ore pihañemoñetasa pipe.

¹⁹ Che rivireta, che rembiaisu, pe revo pepihañemoñeta ore oroicuachia co pẽu, ore yoepi ãgua tẽi. ãgüe ndorohei eté rumo. Ore rumo Cristo rese ore reco pipe oroñehe Tũpa rovaque. Opacatu ité niha mbahe oroyapo pe recocuer moviracua catu ãgua. ²⁰ Che asiquiye asose eipeve pe repia, aviyeteramo ndahei chira che pihã rupi pe recocuer. Iyavei pe aviyeteramo ãgüe peye aveira che repiase. Che asiquiye ité, oime revo pe pãhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pãhuve ava oyeupeño tẽi mbahe oipota vahe, imahechiroi ai vahe iyavei oñehe-ñehe tẽi vahe ambuae ava rese, seco ivate ai vahe iyavei ndiporoviroyai vahe. ²¹ Asiquiye avei aso irise pe repia, omboura Tũpa pe sui che chã ãgua, che mboyaseho uca tiẽtera peye setá pe cueseve peyemboangaipa vahe rese iyavei ndapemboasii etese mbahe tẽi, yemboaguasa-guasa tẽisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapí oicua vahe sembiapo ai. ² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pípe aicose pe píri. Cũritei amombri aico pe sui, amombehu irira rumo co pẽu. Co yipindar vahe upe iyavei opacatu ambuae angaipa pípe yuvirecoi vahe upe aipo ahe: aso irise pe pãhuve, ndopoparaisuereco iri chira. ³ Esepia, pe peipota ité che recoãha ãgua ‘¿Cristo ité pĩha omoñehe uca?’ pe yapave cheu. Cristo ndaseco mbegüemi pẽu mbahe apo oico. Ahe rumo omboyecua opĩratasa pẽu. ⁴ Supi eté niha ahe yaticasa, inungar ava nipiratai vahe. Cũritei rumo ahe oicove Tũpa pĩratasa pípe. Ëgüe orohe avei ore seco pĩrataẽhisa sereco. Oroicose rumo sese oroico Tũpa pĩratasa pípe pe rese hañeco ãgua.

⁵ Pemahecua tupri catu pe recocuer rese: ¿peico ité pĩha pe Cristo rese yeroyasa pípe? ¿Ndapeicuai vo Jesucristo secoise pe rese, pesẽse pe recoãhasa sui? ⁶ Pe revo peicua ora ndorocañi tẽi vahe oroico ore recoãhasa pípe. ⁷ Iyavei oroyerure pe rese Tũpa upe ‘toyapo eme mbahe tẽi yuvireco’ ore hesave. Ndahei rumo ore ivate catu vahe mbahe tẽi rasa pare mboyecuasave ãgüe orohe; co catu ‘toyapo mbahe aviye vahe yuvireco’ ore yapave, yepe pẽu ndoyavii orocañi tẽi vahe oroico viña. ⁸ Esepia, ndiyai mbahe supi tupri vahe amotarẽhi ãgua oreu; ãgüe ehi rumo sese catu ité oroñehe. ⁹ Sese orovihaño ité norepĩratase, ore rumo oroipota ité pe momirata; iyavei ore oroyerure catuño itera pe recocuer catupri catu ãgua rese. ¹⁰ Aicuachía co che ñehe imondo pẽu pe píri che so ãgua renonde. Acoi asose, namboyecua pĩratatai chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

¹¹ Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerẽhi catu, oyoya guasu peico tupri avei peyese mbahe tupri pípe. Evocoyase Tũpa oporoaisusa pípe, güeco tuprisa pípe avei secoira pe rese. ¹² Pemombehu che mahenduhasa ñepeipei peyeupe pe yeovaupitesa pípe. ¹³ Opacatu ambuae yande rivri, Tũpa reroyasar avei omondo omahenduhasa yuvireco pẽu.

¹⁴ Peipisi yande Yar Jesucristo porovasasa, Tũpa poroaisusa iyavei Espíritu Santo tasecoi opacatu pe rese. Aipo rupive che ñehe pẽu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco ãgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohava oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri ãgua. ⁴ Ahe acoi oyemondo vahe omano ãgua yande angaipá repirã. Ëgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboeteipri apirēhi Tu tasecoi!

Ndipoi ambuae ñehesa poropisirosa resendar

⁶ Che pihamondi etepri peye. Esepia, peyepēpi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro ãgua peico viña. ⁷ Supi eté ndipoi ambuae ñehesa pīsirosa resendar. Ëgüe ehi rumo, oime ava pe mañeco tēi vahe pe mbopa ãgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropisirosa angahu tēi rese ndoyoyai vahe che ñehesa rese pesendu vahe yipisive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iba pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he ãgua cheu, Tūpa rumo aseca cheu aipo he ãgua. Esepia, java remimbotar rupi tēi mbahe ayapo vitesē, evocoyase ndahei chietera Cristo rembiguai aico viña!

Mara ehi Pablo apóstol güeco ãgua

¹¹ Che rivireta, tapeicua co ñehesa poropisirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesē aracaco. Che pīratasa pipe tēi aseca opacatu Tūpa rembiporavo Jesús reroyasar momara ãgua. ¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. ¹⁵ Tūpa rumo yipive che ha vitéhiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ëgüe ehi ahe oicua uca Guahir cheu, che imombehu ãgua co ñehesa Tahir recocuer resendar ava ndahei vahe judío upe. Ndasoi rumo ava tēi upe icua ãgua; ¹⁷ ndasoi avei Jerusalén ve yipive apóstol yuvirecoi vahe repia ãgua. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi. ¹⁹ Ndasepiai eté rumo ambuae apóstol. Yande Yar rivri Santiago güeraño asepa. ²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo ãgua, cūrítei omombehu Jesucristo reroya ãgua oico” ehi, “Ahe acoi yipindar yande mocañi

pota rai vahe oico” ehi yuvireco cheu. ²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vaherā. Evocoyase amombehu co ñehesa poropisirosa resendar chupe yuvireco acoi amombehu vahe ava eta ndahei vahe judío pāhuve. ³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore rero yevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa pīsirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuita virecora ivate yuvireco viña. Che rumo nañecuñaroi chietera che recocuer sui. Esepia niha, Tūpa ndahei ava rete tēi osepia.) ⁷ Ahe rumo oicua yuvireco Tūpa che cuai oñehengagüer poropisirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropisirosa resendar mombehu āgua judío upe. ⁸ Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiha rupi eté ore oroporaviqui vaherā ava ndahei vahe judío pāhuve oroico, inungar ahe oporaviqui judío pāhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaisu vahe pītivii āgua rese” ehi. Yipive ité rumo che ēgüe ahe pota vichico yepi.

Pablo oñehe pīrata Pedro upe sembiavi rese Antioquía ve

¹¹ Iyavei orose Pedro tecua Antioquía ve. Aheve oyavi güecocuer. Evocoyase añehe pīrata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocarar iri ipiri. Esepia, ahe Jesús reroyasar judío yugüeru vahe “judío recocuer rupi yaguatara yande ñepisiro āgua” ehi vahe ité yuvireco viña. ¹³ Evocoyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi. ¹⁴ Che asepiase rumo, ndahoyoyai secocuer yuvireco co ñehesa poropisirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cūrítei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca āgua” ahe chupe.

Judío, ndahei vahe judío oyoya oñepisiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cūrítei rumo yaicua, ndipoi eté que ava seco catupri vahe Tūpa rovaque Moisés porocuita mboaviyesa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tūpa

he āgua yandeu. Ēgüe ehi eté seroya pīpe, ndahei acoi porocuita tēi reroyasa pīpe. Esepia, ndipoi chietera que ñepeí ava seco catuprī vahe Tūpa rovaque evocoi porocuita tēi aposa pīpe.

¹⁷ Yasecase yande reco catuprī āgua Cristo rese yande yeroyasa pīpe, ipīpe yaicuase angaipa viyar yande reco, ¿Cristo pīha evocoyase yande mboangaipa? ¡Aní eté! ¹⁸ Che amocañise mbahe, ipare rumo amopuha irise, che evocoyase ayemboangaipa ipīpe. ¹⁹ Esepia, ndaicutise Moisés porocuita reroya tuprī che ñepisiro āgua, ahese ocañi tēi vahe aico ipīpe. Ichui rumo Jesucristo reroyasa pīpe asupiti Tūpa upe nara che recove āgua. Esepia, che aviye yaticapri aico Cristo rese. ²⁰ Sese ndahe iri che ité aicove; Tūpa Rahir Cristo rumo che rese secoi. Sese ité ayeroya che retecuer pīpe che recove āgua. Ahe niha oyemondo omano āgua che raisupave. ²¹ Naroíroi eté co Tūpa porovasasa. Esepia, ava seco catuprira Tūpa rovaque porocuita tēi reroya pīpe viña, evocoyase Cristo mano agüer ēgüe ehi tēi etera viña.

3

Porocuita iyavei yeroyasa

¹ ¡Ndapembahecuaí eté pe Galacia pendar! Pe ndoyavií ipaye vahe remimbopa peico. Oromombehu tuprī niha pe rovai eté acoi Jesucristo curusu rese yatica agüer pēu. ² ¡Pemboyecua co che porandusa cheu! ¿Moisés porocuita mboyeroya pīpe pīha peipisi Espiritu Tūpa suindar, co ñehesa pesendu vahecuer reroya pīpe tie? ³ ¡Ndapembahecuaí eté! Yipindar Espiritu pīpe pemboipi Cristo rupi pe guata āgua. ¿Ēgüe peye aveira pīha pe pīratasa pīpe tēi pe guata tuprī āgua Cristo rupi cūrítei? ⁴ ¿Ndape pītiviimi eté vo acoi opacatu pe paradisusa Cristo recocuer rese? ¡Pe pītivimira tarahu viña! ⁵ Tūpa niha omondo oEspiritu pe rese iyavei oyapo poromondiisa pe pāhuve. ¿Mahera pīha oyapo? Esepia, co ñehesa pesendu vahe peroya ité, sese ēgüe ehi pēu ndahei Moisés porocuita tēi reroya pīpe.

⁶ Esepia, aracahe Abraham oyeroya ité Tūpa rese, ipīpe sui Tūpa oipisi seco catuprī vahe nungar oyeupe nara. ⁷ Sese iya ité peicuara opacatu acoi oyeroya vahe Tūpa rese yuvireco, ahe Abraham suindar supi tuprī vahe. ⁸ Iyavei Tūpa Ñhengagüer icuachiapri pīpe omombehu ité senondeve Tūpa oipisi aveira opacatu oyese oyeroya vahe ndahei vahe judío co ivi pīpendar oyeupe nara. Iyavei omombehu co ñehesa icatuprī vahe Abraham upe: “Opacatu ava ivi pīpendar sovasapriira yuvireco nde sui” ehi. ⁹ Evocoyase Tūpa osovasara cūríteindar oyese yeroyasareta inungar Abraham aracahe.

¹⁰ Acoi seco catuprī pota vahe Moisés porocuita pīpe tēi yuvirecoi vahe, ahe Tūpa ñemoirosavrive tēi yuvirecoira. Esepia, icuachiapri arachendar pīpe aipo ehi: “Opacatu ava nomboaviyei vahe ité opacatu Tūpa porocuita icuachiapri pīpe yepi, ahe iñemoirosavrive tēi yuvirecoira” ehi. ¹¹ Sese, co omboyecua tuprī yandeu ndahei Moisés porocuita reroyasa pīpe tēi Tūpa, “Co seco catuprī vahe” ehi ava upe. Esepia, icuachiapri arachendar pīpe aipo ehi: “Acoi ava seco catuprī vahe oicovera Tūpa rese oyeroyasa pīpe sui” ehi. ¹² Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pīpe, tomboaviye tuprī ité opacatu porocuita güecove āgua” ehi.

¹³ Moisés porocuita mboaviyeēhisa pīpe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirã. Esepia, icuachiapri arachendar pīpe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipīpe sui yande opacatu yaipisi Espiritu imombehupri yayeroyase Cristo rese cūrítei.

Porocuita iyavei Tūpa güemimombehugüer omboaviye vaherã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepei reseve oicuachiase güemimbotar omombehu vahe, ahese ndipoi que ambuae ava omboyeho vaherã iyavei ndipoi que ambuae ava omboyeapí iri vaherã. ¹⁶ Ëgüe ehi avei Tūpa remimombehugüer Abraham upe aracahe. Esepia, oñehe ñepei reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehi upe viña. Ëgüe ehi rumo, “Nde suindar upe ité” ehi ‘ñepei ava’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pëu: evocoi porocuita Tūpa ombou vahecuer cuatrocientos treinta araviter pare, ndoicatui chietera Tūpa ñepei reseve Abraham upe omombehu vahecuer iyavei oñehe omboaviye vaherã mboyeho água. ¹⁸ Supi eté acoi Tūpa suindar ou vaherã porerecosa Moisés porocuita mboaviyesa pipe suise viña, ahese ndahei chiaveira Tūpa remimombehugüer sui. Ahe rumo ñepei reseve Tūpa remimombehugüer rupi Abraham upendar porerecosa.

¹⁹ ¿Mahera pñha evocoyase aviye Moisés porocuita? Esepia, ava poreroyaëhisa cua água Tūpa ombou oporocuita Moisés upe aracahe. Co porocuitavrive rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembiguai íva pendar oporocuita mombehu água Moisés upe aracahe ‘tomombehu evocoyase Moisés che porocuita opacatu ava upe’ oyapave. ²⁰ Ñepei ava rese oñemoñetase, ndipotasai ambuae imoingatu água. Tūpa niha ñepei vahe secoi.

Mbahe sui Tūpa ombou oporocuita

²¹ “Moisés porocuita co coti tēi Tūpa remimombehugüer imboaviyepirã sui” aipo ndahei eté pëu. Esepia, acoi Tūpa omondose que porocuita ombou vaherã tecovesa apirēhi ava upe imboaviyesa pipe, evocoyase porocuita reroya pipe yande reco catuprira Tūpa rovaque viña. ²² Icuachiapri aracahendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ëgüe ehi, Jesucristo rese yande yeroyasa pipe yasē vaherã ichui mbahe imombehupri pisi água.

²³ Yipindar rumo mbiguai nungar yaico Tūpa nomboyecua viteise Guahir rese yande yeroya água. ²⁴ Inungar chñhivahemi tēi, ëgüe yahe porocuitavrive yaico yipindar. Ahe porocuita rumo yande mbohe Cristo yu água ‘toyeroya Cristo rese güeco catupri água curi’ oya yandeu. ²⁵ Cūritei rumo oime Jesucristo rese yeroya água cute. Evocoyase ndahe iri ahe porocuitavrive yaico. ²⁶ Pe niha opacatu Tūpa rahir peico Jesucristo rese yeroya pipe. ²⁷ Opacatu pe ñapiramombri peico vahe Jesucristo rupi pe guata água, secocuer avei pereco. ²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepei vahe nungar ité yaico Cristo rese. ²⁹ Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerecosa yandeundar.

4

¹ Amboyoapí vitera co che ñehesa pëu: inungar que ava omanose, oseyá ombahe eta guahir upe chñhivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guãrosar povrive secoi imboyeroya água. Ocuacuase voi eté, opoira tu remimombehugüer rupi ichui. ³ Ëgüe ehi avei yandeu. Yande chñhivahemise, evocoyase mbiguai nungar yipindar vahe co ivi pipendar porocuitavrive yaico. ⁴ Oyepotase rumo ari imombehupri, Tūpa ombou Guahir, ahe oha cuña sui; evocoyase ahe Moisés porocuitavrive secoi. ⁵ Ëgüe ehi ou opacatu yande renose água evocoi mborocuitavrive sui Tūpa rahir ité yande reco água.

⁶ Evocoyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he āgua chupe. ⁷ Sese yande Tūpa rahir ité yaico, ndahe iri cūrítei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe. ⁹ Cūrítei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi pīha oyevī iri mborocuaíta tēi pipe mbiguai tēi güeco iri āgua yuvireco?” ahe pēu. ¹⁰ Esepia, pemboetei vite ari, yasi, araviter pieta eta tēi peico. ¹¹ ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuaíta povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu. ¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu. ¹⁴ Yepe co che mbaherasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no. ¹⁵ ¡Mahera ru cūrítei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. ¹⁶ ¡Evocoyase cūrítei che amotarēhi tie peye acoi pēu mbahe supi tupri vahe mombehusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepipi āgua tēi ore sui yuvireco pe querēhi āgua supi. ¹⁸ Aviye ité niha yande querēhise mbahe apo ambuae ava upe, mbahe aviye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave pēu. ²⁰ Cūrítei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pēu.

Agar, Sara recocuer resendar yembohesa

²¹ Pe peroya pota vahe Moisés porocuaíta pe reco catupri āgua, pemombehumi cheu: ¿Ndapesenducuai tie co mborocuaíta aipo ehi vahe? ²² Esepia, aipo ehi: Abraham aipo vireco ñuvirío guahir, ñepeí tahir aipo sembiguai Agar membri, ambuae tahir evocoyase sembireco Sara membri. ²³ Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté. ²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuaíta imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuaítavriye yuvirecoi. Ēgüe ehi avei opacatu Moisés porocuaíta pipendar, yuviroha mbiguai nungar güeco āgua, opacatu ichuindar ēgüe ehi vite yuvireco. ²⁶ Yande rumo inungar-ra que Jerusalén íva pendar suindar yaico viña ēgüe yahe yaico mbiguaiēhi. ²⁷ Esepia, icuachiapri arachendar pipe aipo ehi: “Eyembovihareté, cuña nimembii vahe; esapucái nde rorivetesá pipe, nde ndereiporarai vahe nde membri rasicuer. Esepia, acoi cuña seyapri imembii ati catura cuña omer vireco vahe sui” ehi.

²⁸ Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi. ²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu pīratasa pipe sui oha vahe; cūrítei ēgüe ehi tupri avei. ³⁰ ¿Mara ehi icuachiapri arachendar pipe? “Pemboyepipi pe rēta sui cuña mbiguai tēi imembii reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisi āgua yuvireco” ehi. ³¹ Sese,

che riviřeta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pipe pe recoēhi āgua

¹ Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

² Pesendu che ñehe. Che, Pablo, aipo ahe pēu: acoi peyembocircuncida ucase, ahese ēgüe ehi tēi vahe Cristo pereco. ³ Che amombehu pota irimi pēu, que ava oyembocircuncida uca vahe, vireco niha ocuita opacatu Moisés porocuita mboyeroya āgua. ⁴ Pe pereco catupri pota tēi vahe Tūpa rovaque evocoi porocuita tēi reroya pipe, peyepipi ité Cristo sui. Evocoyase Tūpa porovasasa avei pemocañi tēi peyesui. ⁵ Yande rumo yande querēhisa pipe yayeroya yande reco catupri āgua rese. Ēgüe yahe Espiritu yande pītivīsa pipe iyavei Jesús rese yeroyasa pipe avei. ⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pītivī eté yande reco catupri āgua Tūpa rovaque. Co güeraño rumo yande pītivī Jesús rese yande yeroyasa. Ahe niha yande mboyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu! ⁸ Ndahei eté rumo pe poravosar Tūpa ēgüe ehi pēu. ⁹ ¿Ndapeicuai vo acoi aipo ehi vahe: “Chīhimi pan mboapeposa oso panguā rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pīhañemoñeta āgua che pīhañemoñetasa rupi. Tūpa rumo omboura oñemoirosa que ava pe mbopīhañemoñeta yoavirati uca vahe upe.

¹¹ Che rumo, che riviřeta, “Iya yayembocircuncida yande reco catupri āgua” ahe vītese Jesús reroyasar upe viña, ahese revo ndipoi chira che amotarēhisar judío pāhuve, ahese avei ndipoi chira ñehesa curusu rese Jesús manosa resendar amotarēhimbar ipāhuve viña. ¹² Evocoi ava pe mbopīhañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepepe reseve yuvireco!

¹³ Esepia, pe ore riviřeta, Tūpa niha pe renoi mbiguai tēi nungar pe recosa sui pe renose āgua. Ndahei chira rumo pe remimbotarai tēi apo āgua, iyacatu rumo peñepitivīra pe yeaisusa pipe. ¹⁴ Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. ¹⁵ Peyeseño tetei rene catu; peicua catu, aviyeteramo ēgüe peyese, pe recocuer pemomarpa tiētera.

Yaguatara Espiritu remimbotar rupi, ndahei yande remimbotar tēi rupi

¹⁶ Pesendu che ñehe: Espiritu pīratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tūpa Espiritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeupe. ¹⁸ Acoi Espiritu ité pe reroguatase, ahese ndahe iri chiaveira Moisés porocuitavri peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pīhañemoñeta yoyaēhisa, ²¹ iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborerecuasave yuvireco curi.

²² Yayapose rumo Espiritu remimbotar, yande evocoyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboyecuara yande cuaita mboaviyesa, ²³ yayemominiñora iyavei yande

recorã rese yañearo tuprira. Evocoi nungar yayapose, ndipoi eté que mborocuaita pîpe yande yeamotarêhi ãgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pîpendar têi oyesui yuvireco, güemimbotarai, opihañemoñeta raisa avei no. ²⁵ Yande yaicose Espíritu pîratasa rese, ahese Espíritu rupi eté yaguarata.

²⁶ Ndayayemboivate ai chira. Esepia, ipipe sui yayeamotarêhi, yaipota rai avei yande mboetasa recocuer nungar yande reco ãgua.

6

Peñepitívii ñepei-peí

¹ Che rivireta, acoi que Jesús reroyasar pe pãhu pendar oyavise güecocuer, pe peico vahe Espíritu rese, peipitívii secocuer moingatu ãgua pe recocuer mbegüemisa pîpe. Pe-icua catura rumo, aviyeteramo oyoya voi peyemboangaipa uca tiêtera. ² Peñepitívii-tívii catu que mbahe yavai rai vahe rese. Êgüe peyese, Jesucristo porocuaita pemboaviyera.

³ Amove ava, “Che ivate catu vahe aico” ehi têi. Êgüe ehi rumo ahe ae oyembopa aipo ohesa pîpe oico. ⁴ Sese niha ñepei-peí eté yaicua tuprira yande recocuer. Aviyese, evocoyase sese yaviharetera. Ndahei acoi ambuae ava recocuer rese têi yambooyara yande recocuer. ⁵ Esepia, ñepei-peí eté yande yacatu yareco yande cuaita imboaviye ãgua.

⁶ Acoi oyembohe vahe Tûpa ñehe pîsirosa resendar rese, tomondo ombohesar upe mbahe güembiereco ipitívii ãgua.

⁷ Peyembopa eme catu pe ae. Ndipoi chietera que ava viroïro vahe Tûpa ñemoirosa pîsiêhisa pîpe. Êgüe ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pîpe, ahe oipisira cañisa apirêhi vahe. Acoi oyapo vahe mbahe Espíritu remimbotar rupi, ahe oipisira tecovesa apirêhi vahe yuvireco. ⁹ Evocoyase tayandecuerai eme mbahe tupri aposa pîpe. Esepia, acoi ndayandecueraise, yaipisira mbahe tupri apo repri. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pëu! ¹² Acoi judío Jesús reroyasar pe mbocircuncida uca potaño têi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pîpe têi êgüe ehi yuvireco viña. Esepia, ndoipotai evocoi judío oamotarêhi co ñehesa Cristo atica agüer mombehu pîpe yuvireco. ¹³ Acoi oyembocircuncida uca têi vahe avei rumo nomboaviyei eté opacatu mborocuaita yuvireco. Oipota rumo pe mbocircuncida ucara oyemboivate ai ãgua pe cuaise evocoi nungar apo yuvireco. ¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pîpendar mbahe pota raisa opa ité che sui. Che evocoyase inungar omano vahe aico chupe. ¹⁵ Yepe que yayembocircuncidase revo, anise que ndayayembocircuncidaise viña, ndayande pîtívii eté Cristo rese yaico tupri ãgua. Co rumo aviye vahe ité yandeu: Tûpa yande recocuer mbopiasuse. ¹⁶ Opacatu yuvirecoi vahe co ñehesa che remimombegüer rupi iyavei opacatu Tûpa upendar supi eté vahe toipisi Tûpa suindar teco tuprisa iyavei iporoparisuerecosa yuvireco.

¹⁷ Aviye, co pîpe suive ndaipota iri que ava che mañeco têi vaherã. Esepia, che areco che retocuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pëu pe Efeso pendar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri āgua pëu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipipe avei yipisuive yande pisi guahirguā Jesucristo yande pisirosa pipe güemimbotar rupi. ⁶ Sese yande yasapucái chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande pisiro Guahir ruvi piyeresa pipe yande angaipa rese ñero āgua. ⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaporā mboaviye āgua. ¹⁰ Oyepotase ahe ari imboaviye āgua, Tūpa opacatu mbahe iva pendar, co ivi pipendar avei opara omoingue ñepeí reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supi eté vahe pisirosa resendar, Cristo peroya pe piha pipe sese peico vaherā. Tūpa ombou güemimombehugüer Espiritu Santo pe piha pipe ‘cheundar ité yuvirecoi’ oya. ¹⁴ Ipišisa pipe niha yaicua yande yaipisi vaherā yandeundar mbahe imoingatupri, acoi Tūpa opase oipisiro ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar. ¹⁸ Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pendar iporañete vahe Tūpa upendar yuvirecoi vahe upe. ¹⁹⁻²⁰ Ipipe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave. ²¹ Osecomboivate catu opacatu iva pendar, ivi pendar seco ivate vahe mborerecuarecuar tēi pīratasa sui iyavei opacatu cūríteindar sui, que oime vaherā sui avei. ²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco āgua opacatu viroyasar upe. ²³ Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tūpa oporovasasa pipe yande pisiro

¹ Pe rumo, yipindar angaipa pipe peicose, inungar omano vahe peico Tūpa upe. ² Co ivi pipendar pihañemoñetasa rupi tēi peico iyavei ivate rupindar carugar rereciar porocuita tēi avei peroya, ahe Jesús reroyasarēhi ombohe vahe. ³ Yipindar opacatu yande avei yaguata yande remimbotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña. ⁴ Tūpa rumo yande paraisuereco ité, yande raisu etepri avei. ⁵ Yepe angaipa pipe yaico omano vahe nungar viña, ahe rumo ombou Guahir yande recove āgua. Ahe oporovasasa pipe yande pisiro. ⁶ Yande mbogüerayevi iri avei niha sese. Ipare seseve yande moingue oyepiri ivave ⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya. ⁸ Esepia, oporovasasa pipe pe pisiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerecosa pēu. ⁹ Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe. ¹⁰ Tūpa niha yande recocuer mohivi Jesucristo rese yande reco āgua mbahe icatupri vahe apo āgua. Ahe mbahe icatupri vahe yipisuive Tūpa omoime yande rembiaporã.

Cristo ombou yande reco tupri āgua

¹¹ Evocoyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipitivi āgua; ndaperecoi Tūpa iyavei ndaperecoi sãrosa pe ñepisiro āgua co ivi pipe viña. ¹³ Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuvipipe pe reru Vu Tūpa upe. ¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepe vahe nungar yande yeamotarēhiēhi iri āgua oyeupe. Yande ñemoirosa niha opa omocañi yande sui güetecuer mondosa pipe. ¹⁵ Cristo omomba opacatu Moisés porocuita. Ahe oipota ñepe vahe nungar teco piasu pipe yande reco āgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri āgua. ¹⁶ Evocoyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepe vahe nungar Tūpa rupi yande reco āgua.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombri vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vahe Tūpa rese Espiritu ñepe vahe pipe. ¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoyase ñepe reseve oñemu guasu vahe nungar yaico. ²⁰ Pe inungar tūparo maranehi imopuhambri ihivipirã hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, ēgüe yahe ipehapri yaico yande Yar upe nara sese ité yande reco āgua. ²² Sese niha, Cristo rese peicose, pe ambuae viroyasar rese avei sētarã nungar peico. Ipipe Tūpa, oEspiritu pipe, secoira.

3

Pablo cuaita ñehesa pisiroresa resendar mombehu āgua ava ndahei vahe judío upe

¹ Sese, che Pablo, soquendapri aico cohawe Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ēgüe ahe. ² Peicua tupri revo co che poraviquisa Tūpa ombou vahe cheu oporovasasa mombehu āgua pēu nara. ³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chīhi pēu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava yuvireco aracahe. Cūrítei rumo Tūpa oEspíritu pipe omboyecua güembipeha yuvirecoi vahe upe. Ahe sembipeha apóstol, ñehe mombehusar avei yuvirecoi. ⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropisirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer aracahendar peyeroyase Jesucristo rese.

⁷ Yepe ndiyai cheu viña, Tūpa rumo che moingo opīratasa pipe ñehesa pīsirosa resendar mombehu āgua. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu āgua ava ndahei vahe judío upe nara cheu. ⁹ Iyavei ombou che cuaitarā amombehu tupri vaheerā opacatu ava upe opacatu mbahe Aposar pīhañemoñetasa yipindar ndicuasai vahe. ¹⁰ Ēgüe ehi cūrítei oyesuindar aracuasa cua uca āgua viroyasareta recocuer rese opacatu mborerecuar guasu, seco pīrata vahe iva pendar upe. ¹¹ Ēgüe ehi, Tūpa opīhañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya āgua Tūpa rese yande siquiyeēhisa pipe. ¹³ Sese aní chira, ndapequerēhi iri Cristo rupi pe guata āgua, pe recocuer rese che yemombaraisusa sui. Iyacatu rumo che paraisusa pereco pe yembovīha āgua.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pāve vireco yuvireco, opacatu seroyasareta iva pendar, ivi pendar avei ñepe oñemu yuvirecoi vahe nungar. ¹⁶ Che aporandu chupe ‘tombou güeco porañetasa sui opīratasa yuvireco chupe oEspíritu pipe imoviracua āgua’ viya pēu. ¹⁷ Ēgüe ahe ayeroqui pe rese pe piha pipe Cristo rereco āgua sese pe yeroyasa pipe. Iyavei pe poroaisusa pipe pe yemoviracua catu āgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu. ¹⁹ Che ayeroqui ahe poroaisusa peicua tupri catu āgua rese (yepe ndayaicatui icuapa tupri āgua yaico viña). Ipipe sui Tūpa tasecoi pe rese.

²⁰ Cūrítei yamboetei yande Ru Tūpa. Esepia niha, ahe opīratasa pipe ombouvicha catu itera mbahe yande porandusa sui, yande pīhañemoñetasa sui avei yandeu. Esepia, opīratasa pipe oporaviqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaheerā!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tupri pe cuaita rupi Tūpa pe renoisa pipe” ahe pēu. ² Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe. ³ Peyapo opacatu pe recocuer pipe peico tupri vite āgua peyepāhuve Espiritu Santo pe pītiviisa pipe, pe reco tupri pipe avei. ⁴ Yaico ñepe nungar Cristo rese iyavei yareco ñepe Espiritu. Ēgüe ehi avei Tūpa yande poravo ñepe guārosa rereco āgua. ⁵ Oime ñepe yande Yar, ñepe yande yeroyasa, oime avei ñepe poroāpiramosa. ⁶ Oime ñepe Tūpa, ahe opacatu yande

Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepei-peí mbahecuasa ombou. ⁸ Sese aipo ehi icuachiapri aracahendar pipe:

“Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe. ¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya. ¹¹ Ahe niha ombou amove apóstol seco ãgua, ambuae upe ombou Vu ñehe mombehu ãgua, ambuae upe ombou ñehesa písirosa mombehu ãgua, ombou avei ambuae upe viroyasar rãro ãgua iyavei iporombohe ãgua. ¹² Ègüe ehi ava viroyasar mbohe oyeupe mboraviqui apo ambuae viroyasar moviracua tupri catu ãgua. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tüpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoyase ndahe iri chira chihivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. ¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rereciar secoi. ¹⁶ Esepia, ahe yande mboya tupri oyese, yande moenda tupri avei yande rereco, ègüe ehi ahe yande mboyemboya oyese ñepei vahe nungar. Ñepei-peí yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tüpa rer pipe pēu che pe cuaisa pipe: peico iri eme ava Tüpa cuaparēhi nungar. Ahe yuvirecoi vahe ité opihañemoñeta raisa pipe, ¹⁸ ndoicatuí mbahe renducua tupri ãgua iyavei ndovirecoi tecovesa Tüpa suindar oyese yuvireco. Esepia, ndoicuai Tüpa ñehe opihañemoñetaēhisa pipe yuvireco. ¹⁹ Ndoyuvinochi iri mbahe tēi apo ãgua iyavei oyemondo ité mbahe tēi pipe. Ndosiquiyei eté opacatu güemimbotarai apo ãgua yuvireco. ²⁰ Pe rumo ndapeyembohei eté evocoi nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese. ²² Ahe yande mbohe yande recocuerai yipindar vahe reya ãgua. Esepia, ahe naporai vahe yande mbopa tēi yande pihañemoñeta rai apo ãgua. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tüpa yande apo yande reco ivi tupri ãgua yande reco maranehi vahe rã supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepei-peí mbahe supi tupri vahe rese peyeupe. Esepia niha, yande opacatu ñepei ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Carugar upe peyeupe mbahe apo ãgua.

²⁸ Acoi imonda rai vahe, timonda iri eme; toporaviquiño ava iparaisu vahe pítivi ãgua.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu ãgua yuvireco yande Yar rese. ³⁰ Peyapoi rene mbahe Espiritu Santo mboviahēhi ãgua. Ahe niha Tüpa ombou yandeu ‘toicua ava co cheundar oipisira ari ipa vahe pipe poropísirosa ñepei reseve vahe yuvireco’ oya.

³¹ Peyepipi co nungar mbahe sui: piha viracuasa, mbahe mboasi pīratasa, ñemoirosa, pe rãse aisa, opacatu pe ñehe rai, opacatu ambuae mbahe-mbahe tēi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tüpa iñero Guahir Cristo rese pēu.

5

Mara ehira ava Tūpa rahir yuvireco

¹ Pe niha Tūpa rahir sembiaisu peico. Sese peyemonguerēhi catu secocuer moña āgua. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe siacua vahe chupe.

³ Pe niha Tūpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. “Aviye ndeu” peye catuñora rumo Tūpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive. ⁶ Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe. ⁷ Sese ndapeyemboyai chira evocoi nungar ava rese.

⁸ Peicua niha yipindar peico pitumimbisa nungar mbahe-mbahe tēi pipe. Cūritei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ivi tuprisave, mbahe supi tupri vahe pipe. ¹⁰ Sese peyembohe catu mbahe Tūpa piha rupindar apo āgua rese. ¹¹ Peyepipi ité opacatu pitumimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe. ¹² Esepia, ahe sembiapo yemochīsa ñomipri tēi vireco yuvireco. ¹³ Acoi yamboyecua ucase rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoāse pe oque vahe nungar, peyepipi omano vahe nungar pāhu sui. Ahese niha Cristo pe recocuer resapera” ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepi-pei ari yande Yar upe nara pe recoveseve. Esepia, cūritei tecocuer co ivi pipe mbahe tēi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua. ¹⁸ Ndahei chira caguar tēi peico, evocoi mbahe ndoporoposui mbahe tēi apo uca āgua. Peico catura rumo Espiritu Santo pe mbohesa pipe. ¹⁹ Peñehe catu Salmo pipe, opacatu Tūpa upendar sapucaisa pipe avei peyeupe; pesapucui, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarā mbiguai reseve

²¹ Peyemboyeroya catu ambuae rese Cristo mboeteisa pipe peico.

²² Cuña tomboyeroya omer, inungar yande Yar omboyeroya yuvireco. ²³ Esepia, imer güembireco cuai āgua secoi, ēgüe ehi avei niha Cristo viroyasar cuai āgua oico. Viroyasar Pīsirosar avei secoi, inungar güetecuer ité sereco. ²⁴ Evocoiyase inungar seroyasar omboyeroya Cristo yuvireco, cuña avei niha ēgüe ehira opacatu omer mboyeroya yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. ²⁶ Ēgüe ehi yande recocuer moatiro yande angaipa sui i pipe Tūpa Ñehengagüer reroyasave. ²⁷ Iyavei oyeupe yande rerecora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. ²⁸ Ēgüe ehi aveira

ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. ²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua água, oñearo tupri avei. Ëgüe ehi avei Cristo opacatu viroyasar upe. ³⁰ Esepia, chupendar ité yaico setecuer nungar. ³¹ “Sese ava oseyara vu, osi güembireco rese güeco água; ñuvirío yuvirecoira ñepei ava nungar.” ³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. ³³ Ëgüe ehi eté ñepei-pe pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chñhivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita. ² Co porocuaita yipindar omombehu vahe porovasasa pisi água imboaviyesa pipe aipo ehi: “Pemboeteira pe ru, pe si avei. ³ Ëgüe peyese, pe rorivetera iyavei pe reco pãhumbucu catura co ivi pipe” ehi.

⁴ Iyavei pe iyesupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroya catura pe rerecuar co ivi pipe imboeteisave. Ichui pe siquiypave avei mbahe tupri pipe mbahe peyapora inungar-ra Jesucristo upe ité mbahe peyapo vaheã viña. ⁶⁻⁷ Peporaviqui tupri catu chupe nara, ndahei chira rumo pe repiaseño imboviha água tẽi; peporaviquira rumo pe querẽhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri água. ⁸ Esepia, peicua Tũpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiẽhisa pipe. Peicua niha pe opacatu Tũpa pe rerecuar ivave chini vahe povrive peicose. Ahe niha ndayande raisu yoaviratiĩ yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipĩratasa rese avei. ¹¹ Peñearo tupri catu Tũpa pĩratasa pipe pe yemoviracua água Caruguar pe mbopa tẽiẽhi água. ¹² Esepia, yande ndahei ava ité amotarẽhisave yayepihamoviracua. Yande rumo yayepihamoviracua espĩritu naporai vahe ndoyecuai vahe upe iyavei co ivi pipendar Caruguar ipĩrata vahe pĩtumimbisa pendar reroyaẽhi água. ¹³ Sese peipisi catu opacatu mbahe Tũpa ombou vahe pẽu pe yoepi água. Evocoyase yepe oime tẽira mbahe tẽi pẽu viña, peyemoviracuaño itera rumo chupe.

¹⁴ Ëgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe. ¹⁵ Peyemoingatu voi Tũpa Ñehengagüer ñeroisa resendar mombehu água yepi. ¹⁶ Iyavei pereco catu Tũpa rese pe yeroyasa peyese. Ahe inungar sundao yoepisa. Ipipe peyoepira caruguar uhu tata resendar nungar pe ãtoisa sui. ¹⁷ Poropĩsirosa inungar sundao ãca ndiru, ipipe tapeyoepi; peiporu avei Tũpa Ñehengagüer, ahe niha inungar quise pucu Espĩritu vireco vahe. ¹⁸ Peyeroqui catu Espĩritu pĩratasa pipe ari yacatu rupi Tũpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tũpa reroyasar rese yepi. ¹⁹ Peyeroqui avei che rese. Evocoyase Tũpa tombou che ñehẽ água cheu che siquiyeẽhisa pipe ñehesa ñepĩsirosa icuapi ramo vahe cua uca água ava eta upe. ²⁰ Tũpa niha che cuai co ñehesa mombehu água. Ichui tẽi cũritei soquendapri aico. Peyeroqui catu che rese che siquiyeẽhisa pipe co ñehesa mombehu água.

Ñehesa ipa vahe

²¹ Yande rĩvri Tíquico, yande rembiaisu, che pĩtĩvĩsar omboavĩye vahe ocuaita yande Yar upe mboravĩquĩsa rese, ahe omombehura opacatu che recocuer, mbahe che rembiapo avei pẽu. ²² Sese amondo eipeve pẽu ore recocuer mombehu ãgua ‘ĩpipe toyemonguerẽhi catu yuvireco’ viya.

²³ Yande Ru Tũpa iyavei yande Yar Jesucristo tomondo opacatu vĩroyasar upe teco catupri ãgua, iporoaisu ãgua, oyese yeroya ãgua avei. ²⁴ Tũpa tosovasa opacatu yande Yar Jesucristo raisupar saisusa ñepi reseve vahe pĩpe. Aipo rupive.

PABLO REMBICUACHIA FILIPO PNDAR UPE FILIPENSES

Pablo mahenduhasa Jesús reroyasar Filipo pndar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tūpa upendar Jesucristo rese peico vahe tecua Filipo ve, Jesús reroyasar rārosar uve, seroyasar rese ihañeco vahe upe avei. ² Yande Ru Tūpa, yande Yar Jesucristo tape rovasa pe reco tupri āgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tūpa upe yepi. ⁴ Iyavei che ayeruresa, ari rupi ayeroqui opacatu pe rese Tūpa upe che viharetesa pipe yepi. ⁵ Esepia, oyoya yañepitivi Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tūpa omboipi mbahe aviye vahe güemibotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave añ, anise que co coti rupi aico mborereciar rovai co ñehesa pñirosa resendar repi āgua iyavei amboyecua vaheñe ahe ñehesa supi tupri vahe yuvireco chupe. ⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri āgua yuvireco” ahe pëu. ¹⁰ Ipipe sui peicuara mbahe aviye catu vahe poravo āgua yepi; ēgüe peye aveira pe recocuer moatiro āgua peico. Evocoyase ndipoi chira angaipa pe rese acoi Jesucristo ouse curi. ¹¹ Percora pe recocuer aviye vahe ité Jesucristo ombou vahe pëu Tūpa mboetei āgua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoyase opacatu mborereciar guasu poraviquisa pndar iyavei opacatu ambuae ava oicuapa che roquendasa Jesucristo rupi che guata sui tēi yuvireco. ¹⁴ Iyavei setá etepri yande rivri che repiase soquendapri che recose yuvireco, oyemonguerēhi catu Tūpa Ñehengagüer mombehu āgua osiquiyeēhisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tēi vahe Jesucristo rese che reroñrosa pipe tēi. Oime rumo amove ava oñehe tupri Jesucristo rese opihañemoñeta tupri pipe. ¹⁶ Evocoi ava oñehe tupri oporoaisusa pipe, ahe oicua cohava che roquendase yuvireco, “Co ñehesa Tūpa ñehe pñirosa resendar, ahe supi eté vahe, ndahei temira tēi” ahese. ¹⁷ Evocoi ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi vitesave. ¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. ¹⁹ Esepia, che aicua co opacatu mbahe-mbahe tēi sui añepisirora pe yeruresa pipe iyavei che pñivira Jesucristo Espiritu. ²⁰ Che aipota ité, asāro avei opacatu che recocuer sui che chñēhi āgua añehe vaheñe opacatu che siquiyeēhisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco. ²¹ Esepia, Cristo che recovesa ité secoi; amanose rumo, aviyeño itera cheu. ²² Aicove vitesave co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviyeñe cheu. ²³ Ndaicatui co ñuvirío che pihañemoñetasa rereco: amove amano pota che so āgua ivave Cristo piri. Ahe aviye

catura cheu viña. ²⁴ Pêu nara rumo aviye catu aicove vïtese co ivi pipe. ²⁵ Sese che aicua aicove vite vaherã pe pïtivïi vite ãgua, pe guata tupri vite catu ãgua iyavei pe viharete catu ãgua pe Jesús reroyasa pipe. ²⁶ Evocoyase che rereco vïtera peye pe pïri. Ahese pe viharetesa pipe, “Imboeteipri Jesucristo tasecoi” aipo peyera che repïase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repïa, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pïratasa resendar pe poreroyasave co ñehesa poropïsirosa resendar rese. ²⁸ Iyavei ndapeyembosiquiyei chira pe amotarêhimbar sui. Evocoyase ahe oicudara yuvireco chupe ité Tûpa omondora imocañi ãgua; pe rumo Tûpa pe pïsirora curi. ²⁹ Supi eté ndahei Jesucristo recocuer reroya ãgua güeraño Tûpa oipota pêu, sese pe yemombaraisu ãgua avei oipota. ³⁰ Esepia, pe, che avei oyoya tupri yaporaviqui pïrata yande amotarêhimbar pãhuve yaico. Iyavei acoi pesepia yipïndar che aporaviqui pïrata che amotarêhimbar pãhuve vichico, iyavei cûritei peyandu mara ahe aporaviqui pïrata vite ipãhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerêhi, pe mboviha oporoaisusa pipe oico, Espïritu avei secoi pe rese. Peyeaisu tupri iyavei pe yeaisusa pipe peñepitivïi. ² Sese che mboviha catu peye: perecora pihañemoñetasa ñepei reseve, oyoya guasu avei peyeaisura, oyoya aveira pe pihañemoñetasa, ñepei reseve mbahe pe remimbotar rese avei. ³ Ndapeyapoi chira mbahe peyeupe güeraño tõi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri ãgua.

⁵ Inungar Cristo pihañemoñeta, êgüe peye tupri aveira.

⁶ Yepe ahe Tûpa recocuer vireco, “Taseya eme Tûpa recocuer areco vahe ivive che so ãgua” ndehi.

⁷ Opa ité rumo oseya, oyemboava inungar mbiguai tõi ou.

⁸ Êgüe ehi oyemomini.

Vu porocuaïta reroyasa pipe ou iyavei omano poromochisa pipe curusu rese.

⁹ Sese Tûpa omboivate catu, omondo avei sererguã ivate catu vahe opacatu ambuae rer sui.

¹⁰ Evocoyase ahe terer ivate catu vahe renduse ‘toñenopiha opacatu iva pendar, ivi pïpendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tûpa mboetei ãgua yuvireco.

Jesús reroyasar tesapesa nungar yuvirecoi co ivi pipe

¹² Evocoyase che rembiaïsu, yepe che amombri aico pe sui viña, iya rumo pe che reroya vite ité peye inungar aicose pe pãhuve cuese. Che aipota peicora pïsirosa pipeño ité Tûpa mboeteisave ichui pe siquiyesa pipe. ¹³ Esepia, Tûpa ombou pe querêhisa semimbotar apo ãgua. Güemimbotar rupi avei ombou pïratasa imboaviye ãgua pêu.

¹⁴ Peyapo opacatu mbahe pe ñehe-ñehe tõiêhisa pipe, pe yepoepi-epiêhisa pipe avei.

¹⁵ Sese tipo eme mbahe pe rembiavi que pe reco raisa pe rese. Evocoyase peicora Tûpa rahir ndayangaipai vahe ava mbahe-mbahe tõi oyapo vahe pãhuve. Ahe ipãhuve pe recocuer osesapera, inungar tataendi osesape pïtumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa êgüe ndehi tõi vaherã. ¹⁷⁻¹⁸ Jesucristo recocuer rese pe yeroyasa,

ahe inungar mbahe seropovêhepri Tûpa upe. Aviyeteramo ichui têi che yucara yuvireco. Ahe omboaviye tupri itera pe porerecosa Tûpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihanora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pihaiivi vaherã Timoteo pe repia. Ahe omboveyise ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che pihanemoñetasa rupi tupri imahenduha vahe pe rese pe reco tupri ãgua. ²¹ Esepia, opacatu oseca güemimbotar têi apo ãgua, ndosecai eté Jesucristo remimbotar yuvireco. ²² Pe niha peicua Timoteo reco tuprisa opacatu upe. Iyavei che pítivii Tûpa Ñehengagüer mombehu ãgua, inungar chñhivahe oipítivii oyesupa, êgüe ehi che pítivii oico. ²³ Sese che aipota imondo ãgua pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso pihaiivi vaherã che teieté pe repia.

²⁵ Iyavei revo aviye catu co yande rivri Epafrodito amboveyira pe piri ahe pembou vahe che pítivii ãgua mbahe cheu ipane vahe rese. Ahe che ndugüer oporaviqui pñrata vahe Tûpa upe. ²⁶ Esepia, ahe pe repia pota ité opacatu. Iyavei ahe ehiño oico pëu peicuase imbaheasi. ²⁷ Supi eté imbaheasi oico, seni eté omano viña. Ipare rumo Tûpa oiparaisuereco, ndahei ahe güeraño oipítivii, che avei che paraisuereco co viharêhisa yeapí-apíñoêhi ãgua cheu. ²⁸ Sese che amondo pota poyava ité pe piri sese pe yemboviha iri ãgua, che mboviha iri ãgua avei. ²⁹ Peipisi tupri pëu iyepotase pe viharetesa pipe. Esepia, ahe yande rivri yande Yar rese seci vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe têi porara ãgua che pítivii pipe. Esepia, pe ité ndapeicatui che pítivii peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri ãgua pëu. Iyavei aviye catu ité pëu nara. ² Peñearo acoi ava cave nungar têi sui, oyapo vahe mbahe têi iyavei güetecuer omomara têi vahe. ³ Yande rumo imbocircuncidapri nungar supi eté vahe Tûpa mboyeroyasar yaico. Esepia, yayerure Espiritu pipe Tûpa upe; yayemboviha avei Jesucristo reroyasar yande recosa rese. Ndahei yande retecuer rese têi yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoyase ayembohe tupri fariseo aracuasa judío porocuita resendar rese vichico. ⁶ Ipipe sui têi eté aseca-seca catu ayapo vaherã mbahe opacatu ava Jesucristo reroyasar upe vichico. Co porocuita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviye ité cheu aracaco viña. Cüritei rumo Jesucristo rese aicose, êgüe ehi têi vahe nungar areco. ⁸ Iyavei opacatu que ambuae mbahe aviyera cheu viña, areco rumo inungar iti che Yar Jesucristo recocuer cuasa pipe. Opacatu ahe mbahe aseya Cristo rese che reco ãgua. Supi eté Cristo rereco ãgua areco opacatu ambuae mbahe iti nungar têi ⁹ ‘taico sese’ che yapave. Ndahei porocuita mboaviyesa rese têi aseca che reco catupri ãgua, che rumo aseca Jesucristo rese che yeroyasa pipe sui êgüe ahe vaherã. Êgüe ehi eté Tûpa che pisi seco catupri vahe nungar Cristo rese che yeroyasa pipe. ¹⁰ Che aipota ité Cristo cua tupri catu ãgua. Iyavei areco pota pñratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, êgüe ahe pota avei. ¹¹ Êgüe tahe avei che cuerayevi ãgua omano vahe pñhu sui, ahe co che asãro vichico.

Pablo osupiti pota ité güeco maranehi ãgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorã. Esepia, Jesucristo che pisi ité oyeupe nara. ¹³ Che rivireta, “Che ae tēi co tecocuer ihivi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. ¹⁴ Esepia, Tūpa che renoi ivave che so ãgua aipisi vahe rã iporerrecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihãñemoñetara opacatu yande yaracua tupri vahe. Que revo yande pihãñemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yupagüer pēu, cūritei amboyevi iri che yasehosa pipe imombehu pēu. Setá ité oime ava co ñehesa Cristo mano agüer curusu resendar amotarēhimbar. ¹⁹ Ahe rumo imocañipirã yuvirecoira curi. Oyemonguerēhi opacatu mbahe tēi apo ãgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihãñemoñeta yuvireco. ²⁰ Yande rumo ivave nara ité yaico. Iyavei yasãro ité yaico iva sui ou vahe rã yande Pīsirosar, ahe yande Yar Jesucristo. ²¹ Ahe opĩratasa pipe virecora opacatu mbahe opovrive. Ahe opĩratasa pipe avei osecuñaropara yande retecuer ěgüe ehi tēi vahe, ahese inungar ahe setecuer sendi yai, nimarai vahe, ěgüe yahe aveira yande yaico.

4

Yayembovaha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerrecosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco. ³ Nde niha che pĩtivii tupri vahecuer che poraviquisa rese eve. Eipĩtivii evocoi cuña. Esepia, ahe niha oyembopihaviracua ité che pĩtivise Tūpa Ñhengagüer pĩsirosa resendar mombehu ãgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tūpa cuachiar tecovesa apirēhi vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihãño ité!” ahe aipo pēu. ⁵ Pemboyecua catu opacatu ava upe pe reco mbegüesa. Esepia, cõimi yande Yar yevi iri ãgua yandeu.

⁶ “¿Mara ahera pĩha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tūpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoiyase Tūpa omondora güeco tupriisa pēu, pe Jesucristo rese peico vahe. Co teco tupriisa niha aviye catu ité opacatu ava pihãñemoñetasa sui. Ipipe sui Tūpa osãrora pe pĩha, pe pihãñemoñetasa avei pēu.

Yandepihãñemoñetara opacatu mbahe aviye vahe rese

⁸ Co ipa, che rivireta: yande pihãñemoñetara opacatu mbahe supi tupri vahe rese, poromboetei ãgua rese, mbahe ihivi vahe rese, mbahe maranehi rese, mbahe yande mbovaha vahe rese, opacatu mbahe aviye vahe icuapri vahe rese. Iyavei yande pihãñemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoiyase Tūpa güeco tupriisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou ãgua cheu. “Sesarai yuvireco che sui” ndahei chira pẽu. Pe rumo yipindar ndapeicatu eté che pĩtivii ãgua peye. ¹¹ “Ipane mbahe cheu” ndahei chira pẽu. Esepia, ayembohe che viharete ãgua mbahe che rembiereco rese. ¹² Aicua mara yahe yande paraisusa pipe yaico, aicua avei mara yahe mbahe rereco ati ãgua. Ayembohe avei che viha ãgua opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua ãgua. Esepia, Cristo ombou che pĩrata ãgua. ¹⁴ Pe rumo peyapo mbahe aviye vahe cheu che pĩtivii eteprisave peye mbahe-mbahe tẽi oimese cheu.

¹⁵ Iyavei pe Filipo pendar peicua avei acoi yipindar peipisise pĩsirosa resendar Tũpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che pĩtivii ãgua. ¹⁶ Iyavei aicose Tesalónica ve, pembou pe porerecosa cheu ñuvirío yupagüer che pĩtivii ãgua. ¹⁷ Ndachepihañemoñetai mbahe arocuano tẽi vaherã pe sui. Che rumo aipota Tũpa omboyevira pẽu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi sãcua vahe, iyavei inungar mbahe seropovẽhepri aviye vahe Tũpa upe. ¹⁹ Evocoyase yande Ru Tũpa, ombahe eta porañete vahe sui omondora opacatu mbahe ipane vahe pẽu Jesucristo rese oime vahe. ²⁰ ¡Ëgüe tehi timboeteisa yande Ru Tũpa! ¡Ahe apirẽhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tũpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pẽu. ²² Iyavei opacatu ambuae yuvirecoi vahe cohava Jesús reroyasar iyavei acoi mborereciar guasu rõtave yuvirecoi vahe, ahe ité avei omondo omahenduhasa yuvireco pẽu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PNDAR UPE COLOSENSES

Pablo mahenduhasa Jesús reroyasar Colosa pndar upe

¹ Che, Pablo, Jesucristo apóstol aico Tūpa remimbotar rupi yande rivrī Timoteo reseve. ² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esepia, oroyandu acoi oyepota ramosē Tūpa ñehe supi eté vahe, aviye vahe p̄sirosa resendar pēu, peyapisaca tupri sese. Ipipe sui peyeroya ivave pe reique āgua Tūpa porerecosa p̄si āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oip̄si tupri avei yuvireco. Inungar acoi pesenduse yip̄ndar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve. ⁸ Ahe omombehu oreu Esp̄ritu pipe pe ore raisusa resendar.

⁹ Sese avei ore aipo nungar rendu ramosēve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Esp̄ritu suindar pipe, senducua tupri sa pipe avei yuvireco’ ore yapave pēu. ¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. ¹¹ Iyavei tombou catu pe momirata āgua güecocuer p̄ratasa pipe sui. Evocoyase oimese que mbahe tēi pēu, peñemosañora pe reco mbegüesa pipe. ¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peip̄si āgua iporerecosa oime vahe rā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande p̄siro Carugar povri sui. Ēgüe ehi yande reraso Guahir güembiaisu povri. ¹⁴ Ahe Tahir yande p̄siro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yip̄suive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pndar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei. ¹⁷ Ahe oicove yip̄suive aracahe opacatu mbahe reimeēhi vitesēve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yip̄ndar vahe iyavei ahe rane avei ocuerayevi. Evocoyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei ‘che Rahir recocuer pipe sui taroyevi iri opacatu mbahe cheyeupe ivi p̄pendar, iva pndar avei’ oya. Ēgüe ehi Jesús oip̄iyere vuvi curusu rese Tūpa upe opacatu mbahe moingatu āgua.

²¹ Yip̄ndar pe pihañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese. ²² Cūritei rumo Tūpa iñero pēu pe reroyevi oyeupe Cristo mano pipe. Ahe niha Ēgüe ehi Vu rovai ipehapri pe rereco oyeupe nara, pe

reco maranehi ãgua mbahe aviẽhisa pipe ava rovaque. ²³ Ëgüe peye ãgua rumo peyemoviracuaño itera Cristo rese pe yeroyasa pipe yepi. Ndapeyepipi chiaveira mbahe oime vaheã rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuaipri, aico co ñehesa mombehu ãgua.

Pablo icuaita Jesús reroyasar rese hañeco ãgua

²⁴ Cũritei aviha pe rese che yemomborarasa pipe. Ëgüe ahe iporara che rete rese cohava vichico. Ëgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pĩtivii ãgua niha Tũpa che cuai. Sese amombehu opacatu iñehengagũer pẽu pe reco tupri ãgua rese. ²⁶ Ahe ñehesa aracahe suive ndicuasai vahe ité. Cũritei rumo Tũpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaheã teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri ãgua ore aracuasa pipe ‘toyuvirecoi tupri ité Cristo rese Tũpa rovai’ ore hesa pipe. ²⁹ Co rese niha che aporaviqui etepri opacatu Cristo pĩratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparẽhi recocuer rese avei ² ‘toyemonguerẽhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pẽu. Esepia, ichui avei peicua tupri co mbahe imboyecuapi ramo, ahe niha Cristo. ³ Ahe vireco opacatu mbahe yande mboaracua ãgua, mbahe renducua tupri ãgua avei. ⁴ Aipo mbahe amombehu pẽu ava oñehe tupri aisa pipe tẽi pe mbopaẽhi ãgua. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ñvisa pipe, ndapeyepiise co coti rupi Jesucristo reroyasa sui. Sese che mbovĩhareteño ité peye.

Jesús suindar tecocuer piasu

⁶ Evocoyase inungar acoi peipisi Jesucristo pe Yarã, ãgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tũpa upe ari yacatu yepi.

⁸ Peicua catu, peyembopa ucai rene aracahendar tẽi ava aracuasa pipe. Esepia, ahe ãgüe ehi tẽi vahe, ava suindar tẽi yembohesa, ivi pipendar ava seco ivate catu vahe pĩhañemoñetasa tẽi. Ndahei Cristo suindar porombohesa.

⁹ Esepia, Cristo vireco opacatu Vu Tũpa reco oyese. ¹⁰ Evocoyase pe pereco Tũpa reco Cristo rese peicose. Ahe opacatu mborerecuar ivi pipendar iyavei iva pendar rerecuar secoi. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tẽi. Co rumo Cristo oyapo vahe pe recocuer rese. Esepia, ahe virocua pe recocuerai pe sui. ¹² Pe ãpiramosa pipe ndoyavii pe recocuerai ñotimbrĩ Cristo reseve. Ëgüe ehi avei ndoyavii pe recocuer ocuerayevi vahe seseve avei, peyeroyase Tũpa pĩratasa rese. Ahe niha ombogũerayevi vahe Guahĩr omano vahe pãhu sui. ¹³ Pe niha acoi cuese omano vahe nungar peico Tũpa upe pe angaipa pipe, pe ndahei vahe judío peico vahe. Ahe rumo pe recocuer mbogũerayevi Guahĩr reseve iyavei iñero pe angaipa rese pẽu. ¹⁴ Ahe yande cañi rãgũer rumo opa omboepi. Esepia, yande iporocuaite pipe yaico imboaviye ãgua viña, evocoyase imocañipri tẽi yaico ipovrive viña; ombou rumo Guahĩr curusu rese yatica ãgua yande cañi rãgũer sui yande renose ãgua. ¹⁵ Ëgüe ehi ahe omano pipe curusu rese caruguar, ipovri pendar mborerecuareta

reseve secopi. Ēgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoyase toñehe-ñehe tēi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. ¹⁷ Esepia, opacatu co mbahe, ahe yipindar vahe, “Ēgüe ehira Cristo ou” hesa tēi yandeu. Co rumo Cristo ité cute. ¹⁸ Peyapisacai rene acoi ava “ndapeipisi chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pipe iva pendar mbahe” ehi tēi. Esepia, ahe oyemboivate ai oaracua rai tēisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepe vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pipendar pihañemoñetasavri ve peico. ¿Mahera evocoyase peroya vite co ivi pipendar porocuita ěgüe ehi tēi vahe, ²¹ inungar “pepocoi rene co mbahe rese, pehui rene evocoi nungar mbahe” ehi tēi vahe? ²² Opacatu co nungar porocuita ocañi tēi vaherã. Esepia, ahe ava remimbotar tēi yembohesa, iporocuita tēi avei. ²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ěgüe ehi tēi vahe. Esepia, ndayande pitivi eté yande yepipi āgua yande remimbotarai sui.

3

¹ Cūritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pipe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tēi. ³ Esepia, cūritei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña. ⁴ Cristo niha yande recovesa ité secoi. Sese ahe oyevi irise curi, ěgüe peye aveira perecoa ipiri seco ori porañetesa.

Yande recocuer yipindar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco. ⁷ Ēgüe peye avei yipindar pe recocuerai pipe peico. ⁸ Cūritei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu āgua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Anise que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ Ēgüe peyera peñemosa oyeupe, peñero aveira

opacatu oyeupe acoi pe pãhu pendar oñemoïrose pëu. Inungar Cristo ñerosa ombou yandeu, pe avei ëgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tuprisa Cristo ombou vahe pëu, tape mbohe pe pihañemoñeta tupri ãgua. Esepia, co rese Tũpa pe renoi ñepei ava nungar pe reco ãgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe pihã pipe. Pe aracuasa tuprisave peyembohe tupri, peyemonguerëhi catu sapucaisa Tũpa resendar rese. Pesapucaï opacatu sapucaisa Tũpa upendar pe pihã pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tũpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rembireco. Perecoï rene pihavĩracuasa pipe.

²⁰ Pe avei no chĩhivahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoïro ucai rene pe rahĩr peyeupe. Esepia, aviyeteramo niquerëhi iri chira ocuaise pëu.

²² Pe avei nõ mbiguai: peroya tupri avei pe rereciar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tũpa sui pe siquiyesa pipe avei. ²³ Opacatu mbahe peyapo vahe, peyapo pe querëhisave yande Yar mboviha ãgua. Ndahei chira ava mboviha ãgua tẽi. ²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiaipo ai repri. Tũpa niha nomboyoviratii yande raisu.

4

¹ Pe avei sereciar: peyapo mbahe ihivi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rereciar ivave.

² Iyavei no opacatu peyeroqui catu ari rupi pe mahemohasa pipe. “Aviye ndeu” peye Tũpa upe. ³ Peyeroqui avei ore rese. Tore pĩtivii Tũpa oñehengagüer mombehu vite ãgua. Toroñehe vite avei co ñehesa Cristo resendar Tũpa omboyecua ramo vahe rese yandeu. Sese tẽi niha co che roquendasa. ⁴ Evocoyase peyeroqui che rese, tamombehu tupri catu co ñehesa opacatu upe senducua tupri catu ãgua. Ëgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye vitesese. ⁶ Pe reco aviye tuprisa pipe peñehera yepi. Iyavei peicua tupri ñehesa mboyevi ãgua ñepei-peï ava uve.

Ñehesa ipa vahe

⁷ Co yande rivri, yande rembiaisu, Tíquico, che pĩtivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pëu. ⁸ Sese co amondo pëu ore recocuer cua tupri ãgua, pe monguerëhi catu ãgua avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pëu opacatu mbahe oime vahe cohave.

¹⁰ Aristarco, che ndugüer che roquendasave, omondo omahenduhasa pëu iyavei Marcos, Bernabé rihir. Pe revo peicuaño Marcos so ãgua eipeve; oose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pëu. Co güerañomi Jesús reroyasar pãhuve judío oporaviqui vahe che rupi yuvireco Tũpa mborerecuasave nara. Ahe niha che mboviha yuvireco yepi. ¹² Epafras avei omondo omahenduhasa pëu. Ahe pe recua pendar ité, Jesucristo rembiguai. Ahe oyeroqui vahe pe rese yepi ‘toyemoviracua tupri iyavei toyuvirecoï Tũpa remimbotar rupi yuvireco’

oyapave. ¹³ Che aicua ité secocuer. Ahe oyemboaquĩ oyeruresa pĩpe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaĩsu Lucas, oporoposano vahe, Demas reseve omondo omahenduhasa yuvĩreco pẽu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tũpa reroyasar yuvĩreco. ¹⁶ Peyeroquire, pemondo co cuachiar Laodicea pendar Jesús reroyasar upe iyeroqui ãgua. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: “Emboaviye tupri Tũpa nde cuaisa” ere.

¹⁸ Che Pablo aico. Che ité aicuachía co che mahenduhasa pẽu. Tapemahenduha vite che roquendasave che rese. Aviye pẽu. Yande Aposar tape pĩtivii. Aipo rupive.

PABLO REMBICUACHIA YIPINDAR VAHE TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tūpa upe tecua Tesalónica ve, yande Ru Tūpa, yande Yar Jesucristo rese peico vahe. Tape rovasa pe reco tupri āgua yande Ru Tūpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe ari rupi Tūpa upe opacatu pe rese yepi. Iyavei orema-henduha pe rese ore yeruresa pipe. ³ Pe niha yande Yar rese pe yeroya tupri sa pipe peporaviquiño yepi, iyavei pe poroaisusa pipe peyapo mbahe Tūpa upe, iyavei peñemosañño mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tūpa rovai. ⁴ Ore rivireta, Tūpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa pīsirosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, orosecaño avei pe reco tupri āgua.

⁶ Ipare pemboyeapi ore recocuer peico iyavei yande Yar recocuer avei no. Iyavei yepi peparaisu mbahe-mbahe tēi pāhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu. ⁷ Evocoya pe reco pipe pemboyecua catu pe reco catupri sa Tūpa reroyasar Macedonia pendar upe, Acaya pendar upe avei. ⁸ Esepia, pe Tūpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tūpa reroyasa pereco vahe peyese. Sese ore ndoromombehu iri chira pe recocuer. ⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tūpa oicove vahe rupi pe guatasa yuvireco, pe chupe nara mbahe apo āgua avei no. ¹⁰ Omombehu avei pesāro vahe Tūpa Rahir Jesús iyevi āgua iva sui yuvireco oreu, acoi Tūpa ombogüerayevi vahe omano vahe pāhu sui. Ahe niha yande pīsirora Tūpa ñemoirosa ipīrata vahe ou vaherā sui.

2

Tesalónica pendar yeroyasa mboyecuada

¹ Ore rivireta, pe niha peicua ore so agüer pe piri ndahei ēgüe ehi tēi vahe. ² Peicua tupri avei niha acoi cuese yipindar mara-mara tēi ava ore rereco yuvireco tecua Filipino ve. Tūpa rumo ore pītivi oñehengagüer pīsirosa resendar mombehu āgua opacatu ore siquiyeēhisa pipe ore amotarēhimbar pāhuve. ³ Esepia, ndoroyavi eté ore ñehe iyavei ndoroñehei ore pihañemoñeta raisa tēi pipe pëu, ndahei avei ore porombopa āgua oroñehe. ⁴ Tūpa rumo ore recoña, ichui ore cuai oñehengagüer pīsirosa re-sendar mombehu āgua; ēgüe ehi ore ñehe, ndahei ava tēi mboviha āgua. Tūpa yande pihañemoñetasa oicua vahe rumo oromboviha. ⁵ Peicua niha ore ndoroñehei ñehesa icatupri catu vahe tēi rese pe mbopa āgua, iyavei ndahei guarepochi potasave tēi oroñehe tupri. Tūpa niha oicua. ⁶ Ore ndorosecai eté ava ore mboetei catu āgua pe, que ambuae ava eta avei no. ⁷ Ehi oroyandu ucara ore mborerecuasa Jesucristo ore cuaisa pëu viña; oroyemominiño rumo oroico pe pāhuve inungar acoi cuña osāro tupri vahe omembri imboacua. ⁸ Eñgüe orohe avei ore pe raisu. Sese ndahei Tūpa Ñehengagüer año oromondo pota pëu, ore recocuer avei no. Esepia, opoaisú ité. ⁹ Ore rivireta, peyemomahenduha

acoi ore paraisu agüer rese, ore poraviqui agüer rese avei ari, pïtu reseve. Ndahei que ñepei mañeco tēi āgua mbahe rese oromombehu Tūpa Ñehengagüer oroico pēu.

¹⁰ Pe niha ore repia peye Tūpa avei oicua, ore reco tuprisa, ore rembiapo supi eté vahe, ihïvi vahe pe Jesús reroyasar pāhuve. ¹¹⁻¹² Peicua niha, inungar mbia guahir upe, ēgüe orohe pe monguerēhi, pe mbovïhasa avei ñepei-peï opacatu. Iyavei oromondo pe cuaitarā pe reco tupri āgua Tūpa remimbotar rupi. Ahe niha oñehe pēu peico vaherā sese imborerecuasa porañetesave.

¹³ Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pēu, peipisi ité, “Co Tūpa ñehe, ndahei ava tēi ñehe” aipo peye ité pe chupe. Supi eté Tūpa ñehe. Ahe niha osecuñaro ité pe recocuer peroyare. ¹⁴ Ore rivireta, acoi cuese peiporara mbahe-mbahe tēi pe mu eta pāhuve peicose; ēgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarēhisave yuvireco. ¹⁵ Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarēhimbar tēi yuvirecoi. ¹⁶ Esepia, acoi oroñehe potase ava ndahei vahe judío upe iñepisiro āgua rese, ahe rumo ndoipotai yuvireco oreu. Ipipe sui oyemboangaipa catu yuvireco. Cūritei rumo Tūpa ñemoirosa ipirata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoe pia iri yayepipi raimise yandeyesui, ore piha pipe rumo, “Ahé” oroheño ité pēu. Iyavei orequerēhiño ité yepi oroso iri vaherā pe repia. ¹⁸ Orosāha tēi ore so āgua pe repia yepi; che Pablo teieté setá yupagüer tēi aso pota. Carugar rumo ndoipotai. ¹⁹ ¿Ava sui pïha orosāro mbahe aviye vahe? ¿Uma ore vihasa? ¿Uma ore mbovïharete catura? ¡Peño itera acoi yande Yar Jesucristo yevise curi! ²⁰ Pe ité niha ore mbovïhara peye, iyavei orovïha catura pe rese no.

3

¹⁻² Evocoyase che nañemosa irise pe repiaēhi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa pïsirosa resendar Cristo suindar ou vahe. Ahe amondo pēu pe moviracua catu āgua, pe monguerēhi catu āgua avei peyeroa catu vaherā Cristo rese. ³ Evocoyase tipo eme oyembosiquiye vahe co mbahe tēi pe mombaraisuse. Peicua niha yaiporara rane itera co nungar mbahe. ⁴ Iyavei niha acoi oroico vïtese pe pïri, “Yande paraisu rane itera mbahe yavai vahe” orohe voi eté acoi pēu. Ahe niha cūritei peicua. ⁵ Evocoyase che nañemosa irise, amondo Timoteo ‘¿yuvirecoiño ité pïha Tūpa rese?’ che yapave. Che asiquiye, “Aviyeteramo Carugar omondora mbahe tēi pipe yuvireco” ahe ‘ore poraviqui agüer evocoyase ocañi tēira’ che hesave.

⁶ Cūritei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei. ⁷ Sese, ore rivireta, ore paraisusa pāhuve ore mbovïharete peye, co oroicuase pe reco tupri Tūpa reroyasa pipe. ⁸ Cūritei ore mopoase catu iri oroyanduse pe yemoviracua tuprisa yande Yar rese. ⁹ “¿Mara yahera pïha, ‘Aviye ndeu’ yande he tupri catu āgua Tūpa upe?” orohe pe reco tuprisa rese, iyavei ore yemovïha catura rese avei no ¹⁰ pïtu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vite vahe mboaviye tupri āgua pēu.

¹¹ Iyavei ore oroipota ore pïtivïra yande Ru Tūpa, yande Yar Jesucristo avei ore so āgua pe pïri. ¹² Evocoyase yande Yar tape moviracua catu, tombou catu avei pe yeaisu

ãgua, iyavei opacatu raisu catu ãgua, inungar ore orovireco pe raisusa. ¹³ Ipípe sui tape moviracua pe reco maranehi pípe pe mbahe aviẽhisave yande Ru Tũpa rovai acoi oyevise yande Yar Jesús opacatu ovoya reseve. Êgũe tehi pẽu.

4

Teco tupri Tũpa oipota

¹ Ore rivireta, cũritei oroñehe pota pẽu pe cuaitarã rese yande Yar Jesús rer pípe: inungar cũritei pe recocuer pereco, êgũe peyeño ité catu peico ore pe mbohe agũer rupi Tũpa mboetei ãgua.

² Pe niha, peicua acoi ore pe mbohe agũer yande Yar Jesús rer pípe. ³ Esepia, Tũpa oipota pe reco maranehi ãgua oyeupe. “Tipo eme que ñepeí oyemboaguasa tẽi vahe” ehi. ⁴ Iyavei peico tupri pe rebireco rese pe reco ñvisa pípe Tũpa remimbotar rupi, iyavei pemboetei tuprira sereco yepi. ⁵ Peicoi rene ava Tũpa ndoicuai vahe reco pípe pe remimbotar tẽi apo ãgua. ⁶ Tipo eme avei oyapo vahe co nungar angaipa yande rivri reco momara ãgua tẽi. Esepia, Tũpa omondora oñemoirosa ipĩrata vahe evocoi nungar ava upe. Evocoi niha yipisuive oromombehu vahe pẽu. ⁷ Esepia, Tũpa niha yande poravo yande reco maranehi ãgua, ndahei angaipa pípe yande reco ãgua tẽi. ⁸ Sese acoi ndosendu potai vahe co yembohesa, ndahei eté ava tẽi viroĩro, ahe rumo Tũpa ité viroĩro yuvireco acoi ombou vahe oEspíritu Santo pẽu.

⁹ Iyavei co peyepãhuve pe yeaisusa rese, ndaicuachía iri chira pẽu. Esepia, Tũpa ité niha pe mbohe pe yeaisu ãgua opacatu. ¹⁰ Êgũe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa. ¹¹ “Peico tupriño avei pe reco mbegüesa pípe; mbahe pe rembiapo reseño tupri pehañeco; peporaviqui pe po pípe ité” aipo orohe acoi pẽu cuese. ¹² Evocoyase pe mboyeroyara ava ndahei vahe Jesús reroyasar yuvireco; iyavei êgũe peyera mbahe pẽu ipaneẽhi ãgua avei no.

Oyevira yande Yar co ivi pípe

¹³ Ore rivireta, ore oroipota peicua aveira manosa recocuer; sese ndapeicoi chira pe viharẽhisa pípe inungar co ava ndoyeroyai vahe Tũpa rese. ¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya Tũpa Guahir Jesucristo reseve ombogũerayevira opacatu acoi seroyasa pípe omano vahe yuvireco.

¹⁵ Sese co oromombehu pẽu, ahe niha yande Yar porombohesa: yande yaicove vite vahe co ivi pípe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogüeyi irira iva sui ou mborerecuar ivate vahe ñehesa pípe; ahese oyeendura Arcangel ñehe iyavei Tũpa remimbi moñehe pĩratasa. Ahese seroyasar omano vahecuer rane opũhara yuvireco. ¹⁷ Ipare voi yande yaicove vite vahe, serasopri yaicora opacatu iva quihã rese co yande Yar rovaĩchi ãgua ivitu rupi. Êgũe yahera yande Yar pĩri yaico vaherã apirẽhi. ¹⁸ Sese peyemonguerẽhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pẽu. ² Esepia, pe peicua tupri co yande Yar ari oyepotara imohaẽhisa pípe, inungar acoi imonda rai vahe oyepota pĩtu pípe. ³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tẽi yandeu” ehise, ahese inungar acoi cuña imembirasi aviyeteramo tẽi, êgũe ehi aveira, aviyeteramo tẽi icañi oura iharive, ahese ndoicatui chira ichui oñemi yuvireco. ⁴ Pe rumo, ore rivireta, ndahei pĩtumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tẽi ou. ⁵ Esepia, pe opacatu peico vahe Tũpa poroesapesa pípe, ndahe iri yande pĩtumimbi

pîpendar yaico. ⁶ Evocoyase ndayaicoi chira co ambuae yuviroque tēi vahe nungar pîhañemoñetasa pîpe; iyacatu rumo yande yayemopoase yande pîhañemoñeta tuprîsa pîpe. ⁷ Acoi yuviroque vahe, yuviroque pîtu pîpe; iyavei acoi osavaipo vahe, osavaipo avei pîtu pîpe yuvireco. ⁸ Yande rumo yaico vahe Tûpa poroesapesa pîpe. Evocoyase yareco tuprîra yande pîhañemoñetasa yande reco tuprî ãgua yepi. Iyavei yayoepîra yande yeroyasa pîpe, poroaisusa pîpe avei no. Iyavei inungar acoi sundao vîreco oãca ndîru guarepochi apoprî yuvireco oãca repî ãgua, yande avei tayareco yande remiaro yande ñepîsîro ãgua. ⁹ Esepia niha, Tûpa yande poravo ndahei yaico vaherã iñemoîrosa pîpe nara; ahe rumo yande poravo yasupitî vaherã ñepîsîrosa yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco ãgua opacatu yande recove vîtese, yamanose avei. ¹¹ Sese peyemonguerēhi catu, iyavei peyemovîracua catu vîte peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivîreta, pemboyeroa acoi oporavîqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. ¹³ Pemboyeroa iyavei pesaisu tuprîra iporavîquîsa rese. Peico tuprî avei peyepãhuve.

¹⁴ Iyavei ore rivîreta, pe cuaisa: pemboaracua acoi ndoporavîqui potai vahe imbohe catu ãgua. Iyavei pemonguerēhi acoi niquerēhi iri vahe. Peipîtivîi avei acoi ndoyemovîracuai vahe Tûpa rese güeco ãgua. Iyavei peñemosañõ opacatu ava uve yepi.

¹⁵ Peicua catu pe rereco megua potasar sui. Ndapemboyevîi chira mbahe-mbahe tēi co pe rereco megua potasar upe. Iyacatu rumo peyapo tuprî mbahe aviye vahe peyeupe, opacatu ava upe avei no.

¹⁶ Peyembovîhañõra arî yacatu peico. ¹⁷ Iyavei peyeroquirã arî yacatu rupi no. ¹⁸ “Aviye ndeu” peyera Tûpa upe opacatu mbahe rese. Esepia, ahe niha Tûpa oipota yandeu Cristo rese yaico vahe.

¹⁹ Iyavei ndapemombîtuhui chira mbahe Espîritu Santo oyapo pota vahe pe rese. ²⁰ Ndapeyamotarēhi chira Tûpa ñehe imombehuprî. ²¹ Pesãhapa rane opacatu mbahe. Ichui peipîsîra mbahe aviye vahe peyeupe. ²² Peyepipi opacatu mbahe naporai vahe sui.

²³ Tûpa acoi ombou vahe teco tuprîsa yandeu tape pehapa tuprî oyeupe nara. Iyavei tosãro tuprî opacatu pe espîritu, pe hã, pe rete avei pe reco maranehi ãgua co yande Yar Jesucristo yevî irise. ²⁴ Ahe acoi pe poravo vahe oyeupe nara seco tuprî vahe. Ahe omboavîyera opacatu co mbahe.

Pablo imahenduha Jesús reroyasar rese

²⁵ Ore rivîreta, peyeroqui ore rese.

²⁶ Pemboavîrave opacatu yande rivrî eipe pendar pe yeovaupîtesa pîpe.

²⁷ Che opocuai yande Yar rer pîpe: peyeroqui co cuachiar opacatu yande rivîreta upe.

²⁸ Yande Yar Jesucristo tape rovasa tuprîño pe rereco. Aipo rupive.

PABLO REMBICUACHIA IMOÑUVIRIOSA TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe. ² Tombou pëu oporovasasa pe reco tupri ãgua yande Ru Tūpa, yande Yar Jesucristo avei.

Tūpa omombaraisura viroyasarëhi Jesucristo yevisse curi

³ Ore rivireta, “Aviye ndeu” orohé itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoiyase, ore oroñehe pe rese ore vihasa pipe Tūpa reroyasar ñemonuha rupi. Esepia, acoi ava mbahe-mbahe tēise pëu, peñemosañño chupe pe Cristo rese pe yeroyasa pipe. ⁵ Co niha omboyecua Tūpa reco ñvisa ava upe. Esepia, ipipe pe rereco omborerecuasave pe reique ãgua. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ãgüe ehi vaheñã chupe. ⁷ Pe rumo imombaraisupri peico vahe, Tūpa omondora pe pituhu ãgua, ore pituhu ãgua avei, acoi yande Yar Jesús oyevisse tata rendigüer pãhuve ñva sui opacatu güembiguaico seco pĩrata catu vahe reseve. ⁸ Ahe oura opacatu Vu Tūpa reroyasarëhi mombaraisu ãgua iyavei oyesuindar ñehesa poropĩsirosa resendar rendu tēisar mombaraisu avei. ⁹ Evocoi iparaisura yuvireco, imocañipri yuvirecoira apirëhi. Iyavei imboyepepisara amombri yande Yar reco pĩratasa porañtesa sui. ¹⁰ Acoi ouse ahe ari pipe, yande Yar imboeteipriira opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

¹¹ Co rese oroyeroqui pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pĩratasa pipe opacatu ñepepepe mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoiyase yande Yar Jesucristo rer imboeteipriira pe recocuer pipe sui; iyavei pe imboeteipriira peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tupriisa

¹ Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaheñã oyese. ² Peicua catu, tapepihañemoñeta rerova eme iyavei peyembosiquiyeyi rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. ³ Peicua catu peyembopa ucai rene ñepepepe ava upe. Esepia, yipindar ari Jesucristo yu ãgua renonde, yugüerura mbahe-mbahe tēi aposar. Ahe Tūpa amotarëhisar yuvirecoi vahe. Ahese oyemboyecua ava yangaipa guasu vahe. Ahe ocañi tēi vaheñã. ⁴ Oyemboivate aira opacatu Tūpa rer rerecosar amotarëhisave iyavei ndoipotai chira ambuae mboetei. Oique aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oĩ.

⁵ ¿Ndapemahenduhai vo acoi che ñehengagüer rese pe pãhuve aico vitese cuese? ⁶ Co imombitasar peicua cūritei. Ihari oyepotase voi, oyemboyecua. ⁷ Co porocuaita amotarëhisar ndoyemboyecua vitei vahe rembiapo oime cūritei. Co güeraño ipane

imombitasar renose ãgua ipãhu sui, ⁸ ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pĩratasa pipe oyeveise curi. ⁹ Yucasa renonde rumo, acoi ava yangaipa guasu vahe oura Carugar pĩratasa pipe; güerura güeco pĩratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tẽi oporombopa ãgua oico ava ocañi tẽi vaherã upe. Esepia, evocoi ava ndosendu potai porombohesa supi eté vahe oñepisiro ãgua yuvireco. ¹¹ Sese Tũpa oseyara co porombopasa reroya ãgua yuvireco ¹² ‘ipipe tocañi tẽi co ava, opacatu mbahe supi eté vahe reroyaẽhisar, acoi oyemboviha catu vahe mbahe-mbahe tẽi rese yuvireco’ oya.

Iporavopri ipĩsiropirã

¹³ Ore rumo, “Aviye ndeu” orohera Tũpa upe pe recocuer rese yepi, ore rivireta, yande Yar rembiaisu peico vahe. Esepia, Tũpa niha pe poravo yipisuive pe pĩsiro ãgua pe reco maranehi ãgua rese Espĩritu pipe iyavei porombohesa supi eté vahe reroya ãgua. ¹⁴ Sese niha, Tũpa oñehe yandeu yande piha pipe co ñehesa pĩsirosa resendar pipe, ore oromombehu vahe pẽu ‘tovireco che Rahir Jesucristo reco porañetesa’ oya. ¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachia vahe acoi pẽu. ¹⁶ Yande Yar Jesucristo teieté, yande Ru Tũpa avei, yande raisusa yande rovasasa pipe ombou vahe vihasa apirẽhi vahe yandeu iyavei yande reco tupri rãro ãgua, ¹⁷ ahe tape monguerẽhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherã rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pẽu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyepota pe pãhuve. ² Peyerure avei ore repi ãgua rese ava ndaseco põrai vahe, ipihañemoñeta rai vahe sui. Esepia niha, ndaopacatui Tũpa rese ipihañemoñeta yuvireco. ³ Yande Yar rumo seco ïvi vahe. Ahe pe recocuer moviracuara iyavei pe rãrora mbahe tẽi sui. ⁴ Ore oroyeroya yande Yar rovai peyapo vahe rese iyavei peyapo viteño vaherã rese acoi ore pe cuai agüer. ⁵ Yande Yar tape pĩtivii pe poroaisu ãgua inungar Tũpa oporoaisu iyavei Cristo ñemosasa rereco ãgua.

Yande cuaita yande poraviqui ãgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pãhuve, peyepipiño ichui, acoi ndoviroya potai vahe avei ore porombohesa oromombehu vahe pẽu. ⁷ Pe peicua mara peyera ore recocuer moña ãgua peico. Ore oroicose pe pãhuve, ndoroico tẽi, ⁸ ndorohu tẽi avei ambuae tembihu imboepipirẽhi. Ore rumo que ñepeĩ mañeco tẽiẽhi ãgua rese oroporaviqui ore cuerai rane ité ari, pĩtu reseve. ⁹ Iya ité niha mbahe rese ore porandu ãgua pẽu ore pĩtivii ãgua rese viña; ore rumo oroporaviqui pe ore recocuer rupi pe guata ãgua rese. ¹⁰ Acoi oroico vitese pe pãhuve, oromondo pe cuaitarã: acoi ndoporaviqui potai vahe, ahe tocaru eme. ¹¹ Oroyandu amove aipo pe pãhu pendar yuvirecoiño tẽi ndoporaviqui vahe. Evocoi omañeco tẽi ambuae ava recocuer. ¹² Ore oromondo acoi ava upe mborocuita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochi ahe. ¹⁵ Pereco eme catu yamotarẽhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tupri ãgua pẽu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité pẽu. Che rembicuachía icuapri opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tūpa reroyasa pīpe ereico. Che niha Jesucristo apóstol aico, yande Pīsīrosar Tūpa porocuita rupi iyavei yande Yar Jesucristo porocuita rupi. Ahe niha yande remiario. Tombou yande Ru Tūpa, yande Yar Jesucristo oporovasasa, oporoparaisuerecosa ndeu nde reco tupri āgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pīhañemoñetasa co coti-coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ēgüe ehi tēi vahe rese avei. Ahe ichui osē yeacasa naporai vahe yepi; ndayande pītivii rumo Tūpa remimbotar reroya tupri āgua rese.

⁵ Sese co amondo porocuita ndeu yande yeaisu āgua yande pīhañemoñeta catuprisa pīpe, yande reco yapisaca tuprisave, iyavei yande yeroyasa supi eté vahe pīpe. ⁶ Esepia, amove ava oime ichui oyearacua mocañi oñehe-ñehe tēisa pīpe yuvireco. ⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatu mbahe-mbahe tēi aposar upe nara, nomboetei vahe Tūpa iyavei chupendar pīhañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi vīrocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe poropīsīrosa resendar rese. Tūpa sovasapri secoi, ahe che cuai vahe sese.

Pablo oparaisuerecosa rese, “Aviye ndeu” ehi Tūpa upe

¹² “Aviye ndeu” ahe yande Yar Jesucristo upe. Ahe niha ombou pīratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pīpe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. ¹⁴ Ēgüe ehi yande Yar ombou catu oporovasasa che rese iyavei ombou che oyese yeroya āgua iyavei che poroaisu āgua Jesucristo rese che recosa pīpe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pīpe ava yangaipa vahe pīsīro āgua. Che rumo acoi ivate catu vahe yipindar aico ipāhuve. ¹⁶ Sese Tūpa che paraisuereco che rese rane Jesucristo reco mbegüe tuprisa mboyecua āgua. Ēgüe ehi che recocuer upe ambuae ava seroya āgua. Ipīpe sui osupitira tecovesa apirēhi vahe yuvireco. ¹⁷ ¡Sese yamondo imboeteisa apirēhi yande Rereciar ndopai vahe upe! ¡Ahe nomanoi vahe, ndayasepiyai vahe, ahe ñepe vahe Tūpa!

18-19 Che rahir Timoteo, co amondo nde cuaitarã ndeu nde reco moviracua ãgua mbahe tẽi recopi ãgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tũpa reroyasar oñehe yuvireco nde rese serer pipe. Amove ava opihañemoñeta tupri reroyaẽhisave, omocañi uca Tũpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tẽi eme Tũpa upe yamotarẽhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerẽhi pe yerure ãgua, peporandu, pemondo avei “aviye” pe hesa Tũpa upe opacatu ava recocuer rese. ² Iyavei peyerure opacatu mborerecuar rese. Evocoyase tayareco yande reco tupri Tũpa mboetei tuprisa pipe, yande poromboeteisa pipe avei. ³ Co aviye ité; ahe niha yande Pĩsirosar Tũpa remimbotar. ⁴ Supi eté ahe oipota opacatu ava ñepisiro iyavei co porombohesa supi eté vahe cua tupri ãgua. ⁵ Esepia, ñepeño ité Tũpa, iyavei ñepeño ité ava oicatu vahe yande reraso Tũpa upe: ahe Jesucristo. ⁶ Esepia, Jesucristo omano opacatu ava yangaipa vahe repirã ipisiro ãgua. Ahe imombehusa chupendar ari iporavopri rupi. ⁷ Sese che supi eté apóstol, icuapri aico Tũpa Ñhengagüer mombehu ãgua, ava ndahei vahe judío mbohe ãgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiẽhisa pipe, oyeacaẽhisa pipe avei. ⁹ Iyavei cuña toyemonde tupriño turucuarño tẽi pipe yuvireco. Aní chira rumo oãca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco. ¹⁰ Iyacatu rumo yuvirecoi tupri gũembiapo aviye vahe pipe, inungar cuña oyemondo tupri vahe Tũpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehí pãhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tũpa oyapo yipindar Adán; ipare Eva oyapo. ¹⁴ Adán ndahei imbopapri; cuña rumo oyembopa uca. Ichui oviapi angaipa pipe. ¹⁵ Oñepisirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tũpa reroyasar rãrosar cuaita

¹ Iyavei co supi eté: acoi amove oico pota vahe Tũpa reroyasar rãro ãgua, ahe oipota mboraviqui aviye catu vahe. ² Sese acoi vireco vahe ocuaita Tũpa reroyasar rãro ãgua, ahe secoi tupri mbahe aviye vahe pipe yepi. Ipipe ava noñehei chira yamotarẽhisave. Iyavei omendara ñepe cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri ãgua. ³ Iyavei ndahei chira caguar tẽi. Ndosecai chiaveira ovava ãgua. Iyacatu rumo seco mbegüera opacatu ava upe. Ndoipota rai chiaveira guarepochi. ⁴ Iyavei oicua tupri gũeta pipendar rãro ãgua. Ombahe aveira guahir iporeroya ãgua, iporomboetei ãgua avei. ⁵ Esepia, acoi ndoicuai vahe güeta pipendar rãro, ¿mara ehira evocoyase Tũpa reroyasar rãro? ⁶ Tũpa reroyasar rãrosar rumo ndahei chira oipisi ramo vahe Tũpa opiha pipe. Esepia, aviyeteramo oyemboivate ai tiẽtera. Ipipe sui imocañipri avei secoira Carugar nungar. ⁷ Iyavei oyecua uca tupri ranera Tũpa reroyasarẽhi pãhuve. Ahese ndipoi chira imboeteiẽhisa iyavei ndoviapi chira Carugar povrive.

Tũpa reroyasar rese ihañeco vahe cuaita

⁸ Iyavei Tūpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opihañemoñeta catupriisa pipe yuvireco. ¹⁰ Iyavei secoãhasa ranera. Acoi osē tuprise, ahese toyuvirecoi Tūpa reroyasar rese ihañeco vaheerã. ¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tupriira güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeño itera sembireco, oicua aveira guahir rãro tupri ãgua, güeta pipendar rãro ãgua avei. ¹³ Esepia, Tūpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeeñisave avei secoira Jesucristo reroyasa pipe.

Tūpa reco oyecua ramo vahe reroya tupriisa

¹⁴ Che aso pihavi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tupri ãgua ava Tūpa rese yuvirecoi vahe pãhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua. ¹⁶ Supi eté tuvichá etepri Tūpa reco oyecua ramo vahe reroya tupriisa:

Cristo oyemoporēhi yande reco nungar pipe yandeu.

Ipare Espiritu pipe imboyecuaasa secocuer supi tupri vahe.

Iyavei Tūpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

4

Oimera ava oyepipi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepipira Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Carugar suindar avei. ² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ëgüe ehira opihañemoñetasa mocañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. ⁴ Esepia, opacatu mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe. ⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco ãgua. ⁸ Esepia, yepe aviyeño chíhi yande retecuer yamoviracua viña, yande Yar upe yande reco ãgua aviye catu opacatu yande reco uve nara. Esepia, ahe yande pítivira yande recove ãgua cūritei iyavei curi yande recove ãgua. ⁹ Co supi eté vahe, evocoyase yande yaroyara opacatu yepi. ¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Písirosar, iyavei viroyasar Písirosar catu ité secoi.

¹¹ Co porombohesa eremombehura ava pãhuve, erembohe aveira sese. ¹² Tipo eme ava nde reroïro vahe chíhivahe catu nde reco rese. Nde rumo ereico tupriira Tūpa reroyasar rovaque. Eñehe Tūpa reroyasave nde reco tupriisa pipe. Esaisu tupri nde

yeroyasave nde recocuer maranehi pipe. ¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipisiroproi ereicora; nde ñehe rese oyapisaca vahe avei ipisiroproi yuvirecoira.

5

Mara ehira Jesús reroyasar oyepāhuve yuvireco

¹ Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chihivahe upe ereñehe tuprira secocuerā rese inungar nde rivri upe. ² Cuña otīaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

³ Acoi imer mano vahecuer ité ereipitivira que mbahe ipane vahe rese. ⁴ Que oimese imembri, anise que semiariro, toyembohe rane ocuaita mboaviye āgua yuvireco chupe. Ēgüe tehi guaisu mboyevi chupe, ahe niha Tūpa remimbotar. ⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyeroguiño ité ari, pītu yacatu yepi. ⁶ Osecase rumo mbahe güemimbotar yuvireco, ahese omano vahe tēi secocuer yuvirecoi. ⁷ Eyocuai tupri ava co ñehesa rese; ichui ndahei chira ava ñehedora tēi yuvirecoi. ⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeñiño ité omer vireco vahecuer. ¹⁰ Icuaprira secocuer icatuprisa rese, omboacua tuprise chihivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oipitivise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe. ¹² Ipipe oimera Tūpa poronupasa chupe. Esepia, yipendar oyemondo Tūpa upeño ité oyecuachiasa. Ipare rumo nomboaviyei eté oñehe. ¹³ Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembi iri avei yuvireco, iyavei tosāro tupri güeta pipendar. Sese yamotarēhimbar secocuer ndahei chira oñehedora tēi vireco yuvireco. ¹⁵ Esepia, oime ité amove oyepepi vahe güemimbotar pipe Carugar rupi güeco āgua.

¹⁶ Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoyase tūparo pendar nihañecoi chira. Ahese oicatura supi eté imu ndipoi vahe rese hañeco āgua yuvireco.

¹⁷ Iyavei acoi Tūpa reroyasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tūpa Ñehengagüer mombehu āgua, ava mbohe āgua avei, ahe co poropitiviisa oipisi catura. ¹⁸ Esepia, arachendar icuachiapri pipe aipo ehi: “Ereyuru āpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osãro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipãhuve, ahese eremboaracuara opacatu ava rovaque. Evocoyase ambuae osiquiyera angaipa apoēhi āgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai i va pendar rovaque avei: ereyapo tuprira co mborocuaita, nderemomahuatāi chira ava imboaracua nde remimbotar rupi tēi. ²² Ndahei chira pihai vi ereseno i mbiā mborocuaita rese ihañeco vahe rã. Aviyeteramo nde rese pãve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chñhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no. ² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pihañemoñetasa sepirusu vahe nungar

Eporombohe, emombehu co mbahe: ³ oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa ⁵ iyavei iporoacasa ndopai vahe ava yaracua rai vahe pãhuve. Ndoicuai rumo mbahe supi tupri vahe yuvireco. Ipihñemoñeta Tūpa rese omahenduhasa pipe mbahe rereco ati āgua yuvireco viña. ⁶ Yayembovihañose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu. ⁷ Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde āgua avei, sese yayembovihañora yaico. ⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pipe, setá mbahe pota raisave, ipipe oyeecomomara. Ipare oyemocañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vñracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ivisa pipe, ndemahenduhano ité Tūpa rese. Eroya, esaisu, eñemosa avei eico nde reco mbegüesave. ¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai. ¹³ Cūrtei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa

sui acoi ouse yande Yar Jesucristo. ¹⁵ Acoi oyepotase arí imombehuprí curi, ahese Tũpa omboyevira Guahir. Ahe niha ñepei vaheño ité imboeteiprí, seco pĩrata catu vahe. Aheño ité niha mborerecuar ivate catu vahe rerecuar. ¹⁶ Aheño ité teco apirẽhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ëgũe tehi, imboeteiprí tasecoi opacatu opĩratasa apirẽhi vahe rese!

¹⁷ Acoi imbahe eta vahe co ivi pĩpe eyocuai: toyemboivata ai eme, iyavei toyeroya rai eme ombahe eta rese tẽi yuvireco. Esepia, ahe ãgũe ehi tẽi vahe. Iyacatu rumo Tũpa rese oyeroyara yuvireco. Ahe niha opacatu mbahe icatuprí vahe ombou yandeu nara yande rembiporugũ. ¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pĩpe. Iyavei toyemoingatuño acoi mbahe vireco vahe mboyaho ãgua ambuae ava upe yuvireco. ¹⁹ Evocoyase virecora mbahe aviye vahe, apirẽhi vahe oyeupe nara yuvireco curi tecovesa supi eté vahe rereco ãgua.

Timoteo cuaitarã ipa vahe

²⁰ Timoteo, esãro tuprí co porombohesa supi tuprí vahe Tũpa ombou vahe ndeu. Ereyapisacai rene ava tẽi pihãñemoñetasa ãgũe ehi tẽi vahe rese, iyavei porombohesa co coti tẽi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tuprí tẽi vahe yuvireco chupe. ²¹ Ipĩpe sui niha amove ava oyavi Tũpa reroyasa yuvireco.

Aviye, yande Aposar tande rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tũpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cũritei oime yandeu Jesucristo rese yande recose. Yande Ru Tũpa iyavei yande Yar Jesucristo tombou oporovasasa, oporoparisuerecosa nde reco tupri ãgua ndeu.

Pablo oyocuai Timoteo Cristo recocuer mombehu ãgua

³ Che yeroqui pãhuve, chemahenduha nde rese pĩtu, ari yacatu rupi. “Aviye ndeu” ahe Tũpa upe nde recocuer rese. Che aporaviqui tupri ité Tũpa rese che pihañemoñeta tupri pĩpe yepi inungar che ramoi eta oyapo yuvireco aracahe. ⁴ Ndacheresarai eté acoi nde yaseho agũer sui. Iyavei oroepia pota tẽi che yembovĩharete ãgua. ⁵ Supi eté chemahenduhãno ité nde Tũpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipĩndar ãgũe ehi yuvireco. Evocoiyase ayeroyaño ité nde rese, nde avei ãgũe erese.

⁶ Sese che oromonguerẽhi embouvicha catu co Tũpa ombou vahe ndeu acoi amondose che po nde harive; ahe ereco catu ndeyeupe. ⁷ Esepia, Tũpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri ãgua. ⁸ Evocoiyase eresiquiye eme catu yande Yar recocuer mombehu. Nderechĩ chiaveira che roquendasa sui tẽi. Esepia, yande Yar recocuer mombehusa sui tẽi niha che roquenda yuvireco. Iyacatu rumo, nde avei ereñemosañora co mbahe-mbahe tẽi Tũpa pĩratasa pĩpe. Ahe oura ndeu ñehesa pĩsirosa resendar mombehusa sui. ⁹ Tũpa niha yande pĩsiro iyavei yande renoi yande reco tupri ãgua sese, ndahei yande rembiapo pĩpe. Ahe rumo gũemimbotar rupi yande raisu Cristo Jesús rese yande recose. Ahe Tũpa ité yande raisu yipisuive ivi apo vitehiseve. ¹⁰ Cũritei rumo ahe omboyecua oporoaisusa yande Pĩsirosar Jesucristo ouse, acoi ou vahe co ivi pĩpe manosa pĩratasa recopi ãgua. Iyavei ñehesa pĩsirosa pĩpe avei oicua uca tecovesa ndopai vahe.

¹¹ Tũpa niha che cuai co ñehesa mombehu ãgua. Che cuai avei apóstol che reco ãgua iyavei che porombohe ãgua. ¹² Sese niha che opacatu aiporara co mbahe-mbahe tẽi vichico. Nachi eté rumo yande Yar rese che yeroyasa pĩpe. Esepia, aicua ahe vireco pĩratasa acoi ñehesa ombou vahe cheu imocañiẽhi ãgua acoi Jesús yevi ãgua rupi eté.

¹³ Erecoveño ité porombohesa aviye vahe che suindar, iyavei eicoño ité Tũpa rese nde yeroyasa pĩpe iyavei poroaisusa yareco vahe pĩpe Cristo rese yaicose. ¹⁴ Esãro avei co ñehesa aviye vahe Tũpa ombou vahe ndeu Espĩritu Santo reco pĩratasa pĩpe yareco vahe yandeyese.

¹⁵ Ereicua niha co ava opacatu Asia pĩpendar oyepepiño che sui yuvireco. Ipãhuve yuvirecoi mbia ñuvirio, ahe serer: Figelo, Hermógenes. ¹⁶ Yande Yar tomondo paraisuerecosa Onesiforo mu upe. Esepia, Onesiforo setá yupagũer che mbovĩha. Iyavei nochi eté ava rovaque che roquendasa sui. ¹⁷ Ouse rumo Roma ve, ndopituhui eté che reca. ¹⁸ Yande Yar tomondo oporoparisuerecosa chupe ahe ari pĩpe curi. Iyavei nde ereicua tupri ité ahe mbia yande pĩtivii vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe pipe ndeu. ² Acoi che porombohesa eresendu vahe ava rehi rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe água.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité. ⁴ Ñepi yepe sundao ndosiri eté ocuaita sui. Esepia, ahe oyemoingatu voi eté ocuai água güerecuar upe. ⁵ Iyavei iguayi rai vahe, ndoipisi chira porerecosa oguayi tupriēhi pipe. ⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. ⁷ Eyapisaca tupri co che ñehe rese. Yande Yar niha osenducua uca tupri opaatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secoi. Co niha ñehesa ñepisirosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatu eté yuvireco. ¹⁰ Sese che añemosañño opaatu mbahe-mbahe tēi upe opaatu Tūpa rembiporavo recocuer aviye água rese ‘tovireco catu pñisirosa porañete, apirēhi vahe Jesucristo rese yuvireco’ che yapave.

¹¹ Co niha supi tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri. “Ndaicuai Jesucristo” yahese, ahese ahe avei, “Ndopocuai vahe” ehiñora yandeu.

¹³ Yepe co coti tēi yarovara yande recocuer seroyaēhisave, ahe rumo ndovirovai chietera güeco ñvisa.

Esepia, ndoicatu, “Ndahei che ahe aico” ehi vaheñã.

Ava osē tupri vahe güecoñhasa Tūpa upe nara

¹⁴ Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse ñehe rai yuvireco. ¹⁵ Eyapo tupri mbahe opaatu nde catugüer rupi nde recocuer mboyecua água Tūpa rovai inungar oporaviqui tupri vahe, nochí vahe. Ègüe ere, eporombohe tupri ñehesa supi eté vahe rese. ¹⁶ Eyepepi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ègüe ehi Himeneo, Fileto ¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipípe Jesús reroyasar oipihañemoñeta rerova yuvireco. ¹⁹ Tūpa rumo omondo mbahe moviracua tupri água, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opaatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepi iporupirã ari imboeteisa pipe nara, ambuae rumo ari rupi iporupirã. ²¹ Acoi ava oñemoatiro vahe co tecocuera sui Tūpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo água Tūpa upe.

²² Eyepepi mbia chíhivahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo oipihañemoñeta tupri pipe yuvireco. ²³ Eremboyeroyai rene ñehesa porandu-randu tēisa, ēgüe ehi tēi vahe. Ereicua niha ichui tēi oime yeamotarēhisa yepi. ²⁴ Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviñera secocuer opaatu upe, oporombohe tupri,

oñemosañora ombahe mboasiẽhisa pipe oico. ²⁵ Iyavei omboaracuara güeco asiẽhisa pipe acoi ava ndiporeroyai vahe. Esepia, avieteramo Tũpa osecuñarora ipihañemoñeta raisa oyeupe yevi iri ãgua: ipipe sui porombohesa supi eté vahe oicudara yuvireco. ²⁶ Ipipe sui avei toyemopoase, toyuvínose Caruguar povri sui semimbotar apo iriẽhi ãgua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe. ² Ahese ava ahe ae tẽi oyeaisura yuvireco, guarepochi tẽi oipota raira, oyemboivate aira, oyemboetei ai tẽi aveira. Oñehe raira Tũpa rese yamotarẽhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tũpa rese pihañemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tẽi apo ãgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarẽhira yuvireco. ⁴ Iyavei omondora ava yamotarẽhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tẽi oyemboiha ãgua yuvireco. Ipipe rumo Tũpa ndosaisui chira yuvireco. ⁵ Ahe inungar-ra Tũpa rese ité yuvirecoi vahe viña. Tũpa pĩratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pãhuve oime yuviroiqueño tẽi vahe oi rupi cuña ndoicatui vahe angaipa rerecosar mbopa ãgua. Esepia, ahe cuña opihañemoñeta raisa pipe yuvirecoi vahe. ⁷ Yepe oyapisaca tupri tẽira ñehesa rese yuvireco viña, ndosupiti eté rumo co porombohesa supi eté vahe renducua ãgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarẽhi yuvireco, ãgüe ehi avei evocoi ava porombohesa supi eté vahe amotarẽhisar yuvireco. Ahe oyemomara vahe opihañemoñeta rai pipe yuvireco. Ndoviroiyai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicudara yuvireco imbahecuaẽhi rese, inungar co ñuvirío mbia Moisés amotarẽhimbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tẽi porarasa rese. Nde niha ereicua opacatu mbahe tẽi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tẽi che rerecose yuvireco. Yande Yar rumo che pĩsiro opacatu evocoi mbahe-mbahe tẽi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tẽi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopambopa tẽira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. ¹⁵ Iyavei eyemomahenduha co rese: nde chĩhivahe suive ité niha ereicua Tũpa ñehe icuachiapri eico. Ahe niha nde mombahecua vahe nde pĩsiro ãgua Jesucristo reroyasa pipe. ¹⁶ Opacatu co ñehesa icuachiapri ou vahe Tũpa sui, aviye ai eté porombohe ãgua, iyavei poromboyapisaca ãgua, poromboaracua tupri ãgua iyavei ava upe ñehe tupri ãgua secocuer mohivi ãgua yepi. ¹⁷ Ichui, ava Tũpa rese yuvirecoi vahe oyemoingatu voira opacatu tecocuer tupri apo ãgua yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vaheṙā omborerecuasa reseve oicove vahe, omano vahe recocuer rese porandu āgua. ² Emombehu Tūpa Ñhengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe. ³ Esepia, coiye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco. ⁴ Iyavei oyepepira co mbahe supi eté vahe sui. Viroyara rumo opacatu ava remimombehu tēi yuvireco. ⁵ Nde rumo, ererecoveñora nde aracua tupri. Eñemosañō mbahe naporai vahe upe. Ndehañeco catu ñehesa pīsirosa resendar mombehu āgua. Emboaviye tupri avei opacatu nde poraviquisa.

⁶ Virovi ari che retecuer mondo āgua manosave inungar mbahe seropovēhepri yande Yar upe. ⁷ Ayapopa che recoeté pipe che poraviquisa aviye vahe che amotarēhimbar pāhuve. Amboaviye che cuaita. Ndayepepi eté che yeroyasa sui. ⁸ Cūritei che rāro ivave co porerecosa che poraviqui aviye vahe resendar. Yande Yar mborerecuar seco ñvi vahe niha omboura cheu ahe ari pipe. Ndahei chira cheu güerañō. Ombou aveira opacatu Cristo raisusa pipe iyevisa osāro vahe upe yuvireco.

Pablo, “Eyu rane che repia” ehi Timoteo upe

⁹ Ndepoyava catu eyu che repia. ¹⁰ Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güerañō oicove che piri. Eseca Marcos, tou nde rupi che pītivi āgua mboraviqui rese. ¹² Tíquico amondo tecua Efeso ve. ¹³ Acoi ereyuse, eru avirave che yemboyohasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuar sembiapogüer rese chupe. ¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi āgua mborerecuareta rovai, ndipoi eté que che pītivisar; opacatuño ité che reya yuvireco. Tūpa tiñero sese yuvireco chupe. ¹⁷ Yande Yar Jesucristo rumo che pītivi. Che momirata co ñehesa pīsirosa resendar mombehu tupri āgua opacatu ava ndahei vahe judío upe. Ēgüe ehi avei che renose mbahe tēi sui. ¹⁸ Ahe che pehara opacatu mbahe-mbahe tēi sui iyavei che pīsiora oyepiri ivave che so āgua. ¡Ēgüe tehi timboeteisa catu yande Yar apirēhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rēta pendar upe avei. ²⁰ Erasto opita Corinto ve, Trófimo rumo imbaheasi, evocoyase aseya Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supī tuprī vahe cua uca tuprī āgua. ² Esepia, tecovesa apirēhi vahe rārosa pīpe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico. ³ Ichui cūrītei ari oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pīpe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tuprī āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opita vite vahe moingatu tuprī āgua. Iyavei, “Eiporavo ava, Jesucristo viroya vahe rāro āgua ñepei-peī tecua rupindar” ahe acoi ndeu cuese. ⁶ Evocoi Jesucristo viroya vahe rārosar toyuvirecoi güeco tuprī āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco virecora yuvireco; tahir evocoyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pīpe ambuae ava ñeheēhi āgua sese yuvireco. ⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tuprī yuvireco. Iyavei toico eme oporeroyaēhisa pīpe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tuprīra güecocuer. Iyavei taseco ivi güeco catuprī pīpe Tūpa upe. Tosāro tuprī avei opīhañemoñetasa yuvireco. ⁹ Iya oyemboya catu oyembohesa supī tuprī vahe rese yuvireco. Ipipe sui tomonguerēhi catu ambuae yuvireco co ñehesa maranehi pīpe iyavei ambuae seroīrosar pīhañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supī tuprī vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

¹² Ñepeī mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pīrata ité. Evocoyase toviroya tuprī Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipīhañemoñeta rai tēi vahe upe rumo, ndipoi eté mbahe nimarai vahe. Esepia, ipīhañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tuprī tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatui mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoyase mbia oñaro catu vahe Tũpa reroyasar toñearo tupri, imboyeroyapri toyuvirecoi, tosãro tupri güecocuer, tovíreco tupri avei Tũpa reroyasa, oporoaisusa. Iyavei güeco mbegüesa pipe toñemoso mbahe-mbahe tẽi upe. ³ Ëgüe tehi avei cuña oñaro vahe Tũpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuara güecocuer aviye vahe, ⁴ ombohera cuñatai imer raisu água, imembrĩ raisu água avei. ⁵ Tombohe avei seco tupri água, iñearo tupri água angaipa sui iyavei sêta pipendar rese hañeco tupri água yuvireco. Tomboaracua avei seco aviye água, imer mboyeroya água avei. Evocoyase noñehe-ñehe tẽi chira ava Tũpa Ñehengagüer rese yuvireco.

⁶ Ëgüe ere avei emonguerẽhi mbia chĩhivahe secocuer rese iñearo tupri água. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tupriisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarẽhimbar yuvinochira ndoicatuise, “Mbahe” ohe água yuvireco yandeu.

⁹ Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroya imboeteisave, toiñehepoepi eme avei yuvireco. ¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tupriisa, omboeteira yande Pĩsirosar Tũpa recocuer resendar yembohesa yuvireco.

¹¹ Tũpa niha omboyecua oporoaisusa yandeu. Ahe güeru pĩsirosa opacatu ava upe. ¹² Co poroaisusa Tũpa suindar yande mbohe mbahe-mbahe tẽi iyavei yande remimbotar tẽi reya água. Iyavei yande mbohe co ivi pipe yande ñearo tupri água, yande reco ivi água iyavei Tũpa mboetei água. ¹³ Iyavei yasãro yande viharetisa pipe Tũpa omboaviye vaheerã güemimombehu, ahe Jesucristo yande Tũpa seco ivatẽ vahe, yande Pĩsirosar yevi irisa oporañetisa pipe. ¹⁴ Ahe oyemondo oyeyuca uca yande rese yande pĩsiro água opacatu mbahe-mbahe tẽi sui yande reco moatiro tupri água. Evocoyase yande yaico chupe nara güeraño itẽ yande querẽhisave opacatu mbahe aviye vahe apo água.

¹⁵ Evocoi rese erembohera, eremonguerẽhira, eremboaracua aveira opacatu nde porocuita pipe. Sese tipo eme que nde reroĩrosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuar mi porocuita avei. Iyavei toyemoingatu tupri opacatu mbahe aviye vahe apo água yuvireco. ² Toñehe-ñehe tẽi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tũpa. Ocañi tẽi vahe yaico, iyavei yande mbiguai tẽi yaico opacatu mbahe yande remimbotar apo pipe; iyavei yaseca-seca mbahe tẽi vahe yande yemboviha água. Iyavei yaicoño mbahe tẽi pipe, yaipotaño tẽi ambuae ava mbahe, yamotarẽhimbrĩ yaico iyavei yandeyeupe ae-ae yayeamotarẽhi. ⁴ Ipare rumo Tũpa, yande Pĩsirosar, omboyecua güeco tupriisa, oporoaisusa opacatu ava upe. ⁵ Yande pĩsiro, ndahei rumo yande rembiapo aviyesa sui, ahe rumo víreco oporoparisuerecosa yandeu nara. Ichui omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco água. ⁶ Iyavei yande Pĩsirosar Jesucristo rembiapo sui Tũpa ombou

catu oEspíritu Santo yandeu, ⁷ ipipe yande reco ai sui yande renose yande reco ñvi tupri ãgua oporoaisusa pipe ‘toipisi co tecovesa apirẽhi güemiario yuvireco’ oya.

⁸ Aipo ñehesa supi eté vahe. Che aipota sese ereporombohera. Ipipe Tũpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaheã yuvireco. ⁹ Ereyepira rumo opacatu co nungar mbahe sui: yipindar ñehesa yepoepi tẽisa sui, ipare aracahendar ava recocuer rese ñehesa sui. Ereyepi aveira iporomoñemoiro serai vahe sui, Moisés porocuita resendar sui tẽi ñehepoepi-episa sui avei. Esepia, evocoi nungar mbahe ãgüe ehi tẽi vahe.

¹⁰ Acoi ava omoimese yemboyahosa Tũpa reroyasar pãhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihavi che repia tecua Nicópolis ve. Esepia, aheve apita pota sõhisa vahe pituhu rãro. ¹³ Eipitivii opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo ãgua iyavei ava mbahe chupe ipane vahe pitivii ãgua. Evocoyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tũpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo ãgua ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo ãgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. ³ Yande Ru Tūpa, yande Yar Jesucristo tombou oporovasasa, güeco tuprísava avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai ãgua viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo ãgua co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cūrítei rumo ēgüe ndehi iri chira oico ndeu, iyavei cheu no. ¹² Amboyevi co imondo ndeu eipeve. Eipisi inungar-ra che itera viña. ¹³ Che aipota opita vajerã nde nungar tupri che pítivii ãgua viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepipi pucu raimi nde sui oyevi iri vajerã nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprísava saisusa pipe yande rívrí nungar tupri ité yande Yar upe nara.

¹⁷ Inungar nde rívrí che rereco eve. Ēgüe ere tupri aveira co mbia pisi. ¹⁸ Acoi oyapose mbahe ndeu, anise vırocuse que mbahe nde sui, cheu emombehu. Che evocoyase amboepira ndeu. ¹⁹ Che Pablo, aicuachía che po pipe ité seroya tupri ãgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rívrí, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mbovıha catumi eve.

²¹ Che aicuachía ndeu. Esepia, aicua nde ereyapo tuprísava aipo che porandusa, iyavei ereyapo catu itera co sui. ²² Iyavei amoha Tūpa che renose vajerã che roquendasa sui pe yeruresa pipe che so ãgua eipeve pe repia. Sese emoingatumi avei che pıtuhu ãgua.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendapri cohave yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tüpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoí eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe. ² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Ëgüe ehi eté, ahe Vu recocuer tupri ité. Ahe opacatu mbahe omoviracua oñehe pĩratasa pipe. Yande angaipagüer sui yande moatiro pare oso, oguapi Vu acato coti oĩ ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi:

“Tomboetei opacatu che rembiguai yuvireco”

ehi. ⁷ Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui vaherã” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vaherã ité.

Ereporocuai nde reco ivi tuprisa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vaherã tēi,

inungar turucuar cuacua oyearo vahe opa.

Nde rumo apirēhi vaherã ité ereico.

¹² Ipare ereyapara inungar turucuar yapapri iyavei ereseñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherã ité” ehi.

¹³ Ndahei que ñepei iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui ãgua, icuapri avei ava ipisiropirã pĩtivii ãgua.

2

Yandemahemoha tupri yande pĩsirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piasu sui yande yepipiēhi ãgua. ² Esepia, co Tūpa rembiguai remimombehugüer seroyapri ité secoi, iyavei oyemboangaipa vahe, ndoviroyai vahe avei imombaraisupri ité sembiapo

rupi yuvirecoi aracahe. ³ ¿Mara yahera p̄ha evocoyase yande yañemi Tūpa ñemoirosa sui viña acoi ndayandemahemoha tupriise co yande p̄sirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tūpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembiguai povrive omondo Tūpa ivi oime vahe, acoi oromombehu vahe p̄u. ⁶ Oime rumo icuachiapri aracahendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava t̄i rese, iyavei eresãro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboeteisave chupe.

⁸ Iyavei opacatu erereco uca mbahe nde rembiapo ipovrive” ehi imombehu.

Ëgüe ehise Tūpa, ndoseyai eté que ñepe yepe mbahe ipo pendar̄hi. Cūritei rumo ndaopacatu tupri vitei mbahe ipovrive. ⁹ Yaicua niha Jesús, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano ãgua opacatu ava repirã. Cūritei rumo iyemombaraisu pare, omondo oporañetesa imboeteisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisirosar güeco ãgua’ oya. ¹¹ Esepia, opacatu vireco ñepe Vu yuvireco co seco catupri vahe, seco mbocatuprisar avei. Sese Tahir nochi eté, “Che rivireta peico” ohe ãgua viroyasar upe. ¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucái aveira sapucaisa ndeu opacatu ava ndeu oñemonuha vahe p̄huvé” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; ãgüe ehi avei Jesús vireco voho, vuvi yande nungar; omano pipe sui omocañi vahe iporoyuca ai vahe p̄ratasa; ahe Carugar. ¹⁵ Opacatu ava manosa sui osiquiyesa pipe mbiguai t̄i nungar yuvirecoi vahe güecove viteseve, evocoi nungar sui senose ãgua, ãgüe ehi Jesús. ¹⁶ Esepia, ahe ndoui Tūpa rembiguai p̄tivii ãgua, ahe rumo ou Abraham suindareta p̄tivii ãgua. ¹⁷ Sese niha tivireta nungar tupri ité oyapo Tūpa, “Toime che rovaque pahi rereciar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime ãgua” ehi. ¹⁸ Esepia, ahe avei oiporara Carugar poroãtoisa. Sese cūritei ahe oicatu ité ava Carugar remiatoi p̄tivii ãgua.

3

Jesús ivate catu vahe Moisés sui

¹ Evocoyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo ãgua inungar Moisés omboaviye tupri ocuaita Tūpa mbahe rãro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. ⁴ Esepia, ñepepei oi vireco oaposar viña. Tūpa rumo opacatu

mbahe aposar secoi. ⁵ Supi eté Moisés Tūpa rembiguai güeco pīpe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. ⁶ Cristo rumo tahir güeco pīpe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pīpe co mbahe aviye vahe oime vaherā yandeu curi.

Mbituhusa Tūpa upendar yuvirecoi vahe upe

- ⁷ Sese inungar aipo ehi Espíritu Santo icuachiapri aracahendar pīpe:
 “Co pīpeve voi, pesenduse Tūpa ñehe,
⁸ peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.
⁹ Aheve avei acoi che recoāha tēi pe ramoi mbahe güembiapo pīpe, yepe cuarenta araviter rupi osepia tēi mbahe che rembiapo yuvireco viña.
¹⁰ Sese añemoiro ahe ava upe, aipo ahe:
 ‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.
¹¹ Sese che añemoiro ahe ava upe, ‘Ñepei reseve ndapepituhui chietera che pituhusa pīpe’ ahe yuvireco chupe” ehi aracahe.
¹² Che rivireta, peñearo catu; tipo eme que ñepei ipihañemoñeta naporai vahe Tūpa reroyaēhisa pīpe oyepepi vaherā ichui. ¹³ Iya rumo peyemonguerēhi catu ñepei-pei ari yacatu rupi cūrítei pe recove pīpe angaipa upe pe yembopa uca iriēhi āgua, pe mbahe reroya iriēhi āgua rese avei. ¹⁴ Esepia, yayemoviracua tuprise Cristo rese yande yeroyasa yipisuiwe yareco vahe pīpe yande mano āgua rupi eté, ahese yaico itera sese.
¹⁵ Supi niha acoi aipo ehi ñehesa:
 “Co pīpe voi pesenduse Tūpa ñehe,
 peyepihamoatai rene catu chupe; ndapeicoi chira ava ndiava reroyai vahe nungar” ehi vahe.
¹⁶ ¿Ava pīha acoi ava ñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco. ¹⁷ ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi.
¹⁸ ¿Uma upe pīha acoi ñepei reseve, “Ndapeiquei chietera che pituhusa pīpe pe pituhu āgua” ehi Tūpa? Acoi viroyaēhisar upe aipo ehi. ¹⁹ Sese yaicua seroyaēhi pīpe ndoicatui yuviroique ipipe.

4

- ¹ Oime vite Tūpa remimombehu yande yaique vaherā ipiri yande pituhu āgua. Sese iya ité yañearo tupri. Aní chira que ñepei pe pāhu pendar ndoiquei chira. ² Esepia, yandeu avei imombehusa ñehesa poropisirosa resendar inungar yande ramoi upe ivi iporupirēhi rupi yuvireco aracahe. Co ñehesa rumo ndoipitivi eté ahe ava yuvireco. Esepia, ahe osendu yuvireco seroyaēhisave tēi. ³ Yande rumo yaroya vahe, yaiquera yande pituhu āgua, ahe chupe Tūpa aipo ehi:
 “Sese añemoiro ahe ava upe; ñepei reseve,
 ‘Ndoyuviroiquei chietera che pituhusa pīpe opituhu āgua yuvireco’ ahe” ehi.
 Tūpa rumo yipive ité opa omboaviye oporaviquisa iva, ivi. ⁴ Esepia, co imbosietesa ari resendar ñehesa oime icuachiapri aracahendar pīpe:
 “Tūpa opituhu opacatu oporaviquisa sui imbosietesa ari pīpe” ehi.
⁵ Iyavei aipo ehi iri icuachiapri pīpe:
 “Ndoyuviroiquei chietera che pituhusa pīpe opituhu āgua yuvireco” ehi.
⁶ Ipane vite rumo amove ava yuviroique vaherā ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaēhisa pīpe yuvireco. ⁷ Sese Tūpa omombehu tupri iri ambuae ari, chupe ité, “Co pīpe” ehi. Ahe

acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe, peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahe viña, Tūpa evocoyase noñehe iri chira co ambuae ari rese viña. ⁹ Evocoyase oimeño itera mbituhusa iporavopri ava Tūpa upendar upe nara: ¹⁰ Acoi oique vahe evocoyase pituhusa pipe, opituhu oporaviquisa sui inungar Tūpa opituhu ombahe mboaviye pare aracahe. ¹¹ Sese yayemoviracua catura yande reique āgua evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipĩrata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ēgüe ehi avei ñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta. ¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ivate catu vahe oicuaño ité yande recocuer pĩrataēhisa. Ahe avei niha yande nungar aracaco viroparaisu opacatu mbahe-mbahe tēi güecoāhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tūpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pĩtivi āgua mbahe tēi oimese yandeu.

5

¹ Opacatu pahi ivate catu vahe iporavopri secoi ava pãhu sui ava recocuer reropovēhe āgua Tūpa upe iyavei porerecosa mondo āgua chupe, mbahe mimba yucapri reropovēhe āgua avei ava angaipa repirã. ² Ahe pahi niha oiporara avei teco asisa ambuae ava nungar. Sese güeco asiēhisa pipe oipĩtivi ava ndayaracuai vahe, oyavi vahe avei. ³ Ahe rumo güeco pĩrataēhisa pipe viropovēhe mbahe mimba yucapri Tūpa upe oangaipa repirã, opacatu ambuae ava angaipa repirã avei. ⁴ Ndiyai chira que ava oyesui tēi pahi oyeapo. Tūpa ité rumo osenoira imboetei uca āgua inungar acoi Aarón upe aracahe. ⁵ Ēgüe ehi avei Cristo, ahe noñeenoi pahi ivate catu vahe güeco āgua oyesui tēi. Tūpa ité osenoi imboetei uca āgua acoi aipo ehise:

“Nde che rahir ereico, co pipe amondo nde recove āgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirēhi vaherã, inungar tupri mbia Melquisedec serer vahe” ehi.

⁷ Co ivi pipe Cristo oicove viteso, oyeroqui pĩrata oyasehosa pipe Vu Tūpa upe yepi. Esepia, ahe oicatu ipĩsiro āgua manosa sui. Ēgüe ehi iporeroya tupriisa pipe, Tu osendu iyeroqui yepi. ⁸ Yepe Tahir ité viña, güeco paraisu pipe rumo oyembohe imboyeroya āgua; ⁹ evocoiya güeco pipe omboaviye güeco catupriisa. Ipipe sui güeru poropĩsirosa ndopai vahe opacatu viroyasar upe nara. ¹⁰ Esepia, Tūpa niha osenoi pahi ivate catu vahe seco āgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe āgua pēu co mbahe tecocuer resendar rese. Yavai etepri rumo imombehu tupri āgua. Esepia, pe ndapesenducua tupri vitei eté.

¹² Aracacove peporombohera viña; peipota vite rumo pēu mbahe ndayavaimi vahe

imombehu iri ãgua yembohesa Tũpa suindar. Ndapeyemoviracuai rumo; peihu iri pota cambi mbahe sãta vahe hu rãgũer sui. ¹³ Esepia, acoi ĕgũe ehi vahe pĩtani osi rese ocambu vite vahe nungar tẽi pe recocuer. Ipipe sui ndapeyembohei eté Tũpa Ñehengagũer rese mbahe tupri pe reco ãgua. ¹⁴ Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu iñehengagũer rese gũeco tupri ãgua yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tũpa suindar co mbahe rese yembohe iri rãgũer sui. Ahe yipindar vahe co: yande ñecuñarosa, yande reco ai sui yande poisa, manosa apirẽhi vahesave yande rerasoẽhi ãgua, iyavei Tũpa rese yande yeroyasa, ² yembohesa poroãpiramosa resendar, po mondosa Tũpa reroyasar harive, omano vahe cuerayevisa iyavei ava recocuer rese porandusa resendar avei. ³ Tũpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tũpa remimbotar, osãha vahe avei Tũpa suindar porerecosa iyavei oyandu ité Espĩritu Santo gũecocuer pipe, ⁵ osãha vahe avei Tũpa Ñehengagũer aviye vahe iyavei osãha chĩhi ipĩratasa curi oime vaherã viña, ⁶ oyepepise rumo ichui, ndayaicatu iri seco reroyevi iri ãgua Tũpa upe. Esepia, yaticapri nungar iri eté vireco Tũpa Rahir iyavei ambuae ava omoñehe-ñehe tẽi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tũpa suindar. ⁸ Ahe ivi rese yu pãve tẽi oyesuse, ahe naporai eté. Evocoi nungar ava Tũpa poromocañisavrive tẽi, sapipirã tẽi avei yuvirecoira curi.

Yande remiaro aviye vahe yande moviracua tupri vahe

⁹ Che mboripar saisupri, yepe aipo orohe pẽu viña, oromoha ité rumo mbahe aviye catu vahe pẽu co ñepisirosa pare. ¹⁰ Esepia niha, Tũpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipĩtiviise seroyasar. Ahe niha co peyapoño vite peico. ¹¹ Ore rumo oroipotaño ité ñepeipei pe pemboyecuaño itera ari cañi rupi eté co pereco vahe pe querẽhisa pe remiaro aviye vahe rupiti ãgua. ¹² Ndoroiptai pe atẽhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei gũeco ñemosasa pipe oipisi vahe porerecosa imombehupri Tũpa sui.

¹³ Peyemomahenduha acoi Tũpa gũemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ĕgũe ehi vaherã. Sese ahe gũerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoyase Abraham osãro gũeco mbegũesa pipe, ĕgũe ehi ipisi oyeupendar Tũpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. ĕgũe ehise yuvireco, ndiya iri eté ipare oñehe vitera sese. ¹⁷ Tũpa gũerer pipe ité omoingatu oñehe omombehuse gũemimbotar aracahe ‘toicua tupri che remimombehu pisi ãgua che ñehe ñepeipei reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ ĕgũe ehi oime ñuvirio mbahe imboyepoepipirẽhi: Tũpa niha ndoporombopai vahe ité, ipipe avei yande monguerẽhi catu yande yaseca vahe iporopĩtiviisa iyavei yayeroya vahe ñearosa yandeu ombou vahe rese. ¹⁹ Co mbahe yasãro vahe omoviracua tupri yande hã, inungar mbahe carite guasu mombitasa omoviracua tupri carite ivitu sui. ĕgũe ehi yande remiaro oique turucuar guasu tũparo asiasa cupeve oi imaranehi catu vahesave ivave. ²⁰ Aheve Jesús oique yande raperã

mboi ãgua. Ëgüe ehi ahe apirêhi vahe ité pahi ivate catu vahe güeco ãgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar seci aracahe. Abraham oyeveise peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovaichi Tūpa porovasasa mondo ãgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepe-pe chupe. ‘Mborerecuar guasu seco ñvi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe seci. ³ Ahe iyepa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirêhi vahe ité.

⁴ Peyapisaca tupri co mbia recocuer rese: ivate ité seci aracahe. Yande ramoi Abraham teieté avei omondo diez sui ñepe-pe mbahe porerecosa mborerecuar guasu eta sui güembierocua chupe. ⁵ Moisés porocuita pipe rumo opacatu Leví suindar pahi eta yuvirecoi vahe vireco ité ocuita opacatu ava sui diez sui ñepe-pe iporaviquimi rerocua ãgua yuvireco. Abraham suindar ité niha ëgüe ehi yuvireco. ⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vahe rã mbahe Tūpa remimombehu. Ëgüe ehi Melquisedec Abraham rovasa. ⁷ Supi eté sovasapri sui oporovasa vahe ivate catu seci yepi. ⁸ Evocoi levita suindar oipisi ava poraviqui repri diez sui ñepe-pe. Ahe ava rumo omano vahe rã tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. ⁹ Ndoyavi evocoyase opacatu pahi eta Levi suindar omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Levi oyesuindar vireco, evocoyase ihaēhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catuprisa evocoi mborocuita reroya pipe viña, evocoyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tūpa osecuñarose evocoi pahi cuaita, osecuñaro aveira supive mborocuita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuase pahi ipiasu vahe Melquisedec nungar. ¹⁶ Ahe rumo ndahei porocuita “uma sui osēra pahiguã” ehi vahe sui oique pahi güeco ãgua; güecocuer pĩrata ndopai vahe reseve oique. ¹⁷ Esepia, Tūpa ité aipo ehi oñehese sese: “Nde pahi apirêhi vahe rã ité ereico inungar Melquisedec” ehi.

¹⁸ Sese mborocuita arachendar opa ité. Esepia, ahe nipiratai, ndayande pĩtivi eté. ¹⁹ Esepia, Moisés porocuita ndosecocuer mbocatupri eté ava. Yande rumo yasãro mbahe aviye catu vahe yande recocuer uve nara. Supi niha yayemboya Tūpa rese.

²⁰ Tūpa rumo oñehese omoingatu ñepe reseve güerer pipe. Ambuae pahi rumo ndahei ñepe reseve senoipri yuvirecoi Tūpa rer pipe. ²¹ Yande Yar rumo Tūpa osenoi ñepe reseve güerer pipe pahi seco ãgua icuachiapri pipe aipo ehise chupe:

“Yar Tūpa osenoi ñepe reseve, sese nosecuñaroi chietera:

‘Nde pahi apirêhi vahe rã ité ereico’ ehi”

ehi icuachiapri pipe. ²² Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomondoi chietera pahi güecosa ambuae upe. ²⁵ Sese ahe oicatu ité ñepei reseve viroyasar Tūpa rese oyemboya vahe pĩsiro ãgua apirēhi. Esepia, ahe oicove vaheerã ité apirēhi oyeroqui vaheerã Vu Tūpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tūpa upe seropovēhe ãgua yipindar oangaipa rese, ipare opacatu ambuae angaipa rese. Ñepei reseve ité rumo güete viropovēhe opacatu ava angaipa repirã. ²⁸ Moisés porocuita rupi iporavopri pahi ivate catu vaheerã ava ndahei seco tupri vahe; Tūpa rumo Moisés porocuita pare osenoi ñepei reseve Guahir seco catupri vahe ‘tasecoi pahi ivate catu vahe apirēhi vaheerã ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oĩ. ² Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisia mbahe oporerecosa iyavei mbahe mimba yucapri viropovēhe vaheerã Tūpa upe yuvireco. Sese Jesucristo avei vireco mbahe viropovēhe vaheerã Vu Tūpa upe. ⁴ Ahe secoise co ivi pipe viña, ndahei chietera pahi secoi viña. Esepia, cohave oime vite ité pahi mbahe viropovēhe vahe Moisés porocuita rupi yuvireco. ⁵ Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitri ve amboyecua vahe rese ndeu. Ahe inungar tupri eyapo” ehi chupe. ⁶ Yande pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimombehu aviye catu vahe avei.

⁷ Esepia, yipindar Tūpa remimbotar oicatusse yande recocuer recuñaro ãgua viña, ndipoi chira ambuae semimbotar ipiasu vahe yandeu viña. ⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui,

nomboaviyei eté rumo che porocuita yuvireco.

Sese apoi ichui’ ehi yande Yar Tūpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuita iyapisacasa pipe,

aicuachía aveira ipihañemoñetasa pipe.

Evocoiyase che iTūpa aicora; ahe evocoiyase cheundar yuvirecoira.

¹¹ Nombohe iri chira ondugüer, omu avei che cua uca ãgua yuvireco.

Esepia niha, opacatu chihivahe catu vahe sui,

ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese' ehi yande Yar” ehi icuachiapri pipe aracahe. ¹³ Oñehese Tūpa güemimbotar piasu rese, omombehu yipindar vahe cañi āgua; chīhimi tēi ipane icañipa āgua.

9

Tūparo ivi pipendar iyavei tūparo iva pendar

¹ Evocoiyase yipindar Tūpa remimbotar vireco ava cuaitarā iñemonuha āgua Tūpa mboeteisa pipe iyavei vireco tūparo co ivi pipendar. ² Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve. ³ Imoñuviriosa turucuar tūparo asiasa cupeve oime ambuae oi, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tūpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe. ⁵ Ahe mborocuita riru harive oime Tūpa rembiguai rahanga oyovai yuvinochai, “Tūpa oime ité cohave” he āgua. Ahe ipepo oyopi tupri Tūpa porocuita riru rovapisa yuvireco. Co rupive revo amombehura co mbahe pēu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuita apo āgua. ⁷ Imoñuviriosa oi pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovēhe vaheñā Tūpa upe oangaipa rese, ava icuaēhi pipe angaipa oyapo vahe repirā avei. ⁸ Co rese Espiritu Santo oicua uca yandeu avaño tēi ndiya vitei eté oique ipa vahe oi imaranehi catu vahe pipe Tūpa rovai oime vitesse yipindar oi yasiapri. ⁹ Co opacatu mbahe yande mbohe mbahe cūriteindar rese. Esepia, co porerecosa iyavei mbahe seropovēhepri aheve Tūpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuita. Ahe rumo ēgüe ehiñomi tēi yuvireco Tūpa remimbotar ipiasu vahe yu āgua renonde.

¹¹ Poropisirosar rumo ou cute. Iyavei ahe ité cūritei yande pahi ivate catu vahe secoi mbahe avīye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo avīye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe āgua, ahe rumo viropovēhe vuvi ité opacatu rese; ēgüe ehi ahe ñepeí reseve oique apirēhi vahe ñepisirosa reime āgua yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro āgua. ¹⁴ Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombehugüer rupi’ oya. ¹⁶ Que ava oicua ucase güemimbotar ombahe mondo āgua omano renondeve, icuasa tupri ranera rumo imanosa semimbotar apo āgua renonde. ¹⁷ Esepia, ndiya vitei eté omano vaheñā recove vitesseve mbahe imondosa iyarā upe. Imanore voi rumo avīye imondosa. ¹⁸ Sese yipindar vahe Tūpa remimbotar yaposa mbahe mimba ruvi piyere pipe. ¹⁹ Esepia, Moisés omombehupase mborocuita opacatu ava upe, oipisi ovesa ragüer pīra vahe iyavei ivira

hisopo serer vahe rãca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipi cuachiar mborocuita resendar, opacatu ava avei. ²⁰ Evocoyase aipo ehi icuachiapri pipe: “Co mbahe ruvi oicua tupri uca co porocuita Tũpa ombou vahe omboyeroa ãgua pẽu” ehi. ²¹ Mbahe mimba ruvi pipe avei opa Moisés osipi tũparo iyavei opacatu mbahe ipipendar iporupri. ²² Porocuita rupi eté tuvi pipe seni opacatu mbahe oñemoatiropa Tũpa rovaque; ndipoi eté ñeroisa angaipa upe mbahe ruvi piyerepri porẽhise.

Tũpa upe güete reropovẽhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovẽhepri ruvi pipe. Esepia, co mbahe iva pendar nungar tẽi sahangaposa; iva pendar ité rumo ipotasa seropovẽhepirã mbahe aviye catu vahe evocoi sui. ²⁴ Esepia, Cristo ndoiqei tũparo oi imaranehi catu vahe ava rembiapo pipe tẽi. Esepia, ahe iva pendar rahanga tẽi. Ëgüe ehi rumo ahe oique ité ivave. Aheve cũritei secoi Tũpa rovai yande pĩtĩvi ãgua oyeroqui pipe. ²⁵ Judío pahi ivate catu vahe niha ñepei reseve oique araviter yacatu oi imaranehi catu vahe pipe mbahe ruvi tẽi reropovẽhe ãgua; ndahei rumo vuvi ité viropovẽhe. Cristo rumo ndoyeeropovẽhe pihi Tũpa upe. ²⁶ Ëgüe ehise rumo, yipisui omano pihira viña. Cũritei rumo oyemboyecua co ipa ari rupi ñepei reseve, apirẽhi vaherã viropovẽhe ãgua güete Tũpa upe ‘tocañi angaipa’ oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeeropovẽhe ñepei reseve opacatu angaipa mocañi ãgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guãrosar pĩsiro ãgua.

10

¹ Esepia, Moisés porocuita mbahe aviye vahe ou vaherã rahanga tẽi, ndahei ahe eté vahe ité. Sese ahe porocuita ndoicatui eté ava Tũpa rese oyemboya vahe reco mohivi tupri ãgua mbahe seropovẽhepri araviter yacatundar pipe tẽi. ² Porocuita oicatus pe angaipa sui pe moatiro tupri ãgua, ndapeyandu iri chira pe angaipa viña iyavei pahi ndoviropovẽhe iri chaveira mbahe ruvi Tũpa upe yuvireco viña no. ³ Co seropovẽhepri rumo yande momahenduha uca ãgua tẽi yande angaipagüer rese araviter yacatu. ⁴ Esepia, mbahe mimba ruvi tẽi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tũpa upe:

“Ndereipota iri niha mbahe mimba tẽi porerecosa seropovẽhepirã ndeyeupe, nde rumo ereyapo che retocuer evocoi nungarã.

⁶ Ndahei niha nde piha rupi mbahe rapipri mbahe mimba yucapri ndeu seropovẽhepri ñepei reseve angaipa mocañi ãgua.

⁷ Evocoyase che aipo ahe:

‘Che ayu nde remimbotar apo ãgua, che Ru Tũpa, che resendar icuachiapri remimombehu rupi tupri mboaviye ãgua’ ahe” ehi.

⁸ Yipindar aipo ehi, Tũpa ndoipotai eté, iyavei ndahei ipiha rupi mbahe mimba reropovẽhepri, porerecosa mbahe sapipri avei angaipa mboyeho ãgua, yepe ahe mborocuita rupi seropovẽhesa viña. ⁹ Ipare aipo ehi: “Che ayu nde remimbotar apo ãgua” ehi. Ahe ipipe omombopa yipindar vahe mbahe seropovẽhepri co ambuae mbahe ipiasu vahe apo ãgua. ¹⁰ Tũpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirẽhi vaherã güete mondo pipe.

¹¹ Opacatu judío pahi eta ari yacatu oyapo ocuita iyavei mbahe mimba avei-vei viropovẽhe Tũpa upe yuvireco. Yepe ahe viropovẽhe tẽi yuvireco viña, nomocañi catui eté rumo angaipa. ¹² Jesucristo rumo oyeeropovẽhe ñepei reseve angaipa repirã apirẽhi vaherã. Ipare oso ivave, uguapi oĩ Vu acato coti. ¹³ Aheve osãro oĩ Vu Tũpa opase voi omondo yamotarẽhimbar ipovrive. ¹⁴ Esepia, ñepei reseve oyeeropovẽhe pipe

osecomohivi tupri Vu Tūpa rembipeha apirēhi vaherā. ¹⁵ Iyavei Espiritu Santo aipo ehi tupri avei icuachiapri aracahendar pipe yandeu:

¹⁶ “Co ari pare rumo na ahera che remimbotar apo chupe’ ehi yande Yar Tūpa, ‘Coiye amondora che porocuita ipihañemoñetasa pipe, amondo aveira iyapisacasa pipe’ ehi.

¹⁷ Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

¹⁸ Ëgüe ehi angaipa rese oimese ñeroisa, ahese ndiya iri seropovēhesa mbahe angaipa repirā.

Yayemboya catura Tūpa rese

¹⁹ Sese che rivireta, iya ité cūritei yande reique āgua Tūpa rovai yande siquiyeēhisa pipe Jesucristo ruvi pipe sui. ²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiata turucuar yande reique āgua Tūpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secoi Vu Tūpa rēta rārosar; ²² sese yayemboya catura Tūpa rese yande pihañemoñeta tupri pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaēhisa pipe. Esepia, Tūpa omboaviye itera mbahe güemimombehugüer yandeu. ²⁴ Iyavei yasecañora ñepeipei yañepitivii vaherā yande yeaisu catu āgua iyavei mbahe tupri apo āgua yandeyeupe. ²⁵ Ndayamopanei chira yande ñemonuhasa Tūpa upe. Ndayaicoi chira omopane vahe nungar, iya rumo yayemonguerēhi catura ñepeipei yandeyeupe. Esepia, virovi ari yande Yar yevi iri āgua.

²⁶ Acoi, “Tayemboangaipañ ité” yahese mbahe supi tupri vahe cua pare yaico, ndipo iri ambuae seropovēhepirā evocoi yande angaipa repirā yandeu; ²⁷ Tūpa ñemoirosa ipirata vahe güeraño oimera yandeu iyavei tata guasu apirēhi vahe opara omocañi Tūpa amotarēhimbar yuvirecoi vahe. ²⁸ Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuēhisa pipe yuvirecoi. ²⁹ Peyapisaca tupri co rese: ipirata catu oimera Tūpa ñemoirosa tahir reroirosar upe curi iyavei acoi ava vireco vahe suvi inungar mbahe ēgüe ehi tēi vahe iyavei viroiro tēi vahe guaisusar Espiritu, chupe avei oimera Tūpa ñemoirosa ipirata catu vahe. Esepia, co tuvi rese niha seroyapri ité Tūpa remimbotar. Ipipe avei niha ahe ava Tūpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tēi eté yaiquese Tūpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramosa, peyemoviracuaño ité pe recoñhasa upe pe yemombaraisusa pipe. ³³ Esepia, acoi amove pe pāhu pendar rese iñehe-ñehe tēi yuvireco, mara-mara tēi avei pe rereco opacatu ava rovaque. Ambuae pe pāhu pendar evocoyase peipitivii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañ avei pe viharetasa pipe peico. Esepia, peicua ivave pereco mbahe aviye catu vahe iyavei apirēhi vahe. ³⁵ Sese pemocañi tēi eme Tūpa rese pe yeroyasa. Esepia, evocoyase pe recosa pipe omoime ucara mbahe tupri pēu curi. ³⁶ Pe rumo peyemoviracuaño itera mbahe-mbahe tēi upe Tūpa remimbotar apo āgua semimombehugüer oime vaherā pisi āgua curi. ³⁷ Supi eté icuachiapri pipe Tūpa aipo ehi: “Pihavi eté oura acoi ou vahevi. Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera. Acoi oyepepise rumo che sui, che evocoyase ndavilai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vāherā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yādeu, iyavei yaicua ité oime mbahe ndayasepiai vahe. ² Supi eté amove yande ramoī aracahendar upe, “Aviye ité” ehi Tūpa oyese yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepiai vahe apopri.

⁴ Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi viteseve, “Enoc recocuer aviye ai rane ité chupe” ehi icuachiapri aracahendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoyase seroyasave oyapo arca oyesuindar pisiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vāherā vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoiyavi ambuae ivi pendar secoi vahe; oi mbahe pīrer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vāherā Tūpa remimombehu ivi yuvireco. ¹⁰ Esepia, aipo Abraham osāroño ité tecua ivave ovīracua vahe. Tūpa niha ahe tecua rāhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi āgua. Esepia, viroyaño ité Tūpa oñehe omboaviye āgua chupe. ¹² Evocoyase yepe Abraham ocuacuami viña, vireco rumo guahir. Ahe ichuindar sehi eteanga coiyē inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisi eté mbahe semimombehugüer oyeupendar. Ahe mbahe amombri rupi osepiñomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yādeu oseca vite oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe ivā pendar. Sese Tūpa nochi eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷ Tūpa rese yeroyasa pipe avei Abraham oyemoingatu voi guahir ñepe vahe Isaac reropovēhe āgua Tūpa upe güecoāhasa pipe. Yepe Tūpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tūpa vireco pīratasa ava omano vahe mbogüerayevi iri āgua. Evocoyase imano rāgüer sui eté oipisi iri guahir aracahe. Ahe evocoyase omboyecua mbahe yādeu.

²⁰ Tūpa rese oyeroya pipe avei Isaac osovasa Jacob, Esaú avei mbahe oime vaherã pisi ãgua.

²¹ Iyavei Tūpa rese oyeroya pipe avei Jacob omano pota ãgua, osovasa ñepei-pei José rahir. Ahese opococa rese tēi eté oyemoviracua oyerogui ãgua Tūpa upe imboeteisa pipe.

²² Tūpa rese oyeroya pipe avei José, omano ãgua renonde, aipo ehi: “Yande mu israelita opara yuvínose ivi Egipto sui curi” ehi. Ipare oyocuai omu oitacuer rerova ãgua aracahe.

²³ Tūpa rese oyeroya pipe avei, ohase Moisés, iyepia oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyei eté mborerecuar guasu porocuita yuca ãgua sui.

²⁴ Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he ãgua. ²⁵ Ahe rumo oipota catu mara-mara tēi güereco ãgua Tūpa reroyasar reseve chíhi rupive mbahe tēi rese yemboviha rãgüer sui. ²⁶ Aviye catu ité chupe Tūpa rembiporavo upe nara mbahe tēi porara ãgua Egipto pendar mbahe eta sepirusu vahe rereco rãgüer sui. Esepia, ahe oicuaño ité oyeupe nara porerecosa Tūpa ombou vaherã.

²⁷ Tūpa rese oyeroya pipe avei osē ivi Egipto sui osiquiyehisa pipe mborerecuar guasu roriēhise. Oyemoviracuaño ité oyese mbahe apo ãgua; aviye osepia vahe ité Tūpa acoi ndoyecuai vahe. ²⁸ Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tūpa rembiguai oporoyuca vahe ava israelita rahir ipi yucaēhi ãgua.

²⁹ Tūpa rese oyeroya pipe avei ava israelita osasa para guasu Pira Vahe ivi ipiru vahe hari rupi yuviraso. Ipare yamotarēhimbar Egipto pendar, “Ēgüe vahe avei” ehi yuvireco viña, i rumo opaño oyopi.

³⁰ Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

³² ¡Setá vite ambuae ava recocuer oime amombehu vaherã pēu! Ipane ité rumo ari imombehupa ãgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer. ³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ívisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipirata vahe, oyeepi avei quise pucu pipe oyuca rãgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. ³⁵ Oime amove cuña ipãhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco ãgua. ³⁶ Ambuae iparaisu catu ava upe oñeroirosa pipe, onupasa pipe, oapichi-pichisa pipe, voquendasa pipe avei yuvireco. ³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipãhu pendar oguata tēi, ovesa, cavara pিরer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. ³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaherã oyepãhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisi eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri ãgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecuwa tupri ra yande yeroyasa pipe Jesús rese

¹ Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochĩehisa pipe. Esepia, ahe oicua ité oparaisu pare virecora oviharetosa, oguapise omborerecuasave Vu acato coti oĩ.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico āgua iyavei, “Ndorequerēhi iri” ndapeyei chira. ⁴ Esepia, pe ndapemano vitei eté angaipa upe pe yembopihaviracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voĩño Yar nde mombaraisusa upe nde reco mohivi tupri āgua, iyavei, ‘Ndachequerēhi iri’ nderei chiaveira chupe ndeu oñehe pĩratase.

⁶ Esepia, Tūpa osecomohivi tupri ava güembiaisu iyavei omombaraisu rane guahir sereco āgua” ehi.

⁷ Peñemosaño catu pe mombaraisusa upe pe reco mohivi āgua. Esepia, Tūpa ěgüe ehise pēu guahir ité pe rereco. ¿Oime pĩha que ñepei ava guahir upe noñehe pĩratatai vahe secocuer mohivi āgua? ⁸ Tūpa ndape recocuer mohivise inungar oyapo ambuae guahireta upe yepi, pe evocoyase inungar-ra chĩhivahe ndiyesupai vahe, ěgüe peye tēi peico chupe. ⁹ Iyavei, chĩhivahe tēi vite yaicose, yande yesupa co ivi pipendar yande nupa yande recocuer mohivi āgua, ahese yamboetei. Sese yamboetei catura yande Ru Tūpa iva pendar tecovesa rereco āgua. ¹⁰ Yande yesupa co ivi pipendar opihañemoñetagüer rupi tēi yande nupa yaicove raimi tēise co ivi pipe; Tūpa rumo yande mombaraisu yandeu mbahe tupri āgua rese yande reco maranehi āgua inungar ahe ndaseco marai vahe. ¹¹ Supi eté yipendar, poronupasa yaipisi ramosa, tasi yandeu. Coiye rumo yande imboyeroyasa pipe yayapo catura mbahe ihivi vahe. Ahe evocoyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopoase iri pe reco pĩratasa iyavei peyemonguerēhi iri pe guata āgua yande Yar rupi. ¹³ Ipare peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisi vahe Tūpa porovasasa pe pāhuve, iyavei tipo eme mbahe tēi que ava pĩha pipe; aviyeteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroĩro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa resendar mimoi repirã tēi vivri upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirã secoi. Yepe oyasehó iteanga viña, ndiya iri eté rumo mbahe sembierecovi rãgüer mboyevi āgua chupe.

¹⁸ Peyemboyase Tūpa rese, ndahei inungar pe ramoĩ israelita aracahendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigüer; oime pĩtu, pĩtumimbi vahe, ivitu ai avei sese. ¹⁹ Iyavei ndape-sendui mimbi imoñehepri, Tūpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evocoi porocuita aipo ehi vahe sui: “Acoi opĩro vahe ivitri rese, yepe

que mbahe mĩmba tẽi viña, ahe peyapi-yapi yuca ita pipe, anise lanza pipe avei” ehi. ²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiypave arĩrii eté” ehi.

²² Pe rumo peyemboya iva pendar ivĩri Sión ve, Tũpa oicove vahe recuave. Ahe tecua Jerusalén iva pendar. Aheve Tũpa rembiguai setá iteanga vahe oñemonuha imboetei ãgua yuvireco yepi. ²³ Iyavei peyemboya opacatu ava Tũpa rahĩr ipi Cristo reroyasar rese, ahe serer icuachiapri ivave. Peyemboya avei Tũpa rese, ahe niha yande recocuer rese oporandu vahe secoi; iyavei peyemboya ava seco aviye vahe espĩritu yuvirecoi vahe rese. Ahe niha Tũpa osecomohivi tupri sereco. ²⁴ Peyemboya avei Jesús rese, ahe omoime yandeu Tũpa remimbotar ipiasu vahe, ahe suvi yande moatĩro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaherã acoi pẽu oñehe vahe upe. Esepia, Moisés reroyaẽhisa pipe pe ramoi noñemi eté Tũpa ñemoĩrosa sui yuvireco, oyeupe, “¡Peicua catu!” ehise co ivi pipe aracahe. Ëgũe ehise chupe yuvireco aracahe, Ëgũe ehi catu iri tiẽtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tũpa oñehe pipe omborĩrii eté ivi aracahe; cũritei rumo yandeu aipo ehi: “Che amborĩri irira ivi, ndahei chira rumo ivi gũeraño, iva avei amborĩriira” ehi. ²⁷ ‘Amborĩri irira’ aipo oyapave aipo ehi: “Opara mbahe omĩ vahe omocañi gũembiapo Tũpa ‘topita apirẽhi mbahe nomĩ vahe’ oyapave” ehi. ²⁸ Tũpa mborerecuasa ombou vahe yandeu ahe nomĩ chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi. ²⁹ Esepia niha, ahe inungar tata ñepei reseve mbahe omocañipa vahe.

13

Mara yahera Tũpa mbovĩha

¹ Ndapepoi chietera pe yeaisusa sui ñepei-peĩ oyeivri nungar pe recosa pipe. ² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tũpa rembiguai gũetave icuaẽhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tẽi serecopri rese. Esepia, aviyeteramo Ëgũe ehi aveira pẽu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tũpa oicuaara oyemboaguasa tẽi vahe upe.

⁵ Ndahei guarepochi tẽi peipota raira. Iya rumo peyembovĩhaño mbahe pereco vahe rese. Esepia, Tũpa aipo ehi: “Ndroeyai chietera, ndapoi chietera nde sui” ehi aracahe.

⁶ Evocoyase aipo yahera Yar rese yande yeroyasa pipe:

“Che Yar che pitivii, ndasiquiyei chietera ava tẽi sui oyapo potase mbahe cheu” yahera.

⁷ Peyemomahenduha pe reroquatar rese, pẽu Tũpa Ñehengagũer mombehusar rese avei. Pepihañemoñeta tupri secocuer rese, seco apri rese avei; iTũpa reroya agũer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirẽhi vahe. ⁹ Peyembopa ucai rene yembohesa co coti tẽi vahe upe. Aviye catu yayemomirata Tũpa poroaisusa rese que mborocuita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tũpa upe seropovẽhepri. Ahe niha ndiyai eté pahi tũparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi tẽi Tũpa rẽta oi imaranehi catu vahe pipe seropovẽhe ava angaipa rerocua ãgua; ahe mbahe mĩmba rete rumo osapi tecua ivi yuvireco yepi. ¹² Ëgũe ehi avei niha Jesús iparaisu, omano tecua ivi ava reco mbocatupri ãgua vuvi pipe. ¹³ Ëgũe

yahe aveira yasora Jesús upe yande paraisu água supi ava yande reroirosa pipe yaico. ¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaheṛã yandeu curi. ¹⁵ Sese Jesús rembiapo rese iyacatu yamboeteira apirēhi vaheṛã yande Yar Tūpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rãro yuvireco. Esepia, oicua Tūpa oicuara mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nãra.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihãñemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihãivi água rese ité aporandu pe yeruresa rese pẽu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rãrosar ivate catu vahe, suvi pipe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo água; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgüe tehi imboeteipri apirēhi tasecoi Cristo yepi!

²² Che rivireta, peñemosãño co che opomboaracua vahe rese, moviro tẽi niha co ñehesa aicuachía pẽu. ²³ Aipota pe peicua yande rivri Timoteo imosesa soquendasa sui. Oyepota pihãivise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tūpa upendar ava upe avei. Ivi Italia rupindar avei ombou omahenduhasa yuvireco pẽu.

²⁵ Aipo rupive, yande Ru Tūpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosãgua rese peico. ⁴ Peicoño ité pe reco ñemosasa pipe pe reco mohivi tupri catu ãgua. Evocoyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pipe iyavei ombahe mboasiêhisa pipe avei. ⁶ Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tēisa pipe inungar acoi ivitu i ombohitu-hitu tēi vahe. ⁷ Acoi êgüe ehi-ehi tēi vahe ava ndoipisi chira mbahe yande Yar sui yuvireco. ⁸ Esepia, ñepe ari ipihañemoñeta ñepe mbahe rese, ambuae ari ambuae rese. Ndoyemoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa ombocoivate ãgua rese. ¹⁰ Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êgüe ehi raimi tēi vahe yuvireco. ¹¹ Evocoyase acoi ari osēse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirēhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tēi apo ãgua, “Tūpa revo êgüe ehi cheu” ndehi chira. Esepia niha, Tūpa atoisar ndipoi eté mbahe tēi oyapo uca vahe rã chupe. Iyavei ahe noñatoi avei mbahe tēi apo ãgua ava. ¹⁴ Co rumo ava opihañemoñeta rai upe oñeato uca mbahe tēi apo ãgua yepi. ¹⁵ Güemimbotarai pipe evocoyase oyapo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovēhepri cheu opacatu che rembiapo sui’ ohesave yandeu.

Tūpa rese yande pihañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehese rese: peyapisaca tupri voirã ambuae ava ñehese rese, mbegüe rupi rumo peñehera chupe iyavei ndapembahemboasi voi tēi chiaveira. ²⁰ Esepia, yambahemboasi voi tēise, ndayayapoi Tūpa remimbotar. ²¹ Evocoyase peseya teco raisa, opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tūpa ñehese omoingue vahe pe piha pipe. Ahe niha vireco pĩratasa pe pĩsiro ãgua.

²² Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara. ²³ Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiãño tēi vahe vova

yepiasa pīpe. ²⁴ Ipare rumo oyepēpise ichui, cūrīteimi sesaraiño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuaíta maranehi mbahe-mbahe tēi sui yande rerocua vahe rese iyavei oyemoviracuaño ité vahe oyapo vahe rā iporocuaíta, ahe ovīharetera opacatu güemiapo tupri rese.

²⁶ Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri āgua. Evocoiyase ahe ae oyembopa oico. Sembieroya evocoiyase ēgüe ehi tēi vahe. ²⁷ Yarecose rumo yande rembieroya icatupri, nimarai vahe yande Ru Tūpa rovai, ahese yaipītivīra co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoavirati chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira. ²⁻³ Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pīpeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. ⁴ Evocoiyase ēgüe peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe pīhañemoñeta raisa pīpe.

⁵ Che rivireta, che rembiaisu, pesendu aipo ñehesa: Tūpa oiporavo ava iparaisu vahe co ivi pīpe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombhugüer rupi che mborerecuasa oyeupe nara’ oyapave guaisupar upe. ⁶ Pe rumo seroñrosa pīpe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. ⁷ Ahe avei niha oñehe-ñehe tēi seroñrosa pīpe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuaíta ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavirati tēise rumo, ahese yayapo angaipa, yayavi mborocuaíta Tūpa rovai. ¹⁰ Esepia, acoi ava viroya vahe opacatu mborocuaíta, ipare rumo oime que ñepei nomboaviye tupri vahe, ahe oyavi opacatu mborocuaíta. ¹¹ Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucai chira no” ehi. Yepe acoi ndapeyemboaguasai chira viña, pe poroyuca pīpe rumo, peyavi mborocuaíta. ¹² Evocoiyase peñehe tupri vahe iyavei peico tupri aveira. Esepia, oporandura yande recocuer rese yande Yar oporocuaíta pīpe güeru vahe yande reco tupri āgua. ¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pīpe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, ¿aviyera pīha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura pīha ahe oñepisiro aipo ohe pīpe tēi yuvireco? ¹⁵ Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña. ¹⁶ Evocoiyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña? ¹⁷ Ēgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pīpe, aipo yahe tēi yaico.

¹⁸ Aviyeteramo ava pe pãhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoẽhi pipe. Evocoyase che amboyecua che yeroyasa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepe Tũpa” ere. Supi eté aipo ere. Co rumo caruguar avei oicua. Ichui osiquiyepave rumo ahe oriri eté yuvireco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoẽhisa nde yeroyasa ãgũe ehi tẽi vahe? ²¹ Esepia, Tũpa oipisi yande ramoi Abraham seco tupri pipe oicuavẽhese porerecosa nungar guahir Isaac chupe aracahe. ²² Indó, Abraham yeroyasa omboyecua ité güembiapo catupri reseve. Evocoyase ãgũe ehi ahe güembiapo tupri pipe omboaviye tupri oyeroyasa oico aracahe. ²³ ãgũe ehi yaviye icuachiapri aipo ehi vahe: “Abraham viroya ité Tũpa, evocoyase, ‘Co seco catupri vahe’ ehi Tũpa ipisi” ehi. Ahese ava, “Abraham Tũpa mboripar ité” ehi yuvireco chupe.

²⁴ Indó, Tũpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ ãgũe ehi tupri avei cuña ndipihai vahe Rahab upe. Esepia, ahe omoingue ñuvirío ava ivi repiasar imondopri güeta pipe, ipare oñomi imondo ambuae peri rupi yamotarẽhisar sui. Ipipe sui Tũpa oipisi inungar-ra seco ivi tupri vahe viña. ²⁶ ãgũe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoyase omano tẽi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepãhuve. Esepia, peicua niha yande oporombohe vahe yaicose, Tũpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe rese yepi. Oimese que ava ndoyavi vahe oñehe, ahe ava seco ivi tupri vahe. Iyavei oicua tupri opacatu güeco rereco tupri ãgua. ³ Inungar acoi yamondose cavayu yuru penda sese seroguata ãgua. Ahese opacatu cavayu retecuer yaicatu imboyahuva ãgua. ⁴ Inungar tupri avei carite guasu, yepe tuvicha iyavei yepe ivitu omoañi opĩratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. ⁵ ãgũe ehi avei yande ãpecu, yepe chĩhimi tẽi viña, ipipe rumo yayapo tẽi mbahe tuvicha vahe ava upe. Inungar avei que tata chĩhimi vahe sui tẽi yuvi guasu opa ocai. ⁶ ãgũe ehi yande ñehesa tata nungar. Iyavei yande ãpecu pipe opacatu mbahe-mbahe tẽi yamombehu. ¡Evocoi mbahe-mbahe tẽi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tẽisa caruguar suindar. ⁷ Ava oicatu opacatu mbahe mĩmba nimasoi vahe mboaracua ãgua, vĩrai, mboi iyavei mbahe ipi para guasu pipendar avei no. ⁸ Ndipoi eté rumo que ava oipoepi vahe ñehe. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tẽi eté. ⁹ Co yande ãpecu pipe yamboetei yande Yar Tũpa, ipipe avei rumo yamomara ava, ahe ava rumo Tũpa oyapo onungar. ¹⁰ ãgũe ehi eté, yande ñehe pipe yamboetei Tũpa, ipipe avei yaroĩro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pĩha osẽ ñepe i ohẽ vahe sui sãhe vahe, iro vahe avei viña? ¹² ¿Ihara pĩha higuera ivira rese aceituna viña? ¿Iyavei oicatura pĩha uva hi rese oha higo viña no? ¡Aní, ndoicatui eté! Iyavei ndoicatui ñepe i ohẽ vahe sui osẽ i, sãhe vahe sãhe asi vahe reseve.

Mbahecuasa supi eté vahe

¹³ Acoi oimese pe pãhuve yaracua vahe, oyapisaca vahe, tomboyecua catu güeco catupri, güeco mbegüesa avei ombahecu tupri pipe. ¹⁴ Oimese rumo pe pihave pe poroamotarẽhisa mbahe pota raisa pipe, iyavei peyeupe nara tẽi mbahe peseca, ahese

ndiyai peyemboviha tupri tēi ‘che yaracuá vahe aico’ pe yapave. Esepia, peremira tēira supi eté vahe mbahe rese. ¹⁵ Ëgüe ehi eté evocoi nungar aracuasa ndahei Tūpa suindar. Ahe rumo co ivi pipendar tēi vahe, ava pihañemoñeta sui tēi osē vahe iyavei caruguar suindar tēi avei. ¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osē ñehepoepisa iyavei opacatu mbahe tēi. ¹⁷ Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparaisuereco vahe, nomboyoviratii vahe güecocuer. Ahe ipihañemoñetasa ñepeí reseve vahe iyavei oyapo tupri vahe mbahe. ¹⁸ Iyavei acoi oseca vahe mbahe tupri yepi, oipisi itera opiha pipe teco ívisa.

4

Co ivi pipendar mbahe raisusa

¹ ¿Que sui pīha ou vavasa iyavei ñehepoepi-episa pe pāhuve? Ahe ou pe mbahe pota raisa sui pereco vahe pe pihañemoñetasa pipe. ² Pe peipota rai mbahe. Ipare rumo ndapeicatuí sereco āgua. Evocoiyase peporoyuca pe mbahe pota raisa pipe. Ndiyai eté rumo pēu sereco āgua. Ipipe sui peyeecoāha, pevava avei no. Ndapeyosui eté rumo mbahe pe remimbotar. Esepia, ndapeporandui Tūpa upe. ³ Acoi peporanduse rumo sese, ndapeipisií. Esepia, peporandu rai tēi, peipota pe yemboviha āgua rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ëgüe ehi eté acoi oipota vahe co ivi pipendar mbahe-mbahe tēi pipe güeco āgua, ahe oyeapo Tūpa amotarēhimbar. ⁵ Supi eté Tūpa Ñehengagüer aipo ehi: “Tūpa osaisu güecatēhisa pipe o Espíritu omondo vahe yande piha pipe” ehi. ⁶ Ahe rumo yande pītivií catu oporoaisusa pipe. Esepia, icuachiapri aracahendar pipe aipo ehi: “Tūpa oyamotarēhi ava oyeecomboivate ai vahe. Oipītivií rumo seco mbegüe vahe saísusave” ehi. ⁷ Sese pemboyeroya catu Tūpa. Peyemoviracua caruguar remimbotar apoēhi āgua. Ahese ahe oyepepira pe sui. ⁸ Peyemboya Tūpa rese, ahe evocoiyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pihañemoñetasa ñuvirío pereco vahe sui! ⁹ ¡Tatasi pēu, tapeyaseho, perorivete iri eme, pemboasi pe angaipa pe yemboviharēhisave! ¹⁰ Peñenopiha Yar rovai imboyeroysa pipe. Ahe evocoiyase pe reco mboivatara.

Peroñro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viroñro vahe ambuae Jesús reroyasar, ahe oñehe rai tēi aveira mborocuaita rese seroñrosave. Ëgüe peyese, evocoiyase seroyaēhisa pipe peyemboivate catura mborocuaita sui viña. ¹² Oime rumo ñepeño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopisiro iyavei oporomocañi āgua no. Evocoiyase pe, ¡ndiyai pe cotindar reroñro āgua pēu!

Ndayaicuai mbahe oime vaheerã yandeu ayihive

¹³ Pesendu pe aipo peye vahe: “Cūrítei, anise ayihive yasora que tecuave, anise que tecua guasuve revo. Aheve yaicora ñepeí araviter yande poraviqui āgua. Ahese yamogana catura guarepochi” aipo peye vahe. ¹⁴ ¡Ndapeicuai rumo mbahe oime vaheerã pēu ayihive! ¿Mara ehi pīha yande recocuer? Ahe inungar ívichi oyecua raimi tēi vahe, ipare opaño ocañi. ¹⁵ Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai. ¹⁷ Esepia, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

5

Imbahe eta vahe paraisusa resendar

¹ ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico. ² Opacatu pe mbahe eta ocañi tēi vaheṛã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa opochi ati-ati no. Ahe niha pe recoãha ãgua, omboyecua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sãsé tēi yuvireco. Ahe rumo yande Yar ipiratá vahe, ivate catu vahe oicua. ⁵ Co ivi pipe tēi pe peyecomendiyai peico iyavei peyemboviha co ivi pipendar mbahe rese inungar guaca imonguirapri yuca ãgua. Ipipe peyemoingatu pe cañi ãgua. ⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosañi yande Yar yevi iri ãgua rese. Inungar ava omaheti vahe osãro rane güemiti poho ãgua. Esepia, ahe osãro yipindar oqui vahe iyavei ipa oqui vahe mbahe miti aviye ãgua. ⁸ Pe avei peñemosañi, peyemonguerēhi catu. Esepia, cōimi eté yande Yar yevi ãgua cute.

⁹ Iyavei che rivireta, peñemoiroi rene peyeupe. Evocoyase Tūpa ndoporandui chira co mbahe rese pēu. Esepia, mborerecuar guasu iva pendar oyemoingatu voi ohã yandeu porandu ãgua. ¹⁰ Che rivireta, peico catu inungar Tūpa ñehe mombehusar aracahendar yuvirecoi vahe. Ahe oñemosañi mbahe rasicuer upe yande Yar rer pipe oñehe ãgua yuvireco. ¹¹ Yande rumo yaicua sovasapri ava oñemosasa vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparaisuereco vahe.

¹² Che rivireta, peyapisaca tupri catu co che ñehe rese. Pe ñehe ãgua ndapeiporui chietera que iva rer iyavei que ambuae mbahe pe ñehe reroya uca ãgua. Iyacatu rumo, “Supi eté” peyese, supiño itera; “Ani” peyese, aní chiño itera Tūpa poronupasa pisiēhi ãgua.

¹³ Aviyeteramo que pe pãhu pendar iparaisura oico; toyeriqui. Aviyeteramo oimera que sorivete vahe oico; ahe tosapucaí Tūpa upe. ¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosa chupe. ¹⁶ Sese pemombehu pe angaipa peyeupe, peyeroyasa avei peyese pe yembogüera tupri uca ãgua. Ava aviye vahe oyeroyasa oquerēhisave opacatu güecocuer pipe, ahe iyeroquisa ipiratá ité. ¹⁷ Acoi Tūpa ñehe mombehusar Elías yande nungar avei. Ahe oporandu oyeroyasa pipe Tūpa upe, “Toqui eme” ehi. Aipo ehise, ndoqui eté ivi harive mbosapri araviter imombitesa rupi. ¹⁸ Ipare oyeroyasa iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe, ²⁰ tapeicua pe acoi viroyevi vahe angaipa viyar secocuerai sui, oipisiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água ‘imoatıroprı toyuvırecoi che Rahır ruvi pipe oangaipagüer sui’ oya. Peipisi catu Tüpa porovasasa pe reco tuprı água.

Tüpa suindar mbahe aviye vahe rãrosa

³ ¡Imboeteiprı tasecoi Tüpa, yande Yar Jesucristo Ru! Ahe niha oporoparisuerecosa pipe yande recocuer mbopıasu. Ęgüe ehi yandeu Guahır Jesucristo ocuerayevıse. Ipipe sui yaicuaño ité oimera mbahe aviye vahe Tüpa suindar yandeu. ⁴ Ipipe sui avei Tüpa oipısi ucara pëu pe mombahesa ivave yapocatuprı nocañıi vaherã, ndıtuyui vaherã iyavei ndopai vaherã ité. ⁵ Pe peyeroya ité Tüpa rese. Sese niha ahe opıratasa pipe pe repı mbahe tēi sui poropısirosa pe reco água. Ahe vıreco vahe imoingatuprı arı ipa vahe mboyecua água pëu.

⁶ Co rese peyembovıhareteño peico, yepe cūrıtēi pe reco pipe peparısu pucu raimi tēi setá pe recoãhasa pipe peico viña. ⁷ Esepıa, pe yeroyasa Tüpa rese aviye oro, ahe sãhasa tata pipe yepı. Ęgüe ehi aveira pe recocuer sãhambrı tata nungar mbahe yavai vahe pipe, “¿Avıye vahe ité pıha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañıi tēi vaherã sui. Ęgüe yahese, “Che rese pe yeroyasa aviye ité” ehıra yande Yar yandeu. Ahese yarecora teco porañetesa iyavei imboeteiprı yaicora acoi Jesucristo oyevıse curı.

⁸ Pe niha pesısu yande Yar Jesucristo, yepe ndapesepıai viña; cūrıtēi rumo sepıaēhi pipe peyeroya sese. Sese pereco ité pe vıharetesa tuvıchá, aviye catu vahe, ndapeıcatui vahe ahe imombehu. ⁹ Esepıa niha, pesupıtı pe remıaro poropısirosa apırehi vahe peico pe yeroyasa pipe.

¹⁰ Aracahe suıve ava Tüpa ñehe mombehusar oıcuıa tuprı pota ité co poropısirosa resendar yuvıreco ‘¿mara ehi eté pıha co tecocuer?’ oyapave yuvıreco. Iyavei oñemoñeta yuvıreco Tüpa oporoaisusa pipe pëu mbahe ombou vaherã rese. ¹¹ Cristo Espıritu senondeve oıcuıa uca mbahe Tüpa ñehe mombehusar upe aıpo ehi: “Poropısirosar oye-mombarısu ranera, ipare rumo teco orısa porañete vahe oimera” ehi chupe aracahe. Sese, “¿Umara pıha evocoi mbıa?” ehi; “¿Mbahesera vo oimera co Espıritu remimombehu yandeu?” ehi yuvıreco. ¹² Tüpa rumo omboyecua chupe, ndahei chupe nara ité imombehuprı yuvıreco, pëu nara ité rumo. Ahe avei niha poropısirosa resendar ñehesa mombehusar omombehu pëu cūrıtēi, Espıritu Santo pıratasa pipe imbouprı ıva pendar yandeu. ¡Tüpa rembiguai avei oıcuıa tuprı pota tēi cūrıtēi yuvıreco viña!

Tüpa yande poravo yande reco maranehi água

¹³ Sese pe pıhañemoñeta tuprısa pipe pemahemoha tuprıra peyese Tüpa porovasasa pëu ombou vaherã rese pe yeroya catu água acoi Jesucristo oyevıse curı. ¹⁴ Tahır iporeroya vahe pe recosa pipe ndapeıcoi chıra mbahe pe remimbotarai pipe, acoi pereco vahecuer peyese Tüpa recocuer cuaēhi vıtesese. ¹⁵ Peıcora rumo pe reco maranehısa pipe ité. Esepıa, Tüpa pe poravo oyeupe nara; ahe ndaseco marai vahe ité. ¹⁶ Supı eté ıcuıaprı aracahendar pipe aıpo ehi imombehu: “Pe tapeıco seco maranehi vahe. Esepıa, che ndaseco marai vahe aıco” ehi.

¹⁷ Tūpa niha opacatu ava upe secocuer rese nomboyoaviratī chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vitesē. ¹⁸ Esepia, Tūpa pe pīsīro aracahendar pe ramoī suindar aracuasa ēgüe ehi tēi vahe sui. Peicua tupri ité niha co poropīsīrosa repri nimboepisai eté que mbahe ocañi tēi vahe rā pipe inungar oro, anise guarepochira viña. ¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. ²⁰ Ahe Tūpa oiporavo aracahe ivi, iva apoēhi vitesēve ēgüe ehi vahe rā. Cūritei rumo oyemboyecua pēu mbahe tupri āgua. ²¹ Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

²² Cūritei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vahe rā ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pīratasa pipe. ²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe. ²⁴ Esepia, icuachiapri aracahendar pipe aipo ehi: “Opacatu ava inungar caha, iyemboeteisa evocoyase inungar ipotri.

Ipare ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vahe rā ité yepi” ehi.

Ahe co ñehesa imobehupri poropīsīrosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar pītanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropīsīrosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroñroño yuvireco. Tūpa rumo ahe ita oiporavo aviye catu vahe. ⁵ Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri aracahendar pipe aipo ehi:

“Che amondo ñepeī ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochī chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oī aposar rumo viroñroño co ita yuvireco.

Ahe ita rumo coiye vīracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vahe rā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pipe pe reique āgua. ¹⁰ Yipindar ndahe vitei eté Tūpa upendar ava

peico, cūritei rumo ahe ité peico; yipindar ndaperecoi Tūpa poroparaisuerecosa, cūritei rumo pereco ité cute.

Peico catu Tūpa mboetei āgua

¹¹ Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe recocuer ipipe. ¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroīro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tupri pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ñivi vahe oicudara chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ñivisave’ oyapave yandeu. Ahe niha yapichapri secoi pe recocuer moingatu āgua. ²⁵ Esepia, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

3

¿Mara ehira ava omenda vahe recocuer yuvireco?

¹⁻² Ēgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tupri imboeteisa avei chupe, aviyeteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque. ⁵ Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyēhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tüpa omboura güeco tupriisa pipe tecovesa apirêhi vahe oyoya voi pëu. Êgüe peyese, Tüpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepei oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pëu, anise que oñehe raise, ndapemboyevii chira chupe. Iyacatu rumo mbahe tupriisa pipe pemboyevira chupe. Evocoi nungar mbahe apo água niha Tüpa pe poravo ‘toipisi che porovasasa’ oyapave.

¹⁰ Esepia,

“Peipotase pe recocuer aviye tupri água pe yemboviharetisa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tupriisa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa. Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerêhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, jsovasapri peico! Peyembosiquiyei rene que ava sui. ¹⁵ Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pëu pe querêhisa pipe imombehu tupri água. ¹⁶ Êgüe peyera rumo pe reco mbegüesa pipe imboeteisave. Peico tupriira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tüpa oipotase pe yemombaraisu, aviye catu mbahe aviye vahe apo pipe yepi mbahe tēi apo rãgüer sui. ¹⁸ Esepia niha, Cristo teieté omano yande angaipa repirã ñepei reseve. Güeco maranehi pipe êgüe ehi ava recocuerai rese opacatu pe reraso água Vu Tüpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tüpa remimbotar ava hã soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tüpa osãro güeco mbegüesa pipe secocuer moingatu água viña Noé oyapo vitesese arca oico. Ahe ipipe oñepisiro ochomi tēi yuvireco amarusu sui. ²¹ Ahe i osãhangapo i poroãpiramosa, ahe omboyecua yande ipisiropri yande recosa. Poroãpiramosa rumo i pipe ndahei yande rete moatiro água. Co rumo yaporandura Tüpa upe, yande pihañemoñetasa moatiro água. Ipipe sui evocoyase yañepisiora yande Yar Jesucristo cuerayevisa pipe. ²² Ahe oso ivave oguapi oĩ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

4

Yandehañeco yandeyese mbahecuasa Tüpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoingatu voi êgüe peye vahe rã peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipipe sui ndoyuvireco iri chira ari rupi ava tēi pihañemoñetasa pipe. Tüpa remimbotar rupi eté rumo oyapo pota mbahe co ivi pipe yuvirecoi vitesese.

³ Êgüe peye pucu rane niha pe rembiapo ai pipe peico ava Tüpa reroyasarêhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rãse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cüritei rumo pe mboriparer, ndoyembovhai tēi pe rese, ndapeico irise supi semimbotarai apo água. Ahe oñehe-ñehe tēi yuvireco pe recocuer piyasu rese. ⁵ Ahe chupe rumo oimera porandusa. Esepia, yande Yar oyemoingatu

opacatu ava recocuer rese oporandu ãgua omano vahe upe, oicove vite vahe upe avei curi. ⁶ Sese niha co ñehesa pĩsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirẽhi inungar Tũpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ãgũe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rõtave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepeipei yande yaiporura Tũpa suindar mbahecuasa yareco vahe ambuae Jesús reroyasar rese hañeco tupri ãgua. Yaiporu tupri co Tũpa porovasasa setã vahe yande cuaita mboaviye tupri ãgua. ¹¹ Acoi pemombehuse Tũpa suindar mbahe, pemombehura inungar iñehe ité; acoi peporopĩtĩvi potase, peyapoño opĩratasa pẽu Tũpa ombou vahe pipe. Opacatu mbahe peyapo vahe peyapo ‘tomboetei ava yuvireco Tũpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. ãgũe tehi apirẽhi vaherã ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tẽi yande recoãhasa pẽu ‘ndoyavi, ndipoi chietera evocoi nungar mbahe cheu viña’ pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agũer nungar pipe yuvireco. Evocoyase yayemboviharete itera acoi yande Yar oyevisẽ güeco pĩratasa pipe. ¹⁴ Iñehe marase yuvireco pẽu Cristo reroyasar pe recosa rese, sovasapri peico. Esepia, Tũpa Espĩritu güeco porañetesa pipe secoi eté pe rese. ¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tẽi aposa rese. Ndahei chiaveira que ambuae ava mbahe rese iñemañeco tẽisa sui ãgũe ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tũpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu ãgua. ãgũe ehise yandeu, mbahe tẽi catu itera Jesús reroyasarẽhi upe. ¹⁸ Yavaise seco catupri vahe upe iñepisiro ãgua, ¿mara ehira piha ava ndaseco põrai vahe ava angaipa viyar yuvirecoi vahe upe? ¹⁹ Sese peyemomborarase Tũpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro ãgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepiã vahe ité yande Yar mombaraisu agũer. Inungar ahe vireco teco orisa, ãgũe ahe aveira acoi yande Yar oyevisẽ curi. ² Pesãro tupri catu Tũpa upendar ava eta pe remiaro co omondo vahe pẽu inungar ovesa rese yangarecuar osãro tupri vahe ovesa; peyapora pe querẽhisa pipe ité. Ahe niha Tũpa oipota, ndahei ambuae yande cuaisa pipe tẽi, ndahei avei guarepochi pota raisave yayapo. Yayapora rumo mboraviqui yande querẽhisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai pĩrata vahe. Pemboyecuara rumo pe recocuer aviye vahe chupe imbohesa tupri pipe. ⁴ Evocoyase acoi oyevisẽ yande Yar, yande rãrosar ivate catu vahe, ahese peipisira mbahe porerecosa, teco ori porañete apirẽhi vahe.

⁵ Iyavei no pe mbia chĩhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegũesa pipe peyeupe peico. Esepia,

“Tũpa ava oyeecomboivate ai vahe amotarẽhimbar secoi; ava seco mbegũemi vahe upe rumo ombou oporovasasa” ehi.

⁶ Peyecomombegũe catu peico Tũpa pĩratasa povrive. Evocoyase pe reco mboivatera curi. ⁷ Opacatu mbahe rese pe pihãñemoñeta atisa pemombehura Tũpa upe. Esepia, ahe pe rãrosar ité secoi.

⁸ Pearacua cañi rene peyesui, pemahemoha ari rupi peyese. Esepia, pe amotarẽhimbar Carugar pe reco momara pota yepi inungar yaguar oñaro vahe oguata tẽi oporoeca ‘tamomara ava’ oyapave. ⁹ Sese peyemoviracuara Tũpa rese pe yeroyasa pipe Carugar upe. Esepia, peicua niha opacatu rupi avei yande rivireta Tũpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tũpa teieté pe reco mohivi tupri, iyavei pe reco moviracuara, pe momirata aveira pe yepipi iriẽhi ãgua ichui. Ahe niha oporovasasa pipe yande poravo oyeupe nara, yande yaso vahe rã supi teco ori ndopai vahesave yande Yar rese yande recosa pipe. ¹¹ Eẽgũe tehi tasecoi gũeco pĩratasa apirẽhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pĩtivisa pipe co ayapo imondo che rembicuachia ndipucuimi vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tũpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMONUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ívi vahe yuvirecoi. ² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pírata pipe opacatu mbahe ipane vahe yande recove água, sese yande pihañemoñeta catu água avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei. ⁴ Ipipe avei oseya oñehe imboaviyepirã yandeu; ahe ñehe égüe ndehi tēi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepepi água mbahe tēi sui. Ahe acoi oime vahe co ívi pipe ava remimbotar tēi sui. ⁵ Sese pe peyeroya vahe Jesús rese, peyemomirata catu aveira peyapo vaherã mbahe aviye vahe. Peseca aveira Tüpa remimbotar cua tupri catu água. ⁶ Iyavei peñearo tuprira. Ipare peñemosañe aveira mbahe tēi upe. Ipipe sui peyemondo tupri catura Tüpa upe. ⁷ Ipare peyeaisura peyeivri nungar pe recosa pipe. Ipipe sui peseca catu vitera ava raisu tupri água.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer égüe ndehi tēi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndas- esapisoi vahe, anise mbahe ndosepia tupri vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tüpa pe renoisa mboyecua água iporavopri pe recosave. Égüe peyese, ndapeviapi chietera mbahe tēi pipe. ¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhãño itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha vite co aracuasa rese. ¹⁴ Esepia, yande Yar Jesucristo oicua uca cõimi che mano água cheu. ¹⁵ Opombohera rumo opacatu che catugüer rupi co tecocuer rese che manore pe mahenduha água.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar píratasa resendar, iyevi iri água resendar avei, ndahei oreyesui tēi. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tüpa omboeteise Guahir iyavei omondose chupe seco porañete iri água aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharete vichico” ehise. ¹⁸ Ore ité niha aipo ñehesa orosendu iva suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tüpa ñehe mombehusar remi- mombehugüer supi tupri vahe Cristo resendar. Iya ité pëu pe yapisaca tupri água sese; inungar que tataendi pítusave osesape vahe oico acoi osëse voi cõhe rerusar yasitata guasu ou, égüe ehi co ñehesa pe piha pipe sesape. ²⁰ Peicua catu co mbahe, co ñehesa aracahendar icuachiapri Tüpa suindar ité, ndahei yandeyesui tēi yaicua imombehu água. ²¹ Esepia, ndahei ñehe mombehusar oyesui tēi omombehu yuvireco. Ahe rumo ava seco catupri vahe ité. Tüpa ité omombehu uca oñehe chupe Espiritu Santo píratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuacuñora oyar opĩsirosar. Co rumo güecocuer momba pihavi āgua tēi ěgüe ehira yuvireco. ² Setá ava oguatará secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco. ³ Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

⁴ Esepia, aracahe Tūpa niñeroi eté güembigui oyemboangaipa vahe upe. Ahe opa ité omondo mbahe tēisave. Ęgüe ehi seyapa pĩtumimbisave, inungar ñapichimbri carena pipe yapocatupri yuvireco cañisave nara. ⁵ Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei ava siete yuvirecoi vahe supindar, ahe güeraño ité oipĩsiro. ⁶ Iyavei opa omocañi tata pipe tecua Sodoma, Gomorra avei; ěgüe ehi imbotanimbu tupri ‘na ahe aveira niha ambuae ava che reroyaēhisar upe curi’ ohesave. ⁷ Lot güeraño rumo ahese oipĩsiro. Ahe mbia aviye vahe secocuer; ndoyembovihai tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. ⁹ Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi. ¹⁰ Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeēhisa pipe oñehe rai vahe seco ivate, ipĩrata vahe rese. ¹¹ Tūpa rembiguai eta iva pendar rumo yepe ipĩrata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirã tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tēi, “Yayemboviha mbahe yande rembiapo ai rese” ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyemboviha oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaherã yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco. ¹⁶ Tūpa rumo oyaca yangaipa rese guaricu omoñehe ucasa vahe ñehe pipe chupe. Ahese ramo opoi oaracuaēhisa sui.

¹⁷ Co ava oporombohe vahe inungar ivicuar ipiru vahe. Iva quihã ivitu remimombo nungar tēi avei. Apirēhi vahe ité imombopirã yuvireco pĩtumimbi catu vahesave nara. ¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua. ¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinoso catui eté ichui. Supi eté, yayapoño itese que mbahe tēi, ahe evocoiyase

mbuguai nungar ité yande rereco uca. ²⁰ Esepia, acoi oicua vahe yande Yar, yande Pĩsirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipendar secocuer sui yuvireco chupe. ²¹ Oyeupe Tūpa porocuita imondopri aviye vahe cua pare oyepepise ichui, aviye catura revo ndoicuaise co tecocuer ihivi vahe yuvireco viña. ²² Supi tupri ité yaviye ñehesa sesendar: “Cave rumo ohu iri ogühe. Iyavei cuchi oyasu pare, oyevi iri tuyuve oyemboavaete água” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe. ² Peyemomahenduha aracadendar Tūpa ñehe mombehugar seco catupri vahe ñehengagüer rese, yande Yar Poropĩsirosar porocuita rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroñora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombehupri ou vaherã curi? Esepia, yande ramoi opa tēi omano yuvireco. Cūritei opacatu ahe tupriño tēi tecocuer aracahe ivi apo suive” ehi tēira yuvireco. ⁵ Ahe nimahenduha potai yuvireco co aracadendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi. ⁶ Coiye i pipe avei opa omocañi ivi, ombouse amarusu aracahe. ⁷ Cūriteindar rumo iva, ivi imoingatupri tata uve nara Tūpa porocuita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepepe ari inungar mil araviter; mil araviter evocoyase inungar ñepepe ari tēi chupe. ⁹ Esepia, yande Yar ndiaracahei eté oñehe mboaviye água; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepepe yande cañi tēi água; ahe rumo oipota opacatú tupri ité yande recocuer ñecuñaro água.

¹⁰ Yande Yar ari yande resapiha tēira inungar imonda rai vahe ou pĩtu pipe yepi. Ahese iva ocañi tupri tēira viapugüer ipĩrata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherã. Sese, ipyemoviracuaño itera pe reco maranehisa rese Tūpa rese pe pihañemoñetasa pipe! ¹² Pesãroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tupri rai curi. ¹³ Yande rumo yasãro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesãro viteseve co tecocuer, egüe peyera opacatu peicatugüer rupi pe reco tupri água pe angaipañi pipe, pēu Tūpa, “Peyavi mbahe” ehiñi água. ¹⁵ Tapeicua co: yande Yar seco mbegüe yandeu yande pĩsiro água. Egüe ehi avei yande rembiaisu Pablo icuachía oyeupe Tūpa ombou vahe mbahecuaasa pipe pēu. ¹⁶ Opacatu ocuachiar pipe omombehu evocoi nungar mbahe pēu, yepe amove yavai senducua água yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipipe güecocuer omocañi tēi ahe.

¹⁷ Che rivri, che rembiaisu, peicua ité niha evocoi mbahe; sese peñearo tupri rai pe yembopa ucañi água ava ndiporeroyai vahe upe Tūpa rese pe recocuer yemoviracuaasa sui pe yepepiñi água. ¹⁸ Peicua tupri catura rumo yande Yar Poropĩsirosar Jesucristo

iyavei peicoveño itera iporovasasa pipe. ¡Ëgüe tehi imboeteipri tasecoi cūritei apirēhi vaherã! Aipo rupive che ñehe pēu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pîpe oromombehu pëu co yîpîsui ve secoi vahe. Ahe orosendu, orosepia avei ore resa pîpe ité iyavei oropoco ité sese. Ahe niha Tûpa Ñehese tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apîrêhi oromombehu vahe pëu. Ahe Vu rese secoi vahe oyemboyecua vahe oreu. ³ Oromombehu co orosepia vahe, orosendu vahe ñepei vahe nungar pe reco âgua ore rese inungar ore oroico yande Ru Tûpa rese, Tahir Jesucristo rese avei. ⁴ Evocoyase cûritei oroicuachía evocoi mbahe pëu yande yembovîharete catu âgua.

Tûpa tesapesa secoi

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tûpa niha tesapesa secoi; ndipoi eté pîtumimbisa sese. ⁶ “Che aico tupri Tûpa rese” yahese, yaicoño rumo angaipa pîpe, ahe inungar pîtumimbi vahe, ahese yande remira têi iyavei ndayayapoi mbahe supî tupri vahe. ⁷ Yaicose rumo tesapesa pîpe inungar yande Ru Tûpa secoi tesapesa, evocoyase yaico tuprîra yandeyeupe. Iyavei suvî yande moatiro opacatu angaipa sui.

⁸ Iyavei, “Ndarecoi angaipa che pîha pîpe” yahe têise, yande ae yayembopa ipîpe. Evocoyase mbahe supî eté vahe ndayarecoi yandeyese. ⁹ Acoi yamombehuse yande angaipagüer Tûpa upe, ahese ahe omboura oñeroisa yande angaipa rese yandeu iyavei omoatîrora opacatu mbahe-mbahe têi yande sui. Esepia, ahe seco îvi vahe. ¹⁰ Iyavei, “Che ndacheangaipai eté” yahe tupri têise yaico, evocoyase Tûpa semirañete ai vahe nungar yareco. Ipîpe ndayaroyai îñehengagüer.

2

Jesucristo yande reco moingatusar

¹ Che rahîreta, co aicuachía pëu pe angaipaêhi âgua. Que revo ava oime oyemboangaipa vahe pe pâhuve, yareco rumo yande Pîtîvîisar yande Ru rovai. Ahe Jesucristo, seco îvi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi âgua yande sui.

³ Acoi yayapo tuprise Tûpa porocuita, ahese supî eté yaicua Tûpa. ⁴ Oime amove ava “che aicua Tûpa” ehi vahe; nomboavîyei rumo iporocuita. Ahe semirañete ai vahe, ndovîrecoi mbahe supî tupri vahe oyese. ⁵ Acoi yamboavîyese îñehengagüer, ahese supî eté yasaisu Tûpa. Ipîpe sui yaicua yande reco tupri Jesucristo rese. ⁶ Acoi “aico tupri Tûpa rese” ehi vahe, ahe secoira Jesucristo nungar.

Mborocuita ipîasu vahe resendar

⁷ Iyavei, che rivîreta, ndaicuachiai mborocuita ambuae ipîasu vahe pëu. Aheño ité mborocuita pereco vahe yîpîsui ve. Ahe acoi yîpîndar pesendu vahe. ⁸ Co aicuachía vahe rumo ogüeru mborocuita ipîasu vahe. Ahe supî eté tesapesa Jesucristo vîreco vahe iyavei pereco vahe avei. Esepia, pîtumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu têi vahe; oyamotarêhiño rumo ambuae omboetasa Tûpa reroyasar. Evocoi nungar recocuer pîtumimbisave têi vîte. ¹⁰ Acoi osaisu vahe ambuae omboetasa Tûpa reroyasar, ahe secoi tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pîtumimbisa

pipe tēi secoi, ndoicuai avei que rupi güecocuer virecora. Esepia, p̄tūmimbi vahe nomboesap̄isoi.

¹² Che rahireta, co aicuachía p̄u nara. Esepia, Tūpa iñero pe angaipa rese p̄u Jesucristo recocuer pipe. ¹³ Pe, yesupa peico vahe upe co aicuachía. Esepia, peicua ȳip̄isuive oicove vahe. Aicuachía avei p̄u, mb̄ia ch̄ihivahe. Esepia, pesecopi Carugar. ¹⁴ Iyavei pe tahireta aicuachía opacatu p̄u. Esepia, peicua vahe niha yande Ru Tūpa. Aicuachía avei p̄u, pe iyep̄u. Esepia, peicua ȳip̄isuive oicove vahe. Aicuachía avei p̄u, mb̄ia ch̄ihivahe. Esepia, peyemov̄iracua etep̄ri, peip̄isi avei Tūpa Ñehengaḡuer pe p̄iha pipe. Ip̄ipe pesecopi Carugar.

¹⁵ Evocoyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande p̄ihañemoñeta raisa, yaipota vahe sese yamahese, iyavei opacatu yande rembiereco rese yande yemboiv̄ate ai tēisa. ¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vaherã ité.

Mbahe supi eté vahe iyavei mbahe ndahei vahe supi

¹⁸ Che rahireta, co ar̄i ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūritei setá oyemboyecua yamotarēhimbar yuvireco. Sese yaicua ar̄i ipa vahe yepota āgua. ¹⁹ Ahe oyep̄epi yande p̄ahu sui; ndahei eté rumo yande riv̄ri yuvireco Tūpa rese. Esepia, acoi yande riv̄ri itese, ahese op̄itara yande piri yuvireco viña. Ēḡue ehi oyecua ndahei opacatu yande riv̄ri yuvirecoi.

²⁰ Cristo omondo Esp̄ritu Santo p̄u. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co p̄u. Esepia, mbahe supi eté vahe sui ndoui temira. ²² Acoi “Jesús ndahei Porop̄is̄irosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndov̄iroyai Tu, Tahir avei yuvireco. ²³ Acoi ava “evocoi ndahei Tūpa Rahir” ehi vahe, ndov̄iroyai Tu oyese yuvireco. Acoi “evocoi niha Tūpa rahir” ehi vahe rumo, ahe v̄ireco yande Ru Tūpa oyese yuvireco.

²⁴ Sese ȳip̄isuive pesendu vahe ñehesa peyapocatu pe p̄iha pipe. Ēḡue peyese, ahese peico tupri Jesucristo rese, Tu rese avei. ²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía p̄u. ²⁷ Pe pereco Esp̄ritu Santo Jesucristo ombou vahe p̄u. Sese ndiyai eté ambuae pe mbohera. Esp̄ritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Esp̄ritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherã sese yande yeroyasa. Acoi oḡueyise iva sui curi, ahese nayach̄i chietera sovai ichui. ²⁹ Pe niha peicua Jesucristo seco ivi vahe. Iya peicua avei opacatu oyapo vahe mbahe ih̄vi vahe, ahe Tūpa rahir ité yuvirecoi.

3

Tūpa rahir yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndov̄iroyai vahe Tūpa, ndoicatu eté yande recocuer cua āgua. Esepia, ndoicuai Tūpa recocuer yuvireco. ² Che riv̄ireta, yaico ité Tūpa rahir. Yande rumo ndayaicua tupri v̄itei yande reco āgua ipare. Cūritei rumo co mbahe yaicua: acoi oyemboyecua Jesucristo, yaicora inungar. Esepia, yasepia itera opacatu seco reseve. ³ Iyavei opacatu osāro vahe Jesucristo yuvireco, oyep̄epiño ité opacatu angaipa sui güeco catupri āgua, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuaita. Esepia, angaipa Tūpa porocuaita mboaviyeēhisa yepi. ⁵ Pe rumo peicua Jesucristo ou co ivi pipe yande angaipagüer mocañi āgua. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tūpa Rahir Carugar rembiapo mocañipa āgua.

⁹ Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo āgua yuvireco. Esepia, ahe Tūpa rahir ité yuvirecoi. ¹⁰ Icuapri ité Tūpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

Yayeaisura ñepi-pei yande yacatu

¹¹ Co niha ñehesa, acoi pesendu vahe yipisuive, ahe co yayeaisura ñepi-pei. ¹² Ndayaicoi chira inungar Caín, ahe Carugar remimbohe oyuca vivri. ¿Mahera pīha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tūpa ndoicuai vahe pe roeroïrose yuvireco. ¹⁴ Yande rumo yaicua aracacondar yande hã cañi tēi agüer. Cūritei rumo yasē evocoi nungar sui tecovesa apirēhi vahe pipe yande reco āgua. Esepia, yande niha yasaisu yande rivireta Tūpa rese yuvirecoi vahe. Acoi ndosaisui vahe rumo ahe ihã ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese. ¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei ēgüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivii, ahe ndovirecoi Tūpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande pīha pipe yande reco tupri Tūpa rese, ahese yayeroyano itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaita iyavei yayapo semimbotar yaico. ²³ Co ité iporocuaita: yaroyara Tahir Jesucristo iyavei yayeaisura ñepi-pei Tūpa yande cuaisa rupi tupri. ²⁴ Acoi yaroyase iporocuaita, ahese yaicora Tūpa rese; ahe avei secoira yande rese. Iyavei ahe ombou Espiritu yandeu. Ichui yaicua Tūpa secoi yande rese.

4

Espiritu Tūpa suindar iyavei espiritu Cristo amotarēhimbar

¹ Che rahireta, aní chira peroya opacatu “Espiritu pipe añehe” ehi vahe. Iyacatu rumo pesāha rane ‘¿Tūpa suindar ité pīha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. ² Co rese peicua ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité. ³ Acoi aipo ndehi vahe rumo, ndovirecoi eté Espiritu Tūpa suindar

oyese. Ahe rumo vireco espíritu Cristo amotarêhimbar tēi. Aracaco niha pesendu ñehesa acoi yamotarêhisar espíritu ou vahe rã resendar. Ahe cūrítei secoi co ivi pīpe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secoi vahe pe rese, ahe ipĩrata catu Carugar sui. ⁵ Evocoi co ivi pīpendar tēi yuvirecoi vahe. Esepia, oñehe mbahe ivi pīpendar rese tēi yuvireco. Iyavei ava supindar ae ité oyapisaca ñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espiritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepeipei. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. ⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secoi. ⁹ Ëgüe ehi omboyecua oporoaisusa yandeu. Ahe niha, ombou Guahir ñepeipei vahe co ivi pīpe ichui yande recove ãgua. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano ãgua yande angaipa repirã. Ahe niha poroaisusa supi eté vahe.

¹¹ Che rivireta, che rembiaisu, ãgüe ehi Tūpa yande raisu. Evocoyase ãgüe vahe aveira yande yayeaisu ñepeipei yepi. ¹² Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoyase oime ité yande rese. ¹³ Ahe ombou oEspiritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pīpendar pĩsiro ãgua. ¹⁵ Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoyase secoi sese.

¹⁶ Ëgüe yahe icua, seroya tupri ãgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ëgüe yahe Tūpa poroaisusa mboaviye tupri ichui yande siquiyeẽhi ãgua acoi oyepotase ari cañi yandeu. Esepia, yande yaico co ivi pīpe inungar Jesucristo. ¹⁸ Yasaisu tupri itese Tūpa, ndipoi chira siquiyesa yandeu. Ëgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

¹⁹ Yipindar Tūpa yande raisu. Sese cūrítei yande avei yasaisu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroĩro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatu Tūpa ndayasepia vahe raisu ãgua. ²¹ Jesucristo ombou co porocuita yandeu: acoi osaisu vahe Tūpa, tosaису avei omboetasa seroyasar yuvireco.

5

Yande mbahe-mbahe tēi co ivi pīpendar recopisa

¹ Opacatu viroya vahe Jesús Tūpa Rembiporavo Poropĩsirosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe. ³ Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo ãgua. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pīpendar Cristo rese yeroyasa pīpe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pīpendar mbahe-mbahe tēi recopi ãgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espíritu avei osecu mombehu. Esepia, ahe omombehu mbahe supi eté vahe yepi. ⁷ Evocoyase oime mbosapi imboyecuar: ⁸ Espíritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar. ¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secoi. ¹² Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisi vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu. ¹⁵ Evocoyase yaicuae ahe osendu yande yeruresa, yaicua avei mbahe yande porandusa ombou vaheerā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyeroquirā sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. ¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Caruguar ndopocoi sese. ¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Caruguar povri pendar tēi yuvirecoi. ²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua āgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe. ²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMOÑUVIRIOSA JUAN REMBICUACHIA SAN JUAN

Mbahe supí eté vahe iyavei yeaisusa

¹ Che, icuaiþri, aicuachía co che ñehe pëu pe Tūpa rembiporavo peico vahe opacatu eipeve peico vahe upe. Che niha supí eté opoaisu. Ndahei rumo che güeraño opoaisu, opacatu oicua vahe porombohesa supí eté vahe avei pe raisu yuvireco. ² Opoaisu ité mbahe supí eté vahe yande piha pipe yareco vahe rese. Ahe ndopai chivaherã ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparisuerecosa pëu nara. Tombou avei güeco tuprisa, güeco supí eté vahe pipe oporoaisusa pipe avei pëu.

⁴ Che mboviharete aicuase pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supí eté vahe yuvireco. Ahe niha yande Ru Tūpa porocuita yandeu. ⁵ Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu. ⁶ Co yande yeaisusa, yande guata tupri ãgua Tūpa porocuita rupi. Co Tūpa porocuita yipisuive pesendu vahe, ahe omombehu yande yeaisu tupri ãgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi. ⁸ Peñearo catu pe poraviqui repri mocañi tēiēhi ãgua. Tapeipisi catu opacatu Tūpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe ãgua. Ahese yayemboviharetera oyese.

¹³ Iyavei Tūpa rembiporavo oñemonuha vahe cohove opacatu omondo omahenduhasa yuvireco pëu. Aipo rupive co che ñehesa amondo pëu.

IMOMBOSAPISA JUAN REMBICUACHIA SAN JUAN

Gayo recocuer aviye vahe resendar

¹ Che, icuapri, aicuachía co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivri, cūrtei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu. ³ Che aviharete asenduse yande rivri ñehe nde recocuer resendar yugüeruse cohawe. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitivi catu chupe mbahe ipane vahe rese iguataño āgua Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitivi āgua yuvireco ava Tūpa reroyasarēhi sui. ⁸ Sese yande ēgüe yahera yaico evocoi nungar upe ñehesa supi eté vahe rese ipitivi āgua.

Diótrefes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. ¹⁰ Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güetave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui. ¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tūpa rembiaisu semienoi peico. Jesucristo niha pe rāro opacatu mbahe-mbahe tēi sui. ² Tūpa tombou catu pëu pe paraisuerecosa pe reco tupri āgua pe raisusa pipe.

Oporombohe vahe ava mbopa tēi āgua resendar

³ Che rivireta, che rembiaisu, yipindar chepihañemoñeta ité yande pīsirosa resendar cuachía āgua pëu viña. Ipore rumo chepihañemoñeta iri: iyaño revo che aicuachía pe yemoviracua tupri catu āgua yembohesa yaroya vahe rese. Ahe yembohesa yaroya vahe ñepei reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pāhuve. Aracahe suive rumo Tūpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tūpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepei vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tūpa vinose yande ramoi eta Egipto sui. Ipore rumo opa omocañi viroyasarēhi. ⁶ Inungar avei Tūpa rembiguai yipindar vahe yuvirecoi, nomboaviyei vahe ocuaita. Ipipe sui Tūpa osoquenda pītumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tūpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi āgua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye āgua.

⁸ Ēgüe ehi avei niha evocoi nungar ava pe pāhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco.

⁹ Aracahe Tūpa rembiguai ivate vahe Miguel oyepopi-epi Carugar rese yuvireco Moisés retecuer rese. Yepe ahe Tūpa rembiguai rerecuar viña, ndiyai rumo chupe iñehe mara āgua Carugar upe. Evocoiyase aipo ehi chupe: “¡Tūpa oicua co rese ndeu!” ehiño. ¹⁰ Evocoi ava pe pāhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi āgua tēi.

¹¹ ¡Paraisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano opereroyaēhisa pipe.

¹² Pe peñemonuhase pe yeaisusa pipe pe caru āgua, ahese ahe avei yuviroique pe pāhuve; noyuvinochi eté ocaru āgua pe pirí. Ndapeicuai rumo ahe pe recocuer monguiha āgua tēi yuviroique vahe pe pāhuve. Evocoi inungar ovesa rārosar oyese tēi ihañeco vahe yuvireco. Iyavei ahe inungar iva quiha ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoiyase ahe sapohopri.

¹³ Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper

co coti tēi oso pītumimbisave, ěgüe ehi aveira ava Tūpa sui oyepepi vahe pītumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi. ¹⁶ Ahe mbia niha oporoviroïro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe reroqua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co arí cañi renonde oimera ava viroïro ai vahe Tūpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tūpa Espiritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rãrosa pipe. ²¹ Peñearo tupri Tūpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepei yangaipa pipe pe viapiēhi ãgua.

Tūpa mboetei tupriisa

²⁴⁻²⁵ Tūpa yande Pīsirosar ñepei vahe vireco pīratasa pe rãro angaipa pipe pe viapiēhi ãgua. Ahe avei pe rerecora güecocuer porañetesave pe reco angaipaēhisa pipe. Ichui peicora pe viharetesa pipe. Ahe imboeteipri tasecoi. Ěgüe tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūrítei apirēhi vaherã.

TÛPA REMIMBOYECUA JUAN UPE APOCALIPSIS

Jesucristo yemoporẽhisa

¹ Che, Juan, aicuachía mbahe imboaviye pihavipirã pẽu acoi Tũpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca ãgua güembiguai che recose cheu.

² Che supi eté amombehu opacatu mbahe asepia vahecuer iyavei amombehu evocoi Tũpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerocuĩ vahe co Tũpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tũpa suindar, ahe yipivé vahe ité, cũriteindar apirẽhi vahe avei; siete espíritu suindar avei no, ahe senda rovai yuvinohai vahe,

⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tẽi mborerecuar sui. Ahe yande raisu iyavei yande pĩiro yande angaipa sui vuvĩ pipe,

⁶ iyavei yande rereco mborerecuarã, pahiguã avei no Vu Tũpa upe yande poraviqui ãgua. ¡Ëgüe tehi imboeteipri tasecoi opĩratasa pipe apirẽhi vaheerã!

⁷ ¡Esepia, Cristo ¡va quihã rese oura curi!

Ahese opacatu ava osepiara yuvireco, yamotarẽhisarer, oicutu vahecuer avei.

Iyavei opacatu tecua ivi pipendar ahese oyaseho tẽira yuvireco sepiase.

Ëgüe ehi etera curi.

⁸ “Che aico yipindar iyavei ipandar” aipo ehi yande Yar Tũpa opacatu mbahe mboavaisarẽhi evocoi yipivé vahe ité, cũriteindar apirẽhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riquehir aico, iyavei che pe nungar Tũpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pãhumi para guasu aviterve Patmos serer vahesave Tũpa Ñehengagüer mombehusa pipe sui tẽi, Jesucristo recocuer mombehusa pipe sui tẽi avei no. ¹⁰ Acoi yande Yar ari pipe Espiritu povrive aicose, asendu che raquicuei oñehe pĩrata vahe avie acoi mimbĩ ñehe ¹¹ aipo ehi: “Eicuachía mbahe erese pia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava pĩha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipãhuve mbia avie tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapĩrata morochí vahe, sesa evocoyase avie tupri ité tata rendigüer. ¹⁵ Ipi evocoyase sendi yai eté, avie acoi bronce ocai vahe horno pipe, iyavei iñehe ipĩratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osẽ quise pucu saimbe yoya vahe. Sova evocoyase avie ari rendigüer ipĩratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei. ¹⁸ Aicove vahe ité; yepe amano viña, cūrítei rumo aicove iri ndopai chivaherã ité aico. Che areco che mborerecuasa ava recocuer mocañi ãgua. ¹⁹ Sese eicuachía co mbahe eresepia vahe: cūríteindar oime vahe mbahe iyavei mbahe oime vaherã curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaherã. Pesecoãha avei ava, ore apóstol oroico, ehi tēi vahe; ipare peicua iporombopa tēisa yuvireco. ³ Che aicua peñemosañi peyemombaraisu peico che raisupave; ndapecueraí eté ipipe. ⁴ Che rumo aicua oime mbahe ndahei vahe che pĩha rupi pe recocuer: ndapeyeaisu iri inungar yipindar. ⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevíra pēu, arocuapara pe vera hi senda sui acoi ndapeyevise Tūpa upe. ⁶ Co rumo mbahe pe rembiapo aviye cheu: ndapeipotaise nicolaitas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi ãgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pēu aipo ehi: ⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Carugar reroyasar tēi evocoi yuvirecoi. ¹⁰ Ndapesiquiyei chira pe paraisu ãgua sui. Esepia, Carugar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pēu. ¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi ãgua, ahe imanore ihã ndoiporari chira imoñuviriosa manosa pipe, ehi’ erera icuachía chupe.

Ñehesa Pérgamo pendar upe

¹² “Eicuachía avei Tūpa rembiguai Pérgamo pendar che reroyasareta rãrosar upe: ‘Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Carugar oguapi oĩ; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave. ¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pãhuve ndoyepipi

potai eté nicolaíta porombohesa sui yuvireco. ¹⁶ Sese pemboasi pe recocueraí, peyeví Tūpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuara, ehi' erera icuachía.

Ñehesa Tiatira pendar upe

¹⁸ “Eicuachía avei Tūpa rembiguai Tiatira pendar che reroyasareta rārosar upe: ‘Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracua. Aicua avei yipindar sui mbahe peyapo catú aviye vahe. ²⁰ Oime rumo mbahe pe rembiavi: peñemosañño evocoi cuña Jezabel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe. ²¹ Che amondo vite tēi ari chupe, tomboasi oangaipa Tūpa upe oyeví āgua, che yapave viña. Ahe rumo ndopoi potai eté oyemboaguasa tēisa sui. ²² Evocoiyase cūrítei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembrí ichui. Ēgüe ehi opacatu che reroyasar oicuara yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pēu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Caruguar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuita. ²⁵ Peyemoviracuañora rumo evocoi mbahe pereco vahe rese, acoi che ayevisé voi vitu curi. ²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi ²⁷ inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyaera acoi mahemoinda ñaihu apopri viña. ²⁸ Iyavei amondora yasitata cōhe rerusar chupe. ²⁹ ¡Acoi ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tūpa rembiguai Sardis pendar che reroyasareta rārosar upe: ‘Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. ² Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyeví catu Tūpa upe. Ndapeyemopoaseise rumo, asora pēu inungar imonda rai vahe, ēgüe ahera vicho pe resapiha. ⁴ Oime rumo amove ava pe pāhu pendar ndoyapoi eté angaipa yuvireco, evocoiyase inungar ava oguata vahe oturucuar morochi vahe rese, ēgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa

resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tūpa rembiguai Filadelfia pendar che reroyasareta rãrosar upe: ‘Co seco maranehi vahe, supi tupri vahe ité, vireco vahe mborerecuasa aracahendar mborerecuar guasu David nungar, acoi omboise que oquenda, ñepeí yepe que ava nomboyai chietera; iyavei acoi omboyase, ñepeí yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pëu pemombehu vahe rã che recocuer. Ahe que ñepeí yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehe iyavei ndacheñomi eté ava sui peye. ⁹ Co Carugar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopi hapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuita, peyemoviracua ité evocoi mbahe tēi upe peico. Evocoyase che opoepira acoi ari tecoñhasa ouse opacatu ivi rupindar upe curi. ¹¹ Ayevi poyavara. Peyemoviracua catu Tūpa reroyasa pereco vahe rese. Evocoyase ñepeí yepe que ava ndovirocuai chietera Tūpa suindar porerecosa pe sui. ¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piāsu, evocoi ou vahe rã iva pendar che Ru Tūpa sui, iyavei che rer ipiāsu vahe ité arovara sese no. ¹³ ¡Acoi ava osendu pota vahe, toyapisacaño Espíritu remimombegüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rãrosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepeí reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyevñora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoí vahe peico. Iyavei ndapeyavi nditurucuai vahe peico. ¹⁸ Sese opomboaracua; peseca iva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tupri sa peyeupe che suindar nani tupri vahe nungar pipe pe recoēhi āgua, pe chíēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. ¹⁹ Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua. ²⁰ Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoyase aiquera pe piri, yacarura oyepiri. ²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vīte. ²² ¡Acoi ava osendu pota vahe, toyapisacaño Espíritu remimombegüer rese che reroyasareta upe! ehi imombehu pëu' erera icuachía” ehi Jesús cheu.

4

Tūpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipĩrata vahe mimbi nungar yipĩndar oñehe vahe cheu, ahe asendu iri: “Eyeupi ave. Che evocoyase mbahe amboyecuara ndeu mbahe imboaviyepirã curi” ehi.

² Ahe pipeve voi, Espiritu pĩratasa pipe aico iyavei asepia tenda ivave, ahe iharive ñepeu oguapi oĩ. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuaipri yuvirecoi vahe; iturucuar morochí vahe yuvireco iyavei oãca rese omboyere tupri oro apopri yuvireco. ⁵ Evocoyase Tũpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tũpa espíritu. ⁶ Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pãhu rupi oyere tupri Tũpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipĩndar yuvirecove vahe pãhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pĩtu rupi aipo ehi yuvireco:

“¡Santo, santo, santo ité secoi, yande Yar Tũpa ité, ahe mbahe mboavaisarẽhi, yipivé vahe ité, cũriteindar, apirẽhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co oguapi vahe oĩ tenda harive ndopai vahe upe. ¹⁰ Ëgüe ehise evocoyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipare osequi oãca resendar oyere tupri vahe omborerecuasa resendar sovai aipo ehi:

¹¹ “Ore Yar Tũpa, iya ité nde mboeteisa, ndeu sapucaisa nde pĩratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

5

Ovesami upe güeraño iyacatu cuachiar imboyapri mboi ãgua

¹ Che asepia cuachiar Tũpa vireco vahe oacato coti, icuachiapri ipipe coti, ocar coti avei no, imboyapri siete sello pipe. ² Ipare asepia Tũpa rembiguai seco ivate vahe, ahe oporandu pĩrata oico aipo ehi: “¿Ava upe vo iya cuachiar mboi ãgua iyavei sello imboyeroyapri mondoro ãgua no?” ehi. ³ Ndipoi eté rumo que iva pendar, ivi pipendar, ivivri pendar oicatu vaherã cuachiar pipira sepia ãgua viña. ⁴ Evocoyase che ayasehó iteanga. Esepia, ndipoi eté que ñepeu yepe oime angara aviye vahe cuachiar pipira sepia ãgua viña. ⁵ Ahese icuaipri pãhu pendar ñepeu aipo ehi cheu: “Ereyaseho iri eme. Esepia niha, evocoi ava yagua pĩta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira ãgua” ehi.

⁶ Evocoyase, asepia Tũpa rovai iva pendar irungatu yuvirecove vahe pãhuve, icuaipri yuvirecoi vahe mbiterve, ñepeu ava Ovesami nungar ihã, aviye seropovẽhepri. Ahe niha vireco siete tupri sãchi, siete tupri avei sesa; sesa evocoyase siete tupri Tũpa espíritu yuvirecoi opacatu ivi rupi imboguatapri. ⁷ Ipare evocoi Ovesami oso, oipisi cuachiar evocoi tenda harive oguapi vahe yacato coti sui; ⁸ ipisi pare, evocoi irungatu

yuvirecove vahe, iyavei veinticuatro tupri icuaipri, ahe oñenopiha Ovesami rovai yuvireco. Oyacatu ñepei-pei vireco arpa yuvireco, itaisi riru oro apopri, ahe avei vireco yuvireco, ahe itaisi niha Tupa reroyasar yeruresa. ⁹ Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi ãgua,

imboyapri monodoro ãgua avei no.

Esepia niha, nde yucapri seropovēhepri ereico.

Evocoyase nde ruvi pipe eremboepipa Tupa upe nara opacatu ava ambuae-ae tēi vahe, iñehe ambuae-ae tēi vahe avei, ñepei-pei tecua yacatu rupindar, ivi rupindar avei yuvireco.

¹⁰ Iyavei eremborerecua uca Tupa upe nara, erembopahi uca avei no, ipare ahe oporocuaíra opacatu ivi rupi yuvireco” ehi osapucaí yuvireco.

¹¹ Ipare asepia, asendu avei Tupa rembiguai rehi ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi. ¹² Ahe aipo ehi pírata yuvireco no:

“¡Co Ovesami yucapírer, ahe chupe iyacatu ité mborerecuasa pisi ãgua, opacatu Tupa suindar porerecosa pisi ãgua, mbahecuasa,

pírata, mboyeroyasa, poromboeteisa, iyavei sapucaisa pisi ãgua avei no!” ehi.

¹³ Ahese asendu avei opacatu Tupa rembiapo ivave yuvirecoi vahe, ivi pípendar, ivivri rupindar iyavei para guasu pípendar, aipo ehi yuvireco:

“¡Toime sapucaisa, Tupa upendar mboyeroyasa,

imboeteisa, iyavei pírata, ahe timondosa apirēhi vaherã Tupa acoi güendave oguapi vahe upe, Tahír Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omonodoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pãhu pendar oñehe pírata. Iñehe ndoyavii osunu vahe, “¡Eriol!” ehi cheu. ² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pírata catu vahe ava reco reroyi ãgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pãhu pendar ñehe, “¡Eriol!” ehi vahe cheu. ⁴ Ipare osē cavayu pira vahe, ahe ava ihari pendar oipisi pírata mbahe tupri reroqua ãgua ivi pípendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¡Eriol!” ehi vahe cheu. Amahe sese, ipare asepia cavayu sũ vahe, ahe ava ihari pendar vireco opo pipe mbahe rãhasa. ⁶ Ipare asendu yuvirecove vahe cotindar ñehe, ahe aipo ehi: ‘Ñepei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no” ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Eriol!” ehi cheu. ⁸ Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pírata ivi imoirungatusa yahocuer rupi iguata ãgua ava yuca ãgua vavasa pipe, tieporēhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavri ve ava hā, ahe yucasa vahe yuvireco Tūpa Ŋhengagüer mombehusa sui tēi iyavei Jesús reroyasa sui tēi avei no. ¹⁰ Ahe aipo ehi pīrata yuvireco: “Ore Yar Tūpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi riri ipīratá vahe. Ari evocoyase sū, aviye acoi turucuar sū vahe mano sendar yemondesa iyavei yasi pīrá inungar tuvi, ¹³ yasitata evocoyase opa oviapi va sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese va ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. ¹⁵ Mborerecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata vahe oreu! ¹⁷ Esepia, oyepota ité Tūpa ñemoirosa oreu. Ndipoi chiera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai va pendar yuvinohai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepei yepe ivira ro angara viña no. ² Ipare asepia avei ambuae Tūpa rembiguai va pendar ou vahe ari sēsa coti sui, ahe vireco oyese Tūpa oicove vahe rer mondosa. Ahe niha osapucaí pīratá evocoi irungatu tupri Tūpa rembiguai va pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no.

¹⁰ Ipare opacatú guasu oñehe pīrata yuvireco aipo ehi:

“¡Poropīsirosa yande Ru Tūpa suindar, ahe uguapi vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai va pendar yuvirecoi vahe oyere tupri Tūpa renda rese, icuai pri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Ĕgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pĩratasa avei tasecoi yande Ru Tũpa upe!

¡Ĕgüe tehi apĩrẽhi vaheĩ ité yepi!” ehi.

¹³ Ahese icuaipri ipãhu pendar aipo ehi cheu cute: “¿Ereicua vo co ava rehĩ iturucuar morochi vahe pãve yuvirecoi, ereicua que sui pĩha yugüeru?” ehi. ¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvĩnose tupri vahe ité teco asisa sui yuvireco, inungar oyosei, omomochi vahe oturucuar, Ĕgüe ehi avei güecocuer imomochi Ovesami ruvi pipe yuvireco.

¹⁵ “Sese Tũpa renda rovai yuvirecoi, chupe mbahe apo ãgua ari, pĩtu rupi avei sēta pipe. Güendave oguapi vahe oĩ, güecocuer pipe osepira.

¹⁶ Evocoi ndiyumbiasi iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa secoi Vu renda rovai, ahe osãrora ava rehĩ sereco inungar ovesa rãrosar.

Ipare opara viraso tecovesa resendar i ndopai vahesave imboihu ãgua.

Tũpa evocoyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sũu tupri ivave ñepi hora yemombitesa rupive. ² Ichui asepia siete tupri Tũpa rembiguai iva pendar yuvĩnohai vahe Tũpa rovai, chupe opa imondosa siete tupri mĩmbi. ³ Ipare ou ambuae Tũpa rembiguai iva pendar oro itaisi rapisa reseve, iyavei ou ohã itaisi rapisa renda rovai; ipare imondosa tuvichá itaisi chupe oicuavẽhe vaheĩ oyoya tupri opacatu ava Tũpa upendar yeruresa rese oro mbahe reropovẽhepri renda harive; ahe Tũpa renda rovai chini vahe. ⁴ Itaisi rãtachi evocoyase oso Tũpa rembiguai iva pendar po sui. Ĕgüe ehi oyepota oso Tũpa recosave, oyoya tupri chupendar yeruresa rese. ⁵ Ipare evocoyase Tũpa rembiguai iva pendar opoco itaisi rapisa rese, omboapipo mbahe reropovẽhepri renda pendar tãtapiĩ pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi orĩrii.

Siete vahe mĩmbi

⁶ Evocoyase siete tupri Tũpa rembiguai iva pendar oyemoingatu voi güemimbi moñehe ãgua yuvireco.

⁷ Yipĩndar vahe Tũpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvĩ rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

⁸ Imoñuviriosa Tũpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvĩ. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tũpa rembiguai iva pendar omoñehe güemimbi, ahese yasitata tuvichá vahe ovĩapi iva sui ou. Sendi guasu inungar acoi ivira rese tata sendi guasu vahe. Ahe ovĩapi iva mombosapisa yahocuer pipe iyavei ivi sui i ohẽ vahe mombosapisa yahocuer pipe avei no. ¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tũpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer

avei no. Ichui imombosapisa yahocuer ndosesape iri yuvireco ari mombosapisa yahocuer pipe, pĩtu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehese oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tũpa rembiguai güemimbi yuvireco!” ehi.

9

¹ Tũpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pĩtumimbi vahe mboisa.

² Ipare omboise ivicuar rovapisa, ichui opũha tātachi, inungar acoi horno guasu pipe sui osẽ vahe. Evocoyase evocoi tātachi ndosesape uca iri ari upe, niporẽhi iri etẽ mbahe. ³ Iyavei evocoi tātachi sui opa yuvinose tucru guasu rehi oñemosai opacatu ivi rupi; chupe avei imondosa seco pĩrata ãgua inungar acoi mbaherumbiquiãpe. ⁴ Icuaisa rumo opacatu capihi mbahe rocri iyavei ivira momaraẽhi ãgua, ãgũe ehi rumo acoi ava nomboyecuai vahe osiva rese Tũpa rer, chupe nara itẽ. ⁵ Nimondosai rumo mborocuita chupe ava yuca ãgua. ãgũe ehi rumo ‘tomombaraisu pucu rane poyandepo yasi rupi sereco’ oyapave tẽi, inungar tupri acoi mbaherumbiquiãpe rasicuer.

⁶ Evocoi ari rupi ava oipota tẽira omano ãgua yuvireco viña. Imanosa rumo que vitera yuvireco ichui.

⁷ Tucru guasu rehi inungar cavayu imoingatupri vavasave nara yepi; oãca rese evocoyase vireco ndoyavii yeguaca oro apopri, iyavei sova aviye tupri itẽ ava repiaca.

⁸ Iha ndoyavii cuña ha, sãi evocoyase ndoyavii tupri yagua pĩta rãi. ⁹ Setecuer evocoyase oyopia tupri guarepochi apopri, iyavei ipepo riapugũer aviye tupri itẽ acoi cãreto riapugũer cavayu vinoña vahe vavasave. ¹⁰ Vireco vuguai rese opopiar aviye mbaherumbiquiãpe popiar. Ahe niha vireco opĩratasa poyandepo yasi rupi ava momara ãgua tẽi. ¹¹ Evocoi tucru guasu rerecuar, ahe icuai pri ivicuar ipicucu vahe mboi ãgua. Ahe serer hebreo ñehẽ pipe Abadón; griego ñehẽ pipe evocoyase Apolión ehi.

¹² Opa yipindar vahe mbahe-mbahe tẽi; oime vite rumo co pare ñuvirio mbahe tasi vahe.

¹³ Imoñepepe ovasa Tũpa rembiguai omoñehese güemimbi, ahese asendu ñehesa itaisi rapisa renda oro apopri Tũpa rovaindar irungatu sãchi vahe pãhu sui. ¹⁴ Ahe aipo ehi evocoi imoñepepe ovasa Tũpa rembiguai upe: “Eyorapa evocoi irungatu Tũpa rembiguai ñapichimbrĩ ãi guasu Eufrates ivirindar” ehi. ¹⁵ Evocoyase opa yorasa ava mombosapisa yahocuer yuca ãgua yuvireco. Esepia, evocoi imoingatupri co ari rupi tuprise nara yuvireco. ¹⁶ Ipare asendu sundao rehi cavayu harive yuvirecoi vahe, ahe setacuer doscientos millones tupri.

¹⁷⁻¹⁸ ãgũe ehi asepia cavayu rehi che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagũer pĩra vahe tata nungar, sovi vahe, iyu vahe avei no. Cavayu rehi ãca evocoyase aviye tupri yagua pĩta ãca, iyuru sui evocoyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu pĩratasa iyuru rese chini, suguai rese avei no; ahe suguai ndoyavii tupri itẽ mboi ãca, ipipe avei ava omomara.

²⁰ Ava rumbirer rumo nomanopa vitei vahe co mbahe tẽi sui yuvireco, nosecuñaro etẽ güecocuerai yuvireco. Ndopoi potai etẽ carugar mboetei aisa sui, iyavei opacatu mbahe rahanga tẽi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe itẽ mbahe, ndoguatai vahe avei. ²¹ Iyavei noñecuñaro potai etẽ oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarmpi

¹ Ipare asepia ambuae Tūpa rembiguai iva pendar ipiratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer opūha tupri vahe. ² Cuachiarmpi oyemboi vahe vireco opove. Opī oacato cotindar pipe opīro para guasu rese, ambuae opīve evocoyase opīro ivi rese. ³ Evocoyase sãse pīratá, inungar yagua pīta rãse; sãsese, evocoyase siete tupri osunu vahe ñehe oyendu yuvireco. ⁴ Oñehepase, ahese iñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoyase Tūpa rembiguai asepia vahecuer, ahe acoi opīro vahe para guasu rese, ivi rese avei opo oacato cotindar omopuha iva coti. ⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; ⁷ oyepotase rumo imoñuvirío ovasa Tūpa rembiguai upe güemimbi moñehe ãgua, ahese imboaviyesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmpi imboipri Tūpa rembiguai vireco vahe evocoi opīro vahe para guasu rese ohã, ivi rese avei no” ehi. ⁹ Evocoyase aso Tūpa rembiguai upe, aporandu cuachiarmpi rese, ahese ahe aipo ehi cheu: “Ndo co, eipisi, eh. Nde yuru pipe evocoyase sēhera eiri nungar, nde aviterve rumo irora” ehi cheu.

¹⁰ Ahese aipisi cuachiarmpi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu. ¹¹ Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesãhai chira rumo ñachimbri pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīrora tecua nimarai vahe rese yuvireco cuarenta y dos yasi rupi” ehi. ³ “Ipare ñuvirío ava amondora che recocuer mombehu ãgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osēra tata sapipa ãgua; ãgüe ehira ava omano que che reco mombehusar reco momara potasar. ⁶ Co ñuvirío vireco opīratasa oqui vahe mombita ãgua, acoi ari rupi che reco mombehu viteseve yuvireco; iyavei vireco pīratasa i recuñaro ãgua tuvī pipe yuvireco, imombaraisu uca ãgua avei ivi opacatu-catu tēi mbaherasi pipe güemimbotar rupi.

⁷ Omboaviyepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara. ⁸ Sehōgüer evocoyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiãño tēira

sehõgüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ëgüe ehira sorivete, iporrecora oyese yuvireco. Esepia, evocoi ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoyase ava opacatu osepia vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipĩrata vahe iva suindar aipo ehi vahe: “¡Peyepipapa ave ivate!” ehi. Evocoyase opa oyeupi ivave yuviraso iva quiha pāhu rupi oamotarēhisareta rembiepiave. ¹³ Aheseve voi oime ivi rirri tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucai Tūpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehese güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipĩrata vahe iva suindar aipo ehi vahe:

“Yande Yar Tūpa, Sembiporavo Poropĩsirosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirēhi vaherã itera secoi” ehi.

¹⁶ Evocoyase veinticuatro tupri icuapri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco, ¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūritei.

Esepia, nde pĩratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhí ité yuvireco.

Nde ñemoirosa rumo cūritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe, ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi orirri, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondiisa tuvichá vahe ambuae mbahe mboyecua āgua: oime cuña iturucuar inungar ari rendigüer, aviye opiro vahe yasi rese ohã, oāca yeguaca rese doce tupri yasitata vireco. ² Co cuña ipuruha oico, sāsé tēi omembrí iha pota āgua oyesui. Esepia niha, oiporará ité tasicuer. ³ Ipare coiye oyecua iva rese ambuae mbahe mboyecua tupriisa: mbahe ipi pĩra vahe, ahe ñaca siete tupri, sãchi evocoyase diez iyavei vireco yeguaca oāca yacatu. ⁴ Suguai evocoyase ombotiriri yasitata iva pendar imombosapisa sui ñepi iyahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembrí oha ramoseve” ehi viña. ⁵ Ipare co cuña membrí oha cuimbahemi, ahe mborerecuar virecora mbococa guarepochi apopri, ipĩrata catu vahe secoira opacatu ava ivi rupindar upe. Ichui serocuasa voi serasosa Tūpa rovai. ⁶ Cuña evocoyase oñemi ivi iporupirēhisavé oso. Aheve omoingatu Tūpa iyemboerecuā āgua, eipeve icaru āgua mil doscientos sesenta ari rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava āgua mbahe ipi oporomocañi vahe upe ivoya upe avei yuvireco. ⁸ Ndoicatui eté rumo Miguel recopi āgua yuvireco. Sese ndipoi eté ivave seco āgua yuvireco chupe. ⁹ Ēgüe ehi imboyepepisa mbahe ipi oporomocañi vahe reco pīratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

¹⁰ Evocoiyase asendu ñehesa ipīrata vahe ivave, aipo ehi vahe: “Cūritei oime poropīsīrosa, pīratasa iyavei yande Tūpa mborerecuasa, Poropīsīrosar mborerecuasa avei no. Esepia niha, imboyepepisa iva sui acoi oseca-seca vahe yande rivri Tūpa reroyasareta recocuer momara āgua pītu, ari yacatu rupi yande Ru Tūpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tupri pipe sui avei no.

Esepia niha, ndosiquiyei eté güetecuer mocañi āgua yuvireco.

Ahe rumo oyemoingatu voi eté omano āgua.

¹² ¡Peyembovīha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi pēu oñemoīrosa pipe, oicuase güeco pucuēhi āgua” ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuña imembri cuimbahemi reseve yamotarēhisa pipe. ¹⁴ Evocoi cuña upe rumo imondosaño ñuvirío vira guasu pepo iveve āgua chupendar ivi imoingatupri ava porēhisave seco āgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. ¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. ¹⁶ Ivi rumo oime co cuña pītivīsa, ahe oyeca. Ipare opa omoco iai evocoi mbahe ipi oporomocañi vahe rembiapo.

¹⁷ Evocoiyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroya vahe ité Tūpa porocuita yuvireco iyavei yuvirecoi tupri vahe Jesucristo remimombehu rupi. ¹⁸ Ipare mbahe ipi oporomocañi vahe opita para guasu popive ohã.

13

Ñuvirío mbahe ipi vai

¹ Ipare asepia para guasu pipe sui osēse mbahe ipi vai, ahe siete tupri ñaca vahe iyavei diez tupri sāchi. Guāchi yacatu evocoiyase vireco ñepeipei oyeguaca, iyavei oāca yacatu rese vireco terer Tūpa upe mbahe tēi vahe. ² Co mbahe ipi vai aviye tupri acoi yaguar iparañ vahe; iyavei ipi aviye tupri oso pi, iyuru evocoiyase aviye yagua pīta yuru. Mbahe ipi oporomocañi vahe evocoiyase omondo opīratasa iyavei omborerecuasa chupe. ³ Ñepeipei mbahe ipi vai āca oyeapicha guasu vahe ndoyavi omano vaherã ité viña; ahe rumo ocuera tupri iriño evocoiyase opacatu guasu ava sepiase, ndoyembovīhai. Ichui vīroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaherã sese” ehi yuvireco.

⁵ Iyavei mbahe ipi vai upe ipotasa iyemboivate ai āgua oñehe pipe ava rovaque iyavei Tūpa reroiro āgua avei no, iyavei mborerecuar guasu seco āgua cuarenta y dos yasi rupi.

⁶ Ēgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca āgua Tūpa upendar

ava eta upe secopi ãgua. Ipare imondosa avei mborerecuar seco ãgua chupe ava ambuae-ae tẽi vahe upe, secua ambuae vahe upe, ambuae-ae tẽi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoẽhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tũpa rese yeroyasa iyavei ipĩratasa ava chupendar rese.

¹¹ Ipare asepia ambuae mbahe ipi vai osẽ vahe ivivri sui. Co vireco ñuvirío guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico.

¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui. ¹³ Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tẽi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave. ¹⁵ Ipare imondosa pĩratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiẽhisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tẽi upe, ahe chupe, “Toyecuachia opo oacato cotindarve yuvireco, anise osivave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Siõn rese imoha. Ahe supi yuvirecoi ciento cuarenta y cuatro mil tupri ava evocoi oicuachia vahe Ovesami rer, Tu rer avei osiva rese yuvireco.

² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ãgüe ehi siapugüer. ³ Ipare osapucaí sapucaisa ipiasu vahe yuvireco Tũpa rovai iyavei iva pendar irungatu yuvirecove vahe rovai, icuapri eta rovai avei no. Ñepe yepe que iva pendar ndoicatu eté evocoi sapucaisa rese oyembohe vahe vahe. ãgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pãhu sui, ahe güeraño tupri ité oicatu osapucaí yuvireco. ⁴ Co ava ndoyapoi vahe ité mbahe co coti tẽi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovẽhepri Tũpa upe, Ovesami upe avei.

⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tũpa rembiguai omombehu iñehe ava upe yuvireco

⁶ Evocoiyase asepia ambuae Tũpa rembiguai iva pendar oveve vahe iva mbiter rupi iyavei vireco Tũpa Ñehengagüer pĩsirosa resendar ndopai vahe imombehu ãgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. ⁷ Ipare oñehe pĩrata aipo ehi: “Pesiquiye Tũpa sui iyavei pesapucaí seco ivatesa rese chupe no. Esepia niha, cũritei

oyepota ari chupe ava recocuer rese iporandu ãgua. Pemboetei catu oyapo vahecuer ìva, ìvi, para guasu, ì ohẽ vahe avei no” ehi.

⁸ Ambuae Tũpa rembiguai ìva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tẽisa resendar pipe!” ehi.

⁹ Ipare ambuae Tũpa rembiguai ìva pendar imombosapisa, saquicue moña aipo ehi pĩratá iri oico: “Acoi que ava omboetei vahe mbahe ìpi vai sereco, sahanga avei no, iyavei acoi oyembohe catu vahe oyecuachía ãgua osiva rese, que opo rese no, ¹⁰ oipisi itera Tũpa ñemoirosa ipĩrata vahe ité; ipare omombaraisura setecuer azufre ocai vahe pipe güembiguai ìva pendareta reco maranehi rovaque, Ovesami rovaque avei no. ¹¹ Tãtachi icaigüer pendar evocoiyase oyeupira ndopai vaherã, ahese ndipoi chietera pituhusa pĩtu, ari pipe evocoi mbahe ìpi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Egüe ehira Tũpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

¹³ Ahese asendu ñehesa ìva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Egüe ehi eté —ehi Espĩritu imombehu—, opituhura oporaviquisa sui yuvireco. Esepia, mbahe sembiapo rerãcua osora ivave supĩ” ehi.

Ivi pipendar recoãhasa

¹⁴ Ahese asepia ìva quiha morochí vahe; iharive ndoyavii ava uguapi vahe oĩ. Vireco niha oyeguaca oro apopri oãca rese iyavei mbahe miti asiasa saimbé vahe vireco opove.

¹⁵ Ipare osẽ ambuae Tũpa rembiguai tũparo sui. Ahe osapucái pĩrata evocoi ìva quiha harive chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ìvi pendar yaviye ité!” ehi ava recocuer uve chupe. ¹⁶ Evocoiyase evocoi chini vahe oyasia güemiti ivive oico, ahese opa omonuha güembiasia.

¹⁷ Ipare osẽ ambuae Tũpa rembiguai tũparo sui, ahe avei vireco mbahe miti asiasa saimbé vahe. ¹⁸ Ipare ambuae Tũpa rembiguai osẽ mbahe reropovẽhepri renda sui, ahe tata rese hañecosar secoi. Iyavei oñehe pĩrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ìvi pipe! ¡Esepia niha, opa yaviye!” ehi. ¹⁹ Evocoiyase co Tũpa rembiguai inungar oyasia vahe uva ha egüe ehi opa ava ipeha ìvi pipendar. Ipare opa oyapocatu Tũpa ñemoirosa rãro ãgua. ²⁰ Ipare inungar uva ha icambepri tecua cupeve, egüe ehi co ava imombaraisu; ichui osẽ tuvĩ evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipa siete tupri Tũpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tũpa rembiguai, siete tupri mbaherasi ipa vahe vireco vahe, ahe ipá vahe ité Tũpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha atĩ mbahe ìpi vai recopisar, sahanga recopisar iyavei nomondo uca potai vahe serer cuachía ãgua yuvireco oyese. Ahe vireco Tũpa upendar arpa yuvireco. ³ Ipare osapucái Tũpa rembiguai Moisés sapucaisa yuvireco, iyavei Ovesami sapucaisa aipo ehi: “Tuvichá opacatu mbahe nde rembiapo, che Yar Tũpa opacatu mbahe mboavaisarẽhi; nde recocuer supĩ tupri vahe ité; seco ìvi vahe.

¡Too, nde mborerecuar guasu opacatu ìvi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tüpa rëta imaranehi vahe. Aheve acoi yapocatusa mborocuita resendar. ⁶ Evocoyase ichui yuvínosepa evocoi siete Tüpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoyase oyeumbicua opochiha rupi tupri yuvireco. ⁷ Ipare ñepei evocoi irungatu iva pendar yuvirecove vahe pâhu pendar omondo siete tupri Tüpa rembiguai upe siete Tüpa ñemoirosa riru oro apopri, ahe oicove vahe ité, ndopai vahe. ⁸ Ipare Tüpa rëta omboapipo tâtachi, evocoi ou vahe Tüpa reco porañetesa iyavei ipĩratasa sui. Aheve ndiyai eté que ava upe seique água acoi opase voi eté omomba siete tupri mbaherasi vai vireco vahecuer siete Tüpa rembiguai.

16

Siete Tüpa ñemoirosa riru

¹ Evocoyase asendu ñehesa ipĩrata vahe osë vahe Tüpa rëta pipe sui. Ahe aipo ehi siete Tüpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tüpa ñemoirosa” ehi.

² Yipindar vahe Tüpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tüpa rembiguai imoñuviriosa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tüpa rembiguai imombosapisa opa oipiyere igua riru pipendar iai pipe, i ohë vahe pipe avei no. Ipare opa ahe oyeapo tuví yuvireco. ⁵ Co pare asendu Tüpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembose nde ñemoirosa, che Yar Tüpa, seco maranehi vahe. Nde yipisuiendar ité ereico.

⁶ Esepia, ahe opa oyuca ndeundar ava iyavei nde ñehe mombehusar yuvireco. Cūritei rumo eremboihu uca tuví pipe.

jEvocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tüpa, opacatu mbahe mboavaisarēhi, nde ava recocuer mombaraísusa supi tupri vahe ité iyavei nde reco ívi vahe ité no” ehi.

⁸ Tüpa rembiguai imoirungatusa, opa oipiyere mbahe riru pipendar ari rese, ipare ari upe imondosa pĩratasa ava rapipa água. ⁹ Ipare opacatu ité ava yuvirocaipa tupri; ndoyeví eté rumo Tüpa upe iyavei nomboeteiño ité yuvireco. Ēgüe ehi rumo iñehe mara-mara tēiño mbaherasi rerecose Tüpa upe yuvireco.

¹⁰ Tüpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi sereciar ipovri pendar avei pĩtumimbisave yuvirecoi. Ava evocoyase oñeapicusuhu-suhu tēi yuvireco mbahe rasícuer pâhuve; ¹¹ ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño Tüpa ivate vahe rese oyeupe mbahe tasi vahe pâhuve yuvireco.

¹² Tüpa rembiguai imoñepei ovasa oipiyere mbahe riru pipendar iai guasu Eufrates pipe. Ahe evocoyase opa ipiru peri apo água añihivei coti sui mborerecuareta yu água.

¹³ Ipare asepia mbahe ipi oporomocañi vahe, mbahe ipi vai, ndahei vahe Tüpa ñehe mombehusar supi vahe avei, ahe yuvirecoi vahe yuru rupi yuvínose mbosapi caruguar

vireque nungar. ¹⁴ Co Carugar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoyase imbosietesa Tūpa rembiguai oipiyere ñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡Opa ité yaposa cute!” ehi. ¹⁸ Ahese oime overa vahe, mbahe siapu guasu vahe iyavei osunu vahe. Ipare ivi orirīi ipīrata catu vahe opacatu ivi rirīi sui ava yuvirecove viteseve ivi pipe. ¹⁹ Tecua guasu oyeca-yeca mbosapi rupi, opacatu tecua evocoyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoirosa ipīrata catu vahe chupe.

²⁰ Opacatu caha pāhu, ivitri avei ocañipa ité yuvireco. ²¹ Iyavei yuviroviapipa iva sui ava harive amanda guasu, ahe iposi güer cuarenta kilos rutei. Ava rumo ñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa pronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepeu ou aipo ehi cheu: “Erio, amboyecuara co cuña yaguasa serai vahe upe ñemoirosa ndeu, ahe evocoi uguapi i harive oī” ehi. ² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepiā cuña mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. ⁴ Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. ⁶ Ipare aicua evocoi cuña osavaipo vahe oī Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté. ⁷ Ahese ahe Tūpa rembiguai iva pendar aipo ehi cheu: “¿Mahera vo nderevīhai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi. ⁸ “Acoi mbahe ipi vai eresepia vahe ahe yipive secoi vahe, cūrītei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovīhai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara una vireco mbahecua senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña uguapi oī iyavei ahe siete ñaca avei omoporēhi ‘siete tupri mborerecuar’ oyapave. ¹⁰ Cinco tupri mborerecuar evocoi ipāhu pendar ndipo iri yuvireco, ñepeño evocoyase oporocuai cūrītei oico, ambuae rumo ndou vitei. Ouse rumo ipandar, ou raimi tēira. ¹¹ Mbahe ipi vai

secoi vahe yipindar, ndoicove iri cūrītei, ahe imbohochosa secoira mborerecuarã, yepe siete tupri vahe mborerecuar guasu mboetasa viña, ahe rumo ocañi tēi vahe rã secocuer” ehi.

¹² “Evocoi diez tupri vahe sãchi, ahe mborerecuar diez tupri ndoyuviroique vītei vahe oporocuai vahe rã yuvireco. Oyoya rumo oporocuai raimi tēira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vahe rã pīratasa iporocuai āgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tēi vahe oguapi oī, ahe ‘ava rehī tecua yacatu rupindar, iñhe ambuae-ae vahe iyavei opacatu ambuae tēi vahe ivi rupindar’ oyapave. ¹⁶ Evocoi eresepia diez tupri vahe sãchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequi tuprira seya; ohupara soho, ipare opara osapi. ¹⁷ Tūpa niha omondo ipiha pipe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboaviye rane ité che remimombe-hugüer yuvireco’ oyapave. ¹⁸ Iyavei evocoi cuña yaguasa-guasa tēi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

18

Babilonia viapi agüer

¹ Ipare asepia ambuae Tūpa rembiguai ipīrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi. ² Iyavei oñehe pīrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vīrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoyaēhi āgua.

Iyavei ñepe yepi taperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vīte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi seci, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi. ¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehirā yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chiera evocoi tecua rese yuvireco. Esepia niha, ndipo iri chiera que virocua vahe rā imbahe yuvireco ichui, ¹² co opacatu mbahe sepi vahe rā ahe: oro, guarepochi, ita iporañete ai vahe, mbohīr sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape sīacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe sīacua vahe; uva ricuer, mbahe quira, trigo cuhi aviyē vahe, trigo avei; iyavei mbahe mīmba ovosi vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehirā.

¹⁵ Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovīhai tēi chira yuvireco no, ¹⁶ iyavei aipo ehi tēira yuvireco:

“¡Too! ¡Iparaisu iteanga tecua guasu pendar!

Inungar tie cuña acoi oyemonde tupri vahecuer seci cuese viña iyavei iturucuar suendi,

pīra vahe; oro pipe oyemboetei vahecuer,

itami iporañete vahe pipe iyavei mbohīr sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbehi ivirindar carite guasu rerogatasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucāi pīrata tēi yuvireco: “¡Ndipoi eté niha yipisui tecua na ehi vahe!” ehi yuvireco. ¹⁹ Ipare imboasipave omondo ivi cuhi oācave yuvireco, oyaseho iyavei ndoyembovīhai tēi, ipare osapucāi tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovīhaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chiera apirēhi vahe rā” ehi.

22 “Ndasendusa iri chietera ocar rupi arpa moñehesar, mimbí moñehesar, iyavei mimbí guasu moñehesar avei no; ndererecoi chietera ava oporaviqui vaherã, ndasendusa iri chiaveira ita mbahe mbocuhisa monarasa nde suindar.

23 Iyavei ñepeí yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pĩrata etepri vahe opacatu rupi ereico viña.

Iyavei erembopa-mbopa tẽi opacatú ambuae tecua rupindar eico nde payesa pipe” ehi Tũpa rembiguai chupe.

24 Esepia niha, evocoi tecua guasu pipe oyecua Tũpa ñehe mombehusar ruvi, Tũpa upendar ava ruvi, iyavei opacatu ava yucapri vahe ivi pipendar ruvi avei.

19

1 Co pare, asendu ava rehii ñehe pĩrata ivave aipo ehi vahe:

“¡Imboeteipri yande Yar tasecoi!

Poropĩsirosa, teco porañetesa iyavei ipĩratasa ahe yande Ru Tũpa suindar.

2 Esepia niha, ahe oyapo mbahe supi eté vahe,

‘Tocañi’ ehise co cuña oyemboaguasa-guasa tẽi vahe nungar tecua guasu upe evocoi niha oseco momara tẽi vahe ava ivi pipendar güeco rai pipe; ichui Tũpa osepi oyeupendar” ehi.

3 Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rãtachi ndopai chietera” ehi.

4 Evocoiyase veinticuatro tupri iva pendar icuapri yuvirecoi vahe iyavei irungatu iva pendar yuvirecove vahe, ahe Tũpa mboeteisa pipe oyeavi ivi rese yuvireco. Ipare aipo ehi yuvireco no: “¡Ëgüe tehi! ¡Imboeteipri yande Yar tasecoi!” ehi. 5 Evocoiyase Tũpa renda sui tupri oyeendu ñehesa aipo ehi vahe:

“¡Pemboetei yande Ru Tũpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya ãgua!” ehi.

Pieta mendasa Ovesami resendar

6 Asendu avei ava rehii ñehe, inungar acoi itu guasu riapu, ndoyavi avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tũpa opacatú mbahe mboavaisarẽhi omboipi oporocuai.

7 Tayayemboviha catu yaico iyavei tayamondo yande viharetesa, yande sapucaisa yande Ru Tũpa upe.

Esepia niha, cũritei oyepota mendasa ari Ovesami upendar.

Sembireco evocoiyase opa oyemoingatu oico:

8 chupe ipotasa iyemonde ãgua turucuar secose vahe, ndiquihai, sendi vahe pipe.

Esepia niha, co turucuar secose vahe ‘Tũpa rese yuvirecoi vahe recocuer ihivi vahe’ oyapave aipo ehi” ehi.

9 Evocoiyase Tũpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tũpa ñehesa supi tupri vahe ité” ehi.

10 Ipare añenopiha Tũpa rembiguai rovai imboetei ãgua. Ahe rumo aipo ehiño cheu: “Ëgüe erei rene. Esepia, che Tũpa rembiguai tẽi aico nde nungar iyavei nde rivireta nungar oguata vahe Jesús ñehengagüer rupi. Emboetei Tũpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tũpa ñehe mombehusar upe.

Cavayu morochi vahe reroguatasar

¹¹ Evocoyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñvisa pipe oporocuai iyavei oyapo vavasa. ¹² Sesa evocoyase ndayaviyei eté acoi tata rendigüer; iyavei oãca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoyase imopirapri tuvi pipe; serer evocoyase, “Tüpa Ñehe” ehi. ¹⁴ Sundao rehii iva pendar saquicuerive yuvirecoi. Iturucuar secose vahe pãve morochí vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osē quise pucu saimbe vahe opacatu ambuae-ae tecua rupindar momara ãgua. Ahe oyocuaira oamotarēhisar guarepochi apopri opo pendar pipe. Iyavei osecoãhara inungar uva opive otiamii vahe yuvireco iyavei ombohura evocoi uva ricuer paraisu catusa resendar pipe. Ahese Tüpa mbahemboavaisarēhi oñemoiro itera chupe. ¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tüpa rembiguai opüha vahe arisave. Ahe osapucái pĩrata opacatu vĩrai mbahe rohoguar upe oveve vahe iva rese: “¡Perio! ¡Peñemonuha Tüpa suindar carusa guasusave; ¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava ãgua evocoi cavayu hari pendar rese iyavei isundao rese avei no. ²⁰ Co mbahe ipi vai yipindar vahe soquendasa, oyoya evocoi Tüpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoyase co mbahe ipi vai iyavei Tüpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco. ²¹ Ambuae evocoyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoyase opacatu vĩrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tüpa rembiguai ogüeyi vahe ou iva sui ivicuar guasu ipicucu vahe mboy-asar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi. ³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi ãgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava uguapi yuvinoi evocoi oipisi vahe omborerecuasa yuvireco ava upe mbahe rese porandu ãgua. Iyavei asepia ava hã evocoi opa v-hecuer oyasia ñaca yuvireco Jesús recocuer mombehusa sui tēi iyavei Tüpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tüpa upendar ité yuvirecoi! Imoñuviriosa manosa evocoyase chupe ndipo iri eté. Ëgüe ehira rumo ahe Tüpa upe

naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Caruguar recopisa

⁷ Acoi osupitise rumo mil araviter cute, ahese Caruguar yorasara soquendasa sui.

⁸ Ichui osëra opacatú ava ivi pipendar mbopa-mbopa tēi oico; osëra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehi etepri yuvireco inungar ivi cuhi para guasu popi rupindar.

⁹ Ēgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. ¹⁰ Caruguar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaisura pĩtu, ari yuvireco apirēhi vaherã.

Tūpa oguapira güendave ava recocuer rese porandu āgua ari ipa vahe pipe

¹¹ Evocoyase asepia tenda imboeteipri, morochi vahe. Iharive oime ava oguapi vahe oĩ. Sovai ivi iyavei iva opa ocañi tupri tēi. Ndoyecua iri eté co coti rupi yuvireco.

¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese. ¹³ Omano vahecuer opa yuvinohe para guasu pipe sui, iyavei tehögüer recosa sui opa yuvinohe; ichui opacatú mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda āgua oyemboetei tupri omevi upe. ³ Ipare asendu ñehesa pĩrata tenda suindar aipo ehi vahe: “Tūpa cūrítei oicove ava rehii pāhu rupi oico. Ahe oicove vaherã ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe. ⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pĩrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoyase ou ñepeí siete Tũpa rembiguai pãhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rembirecovi” ehi. ¹⁰ Evocoi che quer nungar pipe Espiritu osepiá uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tũpa sui. ¹¹ Ahe tecua sendí iteanga Tũpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipirerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-peí Tũpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu ñachisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tũpa rembiguai oñehe vahe cheu vireco vara oro apopri tecua rãha ñgua, opacatu soquendipi rãha ñgua, ñachisa rãha ñgua avei no. ¹⁶ Tecua guasu pucucuer oyoya tupri ipigüer rese. Evocoyase Tũpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no. ¹⁷ Ipare osãha ñachisa: osãhase ipigüer sesenta y cinco metro tupri. Evocoi Tũpa rembiguai osãha ava rembiporu pipe.

¹⁸ Tecua ñachisa ahe ita porañete vahe Jaspe serer vahe apopri; tecua evocoyase oro pãve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tẽi iporañete vahe pãve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imbopoyandeposa ónice; imoñepeí ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista. ²¹ Doce tupri vahe oquenda guasu ahe doce tupri mbohír; ñepeí-peí oquenda ñepeí mbohír sui yapopri. Calle guasu tecua aviter rupindar evocoyase oro pãve, inungar vidrio yande porẽhi tupri vahe ipipe.

²² Ndasepiái eté evocoi tecua guasu pipe ñepeí yepe tũparo. Esepia niha, yande Yar Tũpa mbahe mboavaisarẽhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi güesape ñgua. Esepia niha, Tũpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pĩtu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tũpa remimbotarẽhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tũpa rembiguai omboyecua íai tecovesa resendar cheu, tĩpiu, oyecua tupri, osẽ vahe Tũpa iyavei Ovesami renda porañete vahe sui. ² Calle guasu mbiter rupi oso. Iyavei íai íque yacatú oime ivira tecovesa resendar, íha vahe doce yupagüer rupi ñepeí araviter pipe. Iyavei evocoi ivira ro aviye ai ava opacatu rupindar mbogüera ñgua. ³ Ndipoi chietera aheve que mbahe tẽivri pendar. Tũpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. ⁴ Osepiara sova iyavei virecora serer osiva rese yuvireco. ⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiaveira que

ari güesape ãgua yuvireco. Esepia niha, yande Yar Tũpa teieté osesapera. Ipare ahe ava mborerecuar apirẽhi vaherã ité yuvirecoira sese.

Cõimi eté Jesucristo yevi ãgua

⁶ Ipare Tũpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tũpa acoi omboyecua tupri vahe mbahe oyesuindar oñehe mombehusar upe, ahe ombou güembiguai iva pendar mbahe omboaviye poyava voi vaherã mboyecua ãgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tũpa suindar mbahe oime vaherã resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tũpa rembiguai rovai imboetei ãgua viña. ⁹ Ahe rumo aipo ehiño cheu: “Aní ereñenopiha che rovai. Esepia niha, che Tũpa rembiguai tẽi aico, nde nungar, nde rivireta nungar avei evocoi oñehe vahe Tũpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tũpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tũpa suindar mbahe oime vaherã resendar sereco, evocoi icuachiapri cuachiar pipe. Esepia niha, ari cõimi secoi imboaviye ãgua. ¹¹ Acoi ava mbahe tẽi aposar, toyapoño mbahe tẽi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tũpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepeipei-pei ava rembiapogüer rupi-rupi amondo vaherã chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirẽhi vaherã” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirẽhi vahe resendar. Ipipe sui oiquera tecua guasu pipe. ¹⁵ Ava rehii ndiporeroyai vahe rumo opitapara ocarve tẽi yuvireco, iyavei ava ipaye serai vahe, oyemboaguasa-guasa tẽi vahe, oporoyuca vahe, mbahe rahanga upe tẽi oyerogui vahe, iyavei opacatu ava oipota rai vahe oporombopa-mbopa tẽi ãgua yepi” ehi.

¹⁶ “Che, Jesús, amondo che rembiguai iva pendar mbahe mombehu ãgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepi vahe yuvireco.

¹⁸ Opacatu acoi ava osendu vahe co ñehesa Tũpa suindar mbahe oime vaherã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tũpa omboyeapi aveira co cuachiar pipendar mbahe-mbahe tẽi imombehupri. ¹⁹ Amove que ava virocua vahe co cuachiar pipe sui ñehesa Tũpa suindar, Tũpa avei evocoiyase ndoipotai chira chupe co cuachiar pipe imombehupri ivira ha tecovesa resendar rereco ãgua iyavei co tecua maranehi pipe seique ãgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ëgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.